


清代傳記叢刊・綜錄類②
周駿富輯

清史列傳

(八)

卷五七至
卷六四

清國史館原編



明文書局印行

清史列傳 卷五十七

新辦大臣傳一

李鴻章

李鴻章安徽合肥人父文安刑部郎中鴻章道光二十七年進士改翰林院庶吉士三十年散館授編修咸豐二年大考二等賞文綺時髮逆竄陷楚省江皖震動三年正月命隨侍郎呂賢基回籍練鄉勇五月禦賊和州之裕溪口獎六品頂戴藍翎四年克含山加知府銜賞換花翎五年五月丁父憂仍留營十月克廬州奉旨交軍機處記名以道府用六年克無爲州賞加按察使銜七年論疊次剿匪功奉旨交軍機處記名遇有道員缺出請旨簡放八年侍郎曾國藩駐師江西留襄營務九年五月曾國藩檄同候選知府曾國荃赴景德鎮助剿立復景德鎮及浮梁縣城十月授福建延建邵遺缺道未赴任十年署兩江總督曾國藩議設淮揚水師令鴻章統之十一年復奏遵籌鎮江援剿之師以鴻章應並密陳才可大用鴻章乃歸募勇皖省爲髮捻蹂躪殆徧惟合肥恃民團苦戰得獨全鴻章所募者

舊團強半選擇將領釐定營制餉章悉法湘軍是爲淮軍之始同治元年二月賊陷松江太倉諸州郡直壓上海戶部主事錢鼎銘等詣曾國藩軍次乞援且集銀十八萬兩租輪舶六泝江迎師議者亦謂上海爲籌餉膏腴之地不宜輕棄而鴻章一軍節爲賊阻不得達鎮江曾國藩乃奏飭鴻章移師上海三月超署江蘇巡撫初蘇松太道吳煦權江海關稅時以重資啗英法諸酋借其兵力爲助又令美國人華爾募洋兵數千益以中國應募者名常勝軍嘗合松滬官軍英法兵攻克松江嘉定青浦鴻章至悉隸焉四月常勝軍英法兵會民團復奉賢方議趨金山衛適松滬官軍覆於太倉鴻章撤英法全軍回援嘉定賊攻急英法兵突圍入挾各官暨留防兵遁歸上海自是不復遣兵助剿嘉定奉賢再陷賊勢專注青浦松江五月青浦守將華爾棄城走保松江賊方厚集於泗涇距上海遠中多港汊謂官軍不能猝進增壘爲久踞計於是鴻章駐營新橋飭總兵程學啟滕嗣武韓正國領隊先進而自督師繼之賊數萬犯新橋鴻章檄參將郭松林等回援縱橫合擊乘勝復攻泗涇解松江圍上以鎮江爲南北要衝疊促鴻章赴鎮如前議鴻章密言洋兵不可久恃滬防必須自強賊謀以大股掣江寧之圍臣亦急思馳往鎮

江就近援應無如陸軍僅有數千分兩處則均不得力專一路則尙可自立軍事以得人心爲本臣軍到滬後稍繫士民之望未便輕動失衆心容臣將滬事就緒再議出江疏入命緩行鴻章議先復浦東廳縣飭所部進南匯之周浦鎮克南匯賊自金山衛川沙廳大舉來犯復破之遂復川沙奉賢六月克金山浦東大定七月諸軍會拔青浦僞慕王譚紹洸自蘇州糾衆十數萬謀救青浦不得逞撲北新涇防營分擾法華鎮以西且及上海鴻章飛調青浦各軍以半留守半趨泗涇七寶繞出賊後親督上海軍當其前軍次虹橋賊憑河據壘左右伏以待鴻章策騎旁馳疾過之與援軍遇於北新涇前後夾擊賊敗走嘉定九月進攻嘉定克之譚紹洸乃糾蘇杭賊大股來犯由崑山太倉北竄連營於四江口三江口大河支港俱設浮橋將內竄鴻章檄所部齊集黃渡三路並進自晨至暮身自督戰諸軍踰濠入斃黃衣酋日數人賊大奔水師循趙屯港截擊復大潰追至三江口殲焉於是松滬解嚴捷入授江蘇巡撫先是華爾援浙戰歿慈谿代以其副白齊文十一月奉調赴江寧漸懷異志閉松江城索餉鴻章與英提督議約十六條黜白齊文捕治之易以英將戈登裁定三千人減其冗費束以紀律常勝軍始復爲用常熟

守賊駱國忠董正勤舉城降福山諸海口皆下僞忠王李秀成悉衆圍常熟江陰援賊復竄陷福山鴻章飭水師護常勝軍出海攻福山不克而還二年正月兼署五口通商大臣奏設外國語言文字學館是爲鴻章創興洋務之始常熟圍急鴻章遣諜密諭駱國忠等固守檄道員潘鼎新提督劉銘傳以三千人乘輪舟趨福山二月奪福山石城常熟軍知援至亦啟城出擊俘斬略盡圍乃解三月復太倉州城四月復崑山江蘇爲財賦之區而賦額之重爲天下最蘇松太之浮糧尤爲蘇省最弊由沿襲前代官田租額乾隆中年以後辦全漕者數十年自道光三年十三年兩遇大水後無歲不荒無縣不緩蠲減曠典遂爲年例又有官墊民欠一款大抵移雜墊正移緩墊急移新墊舊移銀墊米以官中之錢完官中之糧其後或豁免或攤賠同歸無著鴻章歷陳積弊請准減定蘇松太糧額以咸豐中較多之七年爲準折中定數每年起運交倉漕白正耗米一百萬石以下九十萬石以上著爲定額下所司議行五月又奏密察賊情地勢有可慮者三可幸者三蘇常杭嘉爲東南財賦最盛之區逆衆必死守力爭一可慮蘇嘉各郡湖河蕩港千百通聯我難進而賊易守二可慮李秀成爲諸賊冠多狡謀去年迄今圖救江寧分

竄皖江南北又欲繞竄揚州裏下河若攻剿過急則或挈衆來援或別圖竄踞三可慮惟是江皖浙東各有重兵堵截提督鮑超等能再速克江浦浦口扼斷北賊過江之路都興阿吳棠果能力堵淮揚不使賊竄入裏下河則剿辦較易可幸者一李秀成李世賢分踞蘇浙自見挫官軍精銳大減膏腴亦去其半現惟嘉興陳炳文部賊較多而悍有蔣益澧扼其前臣軍綴其後常州無錫賊援甚廣深入頗難但使穩紮穩進徐圖制敵可幸者二臣軍爲數已逾四萬今擬由崑山進蘇州爲一路以程學啟所部陸軍當之由常熟進江陰無錫爲一路以李鶴章劉銘傳所部陸軍當之由泖澱進吳江平望太湖爲一路則李朝斌水師當之皆欲規取遠勢以翦蘇州枝葉而後圖其本根也又恐杭嘉湖各賊繞竄浦東窺撲松滬復令常鎮道潘鼎新八營扼金山衛編修劉秉璋七營扼洙涇副將楊鼎勳五營扼張堰聯爲一氣以防內竄以固全局報聞六月飭程學啟戈登進吳江連破各隘賊以城降七月允兩江總督曾國藩奏毋庸改設南洋通商大臣仍命鴻章兼理於是鴻章分飭程學啟戈登規蘇州李鶴章劉銘傳規江陰潘鼎新劉秉璋規嘉善以牽制賊勢而李秀成由蘇州糾集僞納王郅雲官等水陸十萬偪大橋角營

李鴻章馳軍四擊賊稍卻九月李秀成復由蘇州無錫溧陽宜興聚衆八九萬泊運河口自將悍賊踞金匱之后宅諸賊從望亭后宅屯營互進李鴻章亦立八營於大橋角與之持鴻章以巨賊麕集西路志在保無錫援蘇州乃檄李鶴章劉銘傳堅守後路抽銳卒翻營猛擊程學啟戈登由蘇州西北橫出賊後攻克蠡城黃埭周盛波亦擊走芙蓉山賊克雁臺塘頭郭松林又敗賊於安鎮興隆橋李秀成移居麻塘李鶴章劉銘傳合擊大破之於是蘇錫之賊皆大困賊陷江南以江寧蘇杭爲三大窟而蘇其脊膂故李秀成百計援蘇州譚紹洸尤凶狡誓死守附城築長城石壘堅不可拔程學啟等頓軍河東累月不下十月鴻章泚蘇視師益趣攻程學啟緣南岸戈登緣北岸鴻章親督驍健出炸礮二十餘毀其長城石壘邵雲官等密款乞降鴻章令斬李秀成譚紹洸以獻李秀成夜遁邵雲官等刺殺譚紹洸開齊門迎師時降酋列名者邵雲官伍貴文汪安均周文佳范啟發張大洲汪懷武汪有爲八人其精銳猶逾十萬分屯閭胥盤齊四門歃血誓生死程學啟恐難制白鴻章誅之搜斬悍黨二千餘賞加太子少保銜並賞穿黃馬褂十一月李鴻章等軍克無錫飭程學啟李朝斌水陸由吳江之平望會師嘉善守賊陳占

榜降嘉善既定遂偪嘉興賊守禦甚備久乃克之三年正月戈登請以常勝軍攻宜興鴻章令郭松林等水陸各軍合剿克宜興並克溧陽敗金壇僞劉王僞襄王之衆平其附城諸壘賊勢大蹙時僞護王陳坤書踞常州方合丹陽句容諸賊十數萬繞出常州城北擣官軍之背以無隙可乘復圖竄入腹地以緩常州嘉興之圍循江而東奄至江陰之南牘及周莊華墅楊舍犯常熟所過焚殺鴻章飛檄郭松林等棄金壇勿取疾馳歸援令楊鼎勳張樹聲選三千人橫截江陰之焦店而飭其弟李昭慶由嘉興赴援常熟賊併集無錫江陰常熟間圍常熟尤亟黃翼升督水師自白茅口進與李昭慶鄭國魁合擊賊大敗又擊走顧山陸市之賊追過福山常熟圍解賊退屯江陰之楊舍周莊華墅沙山圖西竄三月鴻章馳赴江陰長涇察賊勢檄提督劉士奇總兵王永勝會郭松林軍由福山荒苑江岸進自率李鶴章李昭慶黃翼升鄭國魁水陸軍馳抵沙山連破賊營追越華墅分兵邀擊楊舍賊惶遽夜竄雲亭劉士奇王永勝設伏雞籠山敗之別賊萬餘夜於三河口設浮橋雲亭賊至欲渡而西官軍蹙之賊爭道橋斷尸積水不流鴻章乃至常州督軍常州西北通丹陽西南通金壇鎮江防軍已克丹陽提督鮑超克金壇外援

盡絕陳坤書猶率悍黨死拒鴻章令戈登礮隊攻南門劉銘傳攻北門劉士奇王永勝攻東南隅時久雨忽霽煙燄反撲城傾數十丈鴻章揮軍登城諸軍接刃直前陳坤書猶揮賊數千巷戰盡斬之擒陳坤書四月復常州城賞騎都尉世職常勝軍多失律及攻常州又畏懦不先登戈登慙思歸國乃撤常勝軍鴻章疏言戈登屢立戰功請優獎以示榮寵詔如所請行六月江寧平錫封一等伯爵並賞戴雙眼花翎尋賜伯號曰肅毅僞堵王黃文金擁衆十萬踞湖州集悍賊於晟舍鴻章以蘇湖接壤防其竄越令潘鼎新以水陸軍拔長興進擊晟舍毀其壘卡七月會浙軍襲湖州劉銘傳亦克廣德州追斃逆首黃文金江浙肅清四年正月飭郭松林楊鼎勳率軍航海赴閩從閩浙總督左宗棠軍疊克漳州漳浦等城四月科爾沁親王僧格林沁戰歿曹州曾國藩爲欽差大臣督其軍鴻章暫署兩江總督五月奏遣潘鼎新一軍由海道赴天津屏衛畿輔九月諭鴻章統率所部各軍赴豫西防剿兼顧山陝鴻章歷陳兵勢不能遠分餉源不能專恃軍火不能接濟遂寢前議五年七月河漫高郵汎掣卸清水潭壩命會同漕運總督吳棠勘修工成予優敘九月命鴻章馳往徐州妥籌淮徐以東各路防務十月曾國藩因病乞假

鴻章署欽差大臣節制各軍專辦剿匪事擒匪時分股爲二張總愚竄陝西爲西
擒任柱賴汝洸竄山東爲東擒鴻章甫視事東擒卽南趨金鄉魚臺豐沛諸縣謀
犯清淮旣挫於官軍反走山東越河南竄湖北鴻章飭劉銘傳劉秉璋周盛波張
樹珊等躡剿入鄂敗之六年正月授湖廣總督二月賊由湖北竄擾河南直趨山
東五月渡運河濟南戒嚴淮豫東皖各軍雖屢勝而賊瞬息千里不能制鴻章以
督辦軍務日久疲師奉旨戴罪立功迅赴山東會剿始曾國藩督師時議於運河
東岸沿隄築牆杜賊竄越鴻章守其策而注重運西飭豫軍提督宋慶張曜兩軍
分守山東東平以上自靳口至黃河沈家口周盛波分守開河至靳口劉秉璋分
守濟寧至開河楊鼎勳分守趙村石佛至南陽湖李昭慶分守灘上黃林莊至韓
莊八牖皖軍黃秉鈞等分守宿遷運河上下游聲息相通互爲策應使賊不得出
運六月抵濟寧賊又由濰縣趨竄登萊鴻章謂賊蹤飄忽當偪入海隅以圖聚殲
乃創膠萊河防之策令劉銘傳潘鼎新於膠萊河南北二百八十餘里築長牆會
合豫軍東軍分汛設守奏言衡量利害之輕重與其馳逐終年流毒江皖東豫楚
各省不如棄一隅以誘之與其往復運東濟泰兗沂青及蘇之淮徐海各地均受

其害不如專棄登萊以扼之膠萊河之防不密則登萊無可扼運河之守不密則膠萊仍不足恃賊已進窺膠東擬俟運隄與膠萊河防次第布置卽當抽兵進剿庶滅一賊少一賊賊智自困而兵力不疲矣時任賴諸賊麕集萊陽卽墨間恐膠萊河防斷其竄路伺隙反撲隄牆數敗七月賊果潛由海神廟撲渡濰河東軍不及禦膠萊防潰下部議處鴻章亟飭淮豫各軍嚴扼運防而令劉銘傳郭松林楊鼎勳三軍往來躡擊十月追至贛榆降酋潘貴升槍斃任柱於陣賴汝洸竄山東十一月劉銘傳等追敗之諸城濰縣膠州賊窮蹙遁入海濱洋河瀾河之交官軍圍擊賴汝洸率騎數百走而南十二月復糾集千餘騎突至流陽衝渡六塘河竄揚州道員吳毓蘭駐守運河擊擒之餘匪悉降東捻平賞加一騎都尉世職七年正月西捻張總愚由山西吉州踰冰北竄疊諭鴻章迅飭劉銘傳各軍入援未至賊已分竄直隸東北平鄉雞澤南和諸縣下部嚴議兼命鴻章親督所部自臨清德州剋日入直相機剿辦又以賊蹤闌入衡水定州奉旨拔去雙眼花翎褫黃馬褂革騎都尉世職鴻章奏言辦流寇以堅壁清野爲上策嘉慶間川楚教匪賴此成功卽東捻流竄豫東淮北所至民築圩寨深溝高壘以禦之賊往往不得一飽

故其畏圩寨甚於畏兵河北平原千里無險可守民又不知築寨自保張總愚本極狡猾遂得肆意蹂躪無處不流且自渡黃入晉沿途擄獲羸馬甚衆步賊多改爲騎趨避旣捷肆擾尤易自古治賊必以彼此強弱饑飽爲定衡賊未必強於官軍但彼騎多而我騎少自有不相及之勢彼可隨地擄糧我須隨地購糧賊常飽而我常飢又有不能及之理今欲絕賊糧斷賊騎惟有勸諭直隸山西河北紳民堅築圩寨如果十里一寨賊至無所掠食兵至轉得買食賊雖流而其技漸窮二月鴻章督軍進德州敗賊安平饒陽三月賊竄晉州渡漳沱河南入豫折竄直隸撲山東東昌四月趨在平德平由德州西奔吳橋東光偪天津下部議處命總統北路軍務限一月殄滅鴻章以捻騎久成流寇非就地圈圍終不足制賊之命是時三口通商大臣崇厚及左宗棠皆以爲言而直隸地平曠無可圈圍欲就東海南河形勢必須先扼西北連河尤以東北至津沽西南至東昌張秋爲鎖鑰乃飭援津之郭松林潘鼎新兩軍掘開滄州池南捷地壩洩運水入減河於河東築長牆斷賊竄津之路東昌運防則淮軍自城南守至張秋東皖諸軍自城北守至臨清並集民團協守賊自鹽山南竄撲東昌運河無可乘復散走閏四月以剿賊逾

限予嚴議時賊爲官軍所偪奔突不常北謀越滅河南謀越運河以北路軍勢重銳意南行迴翔陵縣臨邑間旁擾在平德平犯臨清運防鴻章慮久晴河涸民團不可恃且晝夜追奔波士卒欲乘黃河伏汎縮地圈紮以運河爲外圈恩縣夏津高唐之馬頰河截長補短爲裏圈號召民團卽馬頰河南聯牆築卡第餘臨邑南至濟陽濱河百里冀就西南一隅以制賊其時官軍大敗賊於德州揚丁莊又追敗之商河張總愚率悍黨遁濟陽沿河北出德州犯運防上竄鹽山滄州皆爲官軍扼截乃轉向博平清平適黃運暨徒駭交漲東昌臨清張秋插河水深不可越馬頰河亦經黃水漫入河西北岸長牆縣互賊竄地迫狹勢益困鴻章增調劉銘傳軍期會前敵分屯在平之桃橋南鎮至博平東昌圈賊徒駭黃運之內而令馬隊於中兜逐賊無一生者張總愚投水死西捻平賞還雙眼花翎黃馬褂騎都尉世職開復疊次剿捻不力各降革處分七月賞加太子太保銜以湖廣總督協辦大學士八月入覲賜紫禁城內騎馬十一月乞歸省予假一月八年二月兼署湖北巡撫八月命馳赴四川查辦總督吳棠參款覆陳所劾不實惟道員鍾峻彭汝琮降革有差十二月命赴貴州督辦剿苗軍務川楚各軍統歸節制九年二月廿

肅逆回糾合土匪四擾陝西兵力薄總督左宗棠駐軍平涼不克兼顧命鴻章暫緩入黔先赴陝西督辦軍務七月剿平北山土匪值天津民人因匪徒迷拐幼孩牽涉教堂毆斃法國領事官法國使臣羅淑亞索犯急且以兵艦集津沽爲恫喝計廷議促鴻章移師天津密籌防衛八月調直隸總督諭偕前任總督曾國藩速定讞尋奏上羅淑亞亦無異辭十月撤三口通商大臣以總督兼任改爲北洋通商事務大臣十年日本初請通商授全權大臣與定約十二年正月偕兩江總督曾國藩奏選幼童赴美國肄業又遴游擊卞長勝等赴德國學習軍械技藝五月授大學士仍留總督任六月授武英殿大學士閏六月河道總督喬松年山東巡撫丁寶楨籌治黃運兩河以通漕下鴻章議鴻章覆陳准徐故道勢難輓復借黃濟運與借衛濟運及堵合霍橋決口築隄束水諸策流弊亦多河在東雖不亟治而後患稍輕河回南卽能大治而後患甚重近世治河兼言利運遂致兩難卒無善法不知黃水旣不能入運斷難一治而兩全爲今之計似不得不出於河自河漕自漕治河之策不外古人因水所在增立隄防一語應令河東總督山東巡撫察度形勢量築隄埝俾資周防而期順軌議漕政者皆不以規復河運爲望然自

道光六年卽創辦海運咸豐以後無年不由海運無年不由采買今日海道暢行輪船駢集轉輸旣捷費用大省而蘇浙漕糧現旣統行海運江廣等省本改漕折宜由各督撫酌提本色若干石運滬解津不然指撥漕折由南省采買運津或由天津招商采辦亦可若慮緩急之間京儲匱乏應於無事時多籌采運使數年中得有一年之蓄則內顧可以無虞上嘉其所奏詳盡下部議行兼諭喬松年丁寶楨勘築隄埝以資捍禦十二月以明年恭逢慈禧端佑康頤皇太后四旬萬壽及上親政後初屆元日令辰下部優敘十三年三月授全權大臣與祕魯國議招工事因定和約專條十月慈禧端佑康頤皇太后四旬萬壽加恩中外大臣有老親年八十以上者鴻章母未及八十特賞御書扁額玉如意大卷江紬八絲緞袍褂料十二月調文華殿大學士光緒元年日本與臺灣生番爭船政大臣沈葆楨治臺事鴻章飭提督唐定奎率淮軍渡海助剿撫總理各國事務王大臣奏籌善後海防六策命詳議以聞鴻章覆奏如原議略謂所陳練兵簡器造船籌餉用人持久六條均救時要務所未易猝辦者人才之難得經費之難籌畛域之難化故習之難除今日所急惟在力破成見以求實際而已舍變法與用人別無下手之方

伏願皇上顧念時勢艱危節省冗費講求軍實造就人才皆不必拘執常例而尤以人才爲急要使天下有志之士無不明於洋務庶練兵各事可期逐漸精強積誠致行尤需歲月遲久乃能有濟目前固宜力保利局卽將來器精防固亦不宜自我開釁二年英國使臣威妥瑪因雲南戕殺傳教士馬加里要求不遂下旗將歸國鴻章以全權大臣赴煙臺邀威妥瑪商辦威妥瑪堅求嚴辦適俄德法美日奧六國公使及兵艦齊集煙臺鴻章故示整暇往來談讌並召諸使水師將領大會樂飲六國協力阻英之請乃與威妥瑪定優待往來通商事宜復尋舊盟三年議覆穆宗毅皇帝孝哲毅皇后升祔位次奏言禮親王等請仿照奉先殿成案增修龕座爲折中之論惟太廟規制有定國家統緒無窮醕親王請明降諭旨曉示天下自今以往親盡則祧並請以後殿東西二梢間永藏祧主此則導皇上以大讓酌廟制以從宜禮貴因時讓爲美德非天子不議禮應否允行應秉聖裁詔並如議八月晉豫亢旱鴻章籌巨款賑濟時直隸亦患水永定河居五大河之一累年漫決害尤甚鴻章修復金門橋及南上北三灰壩盧溝橋以下二百餘里改河築隄緩其溜勢別濬大清河漳沱河北運河減河以資宣洩自是水患少紓五年

恭題穆宗毅皇帝孝哲毅皇后神主賞加太子太傅銜六年七月始創海軍訂造鐵甲諸船於外洋以管駕需才奏立北洋水師學堂電報之設也鴻章初行於大沽北塘海口礮臺以通天津傳達號令八月遂設南北洋電線自天津循運河逾江抵鎮江而達上海亘三千里未幾各國請於上海建萬國電報公司暨南北洋海線於是接辦沿海陸線過浙閩至粵道里以倍後十餘年間電線徧達各省巴西通商以全權大臣定約十二月福建巡撫劉銘傳疏請開行鐵路鴻章議有九便事下所司七年六月因慈禧端佑康頤昭豫莊誠皇太后前歲春聖體違和特諭各直省延訪良醫鴻章疏薦道員薛福辰至是大安予優敘九月恭題孝貞顯皇后神主賞穿帶膝貂褂鴻章於江寧上海有機器製造局之設於上海有輪船招商局之設天津舊有機器局集資拓充並開採磁州煤鐵礦開平煤井又設上海紡織局近築津榆鐵路遠開漠河金礦以濬中國之利源杜外人之侵占先後得旨允行八年三月母病予假一月赴鄂省視賞人瀆旋丁母憂賜祭一壇回籍時著地方官妥爲照料諭俟百日後以大學士署理直隸總督鴻章累疏固辭始允開缺仍駐天津督練各軍並署通商大臣六月朝鮮內亂鴻章時在籍詔赴天

津署總督張樹聲先飭提督吳長慶率淮軍援朝鮮定其亂鴻章因爲朝鮮酌定善後之策九年正月奏請回籍營葬予假兩月假滿卽回署任六月命署理直隸總督兼通商大臣累疏乞終制不允十年八月服闋授大學士直隸總督兼通商大臣十月慈禧端佑康頤昭豫莊誠壽恭皇太后五旬萬壽賜御書揆元經體扁額仍授文華殿大學士時法越構兵越之山西北寧皆陷雲貴總督岑毓英督師行邊爲越南援法乃自請講解鴻章與法總兵福祿諾議訂簡明條款旣竣而法人伺隙陷越之諒山薄鎮南關兵艦駛入南洋分擾閩浙臺灣邊事大棘北洋口岸南始煙臺北迄山海關延袤幾三千里而奉直接壤之旅順口爲首衝飭提督宋慶等率軍守之水師統領提督丁汝昌以蚊快船表裏依護副將羅榮光守大沽提督唐仁廉守北塘提督曹克忠總兵葉志超守山海關內外總兵全祖凱守煙臺重兵聯絡海疆屹然十一年正月朝鮮亂黨突入王宮戕其執政大臣六人日本陰助之駐防提督吳兆有等以兵入護剿除亂黨傷及日本兵日本藉以爲辭鴻章奉命爲全權大臣允其撤兵而所索議處統將撫卹難民則嚴拒不許法大敗於諒山又不獲逞志於閩浙臺灣復尋成四月授全權大臣與法使巴德納

增減前約法事乃弭五月以籌濟滇粵前敵餉需軍火無缺下部議敘西人水陸將士皆出學堂鴻章奏仿行之挑選各防營弁勇入武備學堂肄業九月設海軍衙門醇親王總其事命鴻章會同辦理十二年以全權大臣定法國通商滇粵邊界章程十三年會訂葡萄牙通商之約十四年海軍成爲船二十有八艘檄飭海軍提督丁汝昌統率全隊周歷南北印度各海面練習風濤陣技歲率爲常十五年慈禧端佑康頤昭豫莊誠壽恭欽獻皇太后歸政懿旨賞用紫韁十七年二月命偕山東巡撫張曜校閱海軍十一月熱河教匪滋事蔓延平泉朝陽建昌赤峰四州縣分擾蒙古翁牛特諸旗遣直隸提督葉志超往剿旬日平其亂下部議敘十九年正月鴻章年七十慈禧端佑康頤昭豫莊誠壽恭欽獻皇太后御書調鼎凝釐扁額棟樑華夏資良輔帶礪山河錫大年對聯福壽益壽字御筆蟠桃圖無量佛帶膝貂褂諸珍物上御書鈞衡篤祐扁額圭卣恩榮方召望鼎鐘勳勸富文年對聯福壽字無量佛諸珍物賜之二十年慈禧端佑康頤昭豫莊誠壽恭欽獻崇熙皇太后六旬萬壽賞戴三眼花翎子經邁員外郎五月朝鮮以東學黨亂來乞師飭提督葉志超助之日本亦以重兵至官軍屢戰不利日本乘勝內侵連陷

九連城鳳凰城金州岫巖海城蓋平營口大連灣旅順口復踞威海衛劉公島奪我兵艦八月奉旨拔去三眼花翎褫黃馬褂十月革職留任摘去頂戴二十一年正月賞還翎頂黃馬褂開復革留處分授爲全權大臣往日本議和三月於馬關會訂條款十二割臺灣以畀之日本交還所侵地乃成和七月留京入閣辦事十二月命充致賀俄國加冕頭等專使大臣並往德法英美諸國聘問二十二年正月懿旨召見准令扶掖鴻章周歷各國考察政治七閱月回京九月命在總理各國事務衙門行走十二月充經筵講官二十三年充武英殿總裁二十四年正月特恩免帶領引見五月稽察欽奉上諭事件處七月奉旨毋庸在總理各國事務衙門行走九月命往山東查勘黃河工程十月賜西苑門內乘坐二人肩輿二十五年二月鴻章偕河道總督任道鎔山東巡撫張汝梅疏言山東黃河自咸豐間銅瓦廂改道以來光緒八年後潰溢屢見遂普築兩岸大隄尺寸初不高寬乃民間先就河涯築有小埝隨灣就曲緊逼黃流又因河灘淤高埝自加增官民相率守埝大隄日久失修每遇汛漲埝決隄亦隨決此歷年失事病根也古今言治河者惟讓地於水實爲上策其次則惟有展寬河身今兩岸大隄相距有五六里至

八九里不等應卽就此兩隄加倍高厚永爲修守似不失爲中策第兩岸之中先有棄隄守埵之處小民安土重遷不肯遠去非可旦夕議定暫宜照舊守埵徐圖更張至下口入海尾閘尤關全局現在水行絲網口入海去路偏向東南形勢不順不能築隄旣無以束水攻沙故不免下壅上潰今勘得鐵門關故道尙有八十餘里可通海口較絲網口韓家垣兩路爲順工亦較省然建攔河大壩一座挑深引河三十餘里修築兩岸大隄八十餘里所需工費頗鉅惟是下口不治全河皆病今欲大加整頓不得不從長計議覈實勘估其餘如添修費以固根本設減壩以洩異漲以及設堡夫辦豁免設廳汛等事雖有先後緩急之分實爲將來必不可少之舉大約此項鉅工五六年可期辦竣略如從前南河規模但需南河三四年修費則一切法制犁然畢具而山東無蓄清敵黃之累收效亦較爲遠大乃上所籌十策及比國工程師盧法爾擬具治河新法以備采擇又言遷民修隄之舉繁瑣委曲斷難剋期告成而頻年決溢河底積淤如再節次決口不特一切工程種種棘手兩岸災民何忍再罹昏墊爲今之計惟有擇要加修兩岸隄埵疏通海口尾閘旣爲目前救急善策亦卽治本之要圖疏入命軍機大臣等覈

議施行十月充商務大臣前往南北洋各埠考覈商務十一月署理兩廣總督二十六年正月京察鴻章自同治三年始十三次京察並蒙優敘二月皇上三旬萬壽賞穿方龍補服六月調補直隸總督兼北洋通商大臣時值拳匪肇亂八國聯軍攻奪大沽礮臺陷天津七月入京師上奉慈禧端佑康頤昭豫莊誠壽恭欽獻崇熙皇太后西幸命偕慶親王奕劻爲全權大臣便宜行事疊奉電旨以鴻章公忠素著威望信服此行爲安危存亡所係勉爲其難鴻章聞警兼程進先飭提督梅東益等搜剿直隸各屬拳匪與兩江總督劉坤一湖廣總督張之洞山東巡撫袁世凱奏請懲治首禍王大臣各國公使持十二款要挾鴻章處以鎮靜力與辯論卒定和約大亂之後公私蕩然奏辦善後諸務畿輔以安二十七年七月和議成詔行新政設政務處鴻章充督辦政務處大臣旋署總理外務部事務九月卒諭曰朕欽奉慈禧端佑康頤昭豫莊誠壽恭欽獻崇熙皇太后懿旨大學士一等肅毅伯直隸總督李鴻章器識淵深才猷宏遠由翰林倡率淮軍戡平髮捻諸匪厥功甚偉朝廷特沛殊恩晉封伯爵翊贊綸扉復命總督直隸兼充北洋大臣匡濟艱難輯和中外老成謀國具有深衷去年京師之變特派該大學士爲全權大

臣與各國使臣妥立和約悉合機宜方冀大局全定榮膺懋賞遽聞溘逝震悼良深李鴻章著先行加恩照大學士例賜卹賞給陀羅經被派恭親王溥偉帶領侍衛十員前往奠醊予諡文忠追贈太傅晉封一等侯爵入祀賢良祠以示篤念盡臣至意其餘飾終之典再行降旨十月諭曰朕欽奉懿旨周馥奏督臣因病出缺代遞遺疏一摺大學士直隸總督李鴻章以儒臣起家軍旅早膺疆寄晉贊綸扉輔佐中興削平大難嗣在北洋三十餘年辦理交涉悉協機宜上年京師之變事機萬緊該大學士忠誠堅忍力任其難宗社復安朝野攸賴本年七月間因病疊經降旨慰問該大學士仍力疾從公未克休息忠靖之忱老而彌篤方冀調理就痊長資倚任乃驟患咯血遽致不起當茲時局艱難失此柱石重臣曷勝愴慟前已加恩賞卹予諡文忠追贈太傅晉封一等侯爵入祀賢良祠著再賞銀五千兩治喪由戶部給發原籍及立功省分著建立專祠並將生平戰功政績宣付國史館立傳靈柩回籍時沿途地方官妥爲照料任內一切處分悉予開復應得卹典該衙門察例具奏伊子刑部員外郎李經述著賞給四品京堂承襲一等侯爵毋庸帶領引見工部員外郎李經邁以四五品京堂用記名道李經方俟服闋後以

道員遇缺簡放伊孫戶部員外郎李國杰著以郎中卽補李國燕李國燾均著以員外郎分部行走李國煦李國熊均著賞給舉人准其一體會試用示篤念盡臣有加無已之至意又因時局漸定回鑾有期加恩議和王大臣及東南各督撫追獎鴻章成績特再賜祭一壇子經邁以三四品京堂候補十一月諭曰朕欽奉懿旨奕劻等奏據呈請爲已故大學士功德在民懇建專祠一摺已故大學士李鴻章服官中外四十餘年懋建殊勳安定疆宇前經疊降恩旨優予節終已准於原籍及立功省分建立專祠以彰勞勩茲據奏請各節京師建立專祠漢大臣向無此曠典惟該大學士功績邁常自宜逾格以示優異李鴻章著准於京師建立專祠列入祀典由地方官春秋致祭以順輿情而隆報享二十八年四月諭曰朕欽奉懿旨原任大學士李鴻章忠勳久著節終之典前已疊霽恩施現在靈柩回籍有期朝廷惓念前勞倍增悼惜著派醇親王載灃先期前往致祭伊子李經方加恩著以四品京堂候補用示篤念盡臣有加無已之至意尋賜祭葬護理直隸總督周馥山東巡撫袁世凱江蘇巡撫恩壽浙江巡撫任道鎔疏陳鴻章勳績請於山東江蘇浙江各建專祠允之子經述襲侯爵候補四品京堂以毀卒子經方候

補四品京堂經邁候補三四品京堂孫國杰委散秩大臣襲侯爵

閻敬銘

閻敬銘陝西朝邑人道光二十五年進士改翰林院庶吉士二十七年散館以主事用分戶部咸豐四年四月補官九月丁本生母憂五年服闋六年補原官九年署湖北巡撫胡林翼聞敬銘在部嚴整不可干以私爲吏胥所畏因奏調赴鄂委用十年正月官軍復安徽太湖敬銘與有功以員外郎卽補三月總辦湖北前敵後路糧臺兼理營務五月胡林翼疏薦賢才言敬銘綜覈名實居心正大十月與道員邢高魁帶隊赴蘄廣交界之靈東鄉剿辦土匪擒逆首何致祥等陞郎中賞戴花翎十一年二月以扼剿安徽懷桐援賊出力詔以四品京堂候補先換頂戴三月胡林翼奏稱敬銘公正廉明實心任事爲湖北通省僅見之才自接辦糧臺以來刪浮費覈名實歲可節省錢十餘萬緡然無位無權僅能於製造工作節其流不能督率府廳州縣以開其源可否以湖北兩司簡用之處出自聖明採擇若異日蒙特恩賞給閻敬銘頂戴署理巡撫臣敢保其理財用人必無欺僞湖北歲籌餉項實已不薄接辦得人尙可不盡歸於府廳州縣之中飽則於國計誠有裨

益四月命以按察使候補七月署按察使九月實授同治元年六月巡撫嚴樹森奏言敬銘綜覈精密守堪礪俗才可救時其於刑律則準情酌理於精臺則弊絕風清前撫臣胡林翼薦其堪以大任實爲湖北第一賢能惟杜弊嚴斯小人怨植節峻則同官猜流俗之譏評究無損於清望能使久於湖北綜握用人理財之大綱則胡林翼已成之規不致頽廢未竟之志必可踵行八月署布政使九月丁本生父憂總督官文奏請留辦糧臺詔賞假百日回山西臨晉縣寄寓治喪假滿後仍回湖北專辦糧臺事務十月命署山東鹽運使越日詔賞給二品頂戴署山東巡撫諭曰山東見當捻幅棍教各匪紛乘地方極關緊要軍務吏治整頓需人閻敬銘前任鄂省監司辦理諸務均能認真妥協今朝廷破格用才不得已而奪情起用者係爲地方急須擇人而理該署撫膺特達之知自必能矢金革無避之義移孝作忠感激馳驅以圖報效著卽由寄居臨晉地方卽行馳赴新任毋庸拘守百日孝滿之期尋山西巡撫英桂奏敬銘瀝陳哀悃呈請終制上不允復諭英桂催令星速赴任母任遲誤二年四月抵任時教匪入新泰幅匪犯鄒縣曲阜降衆竄陽穀聊城敬銘檄曹州鎮總兵保德直隸提督恆齡等探蹤截剿並飭沿途州

縣嚴密防堵而自督軍進規淄川賊踞淄城久科爾沁親王僧格林沁攻之未下敬銘抵淄奏言東省兵勇驕縱不諳紀律僧格林沁與臣力求整頓將尤不得力刻難姑容之勇隊先行遣撤報聞五月已革參將宋景詩引降衆屯東昌舊米市街反迹漸著敬銘調按察使丁寶楨改赴東昌相機進剿六月淄川克復上命敬銘暫駐淄城妥爲經理各營勇隊分別遣留以節糜費七月宋景詩股匪回竄莘境分屯清平之運河二十里鋪官窯口戴家灣等處敬銘先後遣都司楊通廉副將范正坦等一赴堂邑助剿一赴清博河干禦之既丁寶楨克王家海敬銘再檄道員林士琦履勘運河分軍防魏家灣土橋李海務及陽穀七級鎮等處令之曰有一匪潛渡者殺無赦並檄千總張祖榮礮船入張秋運河上下巡徼而自由淄移軍東昌駐博平八月官軍克甘官屯賊遁直隸開州餘匪入莘之延家營遣保德等進剿焚其巢九月宋逆率餘黨由直隸東光竄入陵縣平原高唐清平等境並分股過河回竄堂邑敬銘檄楊通廉等往清平迎剿保德由朝觀一路回擊賊復竄開州其散匿步賊上諭敬銘督飭保德丁寶楨等分投搜捕毋留餘孽因病賞假二十日在營調理十月擒賊日劉厚德張逢海於陽穀程敬書於館陶自八

月至是計搜捕匪黨三千數百名置於法宋逆日久稽誅仍命敬銘嚴督所屬搜
拏務獲敬銘以地方漸次肅清籲請回籍終制上不允有旨令敬銘將可撤之勇
委員率赴蒙城交都統富明阿助剿敬銘奏請酌留丁寶楨等營分紮東昌屬境
都司馬春嶠一營駐紮武定守備郭大勝一營駐紮德州平原等境來往梭巡所
留東治六營扼要設防並於綠營選練兵馬一營以備防剿詔如所請十一月服
闋補山東巡撫諭曰捻匪李大個攷在僧格林沁安徽軍營投誠惟項盤等股仍
前負固東省與徐宿毗連著閻敬銘飭各軍慎密防維毋令闖入於是敬銘遣副
將陳錫周扼馬良集遊擊王心安扼韓莊廂守備郭大勝扼臺兒莊旋回省奏言
抽調營兵改練騎隊爲有備無患之資報聞先是十月上諭敬銘切實講求訓練
毋得徒託空言虛糜餉項其餘勇丁均卽全行遣散至是奏言東省綠營廢弛已
久又兼歷年積欠俸餉旣無良將遂成疲兵若驟加整頓撤勇用兵先須募兵足
額籌給俸餉而又訓練需時不得不留勇以待勇糧兵糧同時並發司庫難以猝
辦若先行撤勇恐充屬教匪餘黨滋多沂蘭郟費之間受撫幅匪或懷蠢動東直
交界降衆雖懾威反正革面未必革心卽濟武屬縣鹽梟亦時藉兵威彈治此暫

時不能撤勇之實情也臣非敢於事平之後擁兵糜餉亦非敢意存成見袒勇輕兵實因東省事變頻仍奸民多半土著譬如新病初起肌膚之疥搔甫定臟腑之癥結未除邊滌需時濩苓宜備有非他省情形可比他省祇期能富即可自強東省必先自強乃可致富何則戈鋌不動斯農畝不廢耕耘強梁盡除則良懦自輸賦稅近年以來窮鄉僻壤或偶有奸民嘯聚兵符午發士馬夕臨兵不血刃而鄉民里甲卽已縛獻兇渠不特丁漕較曩歲旺收且匪類知官司有備不敢造謀發難保全民命尤多此一時不能撤勇之小效也故臣不敢爲節嗇帑項之浮詞作粉飾太平之下策敢爲我皇太后皇上陳之又奏言兵之能強端恃將領將領之材固由性生性生之賢亦資汲引如胡林翼曾國藩左宗棠倡率鄉里樂育人材王鑫李續賓李續宜彭玉麟楊岳斌蔣益澧諸臣誠有將材實賴推輓使朝廷知其可用日加拔擢自然碩廉懦立志士奮興故楚勇之名遂著卽多隆阿亦賴胡林翼同官日久所聞於林翼者皆忠君事上之言輕財重士之誼行軍用兵之窾信賞必罰之宜多隆阿質性忠良天資高朗遂成名將學成於所習信不誣也前者僧格林沁奏稱不可盡用南勇啟輕視朝廷之漸誠爲老謀碩畫且自古名將

北人爲多臣北人也恥不習兵才慚定亂因在軍多歷年所見諸軍之成敗利鈍胸中必往復求其所以然之故深知紛冗雜湊之軍不求將而兀湊兵則有兵與無兵等有將與無將同今北方雖所在募勇直是匪徒烏合不知尊君親上殺敵致果之方帶勇者功利熏心貪婪欺飾以之爲將則兵譁以之辨團則民亂謬種流傳後患滋大病在不考其技能不察其志趣謂弁兵即可出戰鎮協即可領兵無怪乎臨陣倉惶將逃勇潰爲賊所笑故欲強北方之兵必先儲北方之將當今之時北人智勇俱備馬步兼長者莫多隆阿若矣其部下曹克忠石清吉皆有將材皆爲北產安見在楚將之下哉應請旨密飭多隆阿多募北方將士教之戰陣厲以忠純擇其忠勇樸質者疏請補授北方及各省提鎮參遊卽令蒞任練兵則萬一有警綠營均成勁旅何必再募勇丁臣竊謂事莫有急於此者如其不然徒恃武科技勇之材行伍資俸遷轉終蹈所養非所用所用非所養之覆轍數十年後偶有撻伐仍慨然於用兵不如用勇也晚矣且南勇規模猶在訓練易成又致誚於北勇誠不如南勇也亦屈矣疏上詔如所請行十二月濟陽田屯團長王汝訓聚衆圍城抗漕遣參將志昌等掩擊之尋獲王汝訓等於直隸新城東省團練

恃強抗官積勢已久敬銘自署任後通檄郡縣探其稔惡素著者嚴緝正法由是始知有官團亦馴擾三年正月奏請將沂兗曹濟四府所屬畝捐概行停止從之四月請變通捐例以重名器疏曰捐例之開藉以籌備京外餉糈原爲朝廷萬不得已之政而日久弊滋不但無補兵精抑且暗虧國計外省自道府以至佐雜皆准捐納丞佐雜職尙無民社之責道則巡查數郡府則表率一方州縣一官則寄以地方百姓城池府庫錢糧征收責任尤重自古未有不慎選牧令而能治天下者也卽以納資階進亦不可視之太輕今計由俊秀捐納州縣至指省分發不過千金卽捐免保舉一層專收實銀亦僅增數百金耳持千餘金之本儼然爲數萬生靈託命之官其意只計及州縣之有錢糧未必計及地方之有百姓以臣所見收納錢糧而論山東一省大縣五六萬兩小縣亦萬餘兩不等彼以官爲貿易者廁於其間略一侵吞已逾原捐之數卽令嚴查重究參革查鈔而所侵之項已歸無著國家所賴者惟正款之錢糧捐數不過補助於萬一若如此明效輸將暗虧帑項通盤籌計是得於捐輸者少而失於帑課者多仰懇皇上飭將道府州縣四項官職仍按籌餉定例減二成章程呈繳實銀均在京銅局報捐不得以鈔票見

錢繞算庶可救弊補偏而於京餉亦大有裨益五月陳山東吏治情形疏曰東省羣吏狃於積習陷溺已深以詐僞輕捷爲有才以欺飾彌縫爲得計以謠誣誹謗爲逞能究其心志無非謀利爭財專圖私便國計民生罔知念及若錢糧則侵挪捏冒交代則多半不給盜賊則諱疾忌醫州縣任其狂肆上下習爲寬弛漸至財匱民亂釀爲今日之憂實皆政事不立上下相蒙所致夫州縣固多不肖何以獨甚於山東實因東省宦途遇事多支吾敷衍不求實際卽有事所難行亦惟以案牘了事若州縣法外生術上司亦知其苦累難堪無可如何儒生正士類少心計舞文弄法或非優爲而由佐雜幕友出身者往往設法互相仿行莫可究詰如東省自道光二十九年清查交代所有無著虧案酌提通省俸廉坐支代人彌補又以前後軍需報銷多有歸外籌補之款以及各項公用均出通省公攤卽以州縣而計大缺每年攤至五六千金中小缺亦有千數百金不等養廉旣已提扣無餘年來兵馬紛出差務絡繹又不免格外需求時奉覈減章程每多事後折賠州縣非能取之於家無非上竊公款下勒民財日用私侵糾纏紛雜迨至清算交代遂多方狡飾以爲掩蓋拖延至於濫求妄費陋習相沿視爲成例道府原可督察州

縣而養廉一項攤扣減成之外僅有空名無可具領稍一仰給卽已爲所把持關口奪氣貪猾之吏因而挾制成風更無忌憚吏治是以愈壞臣到任一年嚴查控災督催交代近日州縣似知愧悔臣思馭吏之道非參劾之難俾中材可由人人皆奉公守法爲難若欲滌盪心術講明政事非多用正人稍寬文法公私不混出入有經官有以養其廉不可以爲治否則雖峻法嚴刑亦有難施臣實見東省政弊病類痺痿難緩鍼砭每見屬員語言則極口誥誡稟牘則手自批答至於辦理各事深慮欲速不達惟就愚悃所及力圖補救以副宵旰精勤孜孜求治至意諭曰知之匪艱行之維艱務須實心實力次第慎勉爲之時捻逆徧東境御史王師曾奏請飭帶兵提臣傅振邦總辦登萊青沂四府團練上命敬銘體察情形具奏尋奏言歛鄉里之財以爲餉集耕種之民以爲兵於事有害無益卽傅振邦亦言本籍之人不宜再辦團練臣惟有嚴督地方官力行堅壁清野之實無再附會團練禦賊之名以輓頽風而弭後患事遂罷四年三月賊騎至曹蕪鄆鉅各州縣郡敬銘檄曹州鎮總兵保德等引兵會剿賊北奔旋折而南復檄沂州府知府文彬蘭山縣知縣長慶募勇分防莒蘭蒙沂要隘四月赴東昌督軍僧格林沁追賊至

曹州歿於陣敬銘疏陳不能率師救援請重治臣罪以彰臣咎上以敬銘曾先事陳奏有親王忠奮勇敢兵凶戰危之言已屢降旨誠僧格林沁穩慎進攻詔免議時羣賊數萬盤旋曹荷鄆鉅濮范間另股趨張秋南將犯省城敬銘督遊擊王正起軍回省守禦以黃河水僅尺餘水師舳板不能鼓棹乃增設礮划數十派遊擊周森藻率之賊折而東閏五月赴齊河與三口通商大臣崇厚商辦礮船遂進駐兗州治兵飭知府惠慶等率所部赴金魚曹單鄆荷濮范凡賊至處搜捕餘匪飭總兵楊飛熊扼濟寧冉堦集遊擊王心安扼荷澤皇鎮集沙土集旣擊賊均勝九月賊由單竄江蘇豐沛麇聚歡口敬銘度其將由魚沛湖濱回奔滕嶧乃檄楊飛熊由金鄉間道趨滕賊果入湖濱鄭家集楊飛熊扼運以待之賊竄徐州十二月編設騎隊練習洋槍五年正月以薦舉賢能失察降爲三品頂戴留任二月賊狂竄入鉅野王心安等迎擊失利敬銘方患病請假仍力疾至東平視師三月調楊飛熊等軍回扼運河賊尋撲運兗沂曹濟道文彬督勇團乘夜渡河掩之斬馘甚夥賊見防軍密遂引去四月敬銘赴濟寧與欽差大臣曾國藩商軍事遂同建分段扼守運河之議五月增設四板礮船教練洋槍隊又偕曾國藩建分段扼守黃

河之議八月賊大股由曹荷趨鉅野金鄉並分股潛竄運西敬銘調知府王成謙及王正起等分赴鉅鄆遮擊而自與道員潘駿文知府龔易圖露宿河隄分段巡守歷四晝夜賊連失利始西遁王成謙等亦戰捷九月肥城黃崖教匪張積中謀亂抗不受撫敬銘令按察使潘鼎新兼顧河防抽防運各軍親赴肥城圍剿十日克之捷奏賞還二品頂戴旋因病賞假一月十一月奏請開缺復賞假三月六年二月再疏請允之十月召來京以疾辭八年補工部右侍郎兼管錢法堂事務仍以疾辭光緒三年命稽查山西賑務四年三月偕巡撫曾國荃疏請申明栽種罌粟舊禁五年三月以吉州知州段鼎耀扣留賑銀請旨治罪五月奏言山西河南陝西四川各省差徭苦累請敕分別查辦裁減上諭著該督撫詳察民隱破除積習嚴定章程所有無名科派悉予革除又以上年奉使大臣恩承童華過境擾累殊甚據實奏參恩承等均議處是月晉賑差竣奏言病難遠行就近居解州就醫上以敬銘辦事實心任勞任怨詔准其安心調理一俟病痊後卽行來京陛見八年正月擢戶部尙書疏辭上不允五月到任十一月奏劾廣東布政使姚觀元湖北荆宜施道董儁翰候補道楊鴻典因前任戶部司官聲名貪劣請旨罷絀從之

九年正月賜紫禁城騎馬署兵部尙書十一月以餉款艱難疏陳新疆南北兩路屯田事宜請旨飭下新疆各路統兵大臣速議章程刻期一律興辦詔可十年二月敬銘慮屯田抵餉每年不過節省數十萬金若不裁勇終虞難繼因復統籌全局疏陳三事一曰定額餉略言甘肅新疆自回逆搆亂攻剿之師另撥月餉額餉久已停解今西路漸就肅清應照左宗棠奏案每年調撥的款三百數十萬金合之本處歲入留抵之款已在四百萬兩上下嗣後不准再向商借亦不得率請部儲一曰定兵額略言全疆兵勇數逾五萬較成平額兵四萬之數已多一萬有奇力分於將多財匱於兵衆臣等竊以爲新疆既改設州縣時勢變遷烏魯木齊巴里坤古城庫爾喀喇烏蘇等處自遭回亂旗丁所存無多宜歸併伊犁卽以伊犁將軍專轄旗兵如內地駐防之例應令劉錦棠等通盤籌畫就額餉數目酌留兵勇應併者速併應裁者速裁合南北路滿蒙漢兵勇總不復逾舊額四萬之數見在防營無事口分尙給行糧若有事之時加餉則款愈難籌不加則何以示勸臣等擬仿成法量爲變通暫以二萬人爲勇改行糧爲坐糧出征外域始照行糧支給再於容勇之願留關外者選精壯萬數千人規復制兵照土勇章程支給其駐

防及臺站卡倫各項官兵口分有較土勇少者無庸議增以節餉項一曰一事權略言調撥額餉今議彙總發給必須得人總會其成俾各營章程畫一解到之款專歸一處分撥各軍各路差員儘可裁撤以裕兵食敬銘又以督辦新疆軍務大臣劉錦棠奏稱西餉支絀請旨飭部通籌全局務使勇有確數餉有的款爲經久之計因詳籌未盡事宜復疏言臣部前奏請留兵勇四萬計應裁去一萬餘人論者必以散勇無業爲慮豈知正供有限斷不能舉天下無業之輩咸仰給於度支況勇營半係空名多非實數總在該大臣確查勇數覈實歸併自無棄人卽勇無浮冒遣散亦不爲無法夫汰弱留強合全疆滿蒙漢兵勇以四萬人爲額不准將弁空名冒領則有確數矣舊餉悉停新定額餉以三百數十萬兩爲斷俾各省關專顧新餉則有的款矣詔下劉錦棠等按照該部所奏各節切實籌商務就左宗棠原議三百數十萬之餉量入爲出撙節開支以期經久而昭覈實議定後速行具奏三月命在軍機大臣上行走總理各國事務衙門行走四月遵議烏魯木齊都統恭鏜奏請規復烏垣舊制額設員弁經書敬銘疏言烏魯木齊各項官員實難規復舊制新疆改建郡縣左宗棠原有請設督撫之議應請飭下督辦大臣劉

錦棠等將烏魯木齊等處都統大臣應否裁撤及一切事宜應如何辦理之處悉心妥籌奏明辦理詔可又遵議御史程鼎芬奏嗣後遇有災緩之年州縣概於勘報日起照例停征疏定章程五條五月命以戶部尙書協辦大學士六月奏請停止各省都統等官來京路費時塔爾巴哈臺參贊大臣錫綸奏請飭部墊還俄商積欠詔下戶部墊撥銀十二萬兩敬銘疏言臣部無代各省清償欠款之例今錫綸私向俄人定議許俄人向臣部及總理衙門索償實屬冒昧應請旨將錫綸嚴加議處以昭炯戒至部庫關繫根本畿輔密邇津門見辦海防實難輕予外撥查山西河南安徽陝西等省均有欠解塔城軍餉擬每省各提撥積欠銀三萬兩陝西安徽道路較遠擬令山西河南代兩省先行各墊撥三萬兩以免貽誤詔如所請十二月遵議籌餉借軍機大臣等疏陳開源節流各十二條均得旨次第施行十一年六月遵議御史劉恩溥奏請清釐民欠疏定章程十條十一月補大學士管理戶部事務十二月授東閣大學士十二年三月上恭奉慈禧端佑康頤昭豫莊誠皇太后祇謁東陵迴鑾以敬銘隨扈賞穿黃馬褂四月查明八旗浮支庫銀奏定章程十條五月至八月因病屢請開缺賞假者四九月復瀝陳衰病諭曰聞

敬銘久病之後力難兼顧自應量加體恤著開去軍機大臣差使俾得專心部務所有年間應得賞項俱照軍機大臣賞給用示優眷十月充會典館正總裁時朝議整頓錢法擬先令直隸江蘇各督撫添購機器製造制錢十一月敬銘奏言機器製造錢文工本過鉅京局開鑪恐滋市廛疑慮請於濱臨江海各省應解京餉內酌易制錢解在天津備用欽奉慈禧端佑康頤昭豫莊誠皇太后懿旨該堂官不能仰體朝廷裕國便民之意節詞延宕著交部嚴加議處尋議上欽奉懿旨加恩改爲革職留任敬銘自任戶部尙書後凡議覆陝西甘肅關內外伊犁烏魯木齊古城收支軍餉俸餉及防勇口糧雜支章程與各省製造善後等局經費有裁減者有刪除者有歸併者有酌定額數者有停止部墊者有復額餉而符舊制者無不力求撙節以裕餉源或各省藩司督催交代不力委解餉項遲延均請旨議處以爲通同徇隱者戒十三年十二月開復革職留任處分自十月至十四年三月因病屢請開缺賞假者三七月復疏請詔准其開缺在京安心調理並諭該大學士近年整頓部務日有起色朝廷倚任方深一俟病體就痊卽行具摺請安以慰眷注而資簡畀十五年疏請回籍允之詔加恩賞給馳驛一俟病痊卽行來京

陛見十八年卒遺疏入諭曰致仕大學士閣敬銘清勤直亮練達老成由部屬於咸豐年間調赴湖北軍營辦理糧臺游陞藩臬蒙穆宗毅皇帝特達之知擢任山東巡撫因病乞退旋補授工部右侍郎以舊疾未痊辭不赴職朕御極後宣召來京簡授正卿參預機務晉贊綸扉宣力有年克勤厥職嗣因患病開缺回籍茲聞溘逝軫惜殊深著加恩追贈太子少保銜照大學士例賜卹任內一切處分悉予開復應得卹典該衙門察例具奏用示篤念耆臣至意尋賜祭葬予諡文介子迺林蔭生太常寺典簿迺竹禮部主事

張之萬

張之萬直隸南皮人道光二十七年一甲一名進士授翰林院修撰二十九年充湖北副考官咸豐元年充河南正考官二年大考二等八月充河南學政三年粵匪北犯豫捻乘機並起破歸德踰睢州近偃開封省垣戒嚴之萬條上防剿事宜及地方錢穀差徭諸積弊先後凡十餘疏多允行嗣以捐輸軍餉下部優敘六年充日講起居注官七年命在上書房行走八年命授鍾郡王讀九年三月陞侍讀充會試同考官九月大考二等記名遇缺題奏並賞大卷緞袍料十年擢翰林院

侍講學士充會試同考官十一年擢詹事府詹事兼署工部左侍郎十二月擢內閣學士兼禮部侍郎銜同治元年陞禮部右侍郎仍兼署工部左侍郎先是南書房上書房翰林奉懿旨編輯歷代帝王政治及前世垂簾事跡可爲法戒者三月之萬偕太常寺卿許彭壽等彙纂成書錫名治平寶鑑賞賚珍物六月轉吏部左侍郎九月御史劉毓枬奏劾河南南州縣苛派擅殺命之萬往按得實巡撫鄭元善及知縣任桂副將楊飛熊等以次降革十一月卽命之萬署理河南巡撫甫視事疏請釐定折漕言軍興以來湖北變通漕折國與民俱得其利河南收漕州縣大抵折徵銀錢每石約銀四兩請令各州縣以三兩三錢解交司庫餘仍留爲本縣公費司庫設局津通以二兩一石購米上倉再以一兩爲河南軍餉可支通省二三月軍食所餘三錢留爲通省辦公之費有餘仍歸軍餉疏入有旨嘉其直陳漕弊不避嫌怨飭部施行時捻匪張落刑往來擾犯渦河南北而臨漳內黃土寇四出響應苗沛霖所練團丁復形反側之萬遣總兵李世玉楊長春余際昌等督兵攻剿兼以計控馭苗練十二月捻酋陳大喜竄踞淮南蕭王寨踰陡溝渡淮西走犯南陽之萬親赴汝州督師令總兵張曜余際昌先攻張鳳林老巢以分賊勢張

鳳林震懼乞降之萬偵其詐飭諸軍嚴陣以待擒張鳳林斬之二年正月補授河南巡撫御史呂序程奏請飭河南各州縣徵收地丁每銀一兩改徵制錢三千藉充軍餉之萬覆奏豫省地丁錢糧完銀完錢各處不一雖數之多寡小有不同然往往皆不及三千今若一律加收恐民心驚惶疑爲加賦反致分擾遂寢其議是時陳大喜竄安徽阜陽與皖捻相連結其黨鮑金湖遂由岳城趨楊莊偪雷堰戴應華蕭汝信亦乘間入張岡南與土扶橋賊巢互爲聲援勢張甚西路新撫各寨見賊氛方盛皆存觀望張曜乃率所部併力規取荒坡以防竄逸余際昌會同總兵趙鴻舉等連營環堵以斷西南各捻勾結之路鎮撫新附及未叛各寨二月陳大喜復糾黨踞楊寨牽制官軍之萬飛檄余際昌等敗賊於土扶橋追奔至光山縣南之白雀園同時總兵陳祿興趙鴻舉亦敗賊於張岡克楊寨匪勢稍戢四月苗沛霖叛皖豫大震適總兵余際昌遇伏陣亡賊燄益熾又踞土扶橋及方家寨萬安店與張岡犄角張曜先奉檄進軍歸陳至是之萬飛調張曜馳赴張岡與團練大臣毛昶熙所遣各軍合圍張岡連戰皆勝援賊敗散分竄皖楚逆酋張鳳舞窮蹙乞降斬於陣遂拔張岡汝南全境肅清之萬分遣諸將東赴歸陳南防光固

爲防苗剿擒之計而自駐許州居中策應七月回省兼顧省防八月毫擒乘虛由臨潁竄許州陷大莊保全兩寨上以之萬不知緩急徑回省垣致該匪乘虛奔竄深入腹地降二級留任十月擒首張總愚爲科爾沁親王僧格林沁所敗西南走魯山南召入鄧州直西竄浙川廳窺陝西而逆首藍大順由山陽商州走西坪將與張總愚合朝廷以其地爲三省險塞山嶺叢沓又逼近武關爲西安將軍多隆阿大營轉運之路而張藍皆巨寇悍酋頻詔之萬加意嚴防之萬遣湘勇四營會張曜往攻連敗總愚於重陽店乘勝進西坪藍逆亦敗仍走陝西二寇由此破散十二月之萬進軍汝州防剿皖楚竄寇三年四月由汝州移營南陽克汝南賊巢戮巨擒趙幘良等四年正月賊犯開封之萬回省擊走之三月擒匪竄山東曹州之萬飭張曜等軍出境會剿四月署理河東河道總督五月僧格林沁戰歿曹州上以之萬督剿不力部議降三級調用詔降爲三品頂戴革職留署任八月河南巡撫吳昌壽領軍赴許州省城空虛賊遂偪近陳留爲掩襲計之萬督飭防河將弁分道設防別選精銳二百擇要扼守賊不得逞九月賞還二品頂戴補授河道總督之萬視工驗料事必躬親著治河芻言時工程與軍事並急之萬勵精籌防

民得安堵五年八月調補漕運總督十月擒匪闖入徐州蓄志南犯之萬以裏下河爲江淮財賦所出而清淮爲裏下河門戶洪澤湖成子河六塘河皆清淮要地部署諸將步步設防又調浙軍洋槍隊三千人分布各處與清淮礮船相輔十二月東捻突過六塘河踞鹽河兩岸謀竄越運河與西捻張總愚合之萬檄記名總兵姚廣武張從龍水陸各軍擊敗之生擒擒酋賴汝洸餘寇俘斬略盡捷入賞頭品頂戴並賞戴花翎七年閏四月復親赴台莊督諸將與直豫皖各軍進討西捻七月擒首張總愚伏誅東南大定迺疏陳江北善後事宜九年調江蘇巡撫十年偕署兩江總督曾國藩會議海運漕白二糧章程十二條均見施行九月補授閩浙總督十月以母年逾八旬奏請開缺回籍養親上以情詞懇切許之光緒八年正月諭令來京陛見二月授兵部尙書賜紫禁城內騎馬十二月充經筵講官九年正月調補刑部尙書三月充會試副考官十年三月命在軍機大臣上行走兼署吏部尙書九月充上書房總師傅十一年正月奉懿旨刑部尙書張之萬贊襄樞廷小心謹慎辦理庶務悉臻妥協著交該衙門從優議敘十一月以刑部尙書協辦大學士十二年三月賞穿黃馬褂四月充教習庶吉士十月充會典館正總

裁十四年充方略館總裁十五年正月補授大學士管理戶部事務皇上下婚禮成懿旨賞加太子太保銜二月授體仁閣大學士十六年遵故父張玉册母張孟氏遺命捐助畿輔賑銀一千兩賞給樂善好施扁額准予建坊十七年正月奉懿旨大學士張之萬翊贊樞廷公忠共矢襄理庶務深合機宜著交該衙門從優議敘十一月賜西苑門內乘坐二人肩輿十八年八月管理吏部事務九月授東閣大學士十二月以二十年恭逢慈禧端佑康頤昭豫莊誠壽恭欽獻皇太后六旬萬壽奉旨著張之萬總辦慶典二十年正月奉懿旨賞戴雙眼花翎並賞用紫韁十月諭張之萬年逾八旬著毋庸在軍機大臣上行走用示體恤十二月以捐金贍族賞給御書扁額二十二年因病屢請開缺九月諭張之萬著以大學士致仕加恩賞食全俸二十三年五月卒遺疏入諭曰致仕大學士張之萬老成練達學問優長由道光丁未科一甲一名進士授職修撰入直上書房疊受先朝知遇之隆洊擢卿貳敷歷封圻勲勞卓著朕御極後宣召來京簡任正卿參預機務晉贊綸扉服官五十餘年謹慎小心允稱厥職上年因病屢次奏請開缺疊經寬予假期俾得從容調理嗣因陳懇肫切准其致仕賞食全俸方冀長承恩眷克享期頤

茲聞溘逝悼惜良深加恩著賞給陀羅經被派郡王銜貝勒載濂帶領侍衛十員
卽日前往奠醑晉贈太保照大學士例賜卹入祀賢良祠任內一切處分悉予開
復應得卹典該衙門察例具奏靈柩回籍時並著沿途地方官妥爲照料伊子刑
部員外郎張瑞蔭俟服闋後以本部郎中補用伊孫張元驥賞給舉人准其一體
會試用示篤念耆臣至意尋賜祭葬予諡文達子瑞蔭刑部郎中孫元驥恩賞舉
人

恩承

恩承葉赫那拉氏滿洲正白旗人道光二十三年由繙繹生員補侍衛處筆帖式
二十七年充玉牒館謄錄官二十八年二月委署主事三月玉牒告成得旨俟補
實缺後免其試俸遇有各部院員外郎缺出照例選用咸豐元年授主事三年八
月髮逆由直隸臨洛關竄正定隨參贊大臣科爾沁郡王僧格林沁出都迎剿四
年二月選兵部員外郎十二月克復東光連鎖匪斃功賞戴花翎五年四月僧
格林沁克山東高唐及馮官屯恩承在營勸辦捐務出力以六部郎中遇缺卽補
五月回京補兵部郎中六年調戶部顏料庫郎中九年四月調禮部郎中五月英

吉利闖入天津大沽口內恩承隨僧格林沁擊退英船以四品京堂候補先換頂戴十年正月授內閣侍讀學士九月隨僧格林沁剿辦直隸河間土匪十一年充翼長隨解山東滕縣圍克沙溝營臨城驛破賊曹州又敗之臨朐縣南以三品京堂候補同治元年授太常寺卿二年二月擒首張落刑被擒伏誅賞穿黃馬褂四月擢內閣學士兼禮部侍郎銜四年二月授鑲紅旗蒙古副都統四月僧格林沁追賊至曹州歿於陣以恩承失於援應命革職仍留營帶罪圖功八月護送僧格林沁靈柩回京總理神機營王大臣奏請調營差委得旨賞給五品頂戴交神機營差遣委用十一月充翼長賞還二品頂戴花翎旋帶隊赴奉天剿捕馬賊五年四月以剿賊出力開復原官仍以內閣學士候補遇缺題奏五月回京七月補原官十二月授理藩院左侍郎六年四月調工部右侍郎兼管錢法堂事務署鑲紅旗蒙古副都統十一月以敬事房下司房不戒於火撲救出力賞加三級七年正月擒匪張總愚由晉渡河意圖北竄上諭著總理神機營馬步官兵馳往雄霸一帶扼防與陝甘總督左宗棠直隸總督官文欽差大臣李鴻章聯絡聲威設法圍制六月調工部左侍郎留營剿賊七月擒逆蕩平上以恩承總統諸軍調度合宜

賞還黃馬褂十一月充揀選主事等官大臣八年六月查勘秦陵方城後券門工程八月授正藍旗漢軍副都統九月管理新舊營房事務十一月盛京永陵草倉河新修工程被水衝淘命與吏部尙書單懋謙前往承修旋奉旨校閱壬戌甲子兩科陝西駐防繙譯鄉試試卷十二月管理神機營事務九年二月赴盛京承修永陵工程七月回京十一月兼署刑部左侍郎十二月以原修陵街西堡土隄泊岸工程未能堅實上諭著於明春攜帶錢糧馳赴工所先行挑挖河道就近會同都興阿奕慶詳加履勘應如何酌用料件以期穩固泊岸如何鑲埽暫爲保護並工料運腳應須錢糧若干通盤籌畫再行奏明辦理十年二月調禮部右侍郎偕禮部左侍郎溫葆深赴盛京工所修理河道八月工竣奏稱草倉蘇子兩河水勢遷流不定請飭隨時保護如所請行十一年五月授正黃旗滿洲副都統七月調補刑部左侍郎充右翼查城大臣十二年二月署左翼總兵佩帶正黃旗蒙古都統印鑰七月署正藍旗蒙古副都統充崇文門副監督十月磨勘武鄉試試卷十一月校閱各省駐防鄉試試卷充揀選贊禮郎大臣十三年正月兼署戶部左侍郎兼管三庫事務並署鑲黃旗滿洲副都統二月充監放馬駝大臣五月管理新

舊營房事務七月署正紅旗滿洲副都統九月上閱神機營兵丁操演隊伍整齊
詔加二級十月慈禧端佑康頤皇太后四旬萬壽以恩承母許氏年逾八十賜御
書扁額紫檀三鑲玉如意大卷江紬袍褂料小卷八絲袍褂料十一月調吏部左
侍郎十二月充八旗值年大臣光緒元年正月署左翼總兵旋署正藍旗蒙古副
都統二月恭修穆宗毅皇帝實錄充副總裁七月充繙譯錄科閱卷大臣署戶部
左侍郎兼管三庫事務八月授總管內務府大臣以吏部左侍郎管理戶部三庫
事務九月上奉兩宮皇太后懿旨躬送穆宗毅皇帝孝哲毅皇后梓宮啓鑾命署
右翼總兵暫行佩帶武英殿印鑰武備院印鑰旋命盤查陳設署正黃旗漢軍都
統十二月命恭辦惠陵工程二年正月署戶部左侍郎兼管三庫事務七月充繙
譯錄科閱卷大臣九月管理火器營事務充繙譯鄉試正考官十一月署左翼總
兵三年正月管理寧壽宮印鑰四月署正黃旗護軍統領旋署右翼總兵賜紫禁
城騎馬四年正月兼署戶部右侍郎管錢法堂事務三月擢都察院左都御史正
藍旗漢軍都統署鑲紅旗漢軍都統五月授禮部尙書管理藥房造辦處印鑰以
御史鄧慶麟糾參光祿寺署丞敬惠攬權營私各款上命秉公查辦尋查明奏請

撤去敬惠一切差使下部議處如所請行充左翼查城大臣稽查七倉稽察左翼宗學九月以御史吳鎮前奏劾四川東鄉縣知縣孫定揚苛派激衆誣叛冤民提督李有恆縱兵濫殺殃及無辜總督丁寶楨拆毀離軍妄更水利不諳機器私虧庫款縱容私人徇庇劣員覆奏不實意存迴護各節命與侍郎童華馳往四川查辦尋查明奏請將李有恆嚴訊並將玩誤公事知縣路朝霖議處從之又奏言都江堰隄工舊用竹籠作隄此次全行揭去改用石工致河身偪窄水勢激衝將新隄一百二十丈沖刷過半與丁寶楨前奏僅衝刷金剛隄三丈餘情形迥不相侔又所設機器局費用較鉅製造未能精良道員勞文翹管理籌餉局務據稱無提銀送歸督署之事道員丁士彬勞文翹前署華陽縣知縣田秀栗與門丁黃瑞庭交結雖無確據然人言藉藉不盡無因奏入上諭丁寶楨著交部議處前署成綿龍茂道丁士彬前署灌縣知縣陸葆德承修隄工領款甚鉅見經查明做法與原稟懸殊難保無浮冒侵蝕情事均著先行交部議處又諭即將機器局停止責成藩臬兩司將勞文翹歷年所發款目逐一清查田秀栗撤任察看黃瑞庭驅逐回籍閏三月覆陳川鹽改辦官運借撥成本數目不符徵收款項亦多牽混攤收雜

款名目繁多開支薪水勇糧等項爲數甚鉅又言從古言利之臣咸以不加賦而財用自足之語爲動人聽聞之具及行之日久弊端叢集隱患孔多溯自軍興以來川省釐捐兩項協撥餉需以千百萬計苟非國家深仁厚澤培養多年何以人樂輸將一至於此豈非藏富於民之明效大驗哉方今軍務肅清民氣未復朝廷屢下勤恤之詔疆吏宜宣惠養之仁乃川省設立官運局以來動云興利除弊然必有利無弊或利大弊小權其輕重因勢利導而後有利於國不病於民如弊大利小尙不得以利國者病民況無甚利於國而又甚病於民乎如官運局所徵正款已暗寓加釐所收雜款更巧爲攤派下與小民爭利競及毫釐利弊相權得失可證見在司道兩庫提解之款既已久假不歸而應收之款又不照章彙解一出入懸欠百萬有奇致正款反形支絀似於國計民生兩無裨益敕戶部詳覈妥議途次奉旨俟四川查辦事竣馳赴雲南查辦事件五月奏言雲南提督胡中和勇營尙無潰散情事因四川協餉未解無從墊發其咨請裁撤楚勇兩營發給兩月餉銀並非含混支領開缺鹽法道沈壽榕查無與魏鼎勳等私事干求胡中和請賞還黃馬褂勇號沈壽榕請開復原職已革知府魏鼎勳等請敕該督隨時察

看如果始終奮勉再行奏請開復得旨報可旋以工部右侍郎閻敬銘奏劾恩承入川時在華州途次失察家人需索下部嚴加議處尋議降三級留任上命改爲革職留任八月回京管理咸安宮事務九月充繙繹舉人覆試閱卷大臣十月充磨勘武鄉試弓刀石大臣署步軍統領十一月穆宗毅皇帝實錄全書告成偕大學士寶鋆等籲請停免議敘允之旋授步軍統領六年八月充紫禁城內值年大臣十二月管理犧牲所事務七年三月大行皇太后仙馭升遐命恭理喪儀九月孝貞顯皇后梓宮永遠奉安地宮大禮告成賞加二級並以總理喪儀賞加三級十二月丁母憂八年三月因病請開缺賞假一月安心調理五月奏請開去緊要差使得旨著開去總管內務府大臣步軍統領並毋庸管理神機營事務以示體恤八月署左都御史九年三月署兵部尙書四月充繙譯庶吉士散館閱卷大臣九月署正黃旗滿洲都統十年三月調鑲藍旗滿洲都統五月調刑部尙書八月署鑲藍旗蒙古都統充內大臣調吏部尙書九月充考試繙譯童生閱卷大臣詔以吏部尙書協辦大學士十二月充滿洲經筵講官十一年二月承修東陵工程九月稽察欽奉上諭事件處十一月補授大學士管理理藩院事務十二月授體

仁閣大學士充文淵閣領閣事管宴大臣旋以註冊錯誤又齋戒期內呈遞刑名處分摺件罰俸四箇月十二年二月上謁東陵命留京辦事暫行佩帶鑲白旗滿洲都統印鑰內繕書房印鑰上虞備用處印鑰三月管理雍和宮事務四月充繙譯會試正考官九月充武殿試讀卷大臣十月充會典館正總裁十三年二月充國史館副總裁四月與刑部侍郎薛允升赴廣西查辦事件途次奉上諭前據御史蔣鎮嵩屠仁守翰林院侍講學士龍湛霖等先後奏參湖南巡撫卞寶第昏庸貪污任用劣員傲惰乖戾委任私人暨地方官諱匿劫盜重案署提督李勝貪污營私各摺命往湖南分晰確查尋查明卞寶第李勝被參各款均無其事桃源縣知縣朱益濬因村民與書屋滋鬧輒以風聞匪黨滋事等詞張皇具稟前署道州知州錢紹文屢被參劾不孚衆望奏請將朱益濬錢紹文等交部分別議處如所請行又以御史張廷燎奏新鄭縣民女蒲愛妮叩閭代兄伸冤一案並洛陽縣知縣王道隆濫加糧額酷刑斃命各款命往河南查辦尋查明奏請將蒲愛妮照例監禁俟緝獲蒲套妮質訊新鄭縣知縣鄒金生卽行革職洛陽縣知縣王道隆卽行革職發軍臺效力贖罪巡撫邊寶泉於王道隆濫刑斃命各節不行卽時具奏

請交部察議孟津縣知縣陳理裕河南府知府承恩候補知府馮光元署洛陽縣知縣康乃猷承審不實請分別議處十四年署步軍統領十五年正月授東閣大學士三月慈禧端佑康頤昭豫莊誠壽恭欽獻皇太后歸政崇上徽號命充恭進冊寶大臣四月充殿試讀卷大臣八月署鑲白旗漢軍都統十六年閏二月上謁東陵命留京辦事並暫行佩帶正黃旗漢軍都統內繕書房暨健銳營武備院各印鑰三月皇上二旬萬壽充捧詔大臣六月上以恩承年逾七旬御書綸扉篤祐扁額賜之十七年充武闈會試監射大臣十八年四月充殿試讀卷大臣閏六月卒遺疏入諭曰大學士恩承恪慎持躬老成練達歷受先朝知遇由主事隨剿軍營轉戰直隸山東河南各省卓著戰功賞穿黃馬褂洊陞卿貳朕御極後簡擢正卿歷任都統晉陟綸扉管理藩院事務宣力有年克勤厥職前以微疴給假方冀調理就痊長資倚畀茲聞溘逝悼惜殊深著賞給陀羅經被派輔國公載澤帶領侍衛十員卽日前往奠醊加恩晉贈太子太保銜照大學士例賜卹入祀賢良祠任內一切處分悉予開復應得卹典該衙門察例具奏伊子文森著俟及歲時以六部主事分部行走用示篤念耆臣至意尋賜祭葬予諡文恪子文森賞主事

宗室福錕

宗室福錕鑲藍旗人父載耀吉林副都統福錕咸豐九年進士籤分吏部學習主事同治元年九月期滿奏留三年十月補官七年正月調赴步軍統領衙門兼辦司員上額外行走十月借補滿洲員外郎八年十二月充內館監督十一月補步軍統領衙門兼辦司員十年九月調補戶部銀庫員外郎十一年十月因恭辦穆宗毅皇帝大婚保奏俟補員外郎後遇有本衙門郎中缺出無論咨留卽行借補並加四品銜尋賞戴花翎十三年九月以步軍統領衙門裁撤兼辦司員仍回戶部當差光緒元年六月以三庫年滿無缺轉補回原衙門行走旋以迴避嫺親吏部右侍郎崇綺改分兵部充普祥峪工程處監督二年五月補工部員外郎四年十二月授右春坊右庶子五年三月轉補左庶子充日講起居注官四月陞翰林院侍講學士十月轉補侍讀學士十二月授太僕寺卿六年六月賞副都統銜充西寧辦事大臣八年正月授兵部右侍郎五月調刑部右侍郎九年二月調戶部右侍郎兼管錢法堂事務六月轉左侍郎兼管三庫事務十年二月充軍政大臣三月兼署步軍統領四月充專操大臣五月陞工部尙書補授步軍統領閏五月

命在總理各國事務衙門行走七月充崇文門正監督八月授總管內務府大臣
管理圓明園印鑰十月賜紫禁城騎馬十一月調戶部尙書並命協辦大學士十
二月充經筵講官十二年正月充武英殿總裁二月皇上恭奉慈禧端佑康頤昭
豫莊誠皇太后祇謁東陵命福錕留京辦事佩帶健銳營印鑰十月充玉牒館副
總裁時京師制錢日少臣工有請以機器鼓鑄者事下戶部福錕等奏言機器造
錢工本過鉅京局開鑪恐滋市井疑慮奏入奉慈禧端佑康頤昭豫莊誠皇太后
懿旨戶部堂官不能仰體朝廷裕國便民之意飾詞延宕實屬大負委任交部嚴
加議處十三年正月部議福錕比溺職例革職懿旨加恩改爲革職留任閏四月
署對引大臣十月署正紅旗漢軍都統十一月派管理新舊營房十二月奉懿旨
加恩開復革職留任處分十四年七月復命充崇文門正監督八月充順天鄉試
正考官十月充大婚納采副使十五年正月奉懿旨賞加太子太保銜四月充教
習庶吉士詹事府右庶子崇文奏參軍機大臣張之萬接納外官各款命福錕及
工部尙書潘祖蔭查明具奏十月與祖蔭奏言張之萬住居湫隘無設執客堂談
機密之事樞臣接見外官藉以考覈人才原係向來體制不得以因公謁見謂爲

接納營私惟僧靜洲以方外浮屠往來仕宦之家易招物議請驅逐靜洲回籍十六年閏二月補授內大臣三月皇上恭奉慈禧端佑康頤昭豫莊誠壽恭欽獻皇太后祇謁東陵復命福錕留京辦事七月兼署吏部尙書管理戶部三庫事務尋以前充殿試讀卷大臣時於一甲二名進士文廷式試卷策內筆誤闕面二字未經簽出奉旨交部照例議處十七年七月兼管圓明園三山事務十一月補授閱兵大臣十八年五月再充專操大臣閏六月命稽察欽奉上諭事件處尋充對引大臣八月管理宗人府銀庫補授大學士管理戶部事務九月授體仁閣大學士十一月派考應封宗室管理咸安宮事務十二月以二十年恭逢慈禧端佑康頤昭豫莊誠壽恭欽獻皇太后六旬萬壽奉旨著福錕總辦慶典十九年十月福錕六十生日慈禧端佑康頤昭豫莊誠壽恭欽獻皇太后以御筆書畫及聯額壽佛如意文綺等件賜之皇上亦頒賞福壽字扁額壽佛如意文綺等件十一月上諭御前大臣晉祺等奏禁門約束不嚴請將值班各員交部議處朕昨日前詣大高殿拈香還宮時神武門外人聲喧雜該前鋒護軍統領等約束不嚴咎實難辭步軍統領福錕著交部議處又以內務府奏請撥款經戶部撥銀三十萬兩並奏稱

明年新增之款不得再向部庫借撥上諭庫款出入歲有常經近年以來內務府屢請借撥有加無已福錕等平日不能嚴飭司員力求撙節實屬辦理不善總管內務府大臣福錕著交部議處二十年正月朔以皇太后本年六旬萬壽奉懿旨賞戴雙眼花翎穿帶膝貂褂先是陝西正考官翰林院編修丁惟禔於放差後有太監張秀林持票向索謝銀編修饒士騰亦與聞其事經御史林紹年奏劾下福錕查辦至是訊鞫得實饒士騰服毒自盡請褫丁惟禔職論太監張秀林如律二月以內務府有舒明朦保一案坐降一級留任罰俸一個月均不准抵銷時京師地面盜案層見疊出奉旨著步軍統領等嚴飭捕盜員役認真緝緝不得稍涉疏懈三月福錕奏參正藍旗漢軍署協尉榮光等疏防盜案未能全獲請交部議處詔從之六月奏請變通緝捕章程略云兵以弭盜勢必處於至強盜不畏兵習在緣於積弱近來夥盜類皆攜帶洋槍緝捕兵丁僅持鈎竿木械盜懷利器兵失所長以致轟斃官兵之案層見疊出應請嗣後巡夜官兵准其執持鳥槍相抵如有殺傷之處俱予勿論九月上諭步軍統領管理地方事務責任綦重福錕差使較多深恐未能兼顧著開去步軍統領之缺是冬因病疊次請假二十一年春再疏

請開缺均賞假調理閏五月復請開缺上諭福錕在內廷行走平日辦事謹慎老成茲以久病未痊陳請開缺著以大學士致仕加恩賞食全俸福錕凡充殿試讀卷大臣二次閱貢士覆試朝考拔貢朝考考試試差各直省舉人覆試卷各一次考試漢廕生閱卷二次一充八旗值年大臣充朝審大臣者三管理溝渠河道者四勘估工程者八是年九月卒遺疏入諭曰致仕大學士福錕持躬恪慎練達老成由部曹轉列詞垣旋陟卿貳晉擢正卿疊司文柄簡授步軍統領總管內務府大臣總理各國事務大臣洊登揆席翊贊綸扉綜理部旗事務補授內大臣賞加太子太保銜宣力有年勤勞懋著嗣因患病奏請開缺以大學士致仕賞食全俸方冀克享遐齡長承恩眷茲聞溘逝軫惜殊深著賞給陀羅經被派貝子溥倫帶領侍衛十員卽日前往奠醑照大學士例賜卹入祀賢良祠加恩予諡任內一切處分悉予開復應得卹典該衙門察例具奏伊子一品廕生毓方著賞給郎中俟及歲時分部行走用示篤念盡臣至意尋賜祭葬予諡文慎子毓方郎中

宗室麟書

宗室麟書滿洲正藍旗人咸豐三年進士籤分宗人府主事八年二月補官八月

充順天鄉試同考官同治二年充會試同考官四年補授鴻臚寺卿八月充張家口稅務監督先是詔起定陵麟書派差陵次至是歲工上嘉其敬謹命遇有應陞之缺開列在前十二月遷太常卿五年查驗東陵贊讀等官六年正月稽查西四旗覺羅學二月補內閣學士兼禮部侍郎銜八年三月遷盛京禮部侍郎十二月署盛京戶部侍郎兼管奉天府府尹光緒元年補理藩院右侍郎二年八月充順天鄉試副考官十月轉補理藩院左侍郎十一月調補刑部右侍郎三年二月充正白旗總族長十一月轉補刑部左侍郎四年調補戶部右侍郎兼管錢法堂事務五年三月署正白旗滿洲副都統並佩帶鑲藍正黃蒙古統領都統印鑰五月轉補戶部左侍郎兼管三庫事務九月命在總理各國事務衙門行走十一月調補吏部左侍郎六年三月充會試副考官十月補授都察院左都御史七年十月授理藩院尙書賜紫禁城騎馬十二月命偕侍郎薛允升查辦江蘇命案詳究情實分別處治其失入各員俱論如律疏上詔下所司議行八年四月兼署吏部尙書七月充崇文門正監督九月雲南官吏因報銷一案牽涉大小京員事爲言官所糾有旨令麟書潘祖蔭嚴行審辦因奏言查明私信請旨飭繳並將疏縱案犯

司員先行交部議處仍令嚴催要證歸案審訊皆得旨允行十月讞成舞弊各員
降革有差九年二月調補工部尙書十年恭逢慈禧端佑康頤昭豫莊誠皇太后
五旬萬壽慶典詔京外大臣老親有年屆八十者優加賞賚上以麟書之母老年
祿養特賞御書匾額玉如意大小卷江紬緞等件十一月署理戶部尙書十一年
九月充翰林院掌院學士十二年調補刑部尙書三月兼署吏部尙書四月充教
習庶吉士十月充會典館副總裁十三年充承修孝陵榮親王園寢工程大臣十
五年九月調補吏部尙書十二月充經筵講官十六年閏二月充管理戶部三庫
大臣十七年復充教習庶吉士十八年閏六月充國史館副總裁九月命以吏部
尙書協辦大學士十二月充補文淵閣領閣事二十一年五月補授內大臣六月
補授大學士管理工部事務是月授文淵閣大學士七月充崇文門正監督二十
二年三月充國史館正總裁稽察欽奉上諭事件處並充會典館正總裁四月管
理戶部事務五月授武英殿大學士二十三年署步軍統領歷充庶吉士散館考
試漢廕生考試滿漢教習考試御史考試閱卷大臣殿試讀卷大臣貢士朝考閱
卷大臣覆覈朝審大臣二十四年卒諭曰大學士麟書持躬恪慎學問優長由宗

人府主事洵歷正卿屢司文柄簡授內大臣翰林院掌院學士旋登揆席翊贊綸扉總理部旗事務宣力有年克勤厥職前因患病給假方冀調理就痊長資倚畀遽聞溘逝悼惜殊深著賞給陀羅經被派貝子溥倫帶領侍衛十員卽日前往奠醑加恩晉贈太子太保銜入祀賢良祠照大學士例賜卹任內一切處分悉予開復應得卹典該衙門察例具奏伊子工部員外郎英繇著以五品京堂卽補伊孫定恆著賞給舉人准其一體會試用示篤念耆臣至意尋賜祭葬予諡文慎子英繇鴻臚寺卿

額勒和布

額勒和布覺爾察氏滿洲鑲藍旗人咸豐二年繙譯進士改翰林院庶吉士三年散館以主事用籤分戶部四年補主事記名軍機章京五年戶部奏獎捐銅局承辦司員額勒和布得旨以應陞之缺陞用六年補員外郎十年遷翰林院侍講十一年轉補侍讀同治元年充日講起居注官五月陞翰林院侍講學士十二月陞內閣學士兼禮部侍郎銜二年六月擢理藩院右侍郎八月署工部右侍郎管錢法堂事務十二月充國史館副總裁三年六月署鑲黃旗漢軍副都統七月授正

白旗蒙古副都統會熱河土默特貝勒旗老頭會聚衆肆掠勢甚熾額勒和布奉命往查廉得實請將貝勒議處其佐領章京德瓦拉布窄等降革有差事遂定十月調補正黃旗滿洲副都統四年五月調補鑲白旗滿洲副都統九月補授盛京戶部侍郎兼管奉天府府尹奉天馬賊煽動命直隸總督劉長佑領軍馳抵三屯營防剿熱河之平建朝赤及奉天各地方額勒和布籌備軍餉無誤戎機功最多十二月管理奉天牛馬稅務監督協理盛京內務府事務是月賊酋周榮糾股回竄法庫邊門擾及昌圖所在告警額勒和布檄統領扎明阿先率所部馬隊馳赴開原相機迎擊而令步隊礮手繼進以扼回竄賊遂潰散旋因開原監犯越獄戕官未能預籌防範詔降二級留任五年科爾沁親王伯彥訥謨祜以奉天應編查保甲嚴禁賭博裁撤團會收繳軍械修築堡寨定期會哨添設員弁創立學校條列入奏詔額勒和布以次興辦邊圉大治六年正月請酌抽鹽釐爲練兵經費八月請將添設海防同知駐紮營口沿海一帶統歸管轄以專責成均下所司議行時關內飢三口通商大臣崇厚請撥庫款籌辦救荒額勒和布奏言奉天庫儲不裕若待請款始行採買誠恐緩不濟急先自倡捐粟米三百五十石以應急需得

旨下部優敘七年疏請重開鳳凰城礦以濟軍火從之旋管理宗室覺羅學務
四月署盛京將軍印鑰八年朝鮮國王以鴨綠江北鳳凰城外游民蓋屋墾田咨
請嚴行禁止先是侍郎延煦等往勘會酌覈章程有推展邊界及嚴定邊禁各條
至是益爲酌中定制示以界限游民迺無復有任意侵越者以昌圖所屬幅員遼
闊設遇命案恆苦耽延請嗣後無論三百里內外印官公出卽由分防官往驗以
免留滯其整飭吏治則以錦州府遼陽州兩地當山海衝要爲邊關之鎖鑰必須
得人乃資統馭請嗣後員缺留爲本省量才陞補著爲令其推廣文教則請昌圖
岫巖添設拔貢定額上皆躋之十年遷察哈爾都統十一年新疆用兵烏魯木齊
都統景廉設糧臺於察哈爾額勒和布爲之派員經紀轉運督催應時接濟軍用
賴以不匱並調蒙古馬隊八旗官兵赴烏魯木齊及杜嘎爾營烏里雅蘇臺隨地
防剿杜賊北竄十三年擢烏里雅蘇臺將軍光緒二年四月回匪大股攻撲布倫
托海民廠被圍額勒和布派兵協力捕剿賊勢稍卻而山徑紛歧兼多戈壁防不
勝防五月另股突由布倫托海竄踞沙札蓋等處意圖伺隙復逞使官軍不及兼
顧額勒和布亟督各營偵探截剿殺賊三百餘名餘匪駭逃三年二月因病乞休

奉旨予假調理六月再請開缺許之六年病痊九月復補鑲白旗漢軍都統十二月補進內大臣班七年三月署鑲黃旗蒙古都統四月充派赴朝鮮國正使閏七月調補熱河都統九年二月補理藩院尙書六月調戶部尙書授正白旗漢軍都統時直隸水患已有旨賞米六萬餘石賑恤額勒和布以災區甚廣復請酌提藩庫銀數萬兩以拯饑民從之十月賜紫禁城騎馬管理正白旗漢軍新舊營房城內官房事務補總管內務府大臣十二月充經筵講官十年三月命在軍機大臣上行走四月充正白旗漢軍專操大臣五月以戶部尙書協辦大學士奏開滇越邊界礦務又請將同治十一年以後光緒八年以前直省積欠錢漕悉行蠲免並奏定直省考覈州縣蠲緩章程五條六月國子監司業潘衍桐奏請特開藝學一科額勒和布極言藝學開科諸多流弊事不果行時法人侵我越南攻諒山陷臺北雞籠口岸詔議和戰大計額勒和布奏言儻法人懾於兵威迫於公議悔過輸誠似不妨示以大度仍予轉圜如竟怙惡不悛肆行要挾惟有一意主戰第兵端一開籌餉維難宜減腹地勇營裁冗費閒員省例外支銷杜侵蝕中飽方足以裕餉源而作士氣八月調補正紅旗滿洲都統命稽察欽奉上諭事件處充國史館

正總裁九月管理正紅旗滿洲新舊營房事務命補大學士管理戶部事務十月奉懿旨賞戴花翎旋授體仁閣大學士十二月充文淵閣領閣事十一年十一月調管兵部事務十二月懿旨賞穿帶膝貂褂轉武英殿大學士十二年三月賞穿黃馬褂十月充玉牒館督催及會典館正總裁十三年二月補授內大臣七月充崇文門正監督十月充閱兵大臣十四年充方略館總裁皇上下大婚禮成賞加太子太保銜累下部優敘十六年四月充繙譯會試正考官七月署正紅旗蒙古都統十七年正月奉旨大學士額勒和布翊贊樞廷公忠共矢襄理庶務深合機宜著交該衙門從優議敘十一月命在西苑門內騎馬十八年十二月以二十年恭逢慈禧端佑康頤昭豫莊誠壽恭欽獻皇太后六旬萬壽奉旨著額勒和布總辦慶典二十年奉懿旨賞戴雙眼花翎並賞用紫韁二十一年充繙譯會試正考官歷充各省駐防繙譯鄉試閱卷大臣繙譯會試閱卷大臣各一次繙譯會試覆試閱卷大臣三次各省駐防繙譯舉人覆試閱卷大臣六次閱看繙譯庶吉士散館試卷大臣二次考試蒙古司業閱卷大臣一次考試宗室應封閱卷大臣二次考試滿洲中書閱卷大臣一次考試貼寫筆帖式繙譯官滿洲助教閱卷大臣一次

朝考閱卷大臣一次疊蒙懿旨賞勸善要言書及御書扁額福壽字文綺等件二十二年疾作累請開缺優詔允其致仕二十六年六月卒遺疏入諭曰致仕大學士額勒和布練達老成持躬端謹由翰林洊擢卿貳參預機務晉贊綸扉服官垂四十年謹慎小心克稱厥職嗣因久病屢次奏請開缺准其致仕方冀克享遐齡長承恩眷茲聞溘逝悼惜殊深加恩賞給陀羅經被派貝勒載溎帶領侍衛十員卽日前往奠醑照大學士例賜卹入祀賢良祠任內一切處分悉予開復應得卹典該衙門察例具奏伊子理藩院郎中伯麒著俟服闋後以四品京堂候補用示篤念耆臣至意尋賜祭葬予諡文恭子伯麒候補四品京堂孫世斌一品廕生

榮祿

榮祿瓜爾佳氏滿洲正白旗人祖塔斯哈喀什噶爾幫辦大臣父長壽甘肅涼州鎮總兵榮祿於咸豐二年十一月由廕生以主事用十二月承襲騎都尉兼一雲騎尉三年分工部七年孝靜康慈皇太后梓宮永遠奉安禮成得旨俟補主事後以本部員外郎儘先陞用八年三月補主事八月陞員外郎九年調戶部銀庫員外郎十一年八月捐輸軍餉獎候選道十月充神機營文案處翼長同治三年四

月充全營翼長六月西安將軍都興阿奏調赴陝甘襄治軍事命仍留神機營當
差九月特詔以五品京堂用四年七月統帶神機營兵赴薊東剿捕馬賊並往喜
峰口鐵門關察看邊口情形九月賞副都統銜管理健銳營事務是月回京十月
以督練營兵功賞戴花翎並充神機營健銳營馬隊專操大臣十一月充神機營
威遠隊專操大臣五年四月署正藍旗蒙古副都統五月充本旗專操大臣六月
授正藍旗蒙古副都統十二月調鑲白旗滿洲副都統七年正月擒逆竄直隸隨
恭親王襄辦巡防事六月授左翼總兵八月擒逆平上嘉其隨同籌畫防剿悉臻
妥協賞頭品頂戴是時大學士文祥疏薦榮祿稱其忠節之後愛惜聲名若畀以
文職亦可勝任八年三月補鑲黃旗滿洲副都統十二月命管理神機營事務十
年署工部左侍郎旋補工部右侍郎兼管錢法堂事務十一年充管理值年旗事
務大臣十二年調補戶部左侍郎兼管三庫事務十三年三月兼署吏部左侍郎
五月授正藍旗護軍統領七月充左翼監督八月授總管內務府大臣十月自請
開內務府差使上不許十一月慈安端裕康慶皇太后慈禧端佑康頤皇太后懿
旨皇帝天花之喜榮祿著賞加太子少保銜並賞戴雙眼花翎十二月穆宗毅皇

帝龍馭上賓榮祿自請撤銷翎銜允之光緒元年三月兼署步軍統領三年正月補步軍統領十月賜紫禁城內騎馬四年四月充紫禁城值年大臣五月遷都察院左都御史旋擢工部尙書八月因病乞假上以其差務較繁解工部尙書任開總管內務府大臣差使五年六月參修普陀峪萬年吉地全工告成懿旨賞大卷巴絲緞二疋並下部優敘十一月以病固請開缺允之六年因已革知縣馬河圖夤緣開復未能拒絕部議降二級調用不准抵銷十一年以報效槍支奉懿旨開復降二級調用處分十三年病痊授鑲藍旗蒙古都統十四年三月充領侍衛內大臣九月署鑲藍旗漢軍都統十五年皇上下婚充扈從鳳輿大臣二月充專操大臣十七年十一月授西安將軍十二月賞加尙書銜抵將軍任卽請添練洋槍步隊五百爲西安威遠隊從之二十年十月慈禧端佑康頤昭豫莊誠壽恭欽獻崇熙皇太后六旬萬壽入京祝嘏授步軍統領時日本構釁榆關內外防軍失利京師震動榮祿疏陳急固根本之策略言馭夷不外和戰二策然必先以戰爲根本而後能以和葺事光緒十年法越之役諒山一勝始能講解未有不受懲創而能成和者也用兵不外戰守二事然必先以守爲根本而後能

以戰施功咸豐同治年間粵捻之役畿輔先固賊勢漸衰未有不固畿輔而能言戰者也因請依咸豐三年同治七年故事特設巡防局領以親王專決軍務簡大臣督理五城團防以安輦轂用宿將前任湖北提督程文炳甘肅新疆提督董福祥涼州鎮總兵閃殿魁募重兵駐京畿以備緩急上皆報可旋命會同商辦軍務十一月命在總理各國事務大臣上行走二十一年六月遷兵部尙書請變通武科舉疏云武科之設原期得折衝禦侮之才自火器盛行弓矢已失其利習非所用與八比試帖之弊略同積弱之端未始不由於此查應試武童各州縣少則百人多或數百至千人約計縣以二百人爲率合之各省數可三四十萬皆年富力強里籍可稽若每省延聘精通洋操之教習數十人就地教練一歲之後可成精兵定以學習三年作爲武生選材武聰穎者挑入武備學堂習格致輿地諸學分礮隊槍隊馬隊工程隊諸科三年由督撫考試列優等者作爲武舉人其名數不得逾本省舊額十分之五此爲武備特科其三年一試之武科暫准照舊舉行但須酌減舊額一半以期相濟爲用俟新章試行有效再將舊制停罷並將此次特科武舉人咨送京師大學堂限以三年由兵部奏請欽派王大臣考試列優等者

作爲武進士其名數與常年會試中額各得其半仍恭候廷試各就本科驗其技藝詢以方略以侍衛守備分用各路軍營自哨長以上均用此項武舉人武進士充補以備干城之選似此參酌中外兵制造就將才於國事實有裨益詔下所司議未及行然其後罷武科舉及各省設立武備學堂卒如榮祿議二十二年四月以兵部尙書協辦大學士十月充玉牒館副總裁二十三年充經筵講官請廣練兵團以維大局疏言當今世局合五洲之地已成一大戰國武備之事日新月異英法德俄養兵之費每歲恆逾萬萬外交之進退視其兵之多寡強弱以爲衡強則公法所不能拘弱則盟約皆不可恃國家自舊歲失馭東洋示弱天下環瀛列國窺我虛實不循約章不守公法乘間抵隙肆意要求拒之不能爭之不聽本年德人藉口山東教案徑據膠灣所索各條多已委曲遷就仍不肯退出膠澳爲天下萬國之所未有現在各處教堂林立設有匪徒剽掠彼將悉援德人之例索地以償卽幸而無事相安或執利益均沾以一島一埠爲請何以處之時事艱難於斯已極曩者日本議款於遼東九城要我割讓俄人約德法二國仗義執言有迫日還遼之舉議者遂謂俄人睨我多欲引爲奧援國家降心相從許其築路於東

三省行船於松花江報俄者不可謂不厚原欲假其勢力藉弭各邦之侵侮乃德事方興始稱調撥兵船相助鎮攝繼則援助之義寂然無聞西報多謂德法二主今歲咸赴俄都聯盟合從以圖我而兼拒英日九月彼得堡俄報亦謂三國當堅持已見以相索請未幾卽有青島之役是三國協以謀我之情形已可概見竊以爲目前之策莫如求自強自強之策莫如多練兵自甲乙兩年日人購釁率湘淮之宿將徵各路之精兵遠戰遼西未能取勝固由統兵將帥調度失宜亦緣倉猝成軍教練未能應手故有兵不練與無兵同練不如法與不練同前經督辦軍務王大臣奏請飭臬司袁世凱創練新建陸軍聞其兵皆軀幹彪悍步伐整齊爲各軍冠雖未經與泰西軍隊較量軒輊而比之湘淮舊伍已覺煥然改觀但人數不多難當大敵擬請添募若干營成一大軍與提督聶士成之軍扼守北洋門戶又提督董福祥老成宿將智勇兼全前於光緒二十年保舉將才奏請飭募萬人駐防近畿厥後剿撫甘回卒著成效今董福祥又添募四營增足二十營駐紮山陝一帶認真督練藉資鎮撫仍應再募十營以厚兵力兼爲策應之師其神機營練兵處馬步礮隊不下兩萬餘人應由該管王大臣挑選年力強壯技藝嫻熟者別

爲先鋒營隊專備行軍折衝之用庶可與現練營勇各軍互爲聯絡以期有濟至簡練民團雖不無流弊然咸同之際大學士曾國藩實賴其力戡定東南擬請敕令沿海沿江各督撫先行舉辦責成紳士悉心經理仍杜苛擾以靖閭閻以上各事雖非旦夕之效然認真辦理一二年內通國上下衆志成城不戰而屈人之兵此之謂也當嘉慶十二年德主弗勒得力威廉第三爲拿破侖所敗割其國土之半獻銀九萬億以與法和於是發憤自雄更改兵制使全國丁男悉就兵役越七年而合英俄奧諸國大敗拿破侖恢復疆宇國勢以強至今各國陸兵德爲稱最俄羅斯兵制與德略同教練稍異但其民數旣多故兵數亦廣雖商務與製造不逮英法而各國憚之然則治國之道惟在兵強無不可復之仇無不可雪之恥斷斷然已雖明知財賦日絀籌餉維艱但積弱之餘不加振作侵陵日甚婪索無厭議和議償將無虛歲與其拮据於日後何如布置於事前也疏入命下所司議行二十四年四月授大學士管理戶部事務旋署直隸總督五月授文淵閣大學士補授直隸總督兼充辦理通商事務北洋大臣疏請整頓保甲聯絡漁團其立法有四一曰損益舊章二曰釐剔積弊三曰明定賞罰四曰嚴司稽查八月命入爲

軍機大臣仍節制北洋各軍管理兵部事務九月賜西苑門內騎馬十一月賞穿帶膝貂褂是時北洋自淮練各軍外有聶士成董福祥宋慶袁世凱所部毅甘武毅新建四軍榮祿因之立武衛軍奏請以聶士成駐蘆臺防大沽北塘扼北洋門戶爲前軍董福祥駐薊州兼顧通州一路爲後軍宋慶駐山海關內外專防東路爲左軍袁世凱駐小站阨津郡西南要道爲右軍而自募親兵萬人爲中軍於南苑內擇地安營督率訓練又以籌餉爲軍事要義新募中軍歲需餉銀百二十餘萬請以部撥添練新建陸軍餉銀四十萬改撥備放其不敷銀兩於部庫存儲各省撥解福建船廠經費項下動撥毅甘武毅新建四軍原有豫餉淮餉及部撥各省關之餉近每解不及額請敕下戶部嚴催各省迅卽撥解儻不如額協濟卽查照陝甘總督左宗棠西征成案指名嚴參如能埽數解清每屆三年奏請獎敘從之二十五年正月充文淵閣領閣事二月授正藍旗滿洲都統七月充崇文門監督二十六年皇上三旬萬壽賜御書扁額二月授內大臣七月賜紫禁城內及西苑門內乘坐二人肩輿是月各國以拳匪爲亂聯軍入京師皇上奉慈輿西幸榮祿充留京辦事大臣旋赴西安行在二十七年六月管理戶部事務八月奉上諭

以回鑾在卽賞穿黃馬褂十月奉懿旨現在時局漸定回京有期榮祿保護使館力主剿匪復能隨時贊襄匡扶大局著賞戴雙眼花翎並加太子太保銜十二月授文華殿大學士疏陳老病請開去各項重要差使以散員供職奉懿旨榮祿公忠體國謹慎小心久爲朝廷所信任上年拳匪之變衆口紛呶該大學士獨能堅持定見匡扶大局厥功甚偉今雖時事粗定而元氣大傷除弊更新百端待理正當同心戮力共濟艱難宮廷振厲不遑孜孜求治該大學士受恩深重更何忍置身事外獨使宵旰憂勞揆諸鞠躬盡瘁之義於心安乎所請著不准行二十八年二月河南泌陽縣教案起榮祿疏陳民教相安之策略言鬧教之案層見疊出總由中國人心日漓多藉入教爲名橫行鄉里細故微嫌倚勢搆訟地方官又於案情曲折不能詳切辨明致使教士執先入之言聽斷成偏重之勢平民被抑衆怒難犯加以教堂賠款無非攤派地方疆吏責諸有司有司斂諸百姓鬧教之罰愈重仇教之怨愈深故一案未結一案又起星星之火可以燎原所關匪淺亟當懲前毖後正本清源擬請敕下外務部與駐京總教士樊國樑婉切籌商妥訂規條通行各教士一體照辦並行知各省督撫通飭各屬遇有民教交涉之案持平審

斷不得偏倚庶幾民教相安邦本自固矣詔許之二十九年三月以病久未痊請暫解樞務上諭覽奏實深廬系該大學士翊贊樞機公忠懋著現在振興庶政倚畀方殷著安心調理毋庸開去軍機大臣差使並不必拘定假期一俟病痊卽行入直旋卒遺疏入諭曰朕欽奉慈禧端佑康頤昭豫莊誠壽恭欽獻崇熙皇太后懿旨文華殿大學士軍機大臣榮祿公忠亮達才識閎深由廕生起家洊陟正卿歷任總管內務府大臣將軍總督恪恭匪懈擢登揆席翊贊綸扉竭力盡心調和中外老成持重匡濟時艱近因患病請假並請開去要差朝廷倚畀正殷諭令安心調理方冀病痊入直克享遐齡長資輔弼忽聞溘逝震悼良深榮祿著先行加恩照大學士例賜卹賞給陀羅經被派恭親王溥偉帶領侍衛十員前往奠醊賜祭一壇予諡文忠追贈太傅晉封一等男爵入祀賢良祠賞銀三千兩治喪由廣儲司給發其餘飾終典禮再行降旨又奉上諭朕欽奉懿旨已故大學士榮祿翊贊綸扉適在時事艱難之日盡心經畫獻納周詳有爲中外所不及知者朝廷倚畀之殷相須綦切本年正月間因病給假疊經降旨慰問方冀調理就痊長資輔弼乃以醫藥罔效遽致不起披覽遺章拳拳於國計民生用人行政追念前勞曷

勝愴慟昨已加恩賜卹賜祭派員奠醑予諡文忠追贈太傅晉封一等男爵入祀賢良祠賞銀治喪著再加恩於靈柩發引前一日賜祭一壇生平事蹟宣付國史館立傳任內一切處分悉予開復伊嗣子員外郎良揆著加恩以四五品京堂候補用示篤念蓋臣有加無已之至意尋賜祭葬子良揆太常寺少卿

裕德

裕德喜塔臘氏滿洲正白旗人父崇綸官至湖北巡撫自有傳裕德由舉人一品廕生於同治十年奉旨以文職用籤分戶部在員外郎上行走光緒二年中式進士改翰林院庶吉士三年散館授職編修五年七月陞詹事府右春坊右贊善八月援例報捐五品銜花翎九月擢右中允十一月轉左春坊左中允十二月充文淵閣校理六年三月充會試同考官四月遷翰林院侍講七年五月轉侍讀六月充日講起居注官八年四月充翰林院辦事官兼功臣館提調六月充咸安宮總裁尋偕詹事府少詹事寶昌等會奏整頓咸安宮官學章程六事一慎挑選一分課程一復公費一嚴考成一端學術一請恩試有旨下部議行十二月陞右春坊右庶子九年五月轉左春坊左庶子六月授翰林院侍講學士十年正月充武英

殿纂修二月轉侍讀學士十三年遷詹事府少詹事十四年三月晉詹事四月擢內閣學士兼禮部侍郎銜八月提督山東學政十六年擢工部右侍郎十七年十月學政任滿回京十一月補鑲白旗漢軍副都統十八年兼刑部右侍郎十九年正月命管理三庫事務尋調刑部右侍郎六月調鑲藍旗滿洲副都統八月充順天鄉試副考官九月調鑲黃旗滿洲副都統十月充會典館副總裁二十五年正月授都察院左都御史時川鹽改辦官運外銷所盈餘謂之副本歷年積存未嘗報部戶部奏請敕四川總督詳細登覆並請開支護本銀兩應令安立定章言路復疊劾官運濟楚官吏侵蝕商民肢傷及吏治多貪縱不法四月命裕德偕侍郎廖壽恆前往查辦尋查明官運開辦以來徵收雜款名目繁多數綱之後始經減定收支均詳報有案惟未照章隨時報撥以致辛巳四綱雜款全行開支請嗣後一律造冊報部以重帑項官運局開銷護本之弊不在補配發銀之日而在呈報失事之時應以整頓管事人役及船戶爲要義至濟楚積弊由於官運開辦之初多報帶銷積引復以銷數阻滯遂違例影占楚岸行銷致令渝釐短絀楚商重困請將官運局濟楚引鹽卽行停止以符定案而肅鹽綱均得旨允行其貪劣官吏

亦請旨降黜有差二十一年四月充教習庶吉士閏五月署鑲黃旗漢軍都統旋補授二十三年充順天鄉試副考官二十四年八月遷理藩院尙書尋管理咸安宮官學事務二十六年調兵部尙書二十七年管理圓明園事務二十八年正月命馳往哲里木盟查辦事件尋奏言扎薩克圖郡王烏泰先以放荒啟釁與協理台吉巴圖濟爾噶勒不協會游民乘間倡亂烏泰等遂懷疑互控巴圖濟爾噶勒謂烏泰容留匪類罔恤旗艱烏泰謂巴圖濟爾噶勒藉匪聚兵勒索旗衆經臣親爲剖析開導烏泰等均悔悟感泣扎薩克圖王旗匪亂粗平整飭地方清查戶口均關緊要若僅予以尋常處分不籌長治久安之策恐數年之後隱患潛滋貽害非淺擬將烏泰之扎薩克職巴圖濟爾噶勒之協理之職一併暫革仍准留任勒限三年飭令將闔旗事務和衷共濟認真經理因條上領荒招墾事宜得旨如所議行八月順天借闈河南補行庚子辛丑兩年鄉試奉旨充正考官十月賜紫禁城騎馬十二月署翰林院掌院學士二十九年七月補授掌院學士八月命以兵部尙書協辦大學士十二月充文淵閣領閣事三十年三月充會試正考官四月調署禮部尙書九月管理理藩院事務十月簡授大學士旋授體仁閣大學士三

十一年六月充國史館總裁旋授東閣大學士並管理禮部事務稽察欽奉上諭
事件處歷充朝考閱卷大臣殿試讀卷大臣庶吉士散館閱卷大臣貢士覆試閱
卷大臣考試中書閱卷大臣考試廕生閱卷大臣經濟特科閱卷大臣頒賜欽定
剿平粵匪方略剿平捻匪方略平定回匪方略等書十月卒遺疏入諭曰大學士
裕德持躬恪慎學問優長由翰林洊陟正卿兼翰林院掌院學士疊司文柄晉贊
綸屝並總理部旗事務宣力有年克盡厥職前因患病屢經請假方冀調養就痊
長資倚任遽聞溘逝軫惜殊深著賞給陀羅經被派員勒載壽帶領侍衛十員卽
日前往奠醊加恩予諡入祠賢良祠照大學士例賜卹任內一切處分悉予開復
應得卹典該衙察例具奏伊子熙鑫著賞給員外郎俟及歲時分部行走以示篤
念儒臣至意尋賜祭葬予諡文慎子熙明度支部員外郎熙魁民政部員外郎候
選知府熙壽一品廕生熙鑫恩賞員外郎

宗室崑岡

宗室崑岡正藍旗人同治元年進士改翰林院庶吉士二年散館授職編修三年
三月陞左春坊左贊善七月充河南鄉試正考官旋晉國子監司業七年充會試

同考官十年十一月陞右春坊右庶子十二月充文淵閣校理十一年充日講起居注官十二年五月充雲南鄉試正考官十三年三月充會試同考官光緒元年五月轉左春坊左庶子六月授翰林院侍講學士二年閏五月擢詹事府詹事十一月陞內閣學士兼禮部侍郎銜十二月充文淵閣直閣事三年三月充會試副考官四年二月遷禮部右侍郎三月調兵部左侍郎七月授正白旗漢軍副都統十月兼署刑部左侍郎五年五月調補戶部右侍郎兼管錢法堂事務八月提督福建學政十一月轉左侍郎兼管三庫事務八年五月調正白旗滿洲副都統九年二月任滿回京供職六月調吏部右侍郎十月兼署戶部右侍郎兼管錢法堂事務十一月轉左侍郎十二月充經筵講官十年三月遷都察院左都御史兼正藍旗漢軍都統五月擢理藩院尙書十二年二月調補工部尙書兼署理藩院尙書十三年二月兼署吏部尙書八月兼署戶部尙書十五年正月署正黃旗漢軍都統三月充會試副考官六月署鑲白旗滿洲都統十六年二月調禮部尙書管理太常寺鴻臚寺事務閏二月德宗景皇帝恭奉孝欽顯皇后祇謁東陵命留京辦事署正黃旗滿洲都統及上虞備用處鑲白旗滿洲都統印鑰十月賜紫禁城

內騎馬十七年九月給事中張廷燎奏劾河南巡撫裕寬人地不宜公事未能整頓命崑岡偕侍郎錢應溥往案得實裕寬交部議處餘降革有差十八年以二十年恭逢孝欽顯皇后六旬萬壽命與禮親王世鐸等總辦慶典十九年充教習庶吉士二十年正月奉懿旨本年予六旬慶辰在廷諸臣克勤職守宣力有年自應一體加恩以光盛典崑岡著賞戴花翎並交部從優議敘二月充會典館副總裁二十一年三月兼署理藩院尙書六月命以禮部尙書協辦大學士二十二年三月充國史館副總裁四月授大學士管理工部事務五月授爲體仁閣大學士管理理藩院事務十一月授東閣大學士二十四年閏三月授翰林院掌院學士兼充國史館正總裁會典館正總裁四月充教習庶吉士署正白旗漢軍都統八月署鑲藍旗蒙古都統十一月賞在西院門內騎馬並乘坐船隻拖牀十二月泰寧鎮總兵祥霖奏參西陵守護大臣毓懋等廢弛祀典並職官鑽營大臣受賄德宗命崑岡往廉其事二十五年正月覆奏上以所奏有不實不盡之處諭曰毓懋參款既據委員密稟家人徐岳泉向有徐貝子之號自必有實在劣迹可指翼長敬勝不時赴府致招物議其餘派差挑缺等事必有干預豈得以不知遠嫌四字了

之至所稱防禦岳嵐常在全榮府中恆無虛日物議所叢當由於此竟以想像之詞置諸不論不議尤不足以盡事理宋村木案既稱徐岳泉等訛詐索銀毫無疑義卽應切實嚴訊以期水落石出何得因徐岳泉一人在逃輒予先行完案且宋洛福向毓櫛所賠何罪全榮家人趙子春與徐岳泉狼狽爲奸亦非驅逐回籍所能蔽辜覽奏多涉含糊實屬不肯任怨所有該大學士查奏各節仍著督飭隨帶司員按照原參並此次諭旨指駁各條逐一徹底根究詳晰具奏一面咨行順天府等衙門嚴拏徐岳泉歸案審辦毋得稍涉徇縱近來各省查辦事件大員往往瞻徇情面於飭查緊要大端敷衍了事僅摘取一二細故薄予處分此等故套幾成錮習卽如溥良查辦山東賬務亦難免不實不盡豈謂朝廷洞鑒所不及耶嗣後務當各矢天良任怨一經奉旨查辦卽不得稍存避嫌之見致負朝廷諄諄訓誡之至意崑岡應再嚴切覆查並咨行祥霖逐款指實聲覆二月疏陳徐岳泉隨侍毓櫛多年毓櫛上年三月到任後不常接見僚屬公事皆由徐岳泉回稟其詞色傲慢大有睥睨一切之概外間均有徐貝子之號至實在劣蹟查無別款當以訛詐宋村木料一案爲憑俟拏獲到案卽治以訛詐之罪翼長敬勝幼年曾

習占驗等術向人稱道雖非有意惑人實由心疾所致毓櫛摺奏文牘多出其手至調查挑缺派差稿簿均係三堂會銜施行自無別項情弊但其自供亦以筆墨矜詡此卽不時赴府猜疑羣起之明徵岳嵐住居離府二里往往就進回畫公事同僚赴府回事者常見岳嵐在府中回事處坐談遂不免被人指摘紫荆關外私坡樹木向准民間購買宋洛福買木運回徐岳泉指爲禁木查拏到店追詢知爲私坡之產復向宋洛福索銀後因成訟旋經調處和息雖未得錢實屬意存訛詐宋洛福於和息後恐徐岳泉挾嫌更肆欺陵故自往賠罪實非宋洛福有應得之罪全榮家人趙子春與徐岳泉稔熟且居處相近皆非良善人遂以狼狽日之然欲確指其爲奸何事細檢案卷詳詢人言亦終無從證實但其人爲外間所訾議決非安靜之徒擬仍咨明全榮將趙子春銷除包衣旗檔驅逐回籍以息煩言此駁查各條逐款覆查明確之實在情形也至原參職官鑽營大臣受賄爲案內緊要關鍵更應切實追求連日嚴審密查終無證據咨令祥霖逐款確指據稱曖昧之事焉能令人見及旣經道路宣傳不敢徇隱卽據傳聞入告是鑽營受賄各節該總兵未經指實亦無憑駁辦奴才查辦此事固不敢迴護前言謬執已見亦何

敢文致人罪逆億其詞既未有歧異之案情處分自無甚出入疏入詔開去貝子毓櫛鎮國公全榮守護差使並交宗人府分別議處餘以次議處降革八月署鑲藍旗蒙古都統十一月命往庫倫查辦事件二十六年七月拳匪作亂鑾輿西狩命留京辦事二十七年正月授內大臣三月充督辦政務大臣六月管理兵部事務九月署步軍統領二十八年以病加恩開去對引差使並加恩在西苑門內乘坐肩輿二十九年五月授文淵閣大學士兩次因病奏請開缺均得旨慰留嗣以足疾不良於行再申前請允之仍賞食全俸歷蒙恩賞綢緞春紙紗葛神糕福壽字貂皮等件先後充稽察會同四譯館大臣稽察京通十七倉大臣管理馬館大臣東陵隨扈大臣查看紅椿大臣管理值年旗務大臣專操大臣管理左翼世職幼官學大臣管理雍和宮事務正白旗總族長崇文門副監督管理咸安宮三學大臣稽察右翼宗學管理新營房官房大臣對引大臣管理三庫事務管宴大臣查城大臣管理宗人府銀庫揀選官缺大臣大挑舉人大臣歷充考試漢廕生各直省鄉試覆試會試覆試閱卷殿試讀卷朝考閱卷考試漢中書閱卷考試孝廉方正閱卷庶吉士散館閱卷考試試差閱卷考試漢臚錄閱卷大臣三十三年三

月卒遺疏入諭曰致仕大學士崑岡學問優長老成恪慎由翰林洊擢正卿豐掌文衡旋登揆席充翰林院掌院學士並總理部旗事務宣力有年克盡厥職前因患病奏請開缺以大學士致仕賞食全俸方冀克享遐齡長承恩眷茲聞溘逝悼惜殊深著賞給陀羅經被派員勒載洵帶領侍衛十員卽日前往奠醑加恩追贈太子少保銜入祀賢良祠照大學士例賜卹任內一切處分悉予開復應得卹典該衙門查例具奏伊子郎中占鼈著以四品京堂候補用示篤念盡臣至意尋賜祭葬予諡文達子占鼈花翎三品頂戴候補四品京堂占鳳花翎二品銜前內閣侍讀學士

李鴻藻

李鴻藻直隸高陽人咸豐二年進士改翰林院庶吉士三年散館授編修四年九月充功臣館纂修以分錄貞觀政要賞文綺荷囊五年四月命在上書房行走七月充山西鄉試副考官十二月丁本生父憂七年二月服闋命仍在上書房行走七月提督河南學政十年上命大臣擇保儒臣堪膺授讀之任者大學士彭蘊章以鴻藻應得旨來京供職仍在上書房行走十一年三月特詔充大阿哥師傅穆

宗登極同治元年奉慈安皇太后慈禧皇太后懿旨李鴻藻及禮部尙書前大學士祁雋藻大學士翁心存工部尙書倭仁均著在弘德殿授讀京察引見詔遇有應陞缺出開列在前充日講起居注官三月治平寶鑑書成賞文綺五月擢侍講十一月轉侍讀十二月授國子監祭酒二年十月鴻藻以上釋服逾期與祁雋藻倭仁上疏略曰皇上沖齡御極智慧漸開當此釋服之初吉禮舉行聖心之敬肆於此分風會之轉移於此始玩好之漸可慮也嗜好之端一開不惟有以分誦讀之心而海內之仰窺意旨者且將從風而靡安危治亂之機其端甚微而所關至鉅可無慎乎伏願皇上恪遵慈訓時時以憂勤惕厲爲心事事以逸樂便安爲戒屏玩好以節嗜欲慎游觀以定心志省興作以惜物力凡內廷服御一切用項稍涉浮靡概從裁減雖向例所有亦不妨量爲撙節如是則外物之紛華不接於耳目詩書之啟迪益歛夫心思將見聖德日新聖學日固而去奢崇儉之風亦不令而行矣疏入上優詔褒答命將原摺交弘德殿以資省覽三年九月擢內閣學士兼禮部侍郎銜十月署戶部左侍郎四年十一月命在軍機大臣上學習行走仍兼弘德殿行走鴻藻疏辭上不許尋署戶部右侍郎五年二月擢禮部右侍郎仍

兼署戶部右侍郎三月調補戶部右侍郎兼管錢法堂事務旋命在軍機大臣上行走六月丁母憂奉慈安皇太后慈禧皇太后懿旨戶部右侍郎李鴻藻之母姚氏秉性淑慎教子成名今以疾終深可軫惻朝廷優禮大臣推恩賢母著賜祭一壇賞銀二千兩經理喪事由廣儲司給發以示眷懷李鴻藻事母至孝哀痛必切朝廷以孝治天下原應聽照例終制以遂孝思第該侍郎膺文宗顯皇帝特簡授皇帝讀盡心啟沃迄今六年夙夜罔懈皇帝春秋鼎盛緝熙典學功修正篤李鴻藻諄諄納誨皇帝樂從誠不可或離左右且軍務未平兼資翊贊溯查雍正乾隆年間大臣如孫嘉淦朱軾稽曾筠蔣炳于敏中等皆奉特旨任守制或開缺辦事入直內廷近今如曾國藩胡林翼閻敬銘亦皆奪情起用李鴻藻著開戶部右侍郎缺守孝百日後卽赴弘德殿授讀仍在軍機處行走凡遇朝會不必與列此係遵照列朝成憲權宜辦理日前召見醇郡王倭仁徐桐翁同龢再三垂詢均已深喻此意朝廷不得已之苦衷中外臣工應能共諒李鴻藻當思輔導皇帝弼成聖德移孝作忠莫大於是其勉抑私情以副先皇帝簡任之恩朝廷倚畀之重勿以守禮固辭鴻藻仍瀝陳呈由吏部具疏以聞復奉懿旨前因戶部右侍郎李鴻

藻之母病終推恩賜祭賞銀以示榮寵並令李鴻藻於守孝百日後仍赴弘德殿授讀在軍機處行走原係酌遵成憲從權辦理茲據吏部奏稱轉據李鴻藻呈稱該侍郎母氏苦節多年拊育教誨之恩纖毫未報一旦慘遭大故偷生視息負疚已深樞要之地綱紀攸關輔導聖學尤宜志行完粹之人若自蹈愆尤則進講獻納之際何以置辭懇請終制等語情詞懇切具見悃忱惟念李鴻藻膺文宗顯皇帝特簡授皇帝讀於今六年當此緝熙典學正就將日進之時該侍郎盡心輔導弼成聖德則所以慰天下臣民之望者莫大於是前因軍務未平各督撫等奪情起用者指不勝屈況機務殷繁尤資贊畫前降諭旨甚明李鴻藻惟當恪遵前旨仍於百日守孝後照常趨直用副先皇帝簡擢之恩第思該侍郎哀痛未忘不得不稍示區別前有旨令遇朝會不必與列尙不足以示體恤李鴻藻著遵照雍正年間世宗憲皇帝諭旨二十七月內不穿朝服不與朝會筵宴遇有祭祀典禮咸集之處均毋庸與列該侍郎當深感朝廷曲體之情勉抑哀思移孝作忠毋得再行陳請鴻藻復具疏呈由吏部代奏略曰先王制禮原準人情喪紀之設非徒以名義具文範圍後世蓋以人子之心必如是而後卽安鴻藻雖不才親喪自致之

念豈獨無之伏念鴻藻前以翰林院編修在河南學政任內被先帝特達之知召還京師畀以傳儲重任者蓋以鴻藻恪慎自將尙能謹守禮法也若親喪未終而出入禁闈則先已違禮忍情負罪名教鴻藻一人何足惜然不亦有傷先帝知人之明乎今皇上富於春秋典學正關緊要使以不祥之身而日侍經帷冒不韙之名而虛言啟沃在臣心則無以自安於聖學則何所裨益見在弘德殿行走諸臣如倭仁徐桐翁同龢等皆能守道竭誠盡心輔導此時雖鴻藻一人暫離左右似於緝熙進德尙不相妨至若趨直樞廷則是三年之喪儼然從政尤令鴻藻進退失據跼蹐無以自容鴻藻夙夜憂思欲堅持己見則似朝廷委曲矜恤而臣子冥不知恩欲勉承詔命則疚心實甚而終身無以自處煎灼昏迷惟有號泣伏惟天地高厚哀而憐之會倭仁等亦代爲陳請復奉懿旨前因皇帝典學功修正篤李鴻藻不可或離左右曾經召見醇郡王徐桐翁同龢詢問再三彼時醇郡王卽請降旨慰留倭仁等亦無異議次日復令軍機大臣與倭仁等商議亦以聖學爲重不持異同茲覽倭仁等摺內所稱李鴻藻事親盡禮見在奉旨奪情欲固辭則迹近辜恩欲抑情則內多負疚仍請准其終制等語倭仁等旣以奪情爲非禮何妨

於前次召見時據實陳奏乃爾時並無異議迨兩次降旨慰留後始有此奏殊不可解本日復召見倭仁徐桐翁同龢面加詢問據稱聖學關係甚重臣等亦願李鴻藻照常入直惟親見該侍郎哀痛迫切勢處萬難是以代爲陳請並無他意聖功緊要請仍令李鴻藻遵奉前旨等語是倭仁等亦知此次奪情之舉係屬不得已從權辦理想中外大小臣工亦必能共諒此意李鴻藻當思聖學日新四方多故盡忠卽所以盡孝前降諭旨業已詳盡其恪遵前旨毋得拘泥常情再三籲懇九月復命恭親王至鴻藻寓次傳旨令於百日後照常入直毋得再行固辭鴻藻疏言百日將滿自揣病軀實難入直復奉懿旨李鴻藻奏請曲予矜全等語情詞懇切深用惻然昨據御史張觀鈞奏稱賢臣不能久離請旨敦促並瀝陳該侍郎宜出任事各條頗爲詳盡李鴻藻受恩至重與國家有休戚相關之誼當此聖學日新軍務方急該侍郎豈能恣然於懷著卽於百日後仍遵前旨照常入直弘德殿軍機處以副委任俟將來扶柩回籍時仍當寬予假期俾得從容料理則忠孝兩全可無遺憾該侍郎務當仰體朝廷曲成之意毋得再行籲請十月鴻藻復疏陳病勢復奉懿旨李鴻藻著加恩賞假調理方今皇帝春秋正富典學方殷軍務

未竣四方多事該侍郎受國厚恩具有天良自當於病痊時照常入直竭力圖報諒不始終固執也至是鴻藻勉起違旨入值七年二月擒匪竄擾畿疆祁州饒陽相繼被陷鴻藻以各路諸軍統計不下十萬未聞痛加剿洗由於帶兵之員事權不一未免互相觀望疏請特派親王爲大將軍坐鎮京師以固北路左宗棠李鴻章爲參贊大臣分紮保定河間東西兩路各率所部兵勇相機剿辦陳國瑞爲幫辦軍務專統一軍爲遊擊之師策應各路直隸總督官文專顧省城籌備諸軍餉需以資接濟丁寶楨駐紮直東交界防賊東竄李鶴年駐紮直豫交界防賊南竄直晉交界由左宗棠等分撥勁旅扼要駐紮並請敕下各該大臣和衷商辦迅奏膚功奏入上遂命各路統兵大臣均歸恭親王節制十月服闋命仍在弘德殿軍機大臣上行走並署禮部左侍郎八年六月補戶部右侍郎兼管錢法堂事務仍兼署禮部左侍郎十年七月擢都察院左都御史八月授工部尙書九月上大婚禮成賞加太子少保銜懿旨以上親政伊始仍當不忘古訓命鴻藻照常入直盡心講貫十二月以明年恭逢慈禧端佑康頤皇太后四旬萬壽並上親政後首屆元辰鴻藻本生母姚氏年逾八旬特賞御書蘭陔春永扁額十三年三月充會試

副考官十月復賞鴻藻母姚氏御書扁額福壽字及如意錦綺諸珍物十二月穆宗毅皇帝升遐命鴻藻恭理喪儀光緒元年二月充實錄館總裁二年命在總理各國事務衙門行走三年九月丁本生母憂六年正月服闋命仍在軍機大臣及總理各國事務衙門行走尋署吏部尙書七年正月授兵部尙書六月命以兵部尙書協辦大學士八年調吏部尙書時四裔多故俄約議改幾致失和法人復於越南生釁輔佐諸臣屢爲言者論列十年三月懿旨以鴻藻辦事竭蹶開去一切差使降二級調用十一年二月補內閣學士兼禮部侍郎銜八月署吏部左侍郎十一月授吏部右侍郎十三年九月授禮部尙書時河決鄭州上命鴻藻馳驛前往會同侍郎薛允升詳查見辦大工情形十二月命督辦河南鄭州大工事宜會同河道總督李鶴年河南巡撫倪文蔚迅籌堵築先是李鶴年倪文蔚議於西壩興工鴻藻至仍之十四年正月續興東壩工鴻藻以料少時促變通原估辦法爲併工省料之計大河水勢變遷奇險疊生皆力爲守固會伏秋汛至西壩捆箱船失事阻礙進占七月疏請停緩大工俟秋汛稍平接辦上以鴻藻督率無方革職留任降爲三品頂戴褫河道總督李鶴年職命鴻藻暫行署理八月回京十月禮

部具奏典禮於籤改宣示日期並未照繕部議鴻藻應降四級調用懿旨改爲革職留任鴻藻原有革職留任處分例應革職加恩寬免十一月皇上下大婚鴻藻充大徵副使十五年正月禮成奉懿旨開復革職留任處分三月充會試正考官五月兼署都察院左都御史十八年五月兼署刑部尙書以二十年恭逢慈禧端佑康頤昭豫莊誠壽恭欽獻皇太后六旬萬壽命鴻藻總辦慶典十九年正月鴻藻年七十賜壽頒賞御筆福壽字及諸珍物八月兼署刑部尙書二十年正月以慶典成懿旨賞戴雙眼花翎並下部優敘三月充會試正考官八月署刑部尙書日本與朝鮮構釁邊事告警命鴻藻商辦軍務十月授軍機大臣二十一年六月命在總理各國事務衙門行走二十二年七月因病乞假九月假滿入對上以鴻藻體氣尙未復元特派內監扶掖並賞假一月十月命以禮部尙書協辦大學士尋調吏部尙書命免帶領引見歷蒙賞穿帶膝貂褂賜西苑門內紫禁城騎馬頒賞十朝聖訓高宗純皇帝御製詩文集文宗顯皇帝遺念冠服穆宗毅皇帝遺念冠服玃佩荷包白玉煙壺白玉鎮紙珊瑚水匙白玉筆架白玉水壺等件御筆春華秋實勤思啟沃嶽秀泉澄金石砥礪貞筠端玉聲名遠溢各扁額慈禧端佑康頤

昭豫莊誠壽恭欽獻崇熙皇太后御筆字畫團扇摺扇及諸上方珍物歷充經筵講官武英殿總裁玉牒館副總裁會典館副總裁管理三庫事務大臣教習庶吉士會試知貢舉順天鄉試各直省鄉試覆試會試覆試閱卷殿試讀卷朝考閱卷考試試差閱卷考試漢廕生閱卷大臣五次京察均特旨交部議敘二十三年三月因病乞假疾篤賞給藥餌命御醫往視七月卒遺疏入諭曰協辦大學士吏部尙書李鴻藻守正不阿忠清亮直由翰林荷先朝特達之知入直上書房同治元年欽奉懿旨任弘德殿授讀穆宗毅皇帝恩禮優加洊擢卿貳簡授軍機大臣朕御極後晉協綸扉先後三十餘年辦理一切事宜擘畫精詳殫心竭力前因患病疊次賞假諭令安心調理方冀醫治就痊長資倚畀遽聞溘逝悼惜良深著賞給陀羅經被派員勒載濂帶領侍衛十員卽日前往奠醊加恩予諡文正晉贈太子太傅照大學士例賜卹入祀賢良祠任內一切處分悉予開復應得卹典該衙門察例具奏靈柩回籍時沿途地方官妥爲照料伊子刑部員外郎李焜瀛一品廕生李煜瀛均著賞給郎中伊孫李宗侗賞給舉人准其一體會試用示篤念蓋臣至意復諭曰朕欽奉慈禧端佑康頤昭豫莊誠壽恭欽獻崇熙皇太后懿旨協辦

大學士吏部尙書李鴻藻秉性忠誠自贊襄樞務以來深資倚畀去年患病後尙復力疾從公本年春間因骹疾增劇疊次請假調理深宮時殷屢系特派御醫診視賞給藥餌並派員前往看視方冀就痊長承恩眷遽聞溘逝軫惜殊深著派郡王銜貝勒載溼帶領侍衛十員卽日前往賜奠用示篤念耆臣至意尋賜祭葬

畢道遠

畢道遠山東淄川人道光二十一年進士改翰林院庶吉士二十四年散館授檢討二十六年充山西鄉試正考官二十七年大考二等咸豐元年充國史館纂修二年大考三等四年四月充日講起居注官九月記名以御史用旋陞司經局洗馬五年三月擢翰林院侍講學士八月充順天鄉試同考官六年五月充廣西補行鄉試正考官十二月轉侍讀學士七年六月命協同批本八年三月署國子監祭酒七月充署文淵閣直閣事八月擢內閣學士兼禮部侍郎銜命稽察中書科事務十月充順天武鄉試副考官尋署禮部左侍郎十一月兼署兵部左侍郎九年六月署戶部右侍郎九月充知武舉十年五月偕大學士賈楨等奏陳山東團練事宜並酌保督辦幫辦各員得旨允行十月補兵部右侍郎十一年八月充順

天鄉試副考官十月署戶部左侍郎兼管三庫事務同治元年正月調補倉場侍郎七月丁父憂三年服闋四年二月補兵部左侍郎三月兼署禮部右侍郎又兼署戶部左侍郎兼管三庫事務五年四月命盤查戶部三庫七月調戶部右侍郎兼管錢法堂事務六年二月命往通州查收海運米石十月充順天武鄉試副考官七年授倉場侍郎九年丁母憂十一年服闋八月補原官十二年偕倉場侍郎延煦大學士總督李鴻章奏請江浙漕糧海運抵津擬改令糧道自行運通以除積弊諭曰向來江浙漕糧海運到津用官剝船到通交納乃行之既久弊端滋生本年海運白糧及輪船所載漕糧由改糧道自雇民船運通較用官剝船運送米色尙爲乾潔李鴻章等請將嗣後南糧變通辦理係爲剔除弊端起見著照所議所有來歲江浙漕糧卽著改由糧道運通交納毋庸在津運收十三年八月偕延煦奏請飭折漕之江西等省酌徵本色或籌款採買起運疏下戶部議行光緒八年正月陞補都察院左都御史兼管順天府府尹尋偕府尹周家楣奏建順天府衙門候質公所以杜私押諸弊請按歲提給經費日支口糧得旨允行八月充順天鄉試副考官十月賜紫禁城騎馬九年三月兼署禮部尙書十二月充署經筵

講官十年三月授禮部尙書充武英殿總裁四月充管理三庫大臣八月兼署都察院左都御史又兼署兵部尙書十三年因病篤懇請開缺允之道遠前後任倉場侍郎二十年屢以督率有方得優敘江浙漕糧自行運通之議實自道遠發之當道遠在任時宿弊爲少清焉凡充順天及各直省舉人覆試閱卷大臣八會試覆試閱卷大臣二殿試讀卷官三進士朝考閱卷大臣考試漢教習閱卷大臣各二考試漢謄錄及孝廉方正閱卷大臣各一十五年卒遺疏入諭曰前任禮部尙書畢道遠老成恪慎學問優長由翰林洊擢正卿兼管順天府府尹克盡厥職前因患病准其開缺調理茲聞溘逝軫惜殊深加恩著照尙書例賜卹任內一切處分悉予開復應得卹典該衙門察例具奏伊子工部候補郎中畢念承著俟服闋後以本部郎中卽補用示篤念耆臣至意尋賜祭葬

二

清史列傳 卷五十八

新辦大臣傳二

潘祖蔭

潘祖蔭江蘇吳縣人祖世恩官太傅武英殿大學士自有傳道光二十八年祖蔭以世恩八十賜壽賞舉人咸豐二年一甲三名進士授職翰林院編修四年二月充國史館協修四月世恩遺疏上奉旨以侍讀候補六月充實錄館纂修六年正月充功臣館纂修三月充會試同考官五月補侍讀九月充咸安宮總裁十一月詔在南書房行走宣宗成皇帝實錄慶成奉旨遇缺題奏卽行陞用十二月充文淵閣校理以捐備軍餉賞戴花翎四月署日講起居注官閏五月授侍講學士八年四月英人窺天津上疏請戰六月充陝甘鄉試正考官尋疏請酌加旗兵放款以固巡防下戶部議行十月回京署國子監祭酒十二月轉侍讀學士九年三月早上詣黑龍潭禱雨有廣開言路之奏九月補日講起居注官大考二等賞文綺十二月授大理寺少卿十年三月因湖南舉人左宗棠襄理巡撫駱秉章戎幕有

齟齬之者祖蔭三疏密保有云楚南一軍立功本省援救江西湖北廣西貴州所向克捷固由駱秉章調度有方實由左宗棠於地形阨塞險要瞭如指掌故賊縱橫數千里皆在宗棠規畫之中是國家不可一日無湖南卽湖南不可一日無宗棠也見在賊勢披猖東南蹂躪兩湖亦賊所必爭之地仰懇天恩飭下曾國藩駱秉章胡林翼酌量任用庶於湖南及左右鄰省均有裨益旋奉旨左宗棠以四品京堂隨同曾國藩襄理軍務又有四川軍務宜籌防剿之奏四月疏陳救時八策並團練章程十二條八月駕幸木蘭上疏切諫十一年八月署宗人府府丞十月與議文宗顯皇帝郊配大禮偕太常寺卿許彭壽疏言臣伏讀大行皇帝聖製甲寅孟夏詣齋宮卽事成什末句以後無須再變更注云天壇配享以三祖五宗爲定永不再增配位已見庚戌之旨恐後代無知故違朕旨則儀文太煩又有變更故末句云聖製詩恭懸齋宮永垂法守臣等誦維之下仰見大行皇帝言法行則至當至精初非博謙讓之虛名也臣等久值內廷仰瞻聖藻足爲千古定評何期弓劍未寒頓生異議爲臣子者於心何安伏乞皇上本繼志述事之誠盡尊親養志之道將王大臣會議及載垣陳孚恩黃宗漢各摺一併交大臣敬謹會議從之

又應詔陳言疏云伏見皇上迴鑾之後首斥奸佞綱紀一新朝野臣民額手相慶臣世受厚恩何敢安於緘默謹就禱味之見爲我皇上陳之一曰勤聖學夫典學之教三代所同周成以史佚爲師漢昭有韋賢之教降而東漢桓焉桓郁入授帝經史冊流傳侈爲盛美故宜首擇耆德重臣如翁心存倭仁王茂蔭者時加延訪以資矜式國朝向有日講之制大行皇帝初政曾國藩曾疏請行之今請敕下部臣酌議變通康熙舊制並於翰林中選擇數員日備顧問歲月漸摩養成聖德正本清源莫先乎此一日求人才保國之道得才爲先多事之秋用人尤亟方今理兵理餉動有乏人之憂惟楚南一隅得人爲盛要由曾國藩駱秉章胡林翼提倡以此而論天下大矣何才蔑有臣愚謂宜令在廷大小諸臣各抒所見各舉所知廣開言路毋拘常例果有學識超羣名實兼副者破格錄用夫使拘成格以求英俊是反鏡而索照也戒傲倖而絕言事是懲羹而吹齋也且自載垣等數年用事以來內外臣工未有一疏劾其罪者遂日長其跋扈不臣之氣其餘臺諫章疏大率毛舉細故者居多今請嗣後所有封奏卽賜批發其不足採擇者立予擲還庶委瑣之談不敢上瀆而伉直之氣得以稍申臣下所受者虛名國家所收者實效

不亦可乎一日整軍務今天下之亂日亟而軍事之弛日甚則事權不一軍法未彰之故也朝廷命將不下數十人或已鬪於穴中或猶觀於壁上各分畛域坐失事機臣愚以爲宜設經略節制各省如嘉慶年間辦川楚故事至若失事者自江浙兩省統兵大員張玉良李定泰等未膺顯戮人有玩心甚或如張玉藻者逃脫經年未聞就獲朝廷之法將何所施嗣後凡臨陣逗留城池失陷者立正典刑庶人知警畏矣一日裕倉儲國本以足食爲先今盜賊外訐倉儲內罄一旦乏食可爲寒心畿輔不足自食宜急籌採買之法見在湖廣漸就肅清已可耕種廣東上海寧波福建各海口道途通順宜廣設方略招集商人當於天津設立收米局派員董其事俟飛芻輓粟水陸麇集然後徐平其價如經費無出權開米捐照戶部捐輸例再減一成庶幾偏僻咸來可以集事一日通錢法自咸豐四年改用大錢後錢法益壞戶部鑄當十錢僅行都城之內鼓鑄累年徒耗經費至使銀價消長什一相懸官號奸商浮開虛票近復改行私票而銀價雖落錢價不增夫旣無當十之用而存當十之名無以利民適以病國臣愚以爲宜復制錢與大錢並用大錢又不可卽廢每緡用制錢十之七用大錢十之三俟一年以後大錢漸盡乃專

用制錢一面令戶部採銅精鑄一面令順天府尹督京縣官嚴諭各鋪力平物價庶幾上下交濟而錢法可修矣復陳時務四事一免各省之錢糧以蘇民困一汰釐捐之名目以紓民力一嚴行軍之紀律以拯民生一廣鄉會之中額以收士心疏劾候補鹽運使金安清在江北辦理釐捐大爲民害尋褫金安清職又以各省設立團練大臣辦理無效請分別裁撤以一事權而節糜費如所請行同治元年正月遷光祿寺卿二月兼署都察院左副都御史先是上諭南書房上書房翰林院等將歷代帝王政治及前史垂簾事蹟擇其可爲法戒者據史直書簡明注釋彙爲一冊至是年三月書成祖蔭等表進賜名治平寶鑑有文綺之賜六月因陝西營務廢弛疏列副將張維義總兵閻不敏提督孔廣順等罪狀以聞又以陝西回匪械鬪起事拘留督辦陝西團練大臣張芾殺斃武弁巡撫瑛棨不能聲罪致討徒以粉飾了事一誤再誤將爲雲南之續請命將如多隆阿者以剿甘肅撒匪爲名亟由潼關商雒兩路進剿劾署淮揚鎮總兵龔耀倫縱寇肆掠請旨查辦時捻匪披猖安徽山東江蘇河南四省尤甚祖蔭奏請於徐州四界司添設重鎮以制之略曰伏查安徽之賊蒙城池西而南數百餘里多爲賊巢而大股屯聚則在

宿亳太和靈璧一帶其地西界河南北界江蘇是安徽之邊境也山東之賊匪類紛雜嘯聚劫掠出沒無常不獨曹濮之間鄰於直隸河南者叢生姦宄其沿海則曰青曰萊其在山則曰蒙曰泗而賊勢尤熾之處厥惟沂郡之西兗郡之東其南界江蘇者山東之邊境也河南之地其界於山東江南者曰陳州曰歸德而賊蹤之往來賊壘之屯集則虞城夏邑永城之東履錯而踵接焉是河南之邊境也江蘇之地徐州一屬實界三省賊之竄匿海流者其餘燄耳若邳州若蕭陽則狼跳其穴而虎負其嵎也是江蘇之邊境也夫統計四省而賊之所據邊境最多是由封疆大吏未忘畛域之心致使草澤奸民日長蔓延之勢賊之出掠名曰裝旗任其所之而被掠遂爲習見之事賊之歸巢名曰回哨聽其自反而賊巢儼如化外之鄉勢必舉數省交錯之地委而棄之使賊得而蹂躪焉盤踞焉且紛歧而錯出焉而鄰省州縣止爲諉卸之謀邊境防兵徒作送迎之計揆茲積弊有由來焉且夫團練之法興而械鬪抗糧之案踰時疊出矣堅壁之議建而分疆畫界之圖立寨爭雄矣招撫之策施而陽奉陰違之患乘機竊發矣近來東省皖豫圩寨皆成其顯踞爲賊巢者固無論矣至如江蘇徐屬境內圩寨頭目類多恣睢自專通賊

貌官截遏行旅驕蹇跋扈無所不爲不於此時畫策以制之臣恐陰懷叵測據有事權者馳一介之使要結而迫脅之奉其號令恃其聲援一旦有變固東路咽喉之慮亦中原心腹之憂也臣聞方今剿匪僧格林沁一軍督戰最爲得力捻逆畏威往往望風納款受降之後給與免死大旗及至兵退而焚掠如前地方官莫敢過問見如鄒縣鳳凰山一帶之匪旣降復叛將山口堵塞擁衆數萬劫掠公行名爲就撫其實緩兵此其明證也是卽轉撫爲剿而歲月遷延餉需糜費事機更變精銳摧殘臣不知一戰之勝賊被芟夷者幾何而一日之間民被裹脅者幾何曠日持久庸有濟乎臣舊聞徐州府屬地當孔道設有四界司一官彼固末秩微員據四縣之衝而名之耳竊見徐州一郡實爲四省交衝擬請添設四界鎮總兵一員四界分巡兵備道一員凡四省沿邊州縣悉歸管攝其駐紮之所必酌乎四界之中其餉由四省籌辦其兵由四省酌撥抑或自行召募務使糧足兵強克爲重鎮然後責以辦賊來者拒之過者遏之四界之內有警則救之四界之外乘便則攻之與以專制之權卽重以守邊之罰並合界內外寨圩聽其節制或更選各寨頭目之子弟置之軍中量能委用羈縻駕馭必惟其宜庶諸路有進擣之軍而衝

要有控扼之鎮已方今四省撥兵甚難查有田在田一軍素在徐屬屯紮田在田統兵無律畏葸居心曩時捻匪出巢田在田名爲巡剿其實避道而趨今春捻匪竄擾清淮田在田行至宿遷並未見賊欲進城圩居民防守甚嚴不能縱掠竟敢開槍攻圩踏毀宿遷縣官坐轎搶奪守城將弁器械田在田並不查究所統兵勇又多係徐宿之人與賊潛通是不獨虛糜軍餉也卽有制寇之兵而田在田一軍在彼牽掣擾亂勢必無功相應請旨將田在田從嚴查辦按其見統兵數加以挑選淘汰作爲四界鎮主兵其有不足再由四省酌撥方今將才難得時會難稽擬請敕下兩江總督曾國藩保送文武幹員並會同署漕運總督吳棠暨四省巡撫妥速具議章程又因楚軍近逼金陵請嚴通州靖江泰興等處江防劾浙江金衢嚴道江允康西安縣知縣丁壽辰劣蹟爲蘇常殉難紳民援案請卹天津通州一帶疫氣流行請照乾隆道光年間諭旨敕下直隸總督順天府尹五城御史遵照舊章妥爲辦理七月充山東鄉試正考官十一月奏劾陝西布政使毛震壽擁兵騷擾索賄貪婪狀以直隸總督文煜持祿養交事多坐廢請旨早予罷斥另簡重臣以慎畿防疏薦前任提督鄭魁士傅振邦已革副將吳再升請旨起用又以欽

差大臣勝保驕蹇不法列狀請旨查辦二年正月署宗人府府丞四月以江南郡邑漸就蕩平奏請酌減賦額會江蘇巡撫李鴻章亦以入奏部議蘇松太三屬三分減一常鎮二屬十分減一七月恭編文宗顯皇帝詩文全集進呈頒賞一部並賜顧繡蟒袍文綺十月劾甘肅布政使恩麟玩誤粉飾濫保各款以呈遞該省紳士無姓名信函命傳旨申飭所奏仍交多隆阿查辦三年三月補都察院左副都御史七月署工部右侍郎兼管錢法堂事務十月會議兩江總督何桂清罪名以未經會銜下部議處四年三月恭親王被劾獲譴奉旨會議祖蔭覆奏云毀譽之言聽者必察家庭之事人所難爭恭親王自議政以來咎固難辭功原足紀重臣進退關繫安危尙祈持平用中熟思深計察其悔過酌予轉圜庶不紊黜陟大綱滋天下後世之惑五月山東曹州一帶捻逆披猖奏請由上海運解火器以資攻剿十一月署禮部右侍郎稽察西四旗覺羅學五年三月署刑部右侍郎左侍郎十二月補工部右侍郎兼管錢法堂事務六年四月派查勘福陵工程七年三月署吏部左侍郎閏四月調戶部右侍郎兼管錢法堂事務恭進篆寫說文藝文備覽各四函賜文綺十二月充經筵講官八年轉左侍郎兼管三庫事務九年十月

充武鄉試副考官十一月署吏部右侍郎以捐備軍餉賞正一品封典十年正月
充會試知貢舉九月充武會試副考官十一年穆宗毅皇帝大婚禮成賞頭品頂
戴十二年三月上祇謁東陵充隨扈大臣尋以戶部行印遺失部議革職留任六
月署吏部左侍郎八月充順天鄉試副考官十二月以中式舉人徐景春試卷文
理荒謬部議降二級調用奉旨改爲革任十三年正月賞翰林院編修仍在南書
房行走六月因報效銀兩詔開復革職留任處分以三品京堂候補十月慈禧端
佑康頤皇太后四旬萬壽恭進賦冊命以侍郎候補光緒元年三月授大理寺卿
八月署禮部右侍郎二年正月署刑部右侍郎四月補禮部右侍郎六月恭編穆
宗毅皇帝全集進呈頒賞一部並賜袍褂帽緯八月署工部右侍郎兼管錢法堂
事務九月充玉牒館總裁十月充武鄉試正考官三年充武會試正考官四年五
月調戶部右侍郎兼管錢法堂事務管理三庫事務七月派稽查十七倉九月充
實錄館副總裁十二月復充經筵講官署工部右侍郎兼管錢法堂事務五年正
月轉左侍郎擢都察院左都御史三月遷工部尙書穆宗毅皇帝孝哲毅皇后奉
安惠陵禮成賞加太子少保銜管理溝渠河道四月遵議吏部主事吳可讀遺疏

請豫定大統之歸借尙書徐桐翁同龢疏云閏三月十七日發下主事吳可讀一摺臣等謹赴內閣公同集議竊思吳可讀所陳豫定大統此窒礙不可行者也我朝家法不建儲此萬世當謹守者也臣等恭繹同治十三年十二月懿旨於皇子承嗣一節所以爲統緒計者至深且遠聖諭煌煌原無待再三推闡今吳可讀既有此奏而懿旨中復有卽是此意之諭特命廷臣集議具奏若不將聖意明白宣示恐天下臣庶轉未能深喻慈衷臣等以爲宜申明列聖不建儲之彛訓將來皇嗣蕃昌默定大計以祖宗之法爲法卽以祖宗之心爲心總之紹膺大寶之元良卽爲承繼穆宗毅皇帝之聖子揆諸前諭則合準諸家法則符使溥海內外咸曉然於聖意之所在則詒謀久遠億萬世無疆之業實基於此疏存毓慶宮是月調刑部尙書十月賜紫禁城騎馬十一月穆宗毅皇帝實錄聖訓全書告成賞加一級六年三月署工部尙書九月命借惇親王醇親王翁同龢辦中俄交涉事件七年正月充國史館正總裁以俄國定約借惇親王醇親王翁同龢條陳善後五事一日練兵一日簡器一日開鑛一日造船一日籌餉八年八月署禮部尙書十一月命在軍機大臣上行走九年丁父憂十一年四月服闋命署兵部尙書仍在南

書房行走八月充順天鄉試正考官尋遵議江西學政陳寶琛奏請以故儒黃宗羲顧炎武從祀文廟祖蔭覆疏云臣等謹按從祀之典古無所見禮記文王世子凡學春官釋奠于其先師秋冬亦如之又凡始立學必先釋奠于先聖先師鄭元注先聖周公若孔子先師漢禮有高堂生樂有制氏詩有毛公書有伏生此爲言從祀之始漢魏以還闕焉未舉唐貞觀二十二年詔左邱明二十二座春秋二仲行釋奠之禮繼遂以周公配成王而以孔子爲先聖此爲定從祀之始推原事始蓋本樂祖瞽宗之義凡從祀先聖者皆博士弟子所從承學轉相授受之本師沒則各以其師附祀所謂將習其道必各祭其師證諸古誼斯爲最合濂洛諸賢挺生宋代卓然爲世大師元明以來疊爲增祀亦因士習其教故以崇德爲報功追契始初並非相悖厥後請祀紛紛無關茲義我朝禮教昌明動循古法道光九年特旨不准李容從祀蓋懼空談心性者冒越其間實與唐人創始之心若合符節臣等遠遵其義近稟聖謨謹覈黃宗羲顧炎武之生平及素所服習該故儒之遺書竊謂宗羲炎武皆有傳經之功衛道之力崇正遏邪之實效敢舉其合於從祀之誼者條例上聞我朝文治昌明經師輩出諸經各有專家專家各有疏義精研

小學淹貫羣經者尤難指數蓋自三代以來經學至國朝而極盛而上溯淵源並推至黃宗羲顧炎武而止卽至辨書古文之僞發古韻之微深通天算博稽地理凡樸學之專門皆該二儒之遺緒迄今著述炳在人寰傳授旣繁淵源有在是凡讀其書習其言者皆以該二儒爲轉相授受之本師故道光年間京朝各官特建顧炎武祠於京師春秋祀事直省學人咸爲執事迄今不絕蓋亦未有之創舉矣臣等以爲人心所在卽定論所憑各省名臣達官實不乏人何以獨祀該故儒此卽所謂將習其道必各祭其師皆發於人心之不自覺臣等準之古誼以爲黃宗羲顧炎武當從祀者此其一然僅合古誼而或乖今制臣等亦不敢妄請伏讀道光九年宣宗成皇帝聖訓先儒升祔學宮祀典至鉅必其人學術精純經綸卓越方可以俎豆馨香用昭崇報咸豐年間議准從祀先儒應以闡明聖學傳授道統爲斷臣等查黃宗羲編定明儒學案綜二百年學術升降之原會通融貫雖出自戴山而於姚江末派痛予斥絕故河東姚江兩得其正創修宋元學案條分派別祇斥邪而崇正不伐異而黨同其稱朱子謂致廣大盡精微綜羅百代推挹可云極至顧炎武不立講學之名而有蹈道之實其論學之旨謂聖人之道曰博學於

又曰行己有恥又謂今之理學禪學也不取之論語五經而但資之語錄不知本矣故所學一以肫篤精實爲主而無囂張之氣門戶之私至推崇朱子其所著日知錄皆可覆按夫亦足以當學術精純之日矣然猶未證諸實效也明季心學盛行顏山農何心隱李贄之徒標目狂禪蕩無禮法細行不矜束書不觀學術既壞國運隨之黃宗羲排斥其根株顧炎武痛絕其支蔓自二儒興而禪學息矣禪學息而樸學起矣絕續之交固由國運之隆亦該故儒教澤之力所謂闡明聖學傳授道統者非與至於經綸卓越之稱該二儒皆以經濟交推特以身丁末造心在勝國自不能奮跡聖朝各抒偉略如顧炎武日知錄所載正定之轄五州二十七縣蘇州之轄一州七縣而蘇州之糧三百三萬八千石正定之糧止一十萬石王者則壤成賦豈有大小輕重之不同若此者後之王者審形勢以制郡縣則土田以起徵科乃平天下之先務此卽列聖減定浮糧及增設直隸州改併州縣之議其他鑒明人之失開我朝之法者不可枚舉而肇域志宅京記諸書具有深意尤非僅輿地之學蓋與宗義明夷待訪錄同爲經濟家必資之書矣夫空言經濟能欺一時而不能垂之後世至傳之二百餘年而讀者尤思取法則其非空言經濟

可知矣臣等準之今制以爲黃宗羲顧炎武當從祀者又其一凡若此而無列聖之定評猶未敢遽定也黃宗羲顧炎武經四庫著錄之書原案已經詳列提要廢許之語學者無不周知臣等勿庸復爲引敍惟欽定國史儒林傳於黃宗羲傳內稱其上下古今穿穴羣言自天文地志九流百家之教無不精研於顧炎武傳內謂其歛華就實扶弊救衰又謂國朝學有根柢以炎武爲最如謂四庫提要中有一二糾正之語遂卽寢議此正不然提要爲敍錄之體意在解題係專爲一書而發非是統論全學譬如詩有正變書有真僞而至今並尊爲經未嘗有所偏廢遠者無論矣臣等卽就國朝之得從祀者言之如陸世儀思辨錄提要則謂其不免迂闊陸隴其向學錄提要則謂其過於主持孫奇逢四書近指提要則謂其不免高明之病至張伯行所著理學各書斥入儒家存目一字不登向使當時禮臣必據提要之辭以爲論定則陸世儀卽不應俎豆於兩廡矣湯斌國朝從祀之儒之至純至正者也而推黃宗羲之辭曰黃先生論學如大禹導水導山脈絡分明吾黨之斗杓也其與顧炎武書謂吾道之衰久矣得大力闡明豈非斯人之幸茲數語者苟非宗羲炎武孰敢當此苟非湯斌深知宗羲炎武亦何能發此況湯斌在

史館得黃宗羲一書謂宋史道學傳乃元人之陋習遂示於衆而去之其志同道合可略見矣聖主之評如此賢臣之評如此幾乎無所致疑矣此臣等準之成憲以爲黃宗羲顧炎武當從祀者又其一以上三端容有未盡之語而初無溢美之詞俎豆馨香洵無愧色乃者禮臣具稿力從駁議臣等實不敢苟立異同亦不敢隨事附和卽如陳寶琛疏中有宗羲興於前炎武繼於後二語查二人生旣同時初無先後之分學又異派更無倡繼之說該學政措詞偶誤臣等亦不曲爲之諱然因此謂其不明學術因並斥其所請之人固不可也臣等稽之古訓求之輿論以爲該故儒之從祀實順人心而不違成例況我皇上緝熙典學正當審辨學術以風示天下將因以求所謂師以賢得民儒以道得民者以爲治天下之本是該故儒從祀之典似亦繫乎時政而非徒滋論議者矣臣等公同商酌擬請旨准將黃宗羲顧炎武從祀文廟儻因祀典重大未能驟定應請旨敕下大學士六部九卿翰詹科道再行詳議具奏部議格不行十一月補工部尙書十二年二月上恭奉慈禧端佑康頤昭豫莊誠皇太后祇謁東陵充隨扈大臣十月充會典館副總裁十二月管理溝渠河道十三年四月充管理八旗官學大臣九月兼理順天府

府尹事務議增建貢院號舍十四年署戶部尙書復管理溝渠河道十五年正月
慈禧端佑康頤昭豫莊誠皇太后歸政屆期奉懿旨交部議敘是月皇上帝婚禮
成賞加太子太保銜並加二級三月充會試副總裁七月充順天鄉試監臨時浙
江水災奏請由順天府撥賑銀各一萬兩捐廉爲本籍助賑十六年六月順天二
十四州縣水災偕府尹陳彝籌放義賑疏請擇地添設粥廠以便附近災民就食
並懇欽派三四品京堂分駐稽察彈壓監放八月以順屬飢民衆多轉瞬嚴寒生
路更窘奏請更賞給米石九月奏大興縣境添設粥廠兩處冬春賑務爲日方長
請撥銀米以資嬰需十月患病猶疏請撥銀米以備冬撫之用均如所請行旋以
疾甚請假越三日卒祖蔭自任侍郎後鄉試覆試閱卷十三次會試覆試朝考散
館閱卷各七次殿試讀卷四次考試試差優貢朝考閱卷各四次拔貢朝考閱卷
二次考試御史閱卷六次考試學正學錄漢廕生閱卷各一次考試漢教習閱卷
二次考試孝廉方正閱卷五次考試漢膳錄閱卷三次遺疏上諭曰工部尙書潘
祖蔭學問淵通才猷練達於咸豐年間由翰林入直南書房垂四十年勤勞最著
歷受先朝知遇疊掌文衡洊陞卿貳朕御極後優加倚畀擢任正卿加太子少保

銜在軍機大臣上行走丁憂服闋補授工部尙書並兼管順天府府尹加太子太保銜本年近畿水災盡心籌畫勞瘁不辭前以偶染微疴賞假調理遽聞溘逝軫惜殊深著賞給陀羅經被派員勒載溘帶領侍衛十員卽日前往奠醊賞銀二千兩治喪由廣儲司發給加恩晉贈太子太傅照尙書例賜卹任內一切處分悉予開復應得卹典該衙門查例具奏伊弟潘祖年著賞給郎中分部學習行走伊子潘樹孳著賞給舉人准其一體會試其靈柩回籍時著沿途地方官妥爲照料用示朕篤念蓋臣至意尋賜祭葬予諡文勤十七年直隸總督李鴻章奏寶坻縣紳士前湖南衡永郴桂道方學蘇等呈稱去歲大水爲災數十年所罕見寶坻地居窪下受患尤深原任工部尙書兼管順天府府尹潘祖蔭一聞災信先行撥款飛飭印委辦理急撫內則瀝情入告外則函電四馳爲民救災無微不至本屆待賑人數倍於往時飢者給食寒者授衣全活甚衆秋冬以來屢傳該紳等詳詢賑事形神顛頓若疾痛之在身竟以積勞一病不起聞信之日士民相弔若喪其私感人之深實難泯沒今擬集資爲故兼尹潘祖蔭建立專祠由地方官春秋致祭以申報饗臣維去歲被水以後屢接兼尹臣潘祖蔭來函言及災况憂勤之意流溢

行間心竊敬之身後檢其遺牘手寫告災乞賑之書多至千數百件病中喃喃皆言賑務揆之禦災勤事之義洵爲無愧詔如所請子樹孳恩賞舉人

彭玉麟

彭玉麟湖南衡陽人道光三十年由附生隨官軍平新寧土匪保訓導辭歸咸豐三年侍郎曾國藩駐軍衡州聞其名檄募水勇與千總楊載福各領一營四年二月曾國藩進規岳州檄往西湖搜剿玉麟帶勇三十餘人斃髮逆三十餘獲其船紋縣丞四月偕楊載福破賊湘潭焚六百艘以知縣遇缺卽選六月進攻岳州伏兵君山以小艇誘賊出與楊載福等合擊大破之岳州賊宵遁七月賊自下游再至玉麟繞湖西遙躡其尾賊以大艦數號來犯玉麟發大礮中賊十餘人賊退與楊載福急追之斬僞丞相一名曾國藩奏玉麟忠勇性生氣吞兇逆奮不顧身詔加知州銜並賞戴花翎旋擊賊捕鼓臺以師船七十餘當賊五六百艘冒險鏖戰受三傷裹創復進奪五色龍船一得旨以同知選用復破賊城陵磯八月大軍克湖北武昌漢陽九月玉麟擊賊蘄州敗之又敗諸釣魚臺十月進逼田家鎮時上游逸賊盡萃於此守備甚嚴玉麟與楊載福決策分舟師爲四隊頭隊操小舟具

爐韞椎斧飛槩疾進鎔其橫江鐵鎖自將二隊遏賊援楊載福將三隊候鎖斷下駛大燒賊船四隊守本營防賊上犯又議先燒上游逆船則下者遠竄不如直下數十里逆攻而上可以盡殲及戰悉如所議楊載福突下武穴乘東風返棹上攻玉麟順流夾擊毀賊船四千餘奪獲五百餘玉麟慮軍士互爭且飽則思颺悉焚之捷入記名以知府用尋追剿至九江沈其船百餘十一月破之小池口進新港躍入賊陣獲大礮十餘明日又破之十二月擊湖口賊擒僞將軍梁國安等五年二月賊上犯再陷武昌漢陽三月玉麟自金口進剿敗賊於武昌城南鮎魚套時北岸陸軍與賊戰失利水師向不離船玉麟見賊猖獗恐大挫誤全局督衆登岸截擊破之署湖北巡撫胡林翼奏稱玉麟變計從權保全之功甚大協和之誼可嘉四月攻塘角焚賊船二百餘又屢捷於武漢兩岸六月授浙江金華府知府留營剿賊七月自沌口進拔蔡店及北岸宗關南岸慈菴渡二石城五顯廟者賊踞爲總巢穴四面阻湖賊戰船環衛其下險不可踰玉麟督攻之死亡相繼因號於衆曰已入虎穴非血戰不能出險成功指麾畢前敵張兩翼急槩以進衝賊船尾自督大隊摧賊卡一奪船八獲礮六十有六復督隊徑出賊船之下循兩岸包剿

乘勝出襄河口斷其浮橋鐵索獲賊船七登北岸毀鑄礮局火藥局十餘破僞石城二仍入襄河乘夜搜捕漢陽餘匪擒僞官蕭朝富僞軍師吳會元等並長髮賊二百餘時南岸賊仍踞五顯廟玉麟麾軍攻拔之連毀晴川閣木城二又破之葉家洲燒賊船二百餘胡林翼奏稱玉麟忠勇冠軍膽識沈毅坐舢板督戰被礮中斷其桅神色不變得旨記名以道員用旋乞假歸嗣以曾國藩調赴江西徒步行七百里抵南康國藩派領內湖水師扼剿臨江六年正月敗賊樟樹鎮攻臨江諸壘又敗之二月授廣東惠潮嘉道留營如故三月破賊於吳城之上遊又破之涂家埠五月賊犯吳城擊卻之六月克南康府七月敗賊謝司塘追至屏風南風忽作賊回棹猛攻其地距老營百三十里不能歸玉麟令大舟下旋坐戰發礮如連珠賊反奔二十里始全隊而還七年二月曾國藩丁憂回籍詔以楊載福統帶水師玉麟協同調度九月湖北陸軍既再克武昌漢陽水陸同下圍九江攻湖口賊扼石鐘山梅家洲遏內湖水師不令合外江玉麟率全軍分三隊出戰賊於巖腹置巨礮正當船衝前鋒中礮哨官死之玉麟令前船還後船次進傷十餘舟不一顧或諫阻之玉麟曰水陸用兵五年精銳忠勇之士亡者千數不破此險勢無生

理鼓棹赴之賊礮焦裂我船銜尾直下得與外江水師合陸軍從城背山下應之賊大奔遂進奪小姑山賊壘賞加按察使銜八年會克九江府城晉布政使銜九年偕楊載福攻安徽池州韋志俊以城降其黨古隆賢復攻陷之十年四月與楊載福敗賊於樅陽五月署兩江總督曾國藩疏薦玉麟任事勇敢勵志清苦有古烈士風堪勝總辦水師之任請將蕪湖以上江面戰守機宜由楊載福會同玉麟妥辦得旨報可十一月安慶援賊犯彭澤並圍湖口玉麟分兵赴援均擊走之復遣將克都昌得旨交軍機處記名遇有按察使缺出請旨簡放十一年三月赴援湖北攻孝感克之旋授廣東按察使督師如故五月偕道員蔣凝學克武昌縣破興國州龍港賊巢八月安慶克復下部優敘尋克天門應城蘄州並克黃州九月授安徽巡撫玉麟疏辭詔嘉其真實不欺仍著帶兵勇赴任十月上以苗沛霖攻破壽州見復求撫心懷反側命玉麟統籌大局商酌覆奏尋疏稱苗沛霖叛逆昭著巢穴已成始終皆誤於撫宜一意剿除之十一月命幫辦袁甲三軍務穎壽各軍悉歸調遣玉麟以不習陸戰自楊載福假旋水師亦未可遽離仍乞開安徽巡撫缺疏再上詔以水師提督記名遇缺題奏尋又諭曰該員本係文職出身見在

帶領水師有節制鎮將之任驟令改膺武職不足以資統率彭玉麟著以兵部侍郎候補同治元年正月授兵部右侍郎三月偕江蘇布政使曾國荃督師東下復巢縣含山和州奪銅城牯雍家鎮裕溪口西梁山進拔魯港南陵四月克太平蕪湖並克金柱關東梁山各要隘五月曾國荃攻秣陵關時玉麟駐師金柱關聞曾國荃懸軍深入恐爲賊所乘急約提督王明山率水師渡江策應會曾國荃攻拔頭關玉麟率王明山等偪賊江心洲各勇挾火具登岸躍入賊牆燒燬無算復登舟飛行攻克蒲包洲扼江寧護城河口以爲曾國荃陸軍聲援先是僞護王陳坤書擁衆四五萬突入太平府之張公橋圖犯金柱關閏八月玉麟遣將往禦五戰卻之二年三月分軍渡江援石澗埠解其圍四月連克東關銅城牯五月會楊岳斌軍克江浦浦口又克下關草鞵峽燕子磯奪九泐洲僞城八月破陳家村解青陽圍九月克窯灣金寶圩水陽新河莊塘溝等賊壘十月克滄溪長樂賊酋楊友清降遂復高淳又同提督鮑超軍克東壩建平溧水之賊皆以城降賞穿黃馬褂三年正月與曾國荃攻克鍾山石壘江寧之圍始合六月省城克復紅旗奏捷詔給一等輕車都尉世職加太子少保銜四年命署理漕運總督玉麟再疏辭並乞

開兵部侍郎缺簡員料理長江水師善後應辦事宜諭曰覽奏情辭懇摯出於至誠著准其開漕運總督署缺所有長江水師善後應辦事宜著該侍郎妥爲料理六年以歷任養廉銀報捐充餉下部優敘七年三月與曾國藩奏定長江水師營制自荆岳二州至崇明縣五千餘里凡設提督一員總兵五員以六標分汛營哨官七百九十八員兵丁一萬二千人月餉雜費歲需銀六十餘萬兩以長江釐稅供支不煩戶部六月疏言臣墨經從戎創立水師非敢曰移孝作忠良以先臣曾受朝廷一命之榮臣母亦時以忠義相勸當多難之日義不得顧私情也臣素無室家之樂安逸之志治軍十餘年未嘗營一瓦之覆一畝之殖受傷積勞未嘗請一日之假終年風濤矢石之中未嘗移居岸上求一日之安誠以親服未終出從戎旅旣難免不孝之罪豈復爲身家之圖臣嘗聞士大夫出處進退關繫風俗之盛衰臣之從戎志滅賊也賊已滅而不歸近於貪位長江旣設提鎮責有攸司臣猶在軍近於戀權改易初心貪戀權位則前此辭官疑於作僞三年之制賢愚所同軍事已終仍不補行終制涉於忘親四者有一焉皆足以傷風敗俗夫天下之亂不徒在盜賊之未平而在士大夫之進無禮退無義伏維皇上中興大業正宜

扶樹名教整肅綱紀以振起人心臣豈敢稍犯不韙以傷朝廷之雅化仰懇天恩開臣兵部侍郎本缺回籍補行終制靜養病軀得以醫治則報國之日正長斷不敢永圖安逸優詔許之七月曾國藩調直隸總督上以長江水師營制初創恐提督黃翼升一人不足以資控制命玉麟百日後迅赴江皖地方扼要駐紮俾各舊部有所稟承尋玉麟密保文武人材堪重任者記名提督歐陽利見雲南池東道蔡錦青等五員八年回籍十一年詔趣玉麟簡閱沿江水師玉麟疏陳水師事宜四條曰將材宜慎選曰積習宜力除曰軍政宜實講曰體制宜復舊並疏薦福建水師提督李成謀大名鎮總兵彭楚漢堪勝專閫之任劾罷營哨官百八十餘人九月陛見尋署兵部右侍郎賜紫禁城騎馬嗣以傷疾未痊懇請開缺詔許之仍命赴長江一帶會同李成謀布置周妥再行回籍又諭嗣後每年著巡閱一次遇有應行參劾及變通之處准其專摺具奏應需辦公經費著兩江湖廣總督籌款交該侍郎支領十二年奏定巡閱章程並請巡江經費毋須兩江湖廣總督另籌以節糜費如所請行光緒元年玉麟上疏籌自強之計曰清吏治曰嚴軍政曰端士習曰蘇民困優詔答之二年賜剿平粵匪擒匪方略各一部六年五月應詔保

舉人才薦文員候選道李概等十六人武員正定鎮總兵婁雲慶等十七人九月疏請添造十八丈小兵輪十艘以爲江陰以下海防之用七年二月疏陳開辦鐵路有害無利又請於江陰以上焦山以下南岸圖山關北岸東生洲擇要修築礮隄營壘又焦山都天廟兩處舊修暗礮臺改造明礮臺八座七月命署理兩江總督兼署通商大臣玉麟再疏辭詔以左宗棠代留督江海防如故八年京察下部優敘時言者議改長江水師提督駐吳淞口外移江南提督治淮徐轄陸路上命疆臣會議玉麟疏言長江水師管轄江面汛地計水程近六千餘合兩岸而計路逾萬里僅以六百二十一哨分布其間深恐照料難周乃爲此按年輪駐之計而本署有應辦之公事巡次有遞及之地段蓋兼顧若斯其難也今若以長江提督駐吳淞口外而以江南提督移駐淮徐徒於淮徐兩鎮之外益一專轄陸路之提督是偏重也臣等竊以海防江防宜因緒推廣就勢變通斯爲兩得之道江南提督責在海防宜多畀以得力之兵輪使海上一軍卓然有以自立防海乃能防江也長江提督責在江防仍由臣玉麟每年督同巡閱而以駐岳州府之半年改駐吳淞口外俾與李朝斌就近會操兵輪以通江海之氣脈有事仍專力江防使防

海者無後顧之慮防海亦須防江也九年正月擢兵部尙書玉麟以衰病疏辭得旨俟病體稍愈卽行來京陛見毋庸開缺翰林院侍講盛昱劾玉麟抗詔鳴高開功臣驕蹇之漸命遵前旨卽行來京是年法越構兵法人聲言以大隊兵船至廣東尋釁八月上以廣東兵力單薄守禦尙虛命玉麟酌帶舊部得力將弁酌量招募勇營迅速前往廣東會同張樹聲裕寬妥籌布置玉麟具疏略言江海原相表裏海上有事江防亦形喫緊長江水師得力將弁不便調歸陸路招募勇營則強所不能以爲能且由湘至粵二千餘里新軍初立難保沿途不滋事端與其在湘募勇糜費而不能救急莫若於粵東就地取材粵中義憤果敢之士尙多當經函商兩廣總督張樹聲等遴擇公廉紳士速集團練俟臣到粵後按照陸營規制慎選營官統領勤加操練嚴定賞罰臣於十月輕裝由衡單騎入粵如法兵先已薄城則順化河一路守備自必空虛擬一面協守一面密咨雲貴廣西督撫各派驍將率領精兵數千督同提督劉永福所部出法人不意疾擣順化河及西貢敵營並請密諭滇蜀各督撫豫先布置乘機赴會又疏陳見在通商二十餘國應將不得已而用兵之故宣示各國使知其曲在彼因以攜其黨而敗其謀疏入均報聞

十二月上以瓊州備禦空虛諭玉麟擇地駐紮飭所部各營與鄭紹忠一軍會合吳全美師船扼守瓊州彭玉麟務當相機調度不必親赴瓊州以期慎重毋稍疏虞玉麟尋委候補道王之春率毅字二營又抽調鄭紹忠安勇二營赴瓊州防堵既又派記名提督黃得勝駐營越南交界之欽州靈山一帶防內匪勾結十年正月以瓊州孤懸海外四面受敵飭王之春添募水陸勇營並檄提督吳全美將分駐龍門一營飭調赴瓊分別布置又以北海龍門一帶與瓊州隔海相望鎖鑰西路未便空虛飭高州鎮總兵張得祿選募壯勇兩營馳赴欽廉擇要屯紮與辦理西路團練之馮子材李起高等遙作聲援二月督同總兵婁雲慶等疊勘營地於虎門外沙角大角二處安設礮臺以婁雲慶五營進紮沙角以提督王永章劉樹元二營分紮大角與提督方耀防守上下橫檔及威遠礮臺之軍勢成掎角又飭副將劉迪文管帶紅單船二十隻配齊礮位爲靖海水師營分泊沙角大角水陸相依以固省城門戶又以粵省各海口港汊紛歧小輪船隨處可以登岸乃會商督撫札飭地方文武官辦理漁團鄉團實力講求平時則緝捕土匪有警則據守險要用收堅壁清野之效四月上疏阻和議略曰法人無端生釁殘我屬國及我

出師保護又復肆其豕突撓敗我師迄今並未大加懲創遽與議和何以張國威不可許者一法人並未受創幡然請款是必中藏詭譎或息我師而徐乘其後或緩我謀而誤以多方其害無窮不可許者二既與議款不索兵費更爲叵測彼素惟利是視忽棄目前所索巨萬之費不言但言越境通商其中不免有詐恐將來必有十倍取償於後者瘠中華以奉島夷飾目前以釀邊患不可許者三以一外強中乾之法國憑陵我藩服吞噬我疆土不問其罪轉降心相從以就其和法人此次得志效法人者勢必環向而起是款一法人而轉來無數法人也羣謀日滋隱憂方大不可許者四雲南物產富饒五金之礦翠玉之璞久爲西人所垂涎若與議款必至蒙自以內許其通商迨爲日既久形勢險隘彼皆周知廣傳邪教以張羽翼一旦竊發將何以支不可許者五法自通商以來前於天津教堂一案卽思啟端以償其所大欲適爲普人所窺中止旋卽狡謀越南爲自強之計我中華果以全力決戰審用兵籌餉之分量彼族萬難久持故先爲恫喝以速其和又貌爲恭順以工其術其實鬼蜮伎倆窮矣此揣敵情而可戰者一我朝以神武開基將帥得人遠軼前古嗣平髮捻之亂亦忠勇輩出賈其餘勇尙足定邊憶前議防

俄之時奉旨著保舉人材卽以將才不易存者什一爲慮再閱數年老成凋謝盡矣曷若及時精選宿將俾講求以柔克剛以散敵整之法以盡其長此論將才可戰者二道光間外燬初開廣東三元里團練義聲至今猶在此外各省因事憤激之案層見疊出亦見民間不平之氣不可遏抑越南劉義亦中華民也竄伏荒裔自全不暇猶能尙義屢殲狂寇各省山陬僻壤不乏英豪聞與法戰莫不共發雄心願效死力此察民情而可戰者三查萬國公法在戰分義與不義一節如興戰不義傷害天理不獨可以理喻並可以力止深與齊人伐燕之義暗合朝廷若通飭各督撫大張曉諭於通商和好各國極力保護專與法人絕好准各義民誅其天主教士毀其天主鬼樓罷其駐京法使撤其貿易馬頭旣除萌蘖不虞滋蔓此採公法而可戰者四語云師直爲壯曲爲老今兵端自法人開窮兵黷武掠地爭城欺侮太甚實爲萬國公法所不容宜歷數法人罪狀布告中外使咸知彼曲我直不得已而用兵伐罪明有日月幽有鬼神共鑒此衷應蒙默佑此卜天理而可戰者五五月疏上廣東積弊條陳十事曰水師宜練曰陸營宜整曰教民宜別曰倉儲宜備曰瓊州宜圖曰鹽務宜變曰會匪宜清曰沙田宜查曰墳禁宜嚴曰

水利宜籌續陳六事曰捐攤宜覈曰釐金宜覈曰出入款項宜清曰補署宜公曰差委宜均曰劣幕宜驅六月諭曰彭玉麟在粵辦防忠誠奮發布置周密見在法國雖仍來講解和議尙未大定防守更關緊要該尙書仍督飭各軍實力備禦勿稍鬆勁玉麟尋與總督張之洞等巡閱各海口察其險要兵單之處復添募勇營填紮以爲各礮臺遊擊策應之用又以虎門以西有厓門橫門虎跳磨刀等門其水雖淺而小輪船可直達佛山鎮以拊省城之背與張之洞商之方耀雇募艇船二十分守陳頭五斗口一帶河面以顧省垣後路又調集小輪船十紅單船十駐泊橫檔左右以爲沙角虎門各礮臺應援又派小輪船十紅單船四駐泊黃埔一帶以爲常洲沙路魚珠各礮臺應援十月慈禧端佑康頤昭豫莊誠皇太后五旬萬壽御書建節綏疆額賜之是時法人決意併力逐我桂軍出越再圖上拒滇軍蓋以桂近滇遠爲彼北寧河內等處眉睫之患而滇軍及提督劉永福方攻宣光未能卽時東下桂軍扼守觀音橋谷松那陽三路又爲敵所阻玉麟與張之洞定議由東路進兵爲擣虛而入之計派廣西提督馮子材右江鎮總兵王孝祺等率廣軍四十營分四枝大舉規越十二月馮子材等抵龍州法人焚關自退十一年

正月京察下部優敘諭曰彭玉麟自赴廣東辦防以來實心任事不遺餘力該尙書向有咯血等證見聞尙未痊愈亦未服藥調理身在行間與士卒同甘苦不遑少息朝廷實深廬系必宜善自調攝方能爲國宣勤該尙書務當仰體此意慎求醫藥勉節勞勩以副倚畀之殷保身卽所以報國也二月馮子材等出關拔賊壘二旋克文淵州進攻諒山克之三月攻耶甲未下和議成有旨停戰撤兵玉麟請嚴備戰事以弔後患曰我聖朝待島族過於優容決無自我橫啟釁端之事彼族知其然也而以爲畏之遂日肆其欺侮而悍然罔顧然如琉球之不復伊犁之讓界兵端未開猶可說也此次朝廷赫然震怒命將出師迄今三載本年二月十三日諒山大捷天討方張乃津約忽以款局終事墮其術中益見輕於彼矣彼等如市井無賴小人惟利是趨安知信義挾其趨利之心存一見輕之意見我之兵衛旣撤全越悉爲彼有險要已失藩籬洞開安有不乘機侵軼之理至此而始悔失計不亦晚乎且上年津方定約彼卽犯越之觀音橋我兵方撤入關彼卽肆擾臺灣前事固昭昭可鑒今復狃其故智以款欺我我復信之堂堂中華任其玩弄於股掌而毫不省覺臣愚恐各國聞之謂吾華之易與也亦必從而生心羣思因我

以爲利邊鄙之患其有已時哉抑臣更有慮者西人覬覦中土多歷年所彼其用兵於我忽而請款者夫豈有愛於我而講信修睦哉其必有所圖也明矣自海上告警以來召將徵兵購船製械天下騷然糜餉已數千萬及布置粗定兵機漸利彼乃以一和字誤之而我所用經費盡成虛擲如此行之數四海內罷敝勢必不支不得已一惟和之是從由是當事者以和爲得計無復自強之謀領兵者以和爲固然潛消致果之氣邊疆要隘又以屢和之故武備懈弛而不修一旦黠虜挾其堅船利礮號召醜類環起而與我爲難其時財用旣匱兵氣不揚天下大局將有不堪設想者此其用心至深設謀至毒而其勢殆將必然故臣每一念及輒中夜以興繞帳傍徨不能一刻稍安也昔趙宋南渡韓劉諸將百戰抗金岳飛力圖恢復長驅北向幾復中原乃黃龍正擣金牌遽召終宋之世訖不復振何則戰則氣以厲而彌奮故可進於強和則氣以餒而益偷故日趨於弱宋之已事固其明效大驗矣方今款議已定自難中改然外人無信事未可知伏乞嚴敕沿邊各疆臣及各將領嚴備陸師戰守外瀕海如天津吳淞福州廣東臺灣等處應趕緊添造大小鐵甲戰船每口至少須十隻各令成一軍募各海島精壯漁戶熟習風濤

沙水之性者編爲各船之勇免使爲敵人募用以成奸細精選久於水師身經百戰健將爲之管帶勤加操練靜以待之庶幾立自強之基萬一敵復敗盟狡焉思逞卽永絕其好一意從事於戰備內外臣工復有敢以議款之說進而損威納侮者應請照十年七月十五日上諭交刑部治罪斷不可一誤再誤仍蹈前轍圖一時之苟安貽無窮之隱患惟務聲罪致討大張撻伐必令俯首帖耳就我銜勒不敢復肆鴟張而後已五月檄署南海縣知縣危德連等創造舳板礮船百號分爲三營統名爲廣安水軍以固粵省門戶七月籌議海防善後事宜疏陳六事曰分重鎮以領水師曰練陸軍以輔水師曰東三省之籌防宜豫曰臺灣以練勇辦團爲先曰學習技藝增造船礮務求實效曰餉糈艱絀務須廣籌又密保深悉洋務之大臣出使英國使臣曾紀澤及浙江提督歐陽利見福建水師提督彭楚漢陸路提督孫開華等六員以備海疆之用八月病勢增劇疏請開缺銷巡江各項差使得旨賞假三月回籍安心調理毋庸開缺並毋庸開巡閱長江水師差使九月有議長江水師宜改制參用淺水輪船者命玉麟與曾國荃等籌議玉麟以江防情形與海防異水師舳板仍未可裁淺水輪船可以不設條陳不便者五事又云

洋務有不可不講者如出洋之兵輪扼險之礮臺此宜推究西法精益求精以期可以制敵而保疆也有不必講者如洋槍陸隊臨陣呆笨知正而不知奇我軍趨捷輕快實遠勝於西人今乃必從而效之延聘外人教習是欲去己之長效彼之短此臣之所不解者也薄小輪船以之攻擊脆薄而不可用巡緝長江尤所不宜長江未立水師舢板以前盜賊橫行商賈裹足既立水師舢板之後往來上下商旅視爲坦途釐金暢旺得濟數十年餉糈已著明效乃欲以此易之此又臣之所不解者也詔嘉納之十三年上念玉麟病未就痊賜人漚四兩十四年疏懇開缺諭曰彭玉麟巡閱長江勲勤卓著連年以來因病屢請開缺未經允准茲復據奏病勢增重情詞懇切不得不勉如所請以示體恤著准其開缺回籍安心調理其長江水師巡閱差使毋庸開去卽責成李成謀認真經理彭玉麟不必拘定假期一俟病體稍愈仍著照舊任事以副朝廷倚畀至意十六年卒遺疏上諭曰前兵部尙書彭玉麟忠清亮直卓著勲勤以諸生從戎轉戰東南各省所向有功會同原任大學士曾國藩創立長江水師籌畫精詳規模悉備歷受先朝知遇由知府洊擢封圻內陟卿貳迨粵匪蕩平蒙穆宗毅皇帝眷念勲勞賞給一等輕車都尉

世職並加太子少保銜朕御極後擢任兵部尙書嗣因患病疊次陳請開缺降旨允准仍派巡閱長江水師十餘年來力疾從公不辭勞怨復因病勢增劇請開差使當經寬予假期並准其回籍養病頒賜人瀆方冀調理就痊長資倚畀茲聞溘逝悼惜殊深彭玉麟著追贈太子太保銜照尙書例賜卹任內一切處分悉予開復應得卹典該衙門察例具奏加恩予諡並於立功省分建立專祠其生平戰功事蹟宣付國史館立傳伊孫候選員外郎彭見紳著以郎中選用彭見綬彭見絳均著由吏部帶領引見用示篤念盡臣至意尋賜祭葬予諡剛直孫見紳現官刑部郎中

許庚身

許庚身浙江仁和人咸豐二年舉人考取內閣中書五年補中書七年恭修宣宗成皇帝本紀告成賞侍讀銜尋以玉牒告成甄敘命遇有本衙門陞途酌量補用八年記名軍機章京九年三月覆纂畫一臣工列傳獎以侍讀陞用十年補軍機章京同治元年成進士旋以總理各國事務衙門保獎加四品銜九月補內閣侍讀二年五月記名以御史用八月充方略館纂修三年五月署方略館提調充福

建鄉試副考官七月江寧克復紅旗報捷上命議政王軍機大臣獎敍滿漢章京
庚身得獎以六部郎中不論班次遇缺卽選並賞戴花翎十月補刑部湖廣司郎
中四年充會試同考官五年七月補鴻臚寺少卿復以總理各國事務衙門保獎
加三品銜旋丁母憂八年服闋仍在軍機章京額外行走五月充方略館幫提調
兼總纂六月仍補軍機章京九年三月補方略館提調兼總纂九月仍補鴻臚寺
少卿十月繕進春秋屬辭十年補內閣侍讀學士十一年纂輯剿平粵匪方略告
成得旨以三品京堂候補十二年補光祿寺卿六月充貴州鄉試正考官八月充
江西學政光緒元年以校勘剿平粵匪方略賞加二品頂戴三年回京仍在軍機
章京上行走四年補太常寺卿五年二月署禮部左侍郎四月陞大理寺卿七年
四月署都察院左副都御史十二月擢禮部右侍郎八年二月轉戶部右侍郎兼
管錢法堂事務六月充江南鄉試正考官九月調刑部右侍郎九年十一月禮部
奏許庚身克承先志捐置義田二千餘頃義莊一所養贍宗族古誼可風恩賞扁
額一方十年三月命在軍機大臣上學習行走尋命在總理各國事務衙門行走
八月命補軍機大臣十月恭逢慈禧端佑康頤昭豫莊誠皇太后五旬萬壽慶典

奉懿旨賞給頭品頂戴尋賜紫禁城騎馬十一年七月管理戶部三庫事務十二月署兵部尙書十三年九月調補吏部左侍郎仍兼署兵部尙書十四年七月補兵部尙書八月充順天鄉試副考官十二月充方略館總裁十五年八月署吏部尙書十六年正月皇上二旬萬壽上以許庚身夙夜在公忠勤懋著詔交部優敘二月充會典館總裁十七年八月充順天鄉試正考官賞勸善要言書十一月賞西苑門騎馬十八年十二月以二十年恭逢慈禧端佑康頤昭豫莊誠壽恭欽獻皇太后六旬萬壽奉旨著庚身總辦慶典歷充殿試讀卷官貢士覆試朝考拔貢優貢朝考考試試差漢廕生閱卷大臣凡二十次十九年十二月卒遺疏入諭曰兵部尙書許庚身忠勤恪慎練達老成由內閣中書充補軍機章京蒙穆宗毅皇帝特達之知擢陞卿寺朕御極後簡任侍郎命在軍機大臣上行走兼總理各國事務補授兵部尙書加太子少保銜疊掌文衡夙夜靖共深資倚畀近因偶患微疴賞假調理方冀醫治就痊長承恩眷遽聞溘逝軫惜良深著賞給陀羅經被派員勒載灤帶領侍衛十員卽日前往奠醊賞銀二千兩治喪由廣儲司發給加恩晉贈太子太保銜照尙書例賜卹任內一切處分悉予開復應得卹典該衙門察

例具奏伊子內閣中書許之榮著賞給郎中俟服闋後分部學習行走一品廕生許之鵬著賞給舉人准其一體會試伊孫許寶瑜著俟及歲時帶領引見其靈柩回籍時著沿途地方官妥爲照料用示篤念盡臣至意尋賜祭葬予諡恭愼

景廉

景廉顏札氏滿洲正黃旗人父彥德綬遠城將軍景廉咸豐二年進士改翰林院庶吉士三年四月散館授編修九月陞侍講十二月充國史館協修文淵閣校理四年五月充日講起居注官十二月陞侍講學士五年四月擢內閣學士兼禮部侍郎銜五月充福建鄉試正考官六年六月授鑲白旗蒙古副都統十月充玉牒館副總裁七年正月授工部右侍郎兼管錢法堂事務三月管理火藥局事務十一月命賜奠朝鮮八年六月調補鑲紅旗滿洲副都統七月充順天鄉試監臨九月兼署正藍旗滿洲副都統九年二月調補刑部右侍郎三月兼署吏部右侍郎十月授伊犁參贊大臣十年四月抵伊犁故事哈薩克貿易事訖卽出境後以商貨滯鬻許留兩三人守以度歲支穹廬於西門外樹木柵防暴客而已比漸築室易柵而垣景廉以爲患伏肘腋漸不可長乃疏請以便宜毀之吏貪猾蠹民者以

時劾罷邊圉大治時塔爾巴哈臺參贊大臣以濫保異姓台吉冒襲哈薩克汗爵爲人所論命景廉往鞠具得其駝馬章京納賄情事論如律十一年阿克蘇辦事大臣綿性及葉爾羌參贊大臣英蘊先後以私設鹽課派回民銀錢被劾復命景廉馳查減據實以聞降革有差同治元年四月調葉爾羌參贊大臣其地爲南路八城之表漢回雜處景廉至則疏請將歷年徵收稅務酌量裁減詳立章程二年復奏請停止巴爾楚克過路稅課八城以安三年因病陳請開缺調理不待命遽行入關詔革職發往都興阿軍營聽候差委四年四月抵寧夏將軍都興阿委充總理前敵糧臺營務十月已革安徽巡撫翁同書卒於花馬池軍中詔代領其衆以防後路屢著戰功餉道無梗得旨以四品京堂補用並賞戴花翎五年賞頭等侍衛充哈密幫辦大臣六年正月寧夏將軍穆圖善奏請留營襄贊軍事上不許諭令剋期出關十二月募勇得千餘人騎不滿百軍裝器械略備糧僅支二十日以記名總兵張玉春爲統領副將蔣富山范如松都司金永清副之道金塔堡而西日行冰雪中七年正月至玉門偵知肅州回匪三百餘騎沿南山西竄遣張玉春敗之黃花營又敗其大股於安西州之三四道溝景廉以哈密轄境遼闊兵燹

之餘戶口彫耗商旅裹足軍食所仰惟安西玉門敦煌三州縣敦煌尤完富地迫近關門甘肅新疆之咽喉也而肅逆窺伺久時來侵擾脫有失則哈密運斷而新疆門戶益危迺與辦事大臣文麟會奏請分地防守文麟先赴哈密景廉暫駐後路督防剿且順運道於是以大營屯敦煌躬相要害完城浚濠選狹路築空心墩臺以衛露糧畜牧守具既備復督紳民辦商團民練與官軍相倚輔士民商賈皆以爲便安西玉門亦倣行之景廉時率小隊履行校驗肅逆數來犯一敗之車轆穀壩再敗之南乾溝三水梁三敗之十工廢堡而西寧河州回逆之擾赤金堡者亦望旗驚潰於是牽制虜掠之計皆無所施遂復西竄景廉乃大料三州縣土著得上中下三千餘戶以等差令捐粟麥民亦喜官軍能爲捍寇樂於輸輓凡得雜糧數萬石量道里設糧臺置轉運局以餽哈密部署大定八年七月抵哈密任以漢城殘破築壘蔡巴什湖與文麟營相倚八月烏魯木齊回酋妥得璘結吐魯番瑪納斯各種落萬八千騎東寇哈密潛約哈密回王爲內應回王素驍其母福晉以賊書呈官軍景廉遣使獎慰並助以兵使堅守而遣將先據要隘設伏以待賊至大敗之追奔至瞭墩斬千七百餘人獲騾馬器械無算十年八月俄羅斯侵伊

犁言將赴烏魯木齊並圖收復上命景廉進規烏魯木齊十月授烏魯木齊都統十一年正月抵巴里坤據形勢立堅壘設屯田爲久駐計又以兵力單仍整閱民團如其在敦煌時撫慰豪帥趙興體等獎以銀物皆願爲之死回酋馬明尤狡桀屢以乞降誤官軍安得璘亦猾譎數陰使人通西寧及古牧地回約期同舉景廉偵知之陰爲之備先後擒斬回日馬三馬四楊伏先等大敗援賊於滋泥泉俄人挾蒙古哈薩克入境求互市景廉以軍事未平卻之十二年正月穆宗毅皇帝親政景廉上疏陳六事曰崇聖學曰開言路曰重牧令曰簡軍實曰勸農事曰弭異端皆剴切中時要二月請於蒙古買戰馬耕牛各千及籌臺站事宜上悉從之四月抵古城景廉躬赴濟木薩行視營地以其地扼南山之衝北與烏魯木齊南與吐魯番犬牙相錯烏屬回與安集延時合時離候俟官軍深慮繞後路阻運道先分屯兩營木壘河側又以地肥饒宜稼而大軍久駐餽運勞遠時時憂乏食乃大興屯田表奇臺古城濟木薩木壘河良田方數百里招流民料軍士計口授畝擇將弁樸勤曉農事者領之且耕且防以其暇閱操行軍略依古軍屯法損益之務在便民又開官錢鋪招商買以通懋遷立車局駝廠以資轉運建水磨碓以省農

力是秋歲大熟官屯積穀萬餘石民間自倍復增價糶之乃設臺站自古城以東北至科布多西自巴里坤至於木壘河皆平行無梗滯卽奏停歸綏口北糧道所省費不可勝計而軍食饒給兵勢沛然矣經營不一年屹然成重鎮賊氣懾皆詭辭乞降景廉以兵力未厚姑羈縻之益遣間諜深入西南賊中覘其部落離合曲折情僞當是時陝甘回寇以次蕩平餘得脫者迸竄出關而白彥虎爲之魁合西寧回萬餘騎皆百戰之餘又窮寇瞥不知畏死直西將奔烏魯木齊所過蹂躪官軍莫能常進圍哈密悉擄塔爾沁積蓄破回城據之遊騎越天山至巴里坤勢張甚文麟不能禦告急於景廉而安集延酋帕夏復與馬明糾西南各種落圍徐學功於沙山與白彥虎遙相應景廉以孤軍駐古城四面皆寇將士震懼亟請敕前烏里雅蘇臺將軍金順署伊犁將軍榮全副都統孝順率所部與哈密幫辦大臣錫綸會剿允之並諭景廉嗣後於就近各軍如有應行調撥之處卽由該都統調遣以期便捷景廉迺令營總依勒和布率精騎會徐學功軍並擊帕夏於沙夷園帕夏敗遁去又遣黑虎江副都統吉爾洪額等援哈密巴里坤先以糧三千餘石餉兩城令堅守待救吉爾洪額旣度天山則大喜曰白彥虎不以重兵阨天

山令我得過吾知其無能爲也遂結方陣鼓行而東比至與城中相聞圍中知救至皆振奮選壯士開門出內外夾擊大破之白彥虎敗入回城擄回王及輜重走南湖老巢官軍乘勝追北又大破之拔南湖白彥虎率餘衆西竄十月白彥虎至唐朝渠將入瑪納斯景廉遣徐學功追之徐學功率勁騎四百僞爲瑪納斯迎白彥虎者白彥虎不之覺握手相勞至三道廠前臨大河伏兵從後發白彥虎驚以數十騎走免餘悉殲焉捷入優詔勞勉並獎徐學功學功者本烏魯木齊農家子沈勇有智略軍興集鄉團自衛初從帕夏安得璘景廉招降之奇其材推心委用竟得其死力焉十三年正月白彥虎復率黨東犯景廉遣統領興祿等敗之於西泉斬其目五人皆西寧河州巨酋也白彥虎仍走免然其焰益衰矣三月因病疏請開缺得旨賞假兩月在營調理遇有緊要事件仍當悉心經理勿誤戎機並命陝甘總督左宗棠催令出關各軍迅速西進會同景廉籌商進剿迅將各城踞賊次第蕩平六月白彥虎糾回酋馬燕飛等以數千騎犯濟木薩謀撓我屯田使不得收穫景廉遣興祿等大破之斬酋日拜林金尙保於陣焚其糧七月授欽差大臣督辦新疆軍務景廉既授任則統籌全局爲一勞永逸之計奏請自與幫辦大

臣金順由古城直取古牧地爲一路令提督張曜出天山南略吐魯番爲一路別派大員赴沙山會巴里坤領隊大臣沙克都林扎布哈密幫辦大臣錫綸等取瑪納斯爲一路三道齊舉使賊不相顧而以重兵屯奇臺古城爲根本且屏蔽哈巴復遣奇兵潛襲喀喇巴爾噶遜城以扼其吭並請諭左宗棠委司道大員駐肅州督糧運移甘肅民千戶實奇古屯田益市蒙古駝馬以速轉輸詔如其請行光緒元年授正白旗漢軍都統命將兵勇糧餉移交金順接管回京供職九月補都察院左都御史十月賜紫禁城內騎馬二年正月署步軍統領兼署正白旗蒙古都統三月命在軍機大臣上學習行走五月充教習庶吉士七月充崇文門副監督署工部尙書十月署正紅旗滿洲都統充總理各國事務大臣三年正月命在軍機大臣上行走補授工部尙書管理火藥局事務二月署正藍旗蒙古都統四月充繙譯會試副考官十二月署鑲紅旗漢軍都統四年二月回疆肅清上以軍機大臣贊襄軍務夙夜宣勤下部優敘是歲畿輔旱上降旨悔過省愆切責軍機大臣等日擊時艱毫無補救交該衙門嚴加議處尋議革職得旨加恩改爲革職留任五月調戶部尙書七月管理戶部三庫事務八月兼署工部尙書十二月充國

史館總裁五年正月京察上以景廉等同心翊贊共矢公忠開復革職留任處分
二月兼署吏部尙書六年三月充會試正考官十二月充經筵講官七年四月充
前引大臣七月穆宗毅皇帝本紀告成下部優敘十二月賞穿帶膝貂褂九年以
雲南報銷一案司員書吏收受津貼銀兩景廉曾將納賄之屬員京察保列一等
奉旨交部議處尋照部議降二級調用命仍在軍機大臣上總理各國事務大臣
上行走七月補內閣學士兼禮部侍郎銜九月遷吏部左侍郎十一月授兵部尙
書十二月充經筵講官十年三月諭曰欽奉慈禧端佑康頤昭豫莊誠皇太后懿
旨現值國家元氣未充時艱猶鉅政虞叢脞民未救安內外事務必須得人而理
而軍機處實爲內外用人行政之樞紐恭親王奕訢等始尙小心匡弼繼則委蛇
保榮近年爵祿日崇因循日甚每於朝廷振作求治之意謬執成見不肯實力奉
行屢經言者論列或目爲壅蔽或劾其委靡或謂簞簋不飭或謂昧於知人本朝
家法綦嚴若謂其如前代之竊權亂政不惟居心所不敢亦實法律所不容祇以
上數端貽誤已非淺鮮兵部尙書景廉祇能循分供職經濟非其所長著開去一
切差使降二級調用十一年四月復補內閣學士兼禮部侍郎銜八月署鑲藍旗

蒙古副都統歷充朝考閱卷殿試讀卷庶吉士散館各省鄉試覆試閱卷大臣是月卒十五年正月慈禧端佑康頤昭豫莊誠皇太后歸政以景廉前充軍機大臣夙夜在公襄成邳治賜祭一壇二十八年伊犁將軍長庚新疆巡撫饒應祺奏已故烏魯木齊都統督辦新疆軍務大臣景廉功績卓著遺愛在民懇追復原官並將生平事蹟宣付史館立傳准在新疆捐建專祠得旨允行子治麟光緒三年進士國子監司業

崇綺

崇綺阿魯特氏滿洲鑲黃旗人原隸蒙古正藍旗父大學士賽尙阿自有傳崇綺由廩生挑取膾錄捐輸軍餉獎八品筆帖式旋充玉牒館膾錄道光二十八年玉牒告成議敘工部主事二十九年舉人三十年充實錄館校對旋充詳校咸豐二年宣宗成皇帝實錄慶成議敘補缺後與現任主事計資陞擢三年賽尙阿因辦理廣西軍務獲譴崇綺亦革職四年粵匪陷江寧分股北竄京師告警巡防王大臣調崇綺充督練旗兵處文案五年事平獎六部筆帖式並開復舉人准其一體會試七年籤分兵部學習九年補七品筆帖式十年英人北犯天津崇綺以隨辦

巡防功獎主事復因辦理內城團防賞加五品銜同治元年丁母憂二年辦理議功所事務保以本部主事遇缺卽補三年七月江寧報捷保俟補缺後以本部員外郎遇缺卽補十月寧夏將軍都興阿以崇綺知軍事奏調赴營差遣兵部復疏請留部四年調充步軍統領衙門兼辦司員四月一甲一名進士授翰林院修撰六年充庶常館提調九年三月擢侍講七月充河南鄉試正考官十二月充文淵閣校理十年五月充教習庶吉士九月充功臣館總纂十月充日講起居注官十一年六月册立孝哲毅皇后推恩所生封三等承恩公在委散秩大臣上行走九月以內閣學士候補十一月命擡入鑲黃旗滿洲十二年五月補內閣學士兼禮部侍郎銜七月充順天鄉試監臨十一月補戶部右侍郎兼管錢法堂事務十三年八月調吏部右侍郎光緒元年三月丁父憂八月充順天鄉試副考官二年正月兼署戶部左侍郎三月充會試副考官四月署正黃旗漢軍副都統五月補鑲黃旗漢軍副都統九月署鑲紅旗護軍統領二年八月管理鑲藍旗滿洲新舊營房充專操大臣時河南連年苦旱大吏相率諱飾吏治廢弛先後爲御史所劾命崇綺偕侍郎邵亨豫按其事覆陳藩司劉齊銜貽害地方巡撫李慶翱玩視民瘼

均下部議處四年五月兼署刑部左侍郎八月吉林駐防侍衛倭興額家爲盜劫其母誤指盜爲居民傅洵魁導官兵往捕而其族人齊廣貞與傅洵魁有夙怨乘閒栽贓地方官吏知之抑置不問倭興額遂以釋犯被誣控於都察院命崇綺偕侍郎馮譽驥往讞之十月卽命崇綺暫署吉林將軍專治傅洵魁之獄崇綺以犯供狡展請將案犯監禁待質而是時倭興額復控於都察院與崇綺所稱情節各異上責其草率未成信讞命戶部左侍郎志和奉天府府尹恩福覆覈志和等以齊廣貞栽贓確有明證倭興與阿捏供刁狡入告崇綺迺以前次審理未詳自請議處詔加恩寬免十二月轉吏部左侍郎五年授熱河都統御史孔憲毅疏陳崇綺忠鯁亮直亟宜留以自輔僅使效用邊隅未免可惜請收回外補成命置之左右以資啟沃七年調盛京將軍奉天東界朝鮮西南瀕海通商以後交涉尤繁崇綺飭吏治實營伍并嚴定邊民交易之限八年法人謀踞越南邊警日聞崇綺復添練步隊分防海口以資鎮巡九年以病請開缺允之十年因在將軍任內捐廉添購洋槍下部優敘九月病痊授戶部尙書十月內閣學士周德潤疏劾安徽釐稅弊深鳳穎六泗道任蘭生盤踞利津營私肥己詔崇綺偕內閣學士廖壽恆前往

查覈廉其實請將任蘭生議處並以安徽關局動支之費及外銷各款數甚巨請
敕安徽巡撫覈實籌計詔均如所請行十一年九月充武英殿總裁十一月調吏
部尙書歷充各省駐防繙譯鄉試會試覆試庶吉士散館貢士朝考拔貢朝考考
試漢廕生考試漢御史閱卷大臣十二年二月復因病乞休允之十六年以病難
就痊懇開去公爵另行承襲本旗都統以聞得旨准其另行承襲二十五年特命
崇綺充弘德殿師傅授溥儁讀旋命管理禮部事務賜西苑門內乘坐二人肩輿
二十六年正月署翰林院掌院學士是年皇上三旬萬壽賞戴花翎三月命照尙
書例給俸授正紅旗漢軍都統六月授戶部尙書七月拳匪變起聯軍入京師上
奉慈禧端佑康頤昭豫莊誠壽恭欽獻崇熙皇太后西幸命充留京辦事大臣崇
綺偕大學士榮祿退守保定八月殉節於保定蓮池書院事聞諭曰戶部尙書崇
綺持躬端正學問優長同治年間由翰林院修撰洊陞卿貳屢掌文衡朕御極以
來深加倚畀特擢正卿旋任盛京將軍轉吏部尙書於管理地方及辦理部務均
能不避勞怨悉心供職嗣以引疾家居上年冬召見該尙書精神甚爲矍鑠特命
在弘德殿行走用資輔導旋命管理禮部改戶部尙書近復派充留京辦事大臣

方期共濟時艱長承恩眷詎本日據榮祿奏七月二十一日以後榮祿偕該尙書退守保定該尙書因恢復無力竟於本月初二日殉節於保定蓮池書院洵能舍生取義大節無虧覽奏曷勝震悼崇綺著照尙書例賜卹任內一切處分悉予開復應得卹典該衙門察例具奏併著加恩予諡入祀昭忠祠派廷雍就近前往奠醑靈柩回旗時沿途地方官妥爲照料准其入城治喪伊孫幾人現在有無官職該旗查明具奏候旨施恩用示篤念忠貞至意尋賜祭葬予諡文節子葆初承襲公爵委散秩大臣先於七月偕孫候選員外郎廉定候選筆帖式廉容廉密監生廉宏闔門死難得旨葆初照三等公陣亡例賜卹廉定照郎中例賜卹廉容廉密廉宏俱照主事例賜卹二十七年八月奉旨以曾孫法亮爲廉定嗣襲爵

懷塔布

懷塔布葉赫那拉氏滿洲正藍旗人父大學士瑞麟自有傳懷塔布以廕生用主事分刑部咸豐三年六月補官四年十一月晉員外郎九年捐輸軍餉獎知府同治五年復以捐輸賞戴花翎十三年丁父憂恩旨俟服闋後以四品京堂候補光緒三年補太常寺少卿五年補通政使司副使六年補太僕寺卿八年調太常寺

卿九年正月授都察院左副都御史十二月補泰寧鎮總兵兼總管內務府大臣十四年遷盛京禮部侍郎十七年授左都御史十九年四月兼署刑部尙書五月管理戶部三庫事務七月充崇文門正監督八月署刑部尙書九月補工部尙書管理溝渠河道事務十二月充經筵講官二十年兼署左都御史時戶部收存湖南京餉間雜黑鉛懷塔布疏陳其弊請嗣後各省委解京餉務當釐定章程以重庫儲詔如所請行十一月補總管內務府大臣二十一年正月以御史鍾德祥奏劾上駟院卿增潤等領發五圈馬匹銀兩賄託剋扣命懷塔布查覈得實分別降黜有差十月賜紫禁城內騎馬二十二年三月署管上駟院印鑰四月調禮部尙書八月署正藍旗蒙古都統十月充玉牒館副總裁二十四年命大小臣工皆得上書言事七月禮部主事王照條陳時事懷塔布久之乃代奏上責其故違抑格卽行革職八月復補左都御史並補授總管內務府大臣十月賜紫禁城內騎馬十一月奉懿旨加恩在西苑門內騎馬並乘坐船隻拖牀旋管理咸安宮事務十二月賞還花翎二十六年八月授理藩院尙書鑲紅旗滿洲都統管理圓明園八旗包衣三旗官兵並烏槍營事務九月兼署禮部尙書十一月卒諭曰理藩院尙

書懷塔布持躬恪慎練達老成由廕生供職京曹洊陟卿貳擢任正卿補授總管內務府大臣宣力有年克勤厥職前因患病疊次賞假方冀調理就痊長承恩眷茲聞溘逝軫惜殊深加恩著追贈太子少保銜照尙書例賜卹任內一切處分悉予開復應得卹典該衙門察例具奏伊子廕生耆年著賞給郎中俟及歲時分部行走用示篤念蓋臣至意尋賜祭葬予諡恪勤

續昌

續昌那拉氏蒙古正白旗人由監生議敘筆帖式咸豐七年籤分禮部八年補筆帖式十年辦理巡防出力賞加主事銜同治元年充軍機章京三年大軍克復江寧紅旗報捷經軍機大臣奏保以理藩院主事遇缺卽補並加員外郎銜五年十一月補主事十二月陞員外郎七年捻逆蕩平敘功賞戴藍翎八年四月充方略館收掌官十二月充烏蘭哈達理事司員十年差滿回任十一年纂輯剿平粵匪擒匪方略告成以道員在任卽選先換頂戴十二年京察一等記名以道府用十三年以繕修軍機處清字檔出力得旨專以道員用十三年兼充總理各國事務衙門章京光緒二年京察一等四月充方略館提調五月遷郎中十月授直隸霸

昌道四年捐輸晉賑賞換花翎尋調奉錦山海道兼按察使銜五年以霸昌道任資遣晉豫災民速集鉅款協賑賞加二品頂戴並二品封典先是常稅徵不及額歲撥洋稅補苴之續昌力加整頓稅額以復又以營口爲奉省門戶建議請據要隘建礮臺爲制敵具如議行卽令續昌督其役七年以督辦營口釐捐著有成效加隨帶三級十年五月召來京旋陞兩淮鹽運使九月命赴奉天隨將軍慶裕辦理海防事務十月命偕會辦北洋大臣吳大澂前往朝鮮查辦事件朝鮮自壬午亂後命留提督吳兆有等三營戍之至是亂黨金玉均等勾結日本兵爲援謀作亂戕其大臣閔泳翊等七人其領議政沈舜澤乞師於吳兆有率兵入宮保護誅其黨比續昌至亂已平十一年正月回京命卽赴天津會議日本事件日本使臣伊藤博文以朝鮮之亂中國營兵騷擾日本商民欲援臺灣前事索償續昌抗辭折之議遂寢三月陞湖南按察使六月詔開缺以三品京堂候補在總理各國事務衙門行走十一月補太常寺卿十二月遷內閣學士兼禮部侍郎銜十二年五月署刑部右侍郎八月充武鄉試覆試監射大臣十二月授鑲紅旗漢軍副都統十三年二月陞禮部右侍郎十二月調鑲白旗滿洲副都統十四年一月充管理

新舊營房大臣十月禮部具奏典禮摺件誤繕日期下部議處鑄四級留任尋轉左侍郎十五年正月奉懿旨續昌前在軍機章京行走有年賞加隨帶一級尋開復降級處分調戶部右侍郎兼管錢法堂事務六月充左翼監督轉左侍郎兼管三庫事務八月充覆覈朝審大臣十二月充八旗值年大臣十六年五月調正白旗滿洲副都統七月兼署吏部右侍郎九月充賜奠朝鮮王太妃正使侍郎崇禮副之上憫朝鮮連年喪亂命改由海道前往俾省供億其國王惑於羣小欲免親行郊迎禮而盛備金幣以悅使臣冀寬禮數續昌諭以威德卒郊迎如禮凡所餽贐絲毫無所受比還疏言嗣後奉使大臣除例定土儀准其致送以盡事大之禮其餘餽送銀兩概行禁革並請敕下朝鮮國王嚴飭臣寮不得藉端苛派仍由總理衙門出使經費項下酌撥銀兩爲治裝賞犒之需均奉俞旨尋因病疊次賞假調理十八年正月奏請開缺仍賞假兩月三月再申前請允之前後充前引大臣二次專操大臣三次四月卒遺疏入諭曰前任戶部左侍郎續昌由司員擢任監司洊陞卿貳在總理各國事務衙門行走辦事慎勤克盡厥職前因患病准其開缺茲聞溘逝軫惜殊深著加恩照侍郎例賜卹任內一切處分悉予開復應得卹

典該衙門察例具奏尋賜祭葬子熙鈺同知銜二品廕生

宗室綿宜

宗室綿宜鑲白旗人咸豐二年進士改翰林院庶吉士三年散館改禮部主事五年十月補官六年三月陞左春坊左中允五月補翰林院侍講九年充順天鄉試同考官十月轉侍讀十年正月陞詹事府右庶子閏三月遷翰林院侍讀學士充日講起居注官九月陞詹事府詹事十月以京師盜案疊出官役緝捕不力奏請敕下地方官嚴緝從之十二月授內閣學士兼禮部侍郎銜同治元年正月署正藍旗滿洲副都統五月充湖南鄉試正考官十一月署兵部左侍郎二年正月陞禮部右侍郎二月補正紅旗蒙古副都統十月調正藍旗滿洲副都統十一月充冊封壽禧公主正使三年正月署正黃旗護軍統領五月署正黃旗蒙古副都統七月署左翼前鋒統領八月充順天鄉試監臨十二月署正白旗滿洲副都統四年五月調補鑲藍旗滿洲副都統十月充右翼監督五年二月充西陵歲修工程大臣八月派覆覈朝審七年八月署刑部右侍郎十二月兼署戶部左侍郎管理三庫事務八年八月調盛京兵部侍郎管理威遠堡等六關口事務十一年二月

疏陳治盜事宜一曰清盜源一曰除賊首一曰整兵力一曰嚴門禁詔下將軍都
興阿議行六月以父永良老病乞假回京允之七月調補禮部右侍郎九月充管
理三庫大臣十二年閏六月盛京馬賊復熾再疏陳整兵募勇禁賭聚糧四策得
旨允行十三年四月補正黃旗蒙古副都統八月署正白旗護軍統領十月管理
新舊營房事務光緒元年正月再署戶部左侍郎兼管三庫事務二月充專操大
臣十二月充管理溝渠河道大臣值年大臣二年六月再充左翼監督十月轉補
禮部左侍郎十一月授鑲白旗總族長三年兼署兵部右侍郎四年復調補盛京
兵部侍郎五年管理移居宗室事務六年十一月以盛京恭收玉牒暨尊藏穆宗
毅皇帝實錄聖訓典禮未終輒赴府尹署公讌綿宜任意戲謔副都統富陞奏劾
之詔革職十二年五月起用授內閣學士兼禮部侍郎銜十月充玉牒館副總裁
十二月遷理藩院右侍郎十三年三月充宗人府族長十二月調兵部右侍郎兼
授鑲紅旗漢軍副都統十四年三月調補盛京戶部侍郎二十年九月因病乞假
回旗二十一年二月奏請開缺許之九月病痊二十二年授理藩院左侍郎二十
三年十月賜紫禁城騎馬十一月復充左翼監督二十四年正月卒遺疏入諭曰

理藩院左侍郎綿宜由翰林改官部屬洊擢卿貳宣力有年克勤厥職前因患病賞假調理茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏尋賜祭葬子奕壽廕生

曾紀澤

曾紀澤湖南湘鄉人父國藩武英殿大學士以平粵匪功封一等毅勇侯自有傳紀澤由二品廕生於同治九年引見奉旨以員外郎用籤分戶部十三年丁父憂光緒三年服滿襲侯爵尋奉旨以四五品京堂候補四年七月賞戴花翎充出使英法大臣十月補太常寺少卿五年遷大理寺少卿六年正月以使俄大臣崇厚議收伊犁遽許其成以歸言者交章論劾上治崇厚以違訓越權之罪命紀澤兼充使俄大臣重與訂約時俄人藉詞要挾且沿海備兵增械肆其恫喝紀澤致書總理衙門曰紀澤承崇厚之後欲障川流而輓旣逝之波探虎口而索已投之食事之難成已可逆覩凡民間交易立一合同寫一券據其受益者須待受損者先行畫押允許乃可成事況兩大國立一條約明係中國喫虧崇厚乃不先行請旨而遽請俄君畫押未免過於冒昧然俄君亦大國之君主也臨朝簽字批准條約

本國臣民遠近鄰友莫不周知一旦將已押未行之約廢而不用從新商議辱孰甚焉此難處之一端也英俄兩大相競猜疑日滋中俄交涉事稍不順俄人則曰此英國所唆聳也紀澤適以駐英使者前赴俄都凡有商議舉國皆疑爲有先入之言此較他人尤難處之一端也紀澤擬於英紳閒談之際實探英俄消息采聽既多或可觸機策畫此中求利避損之處自當格外謹慎又論俄之占踞伊犁當時蓋有輕藐吾華之心不料西北平回之師遂能如此得手是以慨然有交還之語及至我師大功告成索踐前諾則藉此以爲要挾地步卒之還我者不過一隅而巖險襟帶之區仍據爲己有於通商章程占我無窮利益又多留罅隙以作後圖其計亦巧矣俄羅斯爲西洋著名雜霸之國與戰國羸秦無異狡獪多端上下一致當時即使他人處此亦未必遽能勝任但無崇厚已定之約則使者於商務界務償款三事原可徐徐爭論可者許之其不可者磨牙掉舌安排拖宕之局務求辯勝方休取舍之權未嘗不操之在我今乃欲悉舉前約而更張之俄人必仍藉兵費以立言曰五百萬盧布未足以盡償兵費故於伊犁境內割留某處以土地準折貲財也又於通商政務推廣某事以商販之利準折貲財也大約界務稍

有更改則兵費不能不加商務係俄人所最重事必不能全行駁改紀澤雖尙未赴彼都然不能毫無主見以自伸其氣而暢其說或仍索伊犁全境而可以酌加兵費或暫不索兵費而以伊犁更換東境舊窆某地以難之皆是立言之法要之使者已至既言舊約之不公不妥則約章必須如何乃爲公安之處勢必連類談及斷無含糊中立之理至於俄人接待情形誠難逆料儻竟失和雖百端將就終歸無益戰守之備在廷者自有嘉謨紀澤何敢妄議然竊揣西陲一帶左宗棠手握重兵取伊犁猶可得手海疆各口南北洋大臣亦當能先事綢繆彼或有所顧忌而不敢遽逞惟池北萬餘里處處毗連尤以東三省爲重俄國鐵路未出歐洲轉運東方殊非易易未必能兩道入寇而紀澤則甚恐其盡赦犯法亡命之徒使擾我邊境擄掠卽以充賞則人自爲戰而無轉餉之勞其鋒固未易當也竊以爲宜卽滿洲之士卒參以近年各軍之營制得其人而練之俾成勁旅以備不虞似不僅一時邊徼之利或且爲萬世根本之計又左宗棠金順於西陲各處務宜專用恩德綏懷反側使其心悅誠服無論和戰總以收拾西塞漢回民心爲主也至兼駐英法刻下未敢遽卸仔肩者誠以公使離境所關極重若俄人待客疏慢可

藉英法公事時去時來則雖駐彼都而不受欺侮雖離境而不著痕迹在紀澤不
過多幾番跋涉之費苟利於國違恤其他又論伊犁地圖云按西域地名譯言各
別卽不難指鹿爲馬惟憑精本輿圖畫以界線尙覺稍有把握查左宗棠函稱伊
犁大城與阿克蘇南北相望俄圖則伊犁稍偏於西紀澤徧查俄英德奧各本輿
圖伊犁皆較阿克蘇偏東一度左右中國輿圖則陽湖李氏及鄂刻兩本均偏東
三度有奇並無伊犁偏西及或與阿克蘇南北相望之說喀什噶爾則各圖皆在
烏什西南並無混列於西之說未審左宗棠據何圖而云然也又謂俄圖不若中
國之確緣其不能仿照中法以南北極出地爲準而又不明地學準望之法所以
方位時有誤會云云紀澤意西人繪中國輿圖略其所詳而詳其所略誠所不免
至於方位遠近山之枝幹水之曲折則西人之精詳實非華圖所及蓋測北極出
地之高下所以定緯度之南北而經度不與焉經度所以分東西則非晝測日午
夜測中星而細推其差度不可得而定也至其循人行路徑測其曲折概以三角
法推之千里萬里無或差忒蓋大小總成三角形同一比例卽所準望之法也中
國測望之法所憑者僅一指南鍼不知電極之南北並非天元之真南北又不講

求里差之理竊以爲輿地之學西精於中不啻倍蓰奈何執成見以論之至劉錦棠所繪之圖其遠近以馬行幾日程估而計之其方位之不準可想而知然藉以譯音亦可與西圖互相參考又論俄人以崇厚被譴引爲大辱或因此次未遽釋放疑爲暫緩論決更不滿意則使者於此事尤須委曲措詞蓋崇厚之被譴本因違訓越權中國治違訓越權之臣並非有意辱俄俄人不應過問今因俄君抱歉而減免其罪彼此喻於不言之表冀暗中可獲微益若諄諄然取赦崇厚之事明以示德於俄是自認前此之重治崇厚爲有意辱俄也似不可也英法使言赦崇厚之益亦有不可盡信者中國援議貴之典赦崇厚以自保威重則可因事之棘手乃赦崇厚以悅俄則似不可俄人因我之譴崇厚而出怨懟之詞散譏謗之語則有之因赦崇厚而遽肯就我範圍則未必也七月至俄日與外部尙書吉爾斯前駐華公使布策等筆舌辯論凡十數萬言十閱月而議始定尋疏陳改訂約章七端第一端交還伊犁查原約中伊犁西南兩境分歸俄屬南境之帖克斯川地當南北通衢尤爲險要若任其割據則俄有歸地之名我無得地之實臣必以界務爲重者一則以伊犁喀什噶爾兩境相爲聯絡伊犁失利喀什噶爾之勢孤此

時不索更待何時再索一則以伊犁東南北三界均與我兵相接緩索後不與議界恐致滋事若竟議界既嫌迹近棄地又慮其得步進步伊犁雖已緩索而他事之爭執如故也嗣與布策專爭南境彼猶欲於西南隅割分三處村落其地長約百里寬約四十餘里距莫薩山口最近勢難相讓疊次厲色爭辯方將南境一帶地方全數來歸其西南隅允照前將軍明誼所定之界第二端喀什噶爾界務從前該處與俄接壤者僅正北一面故明誼定界祇言行至蔥嶺靠浩罕界爲界亦未將蔥嶺在俄國語係何山名照音譯出寫入界約今則池西安集延故地盡爲俄踞分界誠未可緩崇厚原約所載地名按圖懸揣未足爲憑臣愚以爲非簡派大員親往履勘不可吉爾斯必欲照崇厚原議者蓋所爭在蘇約克山口也臣答以已定之界宜仍舊未定之界可另勘布策稱原議所分之地卽兩國見管之地臣應之曰如此何妨於約中改爲照兩國見管之地勘定乎最後吉爾斯乃允寫各派大臣勘定不言根據崇厚所定之界矣第三端塔爾巴哈臺界務查該界經明誼奎昌等分定有年迨崇厚來俄外部以分清哈薩克爲言於是議改考之輿圖已占去三百餘里矣臣每提及此事必抱舊界之論吉爾斯知臣必不肯照崇

厚之議始允於崇厚明誼所定兩界之間酌中勘定專以分清哈薩克爲主所稱直線自奎峒山至薩烏爾嶺者卽指崇厚所定之界而言也日後勘界大臣辦理得法或不至多所侵占以上界務三端臣與俄外部先後商改之實在情形也第四端嘉峪關通商允許俄商由西安漢中行走直達漢口總理衙門駁議以此條爲最重疊議商務者亦持此條爲最堅蓋以我內地無指定何處准西商減稅行走明文此端一開效尤踵至後患不可勝言外部窺臣著重在此許爲商改又云須各大端商定再行議及臣以事關全局儻不見允則餘事盡屬空談詞意激切彼於是允將嘉峪關通商仿照天津辦理西安漢中兩路及漢口字樣均允刪去第五端松花江行船至伯都訥查松花江面直抵吉林愛琿城定約時誤指混同江爲松花江又無畫押之漢文可據致俄人歷年藉爲口實崇厚許以行船至伯都訥在俄人猶以爲未能滿志也見將專條徑廢非特於崇厚新約奪其利直欲爲愛琿辨其誣臣初慮布策據情理以相爭無詞可對故擇語氣之和平者立爲三策一徑廢專條二稍展行船之路於三姓以下酌定一處爲之限制三仍允至伯都訥但入境百里卽須納稅且不許輪船前往布策均以爲不然適奉電旨

責臣鬆勁於是抱定第一策立言吉爾斯恐以細故傷大局遂允將專條廢去聲明愛琿城舊約如何辦法再行商定第六端添設領事查領事之在西洋各國者專管商業其權遠在駐紮中國領事官之下故他國願設者主國概不禁阻此次欲將各城領事刪去外部均以爲怪隨將中國不便之處與之說明吉爾斯猶欲於烏魯木齊添設一員嗣總理衙門電鈔編修許景澄摺內稱科布多烏里雅蘇臺烏魯木齊三處毋設領事其次爭烏里雅蘇臺烏魯木齊兩處等語臣復懇其商改始將烏魯木齊改爲土魯番餘俟商務興旺時再議添設第七端天山南北路貿易納稅查新疆地方遼闊兵燹之後凋敝益甚道遠則轉運維艱費重則行銷益滯招商伊始限以行走之路納稅之事商販實多未便閱總理衙門來電會言收稅爲輕臣因將原約內均不納稅字樣改爲暫不納稅俟商務興旺再訂稅章查西例納稅之事本國可以自主日後商情果有起色卽伊犁等處亦不妨逐漸開徵以充國課以上商務四端臣與外部先後商改之實在情形也此外又有償款一事凡商改之事益於我則損於彼臣旣卻以地易地之請彼遂以備邊耗費盧布一千二百萬圓索償且言如謂未嘗交綏則俄正欲一戰以補糜費等語

臣以勝負難知中國獲勝則俄國亦須償我兵費折之嗣總理衙門覆電囑臣斟酌如無別項糾纏統計約五百萬償款即可商定云云臣見吉爾斯熱梅尼等始則爭易兵費之名繼則爭減代守伊犁償款之數熱梅尼謂遲一年收回伊犁又加還帖克斯川代守費至少亦須加盧布四百萬圓臣察其意甚決乃以添償盧布四百萬圓定數查上年崇厚所議兵費償款盧布五百萬圓合銀二百八十餘萬兩此次俄國認出自華至英匯費則金磅之價較賤合前後盧布九百萬圓而統算之約計銀五百萬兩以內臣綜觀界務商務償款三大端悉心計較與總理衙門囑辦之意大畧相同即摘錄節略電請代奏俟奉後旨再行畫押至崇厚原訂約章字句亦略有增減如條約第三條刪去伊犁已入俄籍之民入華貿易遊歷許照俄民利益一段第四條俄民在伊犁置有田地照舊管業聲明伊犁遷出之民不得援以爲例且聲明俄民管業既在貿易圈外應照中國人民一體完納稅餉並於第七條伊境安置遷民之處聲明係安置因入俄籍而棄田地之民以防遷民雖入俄籍而仍有占踞伊犁田地之弊第六條寫明所有前此各案以防別項需索第十條吐魯番非通商口岸而設領事第十三條張家口無領事而設

行棧均聲明他處不得援以爲例第十五條修約期限改五年爲十年章程第二條貨色包件下添註牲畜字樣其無執照商民照例懲辦改爲從嚴罰辦第八條車腳運夫繞越捷徑以避關卡查驗貨主不知情分別罰辦之下聲明海口通商及內地不得援以爲例凡此增減之文皆係微臣與布策商草法文約稿之時反復力爭而得之者較之廷臣奏定准駁之議輓回之端似已十得七八此臣於節略七端之外又爭得防弊數端之實在情形也得旨該大臣握要力爭顧全大體深爲不負委任卽著照此定約崇厚之索地也僅得伊犁之半而巖險襟帶屬俄如故紀澤力爭乃收回烏宗島山帖克斯川要隘然後伊犁拱宸諸城足以自守且得與喀什噶爾之阿克蘇諸城通行無阻矣七年五月陞宗人府府丞七月遷都察院左副都御史先是逆酋白彥虎竄匿俄境督辦新疆軍務大臣劉錦棠請索還懲辦紀澤以西洋公例於尋常命盜各犯立有條約者莫不互相交還獨於稱兵之逆首則以公罪目之謂稱亂者衆爲之首者非一人之私故各國從無交還之事旣而與俄約定永遠禁錮奏結八年八月疏覆索倫營右翼四旗官兵分設霍爾果斯河西之策集齊齊罕薩瑪爾圖爾根等處其地盡歸俄境該官兵等

既慮無處棲止又恐所葬墳墓被漢回纏回平毀誠爲可憫惟中俄約章經臣隨同總理衙門王大臣仰稟宸謨竭力屢爭久而後定縱使其中有未盡愜心貴當之處亦事勢所無可如何刻下既已互換頒行卽宜彼此堅守不生異議至商議畫還該四旗之地無論由總理衙門商之駐京公使或由臣商之俄外部均屬迹近改約俄人勢必不允徒使大體有礙若由邊界大臣於分界之時就近婉商俄官能以他處幅員無多之隙地或以他項之補償換回四旗之地則自以收地爲佳如地界必不可收猶可商及將該四旗官兵遷歸伊犁境內另行安插而與俄官約定章程設法保全兵民墳墓如此由分界官立言卽使俄人不受商量尙不致牽涉已換之約章致俄人之譏議也十二月差滿得旨再留三年時法越構釁紀澤與法人辯爭始終不撓又疏籌備禦六策十年閏五月閩浙總督左宗棠以紀澤才堪肆應保薦命交軍機處存記十月擢兵部右侍郎旋與英人議定洋藥稅釐併徵條約歲增入款二百餘萬兩十一年六月命回京供職九月奉慈禧端佑康頤昭豫莊誠皇太后懿旨創設海軍衙門命紀澤幫同辦理十二月轉兵部左侍郎十二年十一月命在總理各國事務衙門行走十三年正月調戶部右侍

郎兼管錢法堂事務十四年六月管理戶部三庫事務九月兼署刑部右侍郎十五年二月管理同文館事務八月兼署吏部左侍郎十六年卒遺疏入諭曰戶部右侍郎曾紀澤才猷練達任事勤能由廕生部屬承襲一等侯同治年間奉特旨以四五品京堂用朕御極後疊加遷擢洊陟卿貳簡任出使大臣聯絡邦交熟悉一切情形辦理悉臻妥協嗣在總理各國事務衙門行走並幫辦海軍事務均能盡心職守日前偶感微疴賞假調理方謂即可就痊長資倚畀忽聞溘逝軫惜殊深加恩賞給太子少保銜照侍郎例賜卹任內一切處分悉予開復應得卹典該衙門察例具奏伊子廕生曾廣鑾著俟服闋後由該部帶領引見兵部主事曾廣銓著以員外郎補用以示篤念盡臣至意尋大學士直隸總督李鴻章疏言紀澤自光緒六年兼使俄國改換約章正承崇厚失詞獲咎之後俄人藉爲要挾之端約自我廢勢難轉圜其時沿海震動以爲兵事將起該侍郎受任於危疑之際力爲其難竟能廢已定之成約折無厭之要求易危爲平卒歸於好不惟界務商務保全實多而弭兵息民大局所關尤非淺鮮約成之始優旨褒獎中外論者咸謂此舉殆中國辦洋務以來所無卽泰西交涉亦未嘗有也九年法越事棘差滿將

代奉旨留任以與法人辯爭該侍郎力持正論法人畏避其鋒至不敢復與議事一時海內傳誦翕然以爲正論之歸十年冬間在英議定洋藥稅釐併徵條約此中國歷年議辦而未行英人久宕而不願者該侍郎悉心商辦克底於成至今歲增入款二百餘萬兩且使洋藥釐重價昂吸食漸少暗消隱患其事蹟皆卓卓可傳而俄法兩役當時和戰之局臣始終與聞其中曲折爲難情形局外多未深知惟臣知之最悉其奏疏函牘一一具存艱苦之情歷歷在目每一念及未嘗不失聲歎息以爲有古名臣之風該侍郎係二品大員國史例得有傳惟事關洋務記述應請敕下總理各國事務衙門將當時案牘擇要咨送史館編入傳中庶足垂諸不朽該侍郎爲故大學士曾國藩長子少承家訓劬志勵學羣經俱有論述於小學樂律尤爲顛家其餘力兼通泰西文字語言更屬當代士大夫所罕有方創設海軍衙門時該侍郎猶未回京特奉懿旨幫辦事務草創之初一切規制多所贊畫閏二月臣在都會議朝鮮事宜該侍郎力疾趨公猶復長慮卻顧情溢於言其忠愛之誠臨危不改實爲國之盡臣可否特旨予諡出自恩施疏入諭曰李鴻章奏已故大員勤勞卓著請將事蹟宣付史館立傳一摺原任戶部右侍郎曾紀

澤奉使各國克勤厥職嗣在總理衙門行走辦理中外交涉事宜諸臻妥協辦理海軍事務一切規制贊畫頗多著將生平事蹟宣付史館立傳並加恩予諡用示篤念蓋臣至意尋賜祭葬予諡惠敏子庶鑾都察院左副都御史廣銓兵部員外郎

孫詒經

孫詒經浙江錢塘人咸豐十年進士改翰林院庶吉士是年粵逆陷杭州乞假歸奉父至甬上同治元年正月參寧紹台道張景渠軍聯絡紳耆部署卒伍攻鎮海拔之進攻寧波府城民團不期而至者十餘萬四月克之遂分兵下奉化慈谿餘姚三縣二年正月下紹興府城浙東肅清四月散館授檢討九月充國史館協修旋補纂修十一月論前克寧紹功閩浙總督左宗棠彙案請獎奉旨以應陞之缺開列在前三年八月充本衙門撰文命在南書房行走四年三月充會試同考官閏五月擢國子監司業五年三月文宗顯皇帝永遠奉安隨扈加一級六月奏請將盜案改歸成例其略云弭災首在恤刑治獄務求平法查律載強盜已行但得財者不分首從皆斬康熙五十四年奉聖祖仁皇帝諭大學士會同三法司將造

意爲首及殺傷人者正法餘俱減等發遣雍正五年世宗憲皇帝復命九卿分別法無可貸情有可原纂入例冊歷久遵行咸豐五年刑部以盜風日熾議奏凡遇盜劫之案仍依本律不分首從皆斬並聲明俟盜風稍息奏明仍復舊制等因各在案夫改依本律嚴懲搶劫爲近年盜案多也顧自咸豐五年以迄於今行之已十餘年而盜案不見少可見弭盜之法不在用法之嚴矣臣伏思明火搶劫顯干法紀概予駢誅原不爲過迺列聖寬大之詔必分別首從者非稍存姑息也蓋以盜劫之事非首不行民誠知畏法則嚴首盜之罪使無敢造意爲盜者又安得有從且爲從而入室搜贓則與首盜同科爲從而僅把風接贓則有發遣之罪又何嘗不仁至義盡也夫爲民立法惟其平而已法盡於此而民猶不知畏則當思民所以不畏法之故而徒欲峻法以懲之其究也不足戢奸宄之萌而徒傷忠厚之意臣竊聞刑部盜案往往有無知小民迫於飢寒被誘入夥實無凶惡情狀者案情敗露首惡在逃此輩均罹法網該堂司官研訊確情未嘗不存哀矜惻怛之意徒以格於定例不敢重輕惟有籲懇敕下刑部遇有尋常盜劫之案仍分別法無可貸情有可原改歸成例以復聖祖仁皇帝世宗憲皇帝法外施仁舊制至情有

可原中應如何酌量變通以杜避就並請敕下刑部妥議具奏下部議行六年二月奏云臣恭閱邸鈔奉上諭翰林院侍講學士夏同善奏禮貴因時請緩行幸一摺據稱道路傳聞將幸惇親王府並傳集梨園各部請卽行停止等語覽奏實深詫異前曾傳旨於本月初五日朕奉兩宮皇太后虔詣惇親王府第神殿前行禮所以循奉舊章而展懿親斷無傳集梨園之理且此時惇親王府第神殿前行禮敢預備朕念典方殷日存寅畏何至以耳目嗜好爲天下先如惇親王果有傳集梨園之事著卽撤去所有初五日詣府行禮之處仍照例預備仰見皇上慎修思永聖敬日躋天語煌煌不勝欽佩抑臣尙有進焉者近又聞皇上將詣恭親王府行禮伏思恭親王之外王府尙多皇上推親親之意或將以次親臨曲盡典禮夫念夾輔之功篤宗盟之誼舊章具在誰曰不宜惟是聖學方新宸修宜懋經帷屢曠則神志難專法駕時勤則見聞易惑一日詣府一日已荒念典之功今日行禮異日或啟遊觀之漸古聖王謹小慎微朝乾夕惕實深鑒乎此非臣之過慮也且小民無識疑議易生前者皇上將侍兩宮皇太后詣惇親王府第輿論紛然遂疑有傳集梨園之事雖浮言之無據抑衆口之難防書曰顧畏於民暑誠可畏也已臣

愚以爲皇上冲齡踐阼凡臨雍經筵諸大典或俟親政後再議舉行今此詣府行禮之典應請概行從緩以重聖學而息羣疑疏上報聞四月丁父憂八年七月服闋命仍在南書房行走十一月以業師前翰林院編修上書房行走張洵杭城被陷全家殉難疏請加恩予諡並准於該地方建立專祠其家屬一體從祀以彰忠節允之又奏請嚴杜各直省鄉試弊端其略云鄉試爲掄才大典科場條例至嚴且密乃近日積久弊生有亟宜整頓者一同考官例用正途督撫先期考試近聞該員自經與考卽有不肖士子夤緣干謁交通關節之事請敕下各省督撫考試簾官必遴派公正廉潔之員檄調到省卽令同寓不准與人交接往來另派道府二員同寓隨時監察以杜請託試日必嚴密關防毋使代倩傳遞聞同考官應酬費用甚繁廉吏苦於賠累宜令該督撫酌議優給薪水俾得專心校閱一不肖士子交通關節之弊大抵由於紅號同考官所閱硃卷面有硃印某字第幾號士子於試期前賄屬藩司書吏預將紅號說定因以交之考簾人員用戳之時書吏卽檢某卷用某字號故同考官得卷了然請敕下各省督撫於印用紅號時遴派廉明道府隨抽試卷用戳書吏止令登冊則若輩無所施其技矣一糊名易書謄錄

尤易滋弊定例由各州縣書吏內之善書樸實者均勻選派遣具年貌清冊並親書筆跡籤差妥役解送布政使考驗相符卽封入公所加謹關防屆期委員親送入場乃近來悉係頂替士子賄屬則筆墨精工不賄屬則潦草舛誤甚有舉貢生監以此射利包攬入場點竄詩文毫無顧忌及中式後賄通藩司書吏換卷請敕下各省督撫責成各州縣仍照定例選派正身書吏充當謄錄考試時如有筆跡不符者從嚴懲辦謄錄官宜多派大約一謄錄官止可管五十人入場後各官認明所管謄錄令坐歸一處試卷到時勿遽經謄錄之手該謄錄官必親自按名給卷派寫如有互相調換者嚴懲不貸一士子代倩傳遞諸弊代倩大抵必亂號或倩屬書吏預謀聯號見在各省場規較寬次日黎明開號門後不復扃閉彼號士子可走入此號代倩尤爲至便並可勿庸傳遞其傳遞率串通辦考人役由場外遞進弊不勝述請敕下各省督撫於編列坐號宜遵照定例監臨監試提調親身詳慎辦理不得假手吏胥致滋買屬聯號之弊至查號之法做照會試加戳之例監試提調等官於考試日分入號中視每卷某號旁再加印一某字其亂號者字樣不對卽暗記以授受卷官照例貼出查功令交卷後均領籤由甬道徑出不得

偷歸號舍亦不准另入別號宜飭巡綽官嚴密稽察如士子交卷後擅入柵闌稟明監臨究處其挺身肆鬧者照例治罪至傳遞諸弊防不勝防該督撫務當密訪本地紳士窮其弊竇設法杜絕場中惟責成巡綽官認真嚴查凡水夫雜項人役不准與士子私相授受號軍領供給等事必親自監察如有怠玩者從嚴參辦一冒籍考試例禁綦嚴近聞各省寄居俊秀臨場紛紛捐監投考或並未捐監借別姓之照冒考中式後呈請歸宗改回原籍甚有父兄遊宦之省其子弟卽在該省冒考中式者至頂替之弊監生尤甚比及進場皆難稽察查定例監生赴學政錄科錄遺由地方官具結申送今擬再令本學廩生二人具並非冒籍頂替字樣甘結錄科錄遺唱名時出結廩生眼同識認如有含混送考者一經察出將該監生治罪具結廩生斥革惟以上諸弊士子積習相沿幾於罔知功令請敕下各督撫先行剴切曉諭嚴加整頓肅場規亦以端士習也九年二月仍補國子監司業六月充陝西鄉試副考官十月頒賞文宗顯皇帝聖訓一部御書孝悌清廉扁額並寬惠懿恭能養福剛健篤實以和神楹聯以賜之十年三月擢翰林院侍講五月充日講起居注官七月充教習庶吉士十一年二月復充國史館纂修四月奏天

象可畏請遇災修省其疏云欽天監推算本年五月初一日由巳至午京師日食九分四十餘杪臣維日者太陽之精人君之象凡日食之變皆天垂象以警人君者也今食至九分四十餘杪天之垂戒者大矣昔漢文帝因日食下詔謂天之示災以戒不治深以不能治育羣生上累三光之明是懼其所以謹天戒者何深且切也我皇上冲齡踐阼奉兩宮皇太后垂簾聽政兢兢業業宵旰不遑用能一平粵匪再平捻逆十一年來始終無間天下方延頸企踵以望太平乃今者非常之警日食至九分四十餘杪之多幾及兩時之久抑獨何歟意者政治尙有未盡歟臣伏讀文宗顯皇帝御製文曰爲開創之君難爲守成之君尤難爲蒙業承休之君難爲持盈保泰之君尤難誠以人主日理萬幾惟恃憂勤惕勵其難其慎一念不敢少寬一時不敢少懈然後沴氣消而協氣應也臣愚伏願我皇上念祖宗創業之難思億兆託命之衆隆孝治以溥雍熙之化勤政理以防叢脞之虞親君子以成泰交之美遠小人以杜熒惑之萌而且軍務尙多餉需告匱民氣未復帑藏不充尤當力崇節儉屏黜浮華惜天下之脂膏培萬年之國脈夙夜祇懼惟日孜孜以上副文宗顯皇帝付託之重並請敕下中外大小臣工各宜振刷精神勤求

治理毋蹈因循共儆天戒庶幾祥和可迓天變可回天下幸甚奉上諭朕臨御以來兢兢業業宵旰不遑期與中外臣工共求上理矧值本年五月初一日日食上蒼示警寅畏益深該侍講所陳隆孝治勤政理親君子遠小人並崇儉黜浮各節披覽之餘實深嘉納爾中外大小臣工亦當振刷精神各勤職業庶幾交相儆勉政事修明以迓祥和而消沴厲八月以校閱方略詳慎賞加一級又以穆宗毅皇帝大婚禮成奉旨以應陞之缺開列在前十二年二月京察一等加一級七月頒賞御書鏡橫曉影澄潭碧花壓春陰隔苑紅楹聯九月頒賞欽定剿平粵捻方略各一部並御書獨步文章扁額一方十三年以天變疊著奏云臣聞天所以有災變者所以譴告人君俾增修其德而消患於未萌也今夏彗星忽出光芒所指凡城廂內外婦孺皆驚臣日來仰觀乾象復爲太白經天之變其所占驗欽天監衙門必已具奏毋庸臣之贅述臣竊思皇上受列祖列宗之付託爲億兆生民之君主當此上蒼疊警宸衷敬畏必有大不安者然自古天道之感應皆本於人事之得失若因是益深寅畏自可轉危爲安輓回禍患惟應天以實不以文應請皇上亟下明詔曉諭臣工交相惕勵凡政事之闕失民間之疾苦在廷言責諸臣剴切

指陳無所隱諱至於圓明園工程雖本奉養兩宮皇太后之意然值如此天變昭著尙勞民力耗費經營外省採辦木植擾累閭閻復滋民怨我皇太后聖明亦必以爲不可應請暫停興作俟帑藏充盈再行修葺如此戰兢恐懼精神感格庶足以荷天庥而消沴戾八月轉補侍讀扈蹕南苑九月陞侍讀學士十一月穆宗毅皇帝不豫奏請敕下軍機王大臣保舉名醫數人會同太醫院臣李德立等斟酌處方並廷詰德立等詞氣激切同列難之十二月穆宗毅皇帝升遐奉兩宮皇太后懿旨迎皇帝登極越日奉命校刊穆宗毅皇帝御製詩文光緒元年二月頒發穆宗毅皇帝遺念江紬羊皮四開袂袍江紬綿馬褂各一件五月大考一等第四名奉旨以詹事陞用先換頂戴六月奏云講求吏治先在大吏深知屬吏之賢否今保舉之多捐納之廣品流稍雜人數實繁旅見衙參何從精覈擬請敕下各直省督撫藩臬每日於知府以下至州縣各員接班接見十人或八人分爲兩班或隨舉一事或隨引一案反覆討論並將日行公事命擬批四五件則其人之德性才具已可略知梗概互相印證則進退自有權衡而庸材不敢存倖進之心矣至於民心之向背視乎州縣之賢良莫大乎爲民興利除弊擬請敕下各督撫通飭

州縣將地方實在利弊情形詳細稟報何者有便於民應如何辦理何者不便於民應如何裁革縷晰條分稟商核辦該督撫謹將皇太后皇上休養元氣愛惜百姓之意明白宣示並許該處老成碩彥凡有本地應興之利應除之弊隨時具呈州縣官以備採納至如何興教化清獄訟防盜賊懲吏胥飭各州縣認真講求毋得視爲具文該管道府本有考覈之責諭令隨時訪察各州縣果能實心實力與否如有意存袒護不肖州縣被劾道府一併議處至州縣之賢者尤必以久於其任爲貴各省州縣缺肥瘠不同其瘠者賠累太重每太息於廉吏之不可爲查從前撫臣董教增曾奏准酌提優缺州縣之羨餘以補苦缺之不足擬請敕下各督撫妥爲籌畫則調劑之說毋庸而缺之瘠者亦得盡心民事該督撫於州縣之賢者隨時入告以慰朝廷望治之殷其不賢者必深味乎一家哭何如一路哭之義參劾從嚴毋得姑息不肖以養癰貽患如此則吏治清而民心無不悅服矣九月穆宗毅皇帝奉移隆福寺暫安隨扈加一級二年三月補詹事府詹事並充咸安宮總裁閏五月充福建鄉試正考官八月提督福建學政九月頒賞穆宗毅皇帝御製詩文集一部四年二月陞內閣學士兼禮部侍郎銜十二月遷工部左侍郎

均留學政任五年七月代辦己卯科福建鄉試監臨接辦繙譯場舊例繙譯於十人取中一名是科投卷止九名爲禮部所糾下部議罰俸三月十月請假一月回籍修墓六年二月銷假回京命仍在南書房行走七月奏云聖朝如天之量與外國和好數十年無不由予優容以示中外一家之意乃近以俄羅斯國要約過甚深恐包藏禍心構釁中國日來外間傳出不一人人有意外之虞不識朝廷如何布置有恃無恐臣料俄國既動兵船不能無端而罷如欲議和則不特去年所議十八條難於改易勢必重索兵費而後已卽隱忍遷就敷衍目前而我旣不能自強彼更藐視益甚將來貪恠無厭何所求而不得如欲議戰則洋人兵艘之利火器之精列陣而出有進無退非謀出萬全斷不可輕於嘗試見在海防之策天津山海關等處皇上必已密授方略臣愚以爲近京地方尤宜添調勁旅扼要駐紮方爲嚴密惟倉卒招募不習之兵未必可用查長江水師從前本是陸軍久歷行陣膽氣較壯目前先其所急擬請敕下統帶長江水師臣彭玉麟長江提督臣李成謀迅將水師挑選精銳萬人帶赴京畿改作陸軍以爲居中策應之用其口糧仍由沿江各省按月起解毋庸另撥餉項彭玉麟等紀律素嚴身經百戰必能將

士效命緩急可恃夫咸豐庚申北塘之變亦以兵力全在海口近畿毫無準備以至敢於內犯前車之鑒可爲寒心抑臣更有請者直隸督臣李鴻章所部兵勇尙多自足以資抵禦山海關見調何人扼守所調兵勇不知若干人臣深慮俄羅斯避實就虛卽從東路海口竄入山海關非得重兵兩萬不易防守請敕調著名宿將厚集兵力俾資守禦而壯聲威八月調刑部左侍郎七年四月調戶部右侍郎兼管錢法堂事務尋提督順天學政時大學士左宗棠請修畿輔水利下王大臣會議舉辦五月疏薦侍講學士張之洞侍講張佩綸助之其略云昔人言水聚之則爲害散之則爲利棄之則爲害因之則爲利自宋臣何承矩元臣托克托郭守敬虞集明臣徐貞明邱濬袁黃汪應蛟左光斗輩極言北直水利根本要圖辦理皆有成效國朝如怡賢親王李光地陸隴其朱軾胡寶瑗柴潮生藍鼎元諸臣亦各指陳剴切鑿鑿可行今以數百年未竟之功大學士左宗棠毅然創議興修千載一時在此一舉惟河道遠近異勢今昔異形辦理稍有未宜不但徒勞且滋浮議臣伏念王大臣等政務殷繁勢不能周歷履勘必得博通之士又直隸本籍之人親往督辦諮諏相度方能將直隸全局之水源委清濁分合強弱條分縷晰瞭

如指掌而下手之先後緩急乃可次第以收其效竊見翰林院侍講學士張之洞翰林院侍講張佩綸器識閎遠才具明通又皆直隸本籍之人於桑梓之邦興無窮之利必能慎重周詳不遺餘力可否敕下親詣履勘聯絡各處公正紳耆悉心籌畫隨時函商王大臣等督飭興修當可收指臂之助查雍正三年世宗憲皇帝命怡賢親王偕大學士朱軾查修直隸水利王欲得善治河者朱軾以翰林院編修陳儀對王延見訪以治河所宜先儀指畫精詳厥後一切施行頗著明效蓋陳儀乃順天文安人以土著通才籌萬年至計故較之借材異地尤爲裨益見在時事多艱經費日絀誠使水無遺利一勞永逸西北之粟米日增東南之歲漕可減數年以後北米充溢不必專藉轉輸則歲漕一百十餘萬石半可折徵而漕務一切經費亦可節省其半裕國便民莫大於是抑臣更有進者明徐貞明領墾田使先詣永平募南人爲倡墾出至三萬九千餘畝又徧歷諸河將大爲修治而閹人勦戚之占閒田者爭爲蜚語流入禁中得御史王之棟一疏竟爲所撓千古惜之我皇太后皇上聖明洞鑒無微不照王大臣等公忠體國慮遠謀深定無宵小浮言巧於簧鼓第恐非常之原黎民所懼試辦之初不免物議沸騰怨其不便惟冀

聖聰獨斷堅定不移萬世幸甚七月奏請變通八旗童試章程其略云素聞八旗童試頂替入場已成積習曾先期咨明八旗都統嚴飭派出之識認官認真查察並曉諭各童生俾知臣此次考試力求整頓之意奈各旗參佐領領催等與文人素不相習無從識認徒爲具文旗學廩保止有派保不似漢人有認保挨保之分未嘗專予識認之責教官雖具保結而八旗童生向不進謁安能辨其真僞至各處屯居旗童及奉天而原籍京旗者尤爲漫無稽考以至各童生肆無忌憚實屬不成事體請旨敕下禮部於八旗童試再行變通舊例嚴定章程詳議具奏務使頂替惡習無所施其技倆庶可遴拔真才八年七月又奏請變通屯居旗童章程其略云屯居旗童來京報考向無文據參佐領無從辨認恐尙不免有朦混之弊查八旗屯居內務府三旗屯居五旗包衣屯居向均由在京佐領指派守堡一缺名曰屯領催該堡應試旗童自應熟悉至童等家長理宜約束子孫俾各循循規矩儻有槍冒考試等情該家長豈得置身事外擬請嗣後屯居童生報考先取具該守堡領催及家長等甘結親持入京呈明佐領該佐領等驗明所持保結實係本童然後出具圖片以杜朦混請旨敕下八旗都統內務府三旗暨五旗包衣專

管大臣明定章程妥議具奏著爲定例庶屯居旗童頂替之弊可以永除兩疏併下禮部議行九年六月轉左侍郎兼管三庫事務仍留學政任十年閏五月疏薦內閣侍讀學士鄧承修左庶子盛昱鯁直敢言講求經世之學福建臺灣兵備道劉璈安徽廬州府知府黃雲勤政愛民實事求是武強縣學教諭潘恩增品詣篤誠介然不苟上躋之承修等四員並奉旨交軍機處存記而予恩增內閣中書銜十一年八月任滿回京命仍在南書房行走兼署禮部左侍郎十月充順天武鄉試副考官十二月命在毓慶宮行走十二年二月署吏部右侍郎十月賜紫禁城內騎馬十二月山東巡撫張曜以黃河工程領部庫銀一百萬兩銀庫書吏史恩濤有索費銀一萬兩之事因斥革交坊先令繳還費銀再行請旨懲辦御史王賡榮張炳琳劉綸襄吳兆泰交章彈劾謂辦理輕縱得旨著明白回奏越日奏云戶部銀庫應放山東河工款項銀一百萬兩前月據山東撫臣張曜派員請領臣當卽飭司趕緊開放眼同委員等在庫門前給發並無短少忽風聞銀庫書吏史恩濤有需索費銀一萬兩之事又聞該吏雖索鉅款委員等並未允給以臣嚴催趕放該吏無從阻攔因卽放出等情臣徧處密查毫無實據然臣素性嫉惡旣有所

聞斷不容蠹吏倖逃法網因特傳該吏至戶部堂上面加嚴訊立即斥革而該吏堅不承認無憑覈辦遂一面交坊嚴押候審一面先誘令繳銀一萬兩俟繳足後據款請旨懲辦臣之用意以爲索贓無據而繳款有據必俟鉅款繳出則該吏之貪婪不問可知此臣辦理該吏之原委也原奏張曜函屬追問一節查該省頭批銀兩於前月十二日甫經放出計該委員餉鞘行程至早亦十五站始到山東臣於二十九日當堂詰問函書不能如此之速其同官籌商一節臣惟恐洩漏致該吏遠颺是以不與一人提及戶部同官實未會同商度臣辦理此案係在大廷廣衆之中堂上堂下共見共聞實爲整頓積弊起見見在尙未辦結何得遽謂委曲遷就希圖了事除將該吏等押送刑部嚴訊外謹繕奏具陳十三年正月奉諭曰前因御史王賡榮等奏參戶部銀庫書吏史恩濤侵扣鉅帑等情當交刑部嚴訊並敕令孫詒經明白回奏嗣經刑部傳訊該部書吏等恃無贓證堅不吐實復飭山東巡撫張曜訊取該委員等確供交部覈辦茲據刑部奏稱書吏等索詐一事訊無實據照被參各節約量完結等語已革書吏史恩濤此案雖無需索使費確據惟以一書吏屢被言官參奏平日車馬衣服奢侈踰度其爲遇事招搖聲名狼

籍已可概見必應嚴加懲辦以儆將來史恩濤著照部議杖一百徒三年餘依議
戶部左侍郎孫詒經將史恩濤斥革交坊意在嚴懲蠹吏惟未經查出實據輒誘
令繳銀辦理殊爲失當孫詒經著交部議處二月諭曰吏部奏遵議處分一摺戶
部左侍郎孫詒經應得罰俸一年處分著不准抵銷又諭曰戶部左侍郎孫詒經
著毋庸在毓慶宮行走十五年八月充順天鄉試副考官十月以浙江水災奏請
賑撫其略云浙江本財賦之區自軍興以來民間元氣未復戶鮮蓋藏本年七月
間大雨滂沱連宵達旦各屬同遭水患杭嘉湖三府災情最重寧波紹興及玉環
廳等處情形輕重不等其時將屆秋收農民工本業經用罄專待新稼登場爲仰
事俯畜之計一旦盡付洪流困苦顛連萬無生理撫臣崧駿奏稱三十年來未有
之奇災係屬實在情形見經欽奉恩綸諭令妥速辦賑闔省士民同深欽感惟災
區太廣雖經撫臣飭司酌撥銀穀動放倉米而數十萬災民待哺嗷嗷實有杯水
車薪之慮且杭嘉湖等府均有客民滋生事端臣籍隸杭州疊接鄉人函電縷述
災黎困苦情形慘不忍言自非得有鉅款不足以資補救伏惟皇上軫念斯民有
加無已本年夏間山東災歉欽奉恩旨准由藩庫撥銀五萬兩並由部撥銀十萬

兩復截留南漕十萬石今浙江災區甚廣可否仰懇天恩賞撥重帑交撫臣崧駿體察各屬災情輕重酌量分給並遴派公正官紳覈實散放俾飢民餬口有資不致流離失所詔如所請行詒經自入直南書房歲蒙頒賞福壽字龍虎字珍玩文綺等件自任侍郎充新貢士覆試閱卷大臣四次各直省鄉試覆試順天鄉試覆試閱卷大臣貢士試卷覆勘大臣殿試讀卷官各二次武殿試讀卷官一次朝考閱卷大臣庶吉士散館閱卷大臣各三次考試漢廕生漢謄錄翰林院孔目宗室舉人宗室進士覆試考試試差閱卷大臣各二次覆覈朝審大臣三次屢持文柄所甄錄一以清真雅正爲宗深病末學骯髒之習務摺斥之論學以踐履爲先博覽爲後亦不持漢宋門戶之見在戶部十年於設銀行開鐵路斷斷持異議或合辭或獨疏尤舉朝所難言他所條列亦以樸誠答知遇多所裨助十六年十一月卒遺疏入諭曰戶部左侍郎孫詒經由翰林洊升卿貳曾在南書房行走迭掌文衡克勤厥職前因患病賞假調理茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏尋賜祭葬子寶琦二品廕生候補四五品京堂寶瑄四品廕生工部主事

周德潤

周德潤廣西臨桂人同治元年進士改翰林院庶吉士二年散館授編修歷充國史館協修纂修總纂光緒元年大考三等充實錄館纂修三年九月穆宗毅皇帝實錄全書過半保奏出力人員奉旨遇有應陞之缺開列在前並加五品銜五年八月補授國子監司業十一月出使俄國大臣崇厚違旨定約德潤上疏請另遣使臣並申明法紀疏入上聽其言即日召見遣使更約如所議行十二月因編纂畫一臣工列傳出力賞換四品銜是月穆宗毅皇帝聖訓實錄慶成奉旨遇有應陞之缺開列在前並加隨帶三級六年三月補授詹事府右春坊右中允五月陞司經局洗馬七月署日講起居注官八月補授翰林院侍講九月轉侍讀七年正月疏論各直省保舉孝廉方正之弊擬請敕下各督撫秉公保薦任缺毋濫三月補授右春坊右庶子七月補授翰林院侍講學士八年二月轉侍讀學士八月陞詹事府少詹事時江西巡撫李文敏貪庸不職德潤上章劾之詔議李文敏罪十二月充文淵閣直閣事經筵講官九年正月補授內閣學士兼禮部侍郎銜八月疏陳刑罰之失以失入之過起自承審而平反之功專賴審轉近如浙江葛畢氏

江南三牌樓河南王樹汶等案顛倒是非幾令覆盆無見天之日擬請通諭各督撫申明舊例如有審轉之員能平反大案者卽登上考循例保題庶幾天下以酷吏爲戒疏上下部議行十年正月大學士左宗棠以疾乞退已奉俞旨德潤上言左宗棠不宜去位請旨責其引退之非示以致身之義以資倚任而濟時艱上嘉納之復以疆臣徇私濫保上疏先是調任廣東巡撫前廣西撫臣倪文蔚因官軍在越南擒斬陸之平功保列廣東試用知府鄒觀皋德潤疏言鄒觀皋久在粵東需次八年二月間兩廣總督張樹聲委查臨桂西鄉糧案與關外擒渠若風馬牛不相及請敕下吏部將鄒觀皋保案撤銷又以倪文蔚才略素短吏治廢弛收受梧州懷集賀縣桂平等處季規肆無忌憚三次保案贍徇欺罔請旨嚴加懲處上命張樹聲查辦及覆奏上德潤覈時日計道路上章爭之謂其覆奏欺誣尤出情理之外得旨張樹聲倪文蔚均交部議處並撤銷鄒觀皋保案是時法人侵我越南德潤凡三上章請力保藩封速定戰計奏稱法與中國勢不兩立有不可和者五宜用兵者七大凡禦寇者禦之室中不如禦之門外今越以全境歸法則白馬關外我不能暫駐一營鎮南關外我不能進紮一步臥榻之側虎狼同寢我之防

彼日引月長彼之襲我朝發夕至其不可和者一自來諱言兵者每以踞地爭城爲大患而以通商傳教爲無傷若法之於越始以和餌之終以兵備之有墮其術中而不覺者儻以待越南者待中國竊恐通商於滇今日之蠻耗蒙自卽異日之西貢也傳教於粵今日之太平南寧卽他日之河內也其不可和者二凡沿海諸省未嘗不立馬頭設領事然他國遠隔重洋卽懸軍深入亦我逸而彼勞法國全吞越土苟瞰我鄰邦且反客而爲主其不可和者三中國招劉永福雖謂救越實以捍邊劉永福之出保勝雖謂扶越實衛中國今一旦窮蹙而去法必向中國索之不與則藉納叛爲詞與之則令豪傑解體其不可和者四且我兵旣退之後法以條約制越人兩圻土兵必有爲其號召者以重金購壯士黑旗舊部必有爲其招募者以越人擾吾邊中國反受屬國之害以華人攻內地匪黨反爲嚮導之師其不可和者五竊謂目前大計莫先於正屬國之名責越人之疑貳册封之事可暫停毀新約之規條要挾之詞不足據將興滅繼絕之義宣布於天下使海島諸夷直我而曲彼則聲罪致討不患無詞其宜用兵者一莫要於收忠義之心也乘新喪而用武越君之降非本心用苛政以虐民越臣之服非得已積怨深仇惟延

頸以望中國之救耳儻整我六師檄其反正南北圻之義士必將倒戈以殺強敵其宜用兵者二聞開化以南其山多瘴秋暮而瘴始輕紅江以北其水多毒冬來而毒始解如法人趁此天時長驅深入全滇勢必震驚故不如先發以制之其宜用兵者三且法人之勝亦未足恃也外有英德之窺伺國似實而實虛內有議院之參商兵雖進而易退古未有強鄰覬覦將相不利而能成功於外者誠合全力以逐之其虛憍之師必膽寒而遁歸巢穴其宜用兵者四河內據北圻之形勢三面臨江劉團由懷德陸路一面攻之所以日久無功如令彭玉麟督師欽廉海口遴派得力將弁以輪船扼駐海防以絕西貢之接濟並分兵船薄富良江以截江面之應援則河城剋期必下其宜用兵者五北寧爲廣西門戶當以勁旅鎮之山西爲雲南門戶當以精銳控之北寧距河內一百十里山西距河內八十里我兵相機夾擊法將四面受敵勢必棄城而竄其宜用兵者六重賞之下必有勇夫聞外間助劉團有每月五百金千金之說何足以集大功屢奉旨指撥重帑原以濟一時權宜之用疆臣何憤憤乎苟厚其資使募水師而購利器則越將爲我前驅勇氣自當百倍其宜用兵者七當斷不斷其禍立至安危之機決於俄頃矣又言

中國所以禦外夷斷未有介乎戰不戰之間而可以中立者也法越構兵朝廷慮遠憂深不明言禦法特紆其說爲防邊不明言救越特祕其事爲暗助雖豫留一議和之地而其可和可戰之機已微露於言外惟宸謨微妙疆吏難窺終以無所稟承而罔知設措勢必有誤於啟釁者將以戰獲罪有誤於不啟釁者將以不戰獲罪迨大局敗壞卽置疆吏於重辟亦何補於國家見值越南降法劉軍窮蹙中國若仍依違兩可徘徊於戰不戰之間此必危之道也可危者一劉軍不敵必將資以重兵犒以厚餉密邇數百里之間歷時七八月之久法人盡知之矣助之而敗禍不待言助之而勝亦必歸曲於我而逞憤於我可危者二法人盡有越境矣滇軍在山西粵軍在北寧法不謂保我境而謂侵彼疆咨以照會令我退師何以答之轟以大礮毀我營壘何以應之斯時欲戰則未奉明文不戰則貽羞中國可危者三從來馭軍之道有進尺無退寸嚴勒諸軍殺敵致果不用命者誅然而潰且敗矣今不曰必殺敵而曰毋開釁夫兵亦何樂乎開釁執冰以邀寇至則竄耳雖有萬人實無一人可以固圉可危者四不特兵然也聞疆臣有將防軍撤回者有逗留境內逍遙境外者其或巧於藉口以請戰爲名私意亦欲走耳可危者五

且法必要我通商於滇必要我傳教於粵必挾制我夾攻劉永福許之則自貽伊戚拒之則禍不旋踵竊慮挑釁之端方啟侵邊之旅已來可危者六況法以條約制越人兩圻土兵必有聽其號召者以重金購壯士黑旗舊部必有爲其招募者從此滇越無安枕之時尙欲諱言戰耶可危者七卽曰事尙可爲而依倚他人終無了局虛糜兵餉何所底止且堂堂疆吏奉令而出則易奉令而入則難若無成功不特有損國威亦且無顏遄返將來此事作何收束可危者八凡此八端莫從補救皆欲戰不戰之大害也又言今日急務有十大端一名義宜早定也查越法和約云法國明知越國係操自主之權儻有匪梗並外國侵擾法國卽當幫助是明謂越南非中國之屬而欲假託保護以自便其蠶食之謀然則中國欲爭越南必先存屬國之名欲存屬國必先盡保護之實非彼屬國而彼冒之則釁端自彼而開矣一書使宜常通也向例越南國書由廣西咨部代奏此承平無事則然非所論於危急權宜之際也近者越臣阮述航海齎書乞廣東奏遞該督以格於成例一再拒之藩封被難視同隔膜何足以示懷柔擬請敕粵東督撫如遇越南國書卽行變通代遞並就近派員慰問以示體恤簡書絡繹使者在道則越南歸吾

保護不待辨而自明矣一廣東宜酌調水陸兵勇備用也自翟國彥任提督以來營務廢弛已極所購船隻祇堪巡洋不能禦敵見值事機緊迫訓練實恐不及擬請密諭北洋大臣分撥輪船數號派赴欽廉海口相度機宜如有緩急卽行駛往海陽一帶以保廣安而窺南定如曾國荃駐節欽廉卽檄鄭紹忠莫雲成由陸路取道永安玉山等處以牽制法人河內之師則水陸並進奇正相生雖鋒刃未交而我之聲威已壯矣一雲南之兵宜逐次漸進也由滇至越陸路甚遠雖不必如前督臣富綱設立臺站亦當酌置驛寨以仿步步爲營之法可否敕下雲貴總督岑毓英揀帶大隊親駐開化通盤籌畫相機策應轉飭唐炯督率周萬順各部由蒙自循洮江右岸往據三歧江要口飭總兵蔡標等統領各軍由馬白關抵安邊馳駐宣光鎮兩軍自爲掎角以扼北圻之咽喉則河內不戰而自危矣一廣西宜速籌進取也廣西至越較近擘畫更宜周密道員趙沃總兵黃桂蘭人僅中材必得發蹤指示方可動協機宜擬請嚴敕藩司徐延旭迅速馳赴諒山密偵敵情熟籌勝算檄趙沃等穩慎前進或據市橋江或紮北寧省其緩急進止均聽徐延旭指揮至於大兵深入後路亦慮空虛且恐間諜隱伏凡憑祥歸順上思龍州思州

一帶急宜慎選紳耆籌辦團練特懸重賞激勵士兵以杜窺伺而資捍禦可戰可守而進退不憂失據矣一宜拊循越將也劉永福勇略過人曾殲法將安業久屯保勝權貨養兵葉成林盤踞十州苗地廣開金礦餉足兵強黃佐炎堅守興化擁兵數千三人皆越南梟將誠能就近派員前往宣布天威密頒厚賞使其感而思奮然後遣劉永福出保勝據屯鶴關以扼其險隘葉成林出十州攻河仙以覆其巢穴黃佐炎出興化取河內以撼其本根則我之黨衆法之勢孤有不聞風而遁者哉一宜羈縻暹羅也暹羅與西貢爲鄰法人欲假道暹羅開鐵路以通西貢暹羅不允遂爲仇敵暹羅專尊中國交英人益製船礮以自強前明陳用賓約暹羅夾攻緬甸我朝乾隆年間曾親暹羅以制緬酋此皆已然之效誠能遣一介之使示以利害令其興兵直擣西貢則法人有南顧之憂必棄北寧而自救矣一利權宜收也臨安筒舊錫廠礦苗甚旺近有商人開採由蒙自潛運越南販賣劉永福駐保勝收稅法人因而垂涎意欲通商之後或以商辦爲詞或以助工進步以遂其射利之謀擬請敕催雲南督撫迅速開辦其舉事也用西器而不用西人其流通也運內地而不運關外顯收中國之利權卽隱杜彼族之覬覦庶不致視眈眈

而欲逐逐也一餉源宜裕也勞師遠戍饋餉維艱當豫籌理財之道查越南地勢平坦黍稷豆麻無土不宜兼以地廣人稀隨地皆可開墾宜創辦屯田以資兵食至於海陸之利燕窩象牙魚鹽犀角金珠枴桂諸貨所產尤繁祇以該國嚴禁出口遂致稅務減色竊謂宜除其苛政輕其釐稅一切貨物皆開禁出口於屯鶴關權之除津貼華兵餉項外悉歸越南自用以越之財守越之士計無有善於此者一和約宜慎也以紅江通商而言無論劉永福不肯遽退卽聽越南遣撤恐永福去而北圻亡而滇粵亦危此紅江之斷不可通商者也以南北圻分界而言廣平關以北歸中國保護廣平關以南歸法國保護則邊事尙可爲然紅江在關北吾獨據之法必不願富春在關南吾獨委之越亦不願此南北圻之斷不可分界者也竊謂通商當以屯鶴關爲限屯鶴以南仍許法人由洱河以行屯鶴以北不准法人踰紅江一步分界當以廣南省爲限廣南以北北圻十六省法人不得駐紮一兵廣南以南嘉定六省之外法人不得私占寸土如此立約庶可保十年無事也以上十條未必盡利於行似亦慮遠憂深之計夫有琉球之覆轍始有今日越南之事有越南之覆轍將爲異日高麗之憂履霜堅冰臣實滋懼疏入蒙召見以

熟悉邊情特加倚任三月命在總理各國事務衙門行走尋以法人要挾疏言法人既勒退兵又索償費既奪雞籠又窺閩廠無理要求普天同憤議者欲以與費爲講和似亦權宜之說臣竊以爲過矣國體有傷卽一介亦不可與何論累萬盈千縱舍理而論勢此舉一失安保異日法不翻案他國不效尤乎況與價與卹不過臺北解嚴耳其福州及各口之船依然在華也於是重議詳約與言通商必欲減於值百抽五與言分界必致侵我粵境滇疆將五條之外橫生枝節聽之則與金又復割地拒之則失財並致失和此自困之道也臣維自古馭外之策始以戰而終於和戰而後和可保十年無事能戰由於氣壯氣壯由於志定伏願皇上決然定志於上百折不回不以小敗小勝爲憂喜樞臣定志於內運籌決勝毋稍遊移各疆吏及統兵大員定志於外敵愾衝鋒毋稍退縮上下同心何戰不克以伸義憤以震嚴威天下幸甚復以法使議款事機緊迫德潤單銜具疏略曰法人要挾朝廷隱忍許和亦欲計出萬全暫屈一時求伸異日耳故藩封可棄猶謂非域中也邊界可分猶謂非腹地也商可通而兵可撤猶謂守約而非背約也若於五款之外作無厭之要求仍欲遷就以保和局何以爲國乎謹擇緊要八條爲皇上

敬陳之一賠費斷不可償法索二百五十兆佛郎合中銀三千五百餘萬兩唐宋歲幣貽羞史策有如是之纍纍乎此等狂吠何足與爭然有權宜之說謂不議賠而議卹夫賠百而卹十數且不貲財者國家養兵之源財匱而國亦危況我爲法辱諸國將疊起而辱我何以堪乎似不如直告之曰索費卽不議約庶不爲法愚也一小挫斷不可餒法人孤軍深入兵家所忌我逸彼勞我主彼客縱有小挫無關大局道光舟山之役咸豐大沽之役皆師潰而卽講和坐失機宜前車可鑒一下詔書以激忠憤自文宗顯皇帝巡幸木蘭百姓與夷爲仇二十餘載矣雖屢以嚴法相繩而殺首領焚夷產者絡繹不絕其不共戴天之恨藏之愈久則發之愈毒惜未奉君父一言以洩其忿耳今將法人之罪明諭寰中則忠臣義士不煩號召必羣起與法爲難矣一懸重賞以勵人心計法人入寇多不過三千人重賞之下必有勇夫今下一令曰焚一兵輪者賞萬金擒一首領者千金斬一法兵者十金出賞資三十萬金法人無遺種矣一封海口以杜陰謀中法見未失和兵輪處處可入忽然開礮何以禦之勢不如封禁海口沈舟緝筏下椿壘石豫斷入口之途似覺稍有防範矧封海口必停商務各國恐以兵受累必出爲調停此一舉兩

得者也一誘登岸以便邀擊外洋相接破敵爲難日久相持負隅尤固惟由船登岸之初糗糧未運軍火未齊礮臺未築及其不定而攻之事半功倍至於林木叢雜礮堡縱橫我兵出沒無常尤能因利乘便法人竄入平原處處荆棘耳一伏內港以燒敵船船在海面其勢分難以計破船入內港其勢合易於火攻蓋路狹旣艱於退避水淺尤阻於前行火箭噴筒乘風下手雖有智勇亦無所施所謂以奇爲正者也一攻北圻以牽敵勢我撤兵守約法索款背約法之無禮諸國共知然兵可撤亦可進粵兵向北寧則瓊州之謀必解滇兵攻山西則臺灣之患自消此圍魏救趙之計攻其所必救耳疏入上以德潤單銜具奏不能和衷命毋庸在總理各國事務衙門行走尋以和議將成隱憂方大臚列八事略謂習勤苦以建雄圖責疆吏以警效尤清內宥以安腹地募精銳以實京師會辦北洋大臣宜分駐奉天海口南北洋宜聯絡一氣滇粵宜籌善後宜杜中飽以裕餉源疏入上嘉納焉十二月署禮部左侍郎十一年七月命往雲南會同岑毓英張凱嵩辦理中越勘界事宜至邊與法使論界線執志乘與爭更正久沒入越之地三十餘里險要之地四十里爭復大賭咒河外苗塘子一帶之地數百里十三年三月差竣回京

四月署工部右侍郎九月補刑部右侍郎十四年八月提督順天學政十七年十月充武闈鄉試正考官十八年二月命恭修太廟工程五月命偕刑部尙書貴恆前往東陵查辦事件九月管理戶部三庫事務德潤凡充各省舉人覆試閱卷大臣者四貢士覆試閱卷大臣考試試差閱卷大臣磨勘各直省鄉試試卷大臣進士朝考閱卷大臣庶吉士散館閱卷大臣考試漢廩生閱卷大臣者各一十月卒遺疏入諭曰刑部右侍郎周德潤由翰林洊陟卿貳宣力有年克勤厥職茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏尋賜祭葬子承炯戶部主事孫清任二品廩生

洪鈞

洪鈞江蘇吳縣人同治七年一甲一名進士授翰林院修撰九年提督湖北學政十三年任滿回京光緒元年補行散館充順天鄉試同考官二年充陝西鄉試正考官三年恭纂穆宗毅皇帝實錄全書過半洪鈞前充纂修官得旨著遇缺題奏並賞加四品銜五年充功臣館纂修七月充山東鄉試正考官十月陞侍講六年二月轉侍讀提督江西學政三月陞右春坊右庶子六月轉左庶子陞翰林院侍

講學士七年轉侍讀學士八年奏定經訓書院章程九月任滿乞假省墓得旨賞假三月九年回京三月陞詹事府詹事七月陞內閣學士兼禮部侍郎銜旋因母老請開缺終養十年丁母憂十二年起復十三年簡派出使俄德奧和四國大臣八月補內閣學士兼禮部侍郎銜十六年陞兵部左侍郎十月差旋奉旨在總理各國事務衙門行走十八年因帕米爾與俄分界事右庶子準良疏稱帕米爾圖說紛紜宜求精確詔下總理衙門議洪鈞疏稱自上年帕事起時臣衙門當卽徧查內府輿圖一統志等圖於帕地山川道里形勢險要皆略焉弗詳不得不藉英俄兩國之圖旁參互證新疆本無精通測繪之員又以畏懼俄兵不能前往履勘該督撫先後寄到兩圖皆未精確迨至去冬北洋大臣李鴻章譯寄英圖數種出使大臣許景澄搜集英俄法德圖說十餘種詳稽博考訂成一圖益爲賅備亦於十二月寄到以覈臣衙門先後歷辦情形似於疆界方輿尙無乖謬而證該庶子所奏則歧異甚多請爲我皇上一一陳之謹案欽定西域圖志於霍爾干等地則總結之曰以上屬喀什噶爾於阿喇楚勒葉什勒庫勒等地則總結之曰以上屬喀什噶爾西境外地文義顯明無煩曲解原奏乃謂其曰境外者大小和卓木舊

境之外也曰屬者屬今之喀什噶爾爲我國家自關之壤也穿鑿添砌求伸已說似於文義未安喀什噶爾正北東北與俄之七河省接壤正西與費爾干省接壤帕米爾固在喀城西南也後藏極西爲阿里人亦稱爲底藏自阿里西北越數小部落循雪山行可達挪格爾坎巨提以至印度之克什米爾固不待北陟帕地也設如俄欲躡我喀什噶爾已不患無路進兵英欲通我阿里亦不至尋途乏術原奏乃謂近時英俄二國侵奪拔達克山安集延而不能躡我喀什噶爾通我阿里由於帕米爾爲全疆隘塞所關形格勢禁按其所論實於邊情地利不符光緒年間中俄分界自科布多塔爾巴哈臺伊犁至喀什噶爾西南之烏仔別里山口而止雖勘界未循次第要自東北以迄西南烏仔別里爲自來圖籍所無惟西圖有之原奏謂當日勘界大臣由俄屬薩馬干而東實以烏仔別里西口爲界葉什勒庫勒確爲界內今以東口爲斷情勢大乖等語查各城界約悉無薩馬干地名惟浩罕安集延極西阿母河北有薩馬爾干明史作撒馬兒罕久隸於俄與我華疆渺不相涉當日勘界並非自西而東不知原奏何以傳訛若此烏仔別里東西二口之說尤爲中外所未聞以沙克都林札布勘分喀界之圖與俄圖比較烏仔別

里山口所在形勢相符實是東口並無所謂西口也謹以許景澄寄到地圖摹繪黏簽恭呈御覽又疏言帕米爾地名載籍無徵惟一見於乾隆年間欽定西域圖志證以西國輿圖帕米爾地南北斜亘蓋皆蔥嶺中間之地其西爲阿爾楚爾河伊西洱庫爾淖爾乾隆二十四年平定新疆南路窮追回酋至伊西洱庫爾淖爾三戰三捷遂歲大功謹案高宗純皇帝御製碑文曰伊西洱庫爾淖爾者我副將軍富德等窮追二酋至拔達克山之界以是西域圖志指爲喀什噶爾西境外地當日喀城邊卡西境之玉斯屯阿喇圖什卡僅八十里道光年間欽定新疆識略喀城西至烏帕喇特卡一百二十里與布魯特部落連界西北至喀浪圭卡一百五十里未言及帕米爾迨光緒年間收復新疆劉錦棠始增設七卡於舊界之外十五年又設蘇滿卡於伊西洱庫爾淖爾北十里是卡距喀城千六百里最爲窺遠僅以布魯特回部人守之未駐兵也前年英使來議中英共分帕米爾地當以英俄皆屬強鄰帕米爾接近俄疆恐啟爭端未允其請上年俄兵闖入帕地經臣衙門責其稱兵越界俄卽引咎退歸去年英兵入坎巨提逐其頭目意在窺伺帕地疆撫因派馬隊數旗巡歷帕境駐於蘇滿本年春間俄人遂謂七八年來中國

逐漸拓土帕地亦有屬俄之處未經勘界中國亦不應駐兵臣等公同商酌竊謂先朝用兵西域之時陸警水慄猶以險遠不列版圖今俄既有責報之詞在我當思息爭之計出使大臣許景澄來書亦慮懸軍深入後路難繼因電疆撫退兵而仍留蘇滿卡倫俄復請我盡撤新設各卡然後勘界否則俄國亦將進兵據地駁辨再三曉瀆不已臣等慮其得步進步堅未允撤正相持間愛烏罕之兵突至蘇滿脅擄布回甚且揚言東犯查愛烏罕今世通稱阿富汗爲印度西北大部素聽英人指麾必係受其嗾使據薛福成覆電已告英廷嚴飭阿酋釋放布回賠禮償卹英亦應允乃阿事未平俄兵又進據電報傳聞西隊已與阿人戰於蘇滿東隊則游弋於朗庫里湖阿克塔什距我邊界漸近意殊叵測臣等先已屢電疆撫飭令防軍豫爲戒備一面責問俄使並電許景澄詰俄外部迫令退兵竊念先駐蘇滿之師若不及早撤回則俄阿戰事將自我啟之轉難收束阿雖占地而適致俄兵蠻觸相爭原可不必過問但其東隊駸駸逼近邊境亦頗可慮雖據許景澄電稱外部以阿占地爲詞兵難卽退至喀城等地必不越入等語然亦未可深信就目前情勢而論固未可以窮荒絕徼輕啟兵端亦不可以彼族虛詞稍弛邊備臣

等仍當電知許景澄與俄外部切實辨論以杜狡謀並由臣衙門知照新疆撫臣嚴飭現駐色勒庫爾布隆庫爾各營慎固邊防毋挑邊釁上皆嘉納之十九年八月卒諭曰兵部左侍郎洪鈞才猷練達學問優長由進士授職修撰疊掌文衡洊陞內閣學士派充出使大臣辦理一切悉臻妥協簡授兵部侍郎差滿回京命在總理各國事務衙門行走均能盡心職守前因感患暑溼之症賞假調理方期卽日就痊長承恩眷茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏伊子工部學習郎中洪洛服闋後以本部郎中遇缺卽補以示篤念蓋臣至意尋賜祭葬子洛工部學習郎中

李文田

李文田廣東順德人咸豐九年一甲三名進士授翰林院編修十年充武英殿纂修同治三年八月命在南書房行走十一月充實錄館纂修十二月命署日講起居注官五年大考翰詹命以中允陞用文宗顯皇帝聖訓實錄告成詔俟陞補後遇缺題奏並賞加五品銜六年二月京察一等記名以道府用五月充四川鄉試副考官七年正月擢詹事府右春坊右贊善八年六月轉左贊善十月遷翰林院

侍講九年六月充浙江鄉試副考官八月提督江西學政十一月轉侍讀十年七月陞詹事府左春坊左庶子十二月擢翰林院侍講學士十二年四月轉侍讀學士十三年奏請開缺養親許之光緒八年丁生母憂十年服闋命仍在南書房行走十二年補翰林院侍讀學士奉詔會議籌堵黃運兩河情形以捐修工程賞二品封典十四年充江南鄉試正考官十五年正月陞詹事府少詹事恭逢皇上帝婚禮成奉懿旨遇有應陞之缺開列在前六月充浙江鄉試正考官十六年四月陞內閣學士兼禮部侍郎銜十一月擢禮部右侍郎十七年提督順天學政二十年正月朔以本年慈禧端佑康頤昭豫莊誠壽恭欽獻皇太后六旬萬壽奉懿旨賞戴花翎八月署工部右侍郎兼管錢法堂事務十二月署經筵講官領閣事疏請起用恭親王奕訢前廣西布政使游智開詔均如所請二十一年三月充會試副考官歷充庶吉士散館閱卷大臣朝考閱卷大臣殿試讀卷大臣覆勘鄉試試卷大臣考試漢廕生閱卷大臣考試滿漢教習閱卷大臣考試差閱卷大臣考試御史閱卷大臣拔貢優貢朝考閱卷大臣勘估工程大臣承修工程大臣恩賞世祖章皇帝御製勸善要言書一部是年十月卒遺疏入諭曰禮部右侍郎李文

田由翰林入直南書房薦陞卿貳疊掌文衡學問淵通克勤厥職茲聞溘逝軫惜殊深加恩著照侍郎例賜卹任內一切處分悉予開復應得卹典該衙門察例具奏伊子李淵碩著俟服闋後以員外郎分部學習行走尋賜祭葬

薛福成

薛福成江蘇無錫人同治六年副貢生佐兩江總督曾國藩幕府以勞績歷保選用同知嗣因剿平西捻敘功以直隸州知州留直隸補用並賞加知府銜光緒元年赴部引見道出山東恭讀慈安端裕康慶皇太后慈禧端佑康頤皇太后懿旨諭令內外大小臣工竭誠抒悃共濟時艱福成應詔陳言呈請巡撫丁寶楨代奏治平六策萬餘言一肅吏治二恤民隱三籌漕運四練軍實五裕財用六養賢才又陳海防密議十條一擇交宜審二儲才宜預三製器宜精四造船宜講五商情宜恤六茶政宜理七開礦宜籌八水師宜練九鐵甲船宜購十條約諸書宜頒發疏入得旨留中旋下所司議行二年以隨辦洋務出力總督李鴻章奏請以知府仍留原省補用三年丁母憂四年出使德國大臣劉錫鴻奏調福成充三等參贊官以憂辭五年總理衙門議以總稅務司赫德總辦南北洋海防福成上書李鴻

章謂赫德總司江海各關稅務利柄在其掌握若復授爲總海防司則中國兵權餉權皆入赫德一人之手且以南北洋大臣之尊尙且畫分疆界而赫德獨綜其全南北洋所派監司大員僅獲列銜會辦而赫德獨筦其政彼將朝建一議暮陳一策既藉總理衙門之權牽制南北洋復藉南北洋海防之權牽制總理衙門數年之後恐赫德不復如今日之可馭矣若謂總理衙門已與定議不能中止宜告赫德以兵事非可遙制須令親赴海濱專司練兵其總稅務司一職別舉人代之赫德貪戀利權必不肯舍此就彼其議不罷而罷矣鴻章以其書達總理衙門事遂寢五年起復八年六月朝鮮內變燬日本使館署直隸總督張樹聲聞日兵將出欲請旨發兵往援福成建議以爲往反籌商已五六日若倭兵先到朝鮮擄其王而踞其都又如琉球故事請發超勇揚威威遠三兵輪卽日東駛仍續發陸軍前往樹聲從其議兵船先倭船半日抵朝鮮之仁川口陸軍繼進直入朝鮮都城宵攻亂黨盡殲其渠日兵奪氣尋盟而退尋由李鴻章張樹聲上其功奉旨免補知府以道員留於直隸歸候補班前年先補用九年以胞兄薛福辰官通水道循例迴避改掣河南十年奉旨上諭補授浙江寧紹台道時法人侵越南與滇桂防軍接

仗福成既受事海氛益甚寧波爲浙海要區防軍大集巡撫劉秉璋檄福成綜理營務盡護諸軍十一年正月法兵輪數艘連至官軍開礮縱擊傷其兵輪相持四十五日卒不得逞十四年擢湖南按察使十五年入覲簡派出使英法義比四國大臣旋奉旨開缺以三品京堂候補並賞給二品頂戴十六年補光祿寺卿十七年六月調太常寺卿八月轉大理寺卿十八年正月英人侵坎巨提回部總理衙門電致福成詰英外部福成疏言西洋諸國日肆東封俄關瑋春英守香港彼族知我中國疆土廣遠向不計較尺寸尤不力爭藩屬於是日本滅琉球法人取越南英人翦緬甸相率效尤竟無底止英人經營坎巨提殆非一日此次乘釁而動彼謂蕞爾部落中國必度外置之臣斷斷與爭稍出英人意料之外彼既以立酋爲轉圜我即可藉保小爲退步俾各國知兩屬小部中國尙不肯舍棄已稍變琉球越緬之前規於大局不無裨益上從之八月授都察院左副都御史先是英人既據緬甸與雲南接壤分界久未盡清福成抵英後密疏請商辦滇緬界線商務十九年七月勘界既定福成疏言臣查光緒十一年英兵進據緬甸之初前使臣曾紀澤先與英外部會商立君存祀既不可得英人自以驟闢緬甸全境喜出望

外是以有允曾紀澤三端之說界務一端則稍讓中國展拓邊界蓋指普洱邊外南掌擇人諸土司聽中國收爲屬地也商務二端則以大金沙江爲公用之江在八募近處勘明一地允中國立埠設關八募卽中國所謂新街也當時曾紀澤未深悉滇地情形持論稍覺游移又因中外往返商查之際未能毅然斷而行之僅與外部互書節略存卷旋即交卸回華次年英署使歐格訥與總理衙門議立緬約五條又以三端尙非定局遂未列入約中臣自去年奉命與英外部議界蓋在歐使立約之後已六七年查閱使署接管卷內有曾紀澤議存節略參贊馬格里又係原議之人臣屢遣馬格里赴外部重申前說外部堅不承認以西洋公法議在立約之後不可不遵議在立約以前不能共守爲解臣思英人併緬之始深慮緬民不服及緬屬諸土司起與相抗萬一中國隱爲掣肘彼則勞費無窮故不敢不稍分餘利以示聯絡彼之所以驟允三端者時爲之也旣而英人積年經理萃其兵力餉力戡定土寇復於緬境外之野人山地稍用兵威脅服收其全土磐石之形已成藩籬之衛亦固彼之所以忽靳三端者亦時爲之也前議三端旣不可恃則展拓邊界之舉毫無把握且查滇邊諸土司雖或久隸中國然乾隆以後往

往有私貢緬甸以圖免擾而固圉者英人執此爲辭或指爲兩屬或分我邊地殆事勢之所必至若中國既棄藩屬於前又蹙邊境於後非特爲鄰邦所竊笑亦恐啟遠人之覬覦臣再四思維深懼措置不善有辜皇上倚畀之恩適值前歲秋冬以後英兵游弋滇邊常有數百人以查界爲名闌入界內去來恣忽野番土目驚聳異常英兵常駐之地則有神護關之昔董暨鐵壁關之漢董英人用印度武員之謀窺逼近界以致沿邊騷動風警頻仍雲貴督臣王文韶慮生釁端疊經電達總理衙門臣承總理衙門急電照會外部斥其違理責令退兵又屢赴外部苦口爭論英兵稍自撤退滇邊至今靜謐臣又查野人山地絲互數千里不在緬甸轄境之內若照萬國公法應由中英二國均分其地曾紀澤嘗有此意而未申其說臣復照會外部請以金沙江爲界江東之境均歸滇屬明知英人占此形勝不肯輕棄然必借此一著方可力爭上游振起全局外部果堅拒不應兩次停商而臣不顧數次翻議而臣不顧外部所稍依允者印度部復出而撓之印度部所稍鬆勁者印度總督復出而梗之印督至進兵蓋達邊外之昔馬攻擊野人以示不願分地之意臣相機理論剛柔互用外部謂此議非出自總理衙門與雲貴總督

盡係使臣之私意臣電請總理衙門向英使歐格訥辨論力申畫江爲界之議以昭畫一外部知我中外同心合謀堅持不讓甫稍就我範圍然猶屢易其說彼既重視野人山地不願分割於是就滇境東南讓我稍展邊界之說據稱已與印度商定於孟定橄欖坡西南邊外讓我一地曰科干在南丁河與潞江中間蓋卽孟艮土司舊壤計七百五十英方里又自孟卯土司邊外包括漢龍關在內作一直線東抵潞江麻栗壩之對岸止悉割歸中國約計英方八百里又有車里孟連土司轄境甚廣向隸雲南版圖近有新設鎮邊一廳係從孟連屬境分出英人以兩土司昔嘗入貢於緬併此一廳爭爲兩屬今亦願以全權讓我訂定約章永不過問至滇西老界與野人山地毘連之處亦允我酌量展出其駐兵之昔董大寨雖未肯讓歸中國願以穆雷江北見駐英兵之昔馬歸我南起坪隴峰北抵薩伯坪峰西逾南嶂而至新陌計三百英方里又自穆雷江以南旣陽江以東有一地約計七八十英方里是彼於野人山地亦稍讓矣其餘均依滇省原圖界線割分刻下界務已竣商務本不似界務之繁重商訂條款計可剋期歲事矣福成又以強敵環伺世變方殷疏陳勵人材整武備濬利源重使職四事奉旨留中又因各

省火藥局屢次失慎奏請於城外空曠之區建築以昭慎重從之二十年四月差竣六月抵上海卒諭曰都察院左副都御史薛福成由湖南臬司洊擢京卿派充出使大臣辦理交涉事件悉臻妥恰茲屆差旋忽聞溘逝軫惜殊深加恩著照副都御史例賜卹任內一切處分悉予開復應得卹典該衙門查例具奏伊子直隸候補知縣薛翼運著俟服闋後以知州補用以示篤念蓋臣至意尋賜祭葬子翼運知州

清史列傳 卷五十九

新辦大臣傳三

崧蕃

崧蕃瓜爾佳氏滿洲鑲藍旗人咸豐五年舉人同治四年報捐員外郎籤分吏部以玉牒告成議敘以本部員外郎卽補十年補員外郎十一年以襄辦大婚典禮賞戴花翎光緒四年陞補郎中五年京察一等記名以道府用監修惠陵工程告竣得旨專以道員用是年六月授四川鹽茶道六年署四川按察使因鹽茶道任內籌餉出力賞加二品頂戴九年再署四川按察使是年大計保薦卓異十年兼署按察使四川總督丁寶楨疏薦人才稱崧蕃才識閱通條理精密自到鹽茶道任以來整飭引綱綜覈稅課事事嚴整破除積習迄今該道署一應課稅舉凡應繳積欠大半廓清皆有奏報銷案可查至其於地方所屬州縣雖非專責然遇事必留心考察不稍含糊故屬吏無不服其精明罔敢作弊此向之作鹽道者所未有也奉旨交軍機處存記十一年兼署四川按察使六月授湖南按察使十二年

擢四川布政使時甘省防軍未撤各省協餉多解不如額崧蕃力籌協濟移緩就急餉項賴以不匱十四年四月賞頭品頂戴十七年遷貴州巡撫十八年廣西西林縣屬有匪徒陸亞澂韋卜正等聚衆煽亂西林與貴州册亨接壤崧蕃分飭將弁扼守要隘以掎角之邊患遂平二十年十一月調署雲南巡撫兼署雲貴總督十二月補授雲南巡撫二十一年擢雲貴總督仍兼署雲南巡撫以前在貴州巡撫任內督勸順直賑捐出力得旨優敘二十三年因防營缺額積弊叢生劾副將雷家春等並自請議處奉諭崧蕃據實糾參頗屬認真著加恩寬免處分二十四年因案部議降二級調用加恩改爲革職留任九月命開復處分二十六年京察奉諭雲貴總督崧蕃久膺疆寄任事實心著交部議敘是年奏請陛見允之四月到京時拳匪肇亂京師戒嚴命留京會辦城防事宜賜紫禁城內騎馬扈駕至山西太原行在奉面諭飭赴雲貴總督本任行次湖南調陝甘總督二十八年三月遵旨籌建大學堂先疏陳大概情形略言甘省邊徼苦區歲受鄰協然值整頓庶務之時學校人才爲國勢強弱所繫不能不設法舉行現在籌商辦法約有三端一曰籌的款二曰聘西學教習三曰購時務書籍省城舊有蘭山求古兩書院第

院中每年進款無多稍事擴充立即告罄至建立大學堂一節已於去年咨商湖廣督臣張之洞請代延西學教習二三人並於湖北湖南採購切要時務等書酌給兩書院責成教習就現有各籍令肄業諸生互相研究漸開風氣惟兩書院偪近城市齋舍無多僅可留備蒙養學堂若改設大學堂不敷布置現勘得省城南門外機器局旁地基寬敞擬建立大學堂一所分設東西兩齋東考文學西講武備俾經理之人易於照料且文武肄業生童彼此觀摩砥礪功效尤易兼收惟月需經費必須籌有專款始能酌定現在設法籌備並派提調一人繪圖監造飭令迅蕲厥功俟聘請教習到省卽商訂詳細章程擇期開辦再行分別奏咨立案四月遵旨舉辦農工商務籌修寧夏渠工疏通水利奏言甘肅僻處西北地高風勁無論夏秋每年祇能耕種一次惟寧夏府各屬地濱黃河可以創興水利查寧郡渠工創自乾隆年間利擅魚鹽富甲通省嗣因毀於兵燹需款過鉅無力重修人民遷徙地遂荒廢前督臣陶模任內曾飭估勘工程未及舉辦移交前來當卽遴委講求水利之中衛縣知縣王樹枏勘得縣屬舊有七星渠一道長一百一十里又接連至白馬通灘長七十餘里卽飭設局派員督工挑挖並派防營幫工已開

通一百一十餘里墾復水田四千餘畝現正接修下游白馬通灘一帶渠工秋間即可竣事自寧安恩和兩堡及鳴沙州過白馬通灘渠身共長一百八十餘里灌田六萬餘畝昔時磽确一旦變爲沃壤逃亡復業者甚多所需經費皆就地籌措擲節支用卽於民間承領地價項下歸還惟渠口係分黃河水源黃流水勢洶湧最易淤塞且渠路經過之紅柳溝各處皆傍山麓春夏山水暴發平地水深數尺泥沙俱下渠塞水溢民田皆成澤國挑挖則工程浩大亦且旋挑旋塞當經加意考較得古人暗硲激水之法凡傍山之渠皆用油松大木修成暗硲上蓋石板加以三合灰土墊築堅實渠水由地中行山水由渠面洶行又相度地勢高築圍隄導引山水洩入黃河並於渠口建修進水退水兩閘使黃流曲折入渠巨浪急湍不得沖漫渠口工竣之後已經暴水數次頗無妨礙似可一勞永逸擬俟中衛渠工修竣凡寧郡近河州縣查勘可興水利之處皆令仿照接修其旱地無水各屬亦令酌設農務局選派公正紳耆設法招墾如平羅渭源海城固原慶陽安化董志原各屬均先後報墾荒地數百畝及千餘畝不等至於工藝一項甘肅省城向設有機器局一所製造洋土各種火藥及大小銅火帽並毛瑟後膛各種槍子凡

有舊式銅壳者均能製造邊省風氣甫開擬先就此局漸次擴張俟大學堂工竣書報各局及各項雜藝學堂皆可附入大學堂之內分別舉行以免多設名目虛糜經費況邊地瘠苦庫款奇絀不得不就地方實在情形及現有財力覈實辦理以期仰副朝廷振興庶務實事求是之至意疏入上皆韙其言三十一年三月調閩浙總督六月陛見到京以病請開缺優詔賞假十二月卒遺疏入諭曰閩浙總督崧蕃才識通敏練達老成由部曹外放道員洊陟封圻歷任雲貴陝甘總督於邊防吏治辦理諸臻妥善本年調任閩浙總督諭令來京陛見疊因患病賞假調理方冀醫治就痊長資倚畀遽聞溘逝軫惜殊深崧蕃著加恩追贈太子少保銜照總督例賜卹任內一切處分悉予開復應得卹典該衙門察例具奏伊嗣子外務部主事豫敬著以本部員外郎卽補用示篤念盡臣至意尋賜祭葬

劉嶽昭

劉嶽昭湖南湘鄉人由文童投效軍營咸豐六年隨直隸州知州蕭啟江由瀏陽轉戰江西疊破賊於珠樹潭荆樹鋪高城竹埠等處踏平萬載城外賊營攻拔江南八角亭賊壘積功歷保以知縣儘先選用七年破賊於高安之鸚哥嶺連拔彭

家村賊巢進攻臨江擊援賊於太平墟大破之尋克臨江府城陞同知並賞戴藍翎隨剿撫州賊大捷於何家村香溪等處崇仁賊踞白陂墟又破之遂由上頓渡進偪撫州賊開東門出復其城得旨以知府選用並賞換花翎九年正月赴援南康攻新城墟僞城克之進擣池江前敵潰奔官軍遂亂嶽昭斷後斃賊多名二月軍薄南安攻其東北門克之賊圍信豐急嶽昭馳至由右路沿河而進破賊四壘城圍立解以功加道銜尋賊大股犯湖南圍寶慶六月嶽昭回援賊六萬餘徑撲營壘嶽昭偕副將余星元楊恆升等鏖戰竟日斃賊二千餘七月解城圍得旨以道員卽選十年駐防江華時逆酋陳金剛踞廣西賀縣阻山爲固其黨分踞要隘路險而多歧官軍久未進攻五月嶽昭遣參將李金暘等先降其黨與資散之進拔蓮塘賊分路來撲復敗之遂會道員蔣益澧軍直擣賀縣嶽昭督所部攻破河東街賊壘悉焚附壘賊卡遂復賀城得旨以道員記名簡放並賞加按察使銜十月逆首彭大順竄犯楚境陷綏寧城步圍武岡撲新寧繼陷東安嶽昭躡蹤追剿一捷於道州之四眼橋再捷於宜章湖南肅清巡撫毛鴻賓奏稱嶽昭調度有方出奇制勝賞給鼓勇巴圖魯名號十一年會副都統舒保軍攻湖北隨州克之得

旨以按察使記名簡放當是時黔逆大股竄撲來鳳而賊酋石達開復由龍山竄入宣恩境內窺伺施南嶽昭督所部由施南馳剿石逆折回龍山來鳳已被賊陷同治元年正月嶽昭進克縣城埽平忠堡一帶賊棚賊館並遣軍分路橫截屢捷於散毛河白蘭壩兩河口等處追剿至黑洞斬馘尤多石逆旋由利川竄犯蜀境圍涪州三月嶽昭軍會同知府唐炯副將唐有耕破之於仰天窩復督所部渡江由北岸馳赴重慶攔頭截擊遂解涪圍賊敗踞長寧六月嶽昭攻克之追至合江之先市寨又敗之疊捷於敘永之得用壩合江之丁子場斬斃無算賊尋踞敘州之雙龍場十二月嶽昭約降賊郭集益爲內應破賊營二十餘殪賊近二萬二年三月貴州巡撫張亮基疏稱嶽昭在敘州剿辦髮逆布置極有條理湖南著名之將似嶽昭者甚少請旨擢用十一月授雲南按察使三年八月擢布政使九月克貴州仁懷縣並擊敗馬蹏灘踞匪四年五月克正安州追賊至清溪河斬其渠五年正月擢巡撫復綏陽縣先是嶽昭克正安後遂督軍由婁山關進規綏陽破賊於觀牛碕杉村壩等處賊攻獅山七寶兩寨擊卻之進拔牛角壩元音寺賊巢解火石坎民寨圍踏平綏陽城外天台山賊壘至是提督李家福等陣斬逆黨藍山

虎疊破賊壘擊敗七星坡援賊各鄉震懾投誠者三百餘寨城賊吳元彪等勢窮乞降遂克之五月上諭飭將黔西大定畢節各處土匪迅速掃蕩卽行赴滇任事張亮基亦奏留嶽昭專辦黔中軍事而嶽昭業已回川奉旨申飭嶽昭尋由溫水進剿大定平棗竹山老巢收降鐵匠坪九倉壩及被脅巖洞二十餘處六年正月破沙窩踞賊解大定城圍三月拔大屯朵壩各壘並焚燬豬拱箐賊壘百餘擒斬黃號苗教股匪殆盡十一月拔平遠牛場聖苗巢黔西一律肅清七年正月因滇省回匪變亂情形疏陳用兵籌餉內患征西四事上諭著卽振刷精神實心籌辦速將黔省邊防事宜交代星馳赴滇三月陞授雲貴總督進駐曲靖督同藩司岑毓英於宜良七甸一帶進攻疊克小石壩賊營二十餘小板營賊壘三收復官渡水寺等處民堡別軍攻拔金馬市一帶賊營十餘四月督師進攻尋甸破七星橋木城至文筆山法鼓山察看情形嚴扼要隘剷平附近村莊及小坡賊壘收復果馬疊捷於塘子張徐灣等處旋以悍民逆匪率黨來援圍攻果馬各營被陷下部嚴加議處尋部議革職留任八年二月解馬龍州圍進偪尋甸逆首馬天順與嵩明踞匪李芳園畏懼求撫遂復其城十月以劾四川總督吳棠不實奉旨嚴行申

飭是年收復楚雄昆陽祿豐及土堆村堡等處逆首楊振鵬劉和馬德良伏誅九年三月克麗江縣六月復威遠廳姚州誅逆首馬金保八月復永北鶴慶鎮南鄧川浪穹諸城並拔鳳羽白米莊等處賊巢閏十月平彌勒縣竹園踞匪十年平永善蠻匪拔賓川逆巢並搜捕豬拱箐餘孽蕩平香鑪山積匪連克河西之大東溝小東溝及臨安之五山夷寨十一年四月復貴州之興義先後攻永平雲南及趙州蒙化廳各城大理之上下兩關均克之十月克貴州新城暫行兼署雲南學政十一月復大理府城誅逆首杜汝秀捷入詔開復革職留任處分並下部優敘十二年拔大小圍埂賊巢收復順寧府城及錫臘等處並克雲州騰越廳城斬逆首馬大廉等滇省肅清賞穿黃馬褂尋奏請陞見允之光緒元年御史李廷簫奏言嶽昭以奉旨入覲之員率意耽延規避取巧下部議革職九年卒十年署湖南巡撫龐際雲奏稱據湖南紳士前兵部左侍郎郭嵩燾等呈稱嶽昭統兵十餘年轉戰數千里殲除巨憝疊克堅城建功之地黔屬爲多任事之艱雲南爲最公懇援案奏請開復革職處分詔如所請

岑毓英

岑毓英廣西西林人咸豐初年由附生本籍辦團出力保縣丞六年帶勇入雲南投效迤西軍營助剿七年覆趙州紅巖賊巢賞戴藍翎九年克宜良縣斬逆首馬鴻先奉委署宜良縣事保以知縣留滇補用加知州銜十年正月丁祖母憂總督張亮基奏留毓英帶練攻剿請俟軍務稍靖回籍守制得旨准其留滇差委不准仍留署任七月偕參將何自清克路南州兼署州事巡撫徐之銘疏言毓英上年委署宜良本年兼署路南實係甫經克復人心未定是以委令兼署仍懇恩准暫留署任允之十月敘功以同知直隸州用加運同銜十二月兼署澂江府知府十一年正月剿毀澂江諸賊壘五月破昆陽海口賊嗣迤西回逆杜文秀之黨連陷楚雄廣通祿豐等城省垣戒嚴毓英帶勇赴援同治元年正月破賊大樹營時張亮基引疾去徐之銘決意主撫回酋馬如龍自陳迫於仇殺實無反意願率眾就撫毓英奉檄往諭之暢陳順逆馬如龍俯首聽命獻所踞新興等八城三月上從徐之銘請敕毓英暫行代理雲南布政使其秋以辦理安撫著有成效賞加按察使銜並換花翎二年正月回弁馬榮叛戕署總督潘鐸及府縣各官毓英所部僅粵勇千餘人與弟毓祥毓寶毓琦力保藩署及城東南隅瀝血誓衆全家與城爲

存亡衆亦感憤誓死相從毓英隻身入昭靈觀陽與賊渠約和令勿擾閭閻密馳書責馬如龍以大義趣赴援於是內外夾擊殲賊罄盡誅逆酋李俊馬榮僅以身免走南寧合馬聯陞踞曲靖八屬二月陞道員省垣既定統師西征疊復富民安寧羅次高明祿豐武定祿勸廣通陸涼南安各城及黑元永三鹽井進擣楚雄四月東路有警徐之銘繳令抽帶親軍旋省東征尋克霑益平彝仍西上督攻楚雄十月復其城並克大姚十二月疊克雲南縣趙州賓川鄧川浪穹鶴慶分道進規大理上下關三年正月克定遠圍攻鎮南州大破援賊於普棚二月馬聯陞復陷霑益犯馬龍州東路請援急乃留副將李維述守楚雄率師東下七月大破馬聯陞於天生關進攻曲靖八月復馬龍霑益進圍尋甸上諭雲貴總督勞崇光曰岑毓英以忠義自許數月之中克堅城十數尙書趙光奏滇省情形並將該省紳耆士庶公啟呈覽內稱岑毓英勉圖上進亟應優加獎敘曾諭令先將攻克楚雄等府廳縣出力情形奏候施恩著趕緊查明據實保奏並著傳諭岑毓英令其鼓勵兵勇安速進剿剋日攻拔大理殄除杜文秀用膺懋賞九月克尋甸擒斬逆回馬榮馬興才十月曲靖回日馬文升等降擒馬聯陞盡法誅之池東肅清四年二月

奏入優詔嘉尙賞加布政使銜並勉勇巴圖魯名號自毓英移軍東指西路兵單已克各城多不守獨楚雄孤扼賊衝而已毓英以西賊猝難殄滅宜於東南先立不拔之基曲靖爲池東門戶省垣糧運所出督兵駐之五年正月命署理雲南布政使時總督勞崇光入滇毓英謁諸平彝具陳軍情賊勢請崇光坐鎮省垣漸收旁落之權以維根本用兵則先東後西庶免牽掣而收全功勞崇光深然之疏請以署提督馬如龍專辦西路以毓英督剿黔境豬拱箐海馬姑賊得旨報可豬拱箐隸貴州威寧州境與海馬姑相犄角山谿阻深逆苗陶新春陶三春分踞之糾聚苗教各匪及髮逆石達開餘黨凡十數萬疊擾滇之鎮雄彝良大關昭通黔之大定黔西威寧畢節及四川邊界川楚黔軍會剿日久無功毓英條上機宜謂權不一則軍不用命願率滇軍獨任此役限百二十日擣其巢勞崇光與四川總督駱秉章皆壯之會巡撫林鴻年招降鎮雄州匪首李開甲漆維新等復叛踞州城擾彝良連營數百里勞崇光令毓英先往剿之三月毓英率五千人轉戰而前連破堅壘數百克鎮雄二賊伏誅是月詔授迪西道署布政使如故時有旨令新授雲南巡撫劉嶽昭會剿豬拱箐賊嶽昭疏稱毓英智勇兼優實心任事請專責以

一事權必可迅奏膚功允之六年正月陞授布政使二月師次豬拱箐築壘休士卒日遣閒諜偵賊形勢陶三春陶新春之倡亂也先踞海馬姑紅巖尖山壁立斗絕大河帶其前鳥道攀援僅容一夫賊呼爲鐵桶嘯聚日衆山隘不能容陶新春復分踞豬拱箐界三省之交八山環合三面嶄然惟青松梁一面可往來三泉下注匯山麓爲河賊巢分踞山險山下沃壤曰吳家屯廣七十餘里賊糧資焉有閒道可達海馬姑外有二龍關大丫口小丫口三隘爲門戶備甚嚴惟一隘曰大溜口徑尤險僻賊防稍懈毓英密遣遊擊張保和等夜率二千人由大溜口出二龍關後掩襲吳家屯自督三千人攻關黎明賊傾巢出犯戰方酣關後礮發賊回救毓英麾軍夾擊連破三隘及吳家屯擒斬數千援賊自海馬姑來者毓英親截擊之斬其渠餘黨反奔派部將蔡標劉重慶分一軍圍剿海馬姑克紅巖尖山賊援乃絕大軍直逼老巢陣斬賊目楊大仁等五十餘級賊伐巨石斲爲輪鑿其中貫以硝磺松脂引火於蒂乘夜自山頂下發驅牛馬隨之衝毀我營二十餘座將士多死傷毓英督親軍迎剿手斬悍酋賊始卻次日填紮舊營徧掘深坑賊發石如前乃盡陷坑中毓英偵賊黨多裸人裸目有來降者毓英具酒食厚待之裸感而

言曰賊每一弓地守一人家東南者守西北家西北者守東南互爲牽制莫敢二
心日惟卯酉二時然礮爲號留一人守十弓地餘各歸食斯時奮擊必破毓英用
其策選敢死士二千人親率之昧爽填壕猛進連破木城二重賊殊死鬪毓英身
先士卒直擣中堅縱火掩殺賊披靡斬首二萬餘級擒逆首陶新春及僞將軍僞
軍師等凌遲處死散脅從拔出男女四萬餘人豬拱箐剿洗一清遂督勝軍合剿
海馬姑以一軍攻後山中路令守備楊玉科等軍伏前山小路賊傾巢自後山來
拒玉科等鈔出奪紅巖尖山新結賊營三十餘座馘二千餘級進攻老巢以噴筒
環燒賊柵賊驚潰盡毀其壘擒斬焚溺不可勝計餘匪竄山頂夜乘大雷雨鼓譟
搜剿賊投巖墜澗死相枕藉擒陶三春及悍酋二百餘人皆斬之自進兵以至蕩
平於百二十日限僅逾四日也捷聞賞頭品頂戴先是署提督馬如龍西征逆回
杜文秀屢失利總督勞崇光病故杜文秀傾巢下竄衆數十萬連陷二十餘城省
城戒嚴毓英先撥一軍添助省防十二月自豬拱箐凱旋曲靖整頓土馬七年二
月兼程援省揚言師出陸涼而取道宜良七甸沿路破賊營數十座進軍大樹營
聯絡省城通糧道賊乘新營未定盡力攻撲官軍血戰數日頗損精銳卒以計擊

卻之昆陽逆首楊振鵬夜渡昆明池襲省城毓英飭同知岑毓寶敗之九甲蹙諸海邊奪其船斬溺無算楊逆被創遁時僞大司寇李芳園等圍攻楊林楊林當省東驛道拊官軍之背毓英疾擊之縱火燬其木壘密授諸將策破賊連營六礮樓三毓英鼻受槍子傷督攻益急卒解其圍溫旨嘉勉回軍省城破石虎關生擒僞大將軍李洪勳等殲之賊勢稍蹙三月授巡撫時附省賊壘猶繁深溝重壕間以礮樓礮臺抵死拒官軍相持久互有利鈍新授總督劉嶽昭由馬龍進剿尋甸屢失利賊勢復熾十二月毓英遣將援剿馬龍迴顧曲靖以杜逆竊居池西十三載根深蒂固未易殄滅不能不徵兵籌餉通盤籌畫議上章程八條疏言一選定兵勇數日以備戰守也查杜逆竊踞西南縱橫各數千里若止由一路進剿逆等併力抗拒恐難成功必一路由池南進牽其威緬雲蒙之賊一路由三姚永北進斷其鶴麗鄧浪之援大軍由楚雄鎮南直擣中堅使該逆面面受敵庶易得手但該逆增壘設險防守甚嚴克復一城動須數月既克之後不乘勝進攻則坐失機會不稍資休息又恐師老變生臣擬三路進兵須選兵勇六萬分爲兩班更番戰守既無停兵之時亦免老師之患而池東開廣土匪東路蠻患如遇竊發亦可以守

兵隨時撲滅不致有內顧之虞一兵勇無須外募也查用兵必因地利當日川楚之役仁宗睿皇帝以爲他省兵勇人地不習目前則多報銷事後則易聚難散不如團集本地鄉勇事半功倍聖訓炳存又本年七月二十五日欽奉諭旨馬恩溥所奏請簡派良將一二員統帶勁旅一二萬人入滇助剿等語雲南距直東較遠移師往剿情形未必相宜如該省亟須籌添兵勇著劉嶽昭等卽就近添募以資得力等因仰見廟算周詳無微不至見在滇省兵勇鄉團已調集八萬有零而其中未盡得力擬俟附省逆壘肅清卽認真裁汰選定精銳六萬以本省兵勇剿本省之賊庶地利賊情熟悉攻剿易於得手一擬易勇爲兵以復舊制而肅軍政也滇省勇丁除臣舊部粵勇千餘人及新到投效把總周平楚所帶粵勇千名外餘皆本省兵與各廠砂丁或因地方失陷不能歸營回籍或因廠務廢弛停工失業悉賴當勇餬口既習戰鬪卽不復耐耕作實有易聚難散之勢思所以善其後莫如易勇爲兵查滇省綠營額設馬步兵三萬七千數百名承平日久訓練多疏將不知兵兵不知戰倉卒有事則募勇以代兵餉需支絀卽不能不後兵而先勇於是兵丁愈困營務益弛有改業貿易者有人營當勇者通省營兵所存不及十分

之一夫祖宗之成法豈可久廢與其事後另募新兵有名無實何如卽此嫻熟之勇加習營規事半功倍臣擬卽此六萬人中先選其尤爲奮勇者補足各營兵額查其本籍而位置之覈其技藝而等第之目前仍令隨征事竣再飭歸伍庶該勇等既有常業自有恆心責以成功收效必速矣一擬定團練鄉勇章程以均民力也滇省近年用兵多藉鄉勇之力臣見擬用兵勇六萬內除擬補營兵約三萬五六千名外其餘二萬四五千名若併由官招募誠恐餉難接濟不能不仍用鄉勇藉資民力但鄉勇餉銀向由本籍地方籌捐官不爲稽核往往劣衿團首任意科斂弊竇叢生且徵調之數無定章多少有無殊未畫一查臣所部勇營章程向以六百一十四人爲一營每月僅支餉銀四百二十兩米一百八十四石二斗猶不能按月發足較外省募勇章程似覺儉約今擬按州縣之大小定徵調之多寡共編鄉勇四十營得勇二萬四千數百名亦分兩班隨征其餉銀仍由各該地方籌捐飭照臣營舊章發給不許格外多派所用糧米賞需軍火槍礮旗幟鍋帳等項向來由官籌發者照舊辦理不過兩年內外迤西肅清卽可裁撤歸農一勞永逸至地方所捐餉銀軍務告竣覈實數目擬請增學額以昭激勸一軍實宜籌備也

滇省兵勇向於餉銀之外每名月支米三斗見擬用兵六萬每年共需米二十餘萬石爲數甚鉅查本省額徵地丁秋糧除地方被賊占踞外其餘州縣亦疊遭兵燹疾疫荒蕪甚多通省收穫不過十分之二卽全數解收糧米亦不足供兵食歷年以來皆按成熟田畝酌抽釐穀約十分取其一二資助軍食與川之津貼黔之義穀名異實同今擬仍照舊章抽收並將可徵地丁抽糧全數改徵糧米如不敷用再籌價採買接濟一俟軍務肅清分別裁止一兵餉宜畫定也滇省綠營官兵俸餉歷來定章有閏之年需銀七十萬兩零無閏需銀六十四萬數千兩除由本省鹽課地丁項下動撥外各省每年協濟四十餘萬見在辦理軍務功傷卹賞之費軍火槍礮旗幟鍋帳之用數實倍之每年約共需銀一百三四十萬兩每月約需十萬兩零但各勇兵等荷朝廷深仁厚澤參養二百餘年無不奮勇圖報故臣營勇丁每名月餉不過給銀數錢均知體諒見旣易勇爲兵則餉銀較勇糧稍厚若能照額發足自能愈加奮勉卽或籌餉維艱每月先給半餉俟帑項充裕再行補足該兵勇等亦所樂從今試以半餉覈計每月約需銀六萬兩加以賞需軍火各費約共需銀八萬兩惟各屬地丁旣改徵糧米卽不能撥作兵餉而各廠廢弛

已久工本無著一時難以整頓目前池東釐金因軍務吃緊商賈裹足抽收減色若附省軍務肅清楚雄鹽井克復之後實力整頓釐金稅課點滴歸公則池東及附省釐金每月除酌留各官養廉薪水經費外可籌銀一萬數千兩楚雄三井鹽課可籌銀二萬兩若能再將臨安普洱地方整頓道路稍通不准官紳把持則池南釐金普洱茶稅磨黑石膏等井鹽課可籌銀一二萬兩再有工本整頓廠務亦不無小補每月所短兵餉不過三四萬兩應由外省協撥較之向例協餉有減無增此以半餉核計若發全餉每月須由外省撥銀六萬兩較常例所增亦屬不多應如何酌發之處恭候聖裁一請改撥鄰省協餉以濟急需也餉既劃定須按月如數解到方免貽誤見在部臣指撥各省協滇軍餉內如浙江廣東江西等省距滇較遠雖滇省委員到彼立即籌撥起解而往返亦須經年實屬緩難濟急懸軍待餉殊深焦灼臣愚以爲浙江等省餉銀皆係有著之款與其撥解滇省諸多遲誤何如改撥京餉水運較爲迅速另由川楚等省應解京餉項下改撥濟滇在京餉並無窒礙而於滇餉近便良多且該省誼切唇齒亦必能力籌顧持也一擬選任鎮將以資得力也勇丁團練雖無職人員可以管帶易勇爲兵則必以本營鎮

將統領以符體制而資約束查總兵副將均係專闕大員任用不得不慎惟武將中熟悉營務者或不知用兵用兵者或不熟悉營務求其兩全固難求其能當一面者尤難然營務可學而知將兵之才則難學當此有事之秋總以有勇知方爲上臣愚以爲選用鎮將宜不拘資格不惜情面凡有能將三千兵以上當一面之才者雖其名位尙卑亦宜委署要職藉資得力儻謀勇平常僅止熟習營務卽係實缺人員亦宜另予差遣勿使倖位滇省共有總兵六員副將六員見定三路進兵擬卽以一鎮一協專辦一路軍務仍令兩班更換其參遊以下等官亦按班分派隨征庶得實在人材亦可藉資激勵疏入下部如所議行八年二月逆酋楊榮復由嵩明尋甸率悍賊數萬陷楊林長坡長驅大進復分股踞小偏橋十里鋪羊芳凹牛街興福寺省城大震毓英親督諸軍分路攻戰兼旬奪回小偏橋等處復奪蕭家山又敗之鸚鵡山殺賊逾萬盡克省東賊壘百餘座毓英弟毓寶亦攻克團山楊林等處而西北兩面及江右館等處踞賊猶死守毓英遣副將楊玉科總兵李維述等率勁旅直擣迤西爲釜底抽薪計又檄騰越義兵刻期並進側擊旁攻首尾相應賊始兼顧不遑次第奔潰於是副將張保和等克富民昆陽知府岑

毓寶總兵馬忠等克呈貢晉寧澂江易門祿豐及豐明安寧邵甸桃園海口各城
鎮楊玉科等克武定祿勸元謀羅次定遠大姚及白鹽井李維述等克廣通楚雄
南安並黑琅元水各鹽井凡竄省之悍酋劇匪二十餘萬斬擒殆盡八月省圍解
疏聞諭曰岑毓英於各路援軍未到之時竟能激勵將士力解省圍洵爲不負委
任先是澂江回匪復叛襲踞府城毓英自請議處降二級留任九年二月移軍往
剿圍其郭七月奏留道員岑毓寶督剿毓英回省監臨文闡鄉試典武闡鄉試雲
南自咸豐五年停科至是始奏請舉行並補前數屆舉額事竣仍赴澂江督師穿
地道十年二月地雷發克其城殺賊萬餘並克竹圍江那各賊巢池西諸軍亦克
麗江劍川永北鶴慶賓川姚州鎮南等城尋疏言雲南前事之誤在於東南未定
遽議西征致屢次喪師失地見通籌全局必須掃蕩東南兩池然後全軍西上無
後顧之虞諭曰滇省東南一帶未拔賊巢均距省城甚近自應先行剿除以去肘
腋之患岑毓英親赴池南督剿可謂勇於任事卽著激勵各營分投掃蕩迅拔各
巢肅清東南一路未幾館驛婆兮田心日者鄉各踞匪皆次第殄滅十一年東南
兩池悉平西路各軍亦先後攻克永昌鄧川浪穹趙州雲南永平蒙化各城及上

下兩關惟大理未下毓英先遣總兵楊玉科等進兵池西疊克堅城而賊恃騰越順寧互爲援應得久持十一月遵旨西征抵大理督將士先斷賊援直薄城下掘隧道以地雷轟陷城垣數十丈進奪東南兩門賊猶死守西北門及僞內城官軍晝夜以開花礮環攻之守陴賊多死逆首杜文秀率死黨萬餘出戰陣斬過半退入內城窮蹙服毒自盡逆黨及其未死昇杜文秀及僞帥印出城詐降毓英燭其奸立就軍前正法限逆黨三日呈繳軍械盡徙出城逆黨期以半年毓英陽許之密飭楊玉科選死士二百人入城收軍械嚴布重兵於城外夾擊之斬僞將軍參軍等三百餘名生擒僞大司衡楊榮僞大經略蔡廷棟僞大冢宰馬仲山凌遲處死大理肅清十二年正月捷疏入諭曰杜逆倡亂以來流毒十有八載攻陷五十三城岑毓英於兵單餉絀之時激勵衆心堅忍耐苦先將東南各郡次第蕩平然後專事池西卒使全境肅清渠魁授首實屬謀勇兼裕功績懋昭岑毓英著賞穿黃馬褂並賞給騎都尉世職毓英暫駐大理辦理善後二月督軍克順寧及雲州騰越四月疏報全省肅清上嘉其親臨前敵調度有方賞加太子少保銜改騎都尉世職爲一等輕車都尉七月還駐省城先因侍郎徐桐敬陳安危大計請將吏

治營伍國用力圖整頓命直省督撫籌議具奏毓英上言整頓吏治必先停捐欲停捐必先足用欲足用必先易勇爲兵按楚勇章程各省如裁勇十萬每歲所省餉銀卽足抵補京外捐項各省多以勇營留防則綠營未能整頓可知應將見在勇丁挑選精壯充補綠營兵額痛除積習易弓箭爲槍礮勤加操練請自滇始得旨所奏甚合機宜深明大計足見勇於任事著卽舉行毓英又以兵燹之後教養宜先清查田畝暫緩徵收籌書院膏火添會試卷資以滇民捐輸千餘萬金奏請加廣文武鄉試永遠中額暨各府縣學額又以所部粵勇未領欠餉百餘萬奏請加廣本籍中額學額皆敕部議行十三年正月詔兼署雲貴總督拜疏懇辭上不允吏部以全滇肅清題請開復降二級留任處分五月飭總兵馬忠緝獲要逆馬德新德新爲滇回掌教屢降屢叛皆其主謀馬榮之變據督署謀僭號亂定竄匿新興至是伏誅光緒元年毓英以亂久諸務廢弛力加整頓舉劾官吏賢否興辦銅廠清釐鹽務籌善後庶政一新二年丁繼母憂解任歸里卽創建宗祠設立義塾捐修學宮三年賜剿平粵匪擒匪方略各一部四年六月服闋毓英以前居祖母憂墨經從軍不克盡禮補穿孝服百日五年二月到京召見三次閏三月詔加

兵部尙書銜補授貴州巡撫六年會剿湖南董倒寨苗匪搜剿梵淨山積年踞匪撲滅桐梓縣等處會匪安輯流亡還民墾田設立各處苗學並修建烏江鐵鎖橋以通行旅七年調福建巡撫督辦臺灣防務兩次渡臺開山撫番濬大甲溪築臺北城瞻孤寡恤寒畯清查閒款爲賓興費八年五月署雲貴總督辦理雲南邊防事務八月到滇裁減徭釐開辦礦廠續修通志九年實授總督時法蘭西構釁越南毓英奏請帶勇出關親赴前敵詔以毓英威望素著飭卽出關行甫五日越南山西失守毓英進駐興化省十年二月詔節制關外粵楚各軍統歸調度毓英疏辭俾專責成適廣西一路北寧太原防營相繼潰滇軍與法人相持一月糧盡勢孤毓英奏明情形卽全退紮保勝力扼紅江上游繕壘練兵以待朝命尋奉諭曰越事萬難補救我軍糧盡勢孤全師而退固與退縮者有間惟雖經奏明並未奉旨究有應得之咎著交部議處尋坐降二級留任七月明奉諭旨與法決戰遂親督大兵鼓行而前復越之館司鎮安清波夏和各縣駐軍館司關規取河內諸省遣丁槐何秀林以偏師攻宣光省用地雷轟破城垣斬擒法教各匪無數傳首滇中法人抵死相拒於霖雨泥淖中苦戰三十六晝夜肉薄相當不少休息朝廷念

邊戍勞苦賞尙方珍物藥餌十一年正月京察詔嘉毓英果勇性成不避艱險開復降二級留任處分毓英以緬旺地方前接興化山西後通十州三猛早經法踞爲患肘腋遣總兵覃修綱率勁旅克之連復清水清山兩縣斬法教各匪千數百人秦西槍礮精利毓英飭諸軍創爲地營開挖明礮架以松梨各木洞開槍眼延袤十餘里曲折而入聲息靈通法兵大股由諒山來援宣光毓英飭覃修綱迎剿以道員岑毓寶居中策應敵至槍發如雨加以巨礮迄不能入地營歷二十餘日大敗法人於臨洮府陣斬法酋七晝以下數十人白帽紅衣花衣洋匪二千餘人教匪七八千人乘勝攻破梅枝關不拔縣廣威永祥二府進擣山西河內等省越南之興安寧平南定興化太原各省義民間風響應共舉義旗來迎滇軍三月正飭將領渡河以規北圻而法人遣越民投書稱和議已定旋奉電寄諭旨停戰撤兵毓英慮其未定條約之前挾詐背盟密飭各路將士加意戒備嚴密扼守五月詔嘉毓英調度有方懋著勞勩加一雲騎尉世職並交部從優議敘復奉慈禧端佑康頤昭豫莊誠皇太后懿旨頒發內帑銀五千兩分賞將士命內閣學士周德潤赴滇會辦勘界事宜七月賜穆宗毅皇帝聖訓全部十二年九月法使狄隆至

邊時毓英感受瘴疾扶病偕周德潤出關勘界嚴兵以備不虞法使不敢要挾按圖畫界十一月詔回省調養兼署巡撫事先後飭地方文武剿東川府屬土匪張學義騰越廳所屬蠻匪小胖廣南土富州匪徒王朝義等滅之十三年八月派兵剿順寧府屬裸黑夷匪張登發至十一月擒之初張逆之祖張輔國於嘉慶初年糾煽猺夷侵擾南甸耿馬猛猛三土司之地官軍三次勘定擒張輔國而遺孽猶存其子秉權孫登發相繼構亂又數十年抗不就撫至是始平其地千有餘里內接孟艮外通緬甸奏請改土設流以爲鎮邊廳從之其時武定州屬古黑夷匪魯占高劫犯毆官派兵擒至省誅之又他郎廳木戛寨土匪陳定邦乘越南之亂占踞越之猛萊屬地繼復歸擾元江遣兵滅之先是巡撫唐炯失守越南山西嚴旨逮問毓英疏請寬宥上責其冒昧交部嚴議尋議革職留任加恩改降二級留任至是剿平裸黑夷匪得旨開復十四年京察詔嘉毓英盡心民事綏輯巖疆殫竭盡忱不辭勞瘁交部議敘二月因病疏懇給假一年開缺養疴得旨賞假四箇月毋庸開缺五月毓英六十生辰御書綏圻錫祐扁額福壽字珍綺等件賜之八月力疾出省查閱池西營伍行至楚雄陳奏病狀諭曰該督於校閱事宜力疾辦理

務當隨時加意調攝以慰廬繫十月巡閱事畢復奏請賞假兩月十五年正月恭逢慈禧端祐康頤昭豫莊誠皇太后歸政大典奉懿旨晉太子太保銜四月法蘭西領事彌樂石由保勝至蒙自請照約開關通商並遺方物毓英申明約章卻其餽彌樂石向關道索給游歷各廠護照毓英以礦務爲滇人性命不可聽他族窺利源奪生計致開邊釁密電達總理各國事務衙門累數百言以阻之五月卒遺疏入諭曰雲貴總督岑毓英秉性公忠才識沈毅由諸生從事戎行咸豐同治年間雲南回匪倡亂兵事孔殷仰荷先朝特達之知疊加拔擢代理雲南藩司旋即簡授巡撫當兵單餉絀之時激勵衆心出奇制勝克復省城肅清大理等府埽穴擒渠全滇底定厥功甚偉疊經賞給騎都尉並改爲一等輕車都尉世職朕御極後擢任雲貴總督整頓地方操練營伍均能實心任事光緒九年統兵出關卓著勞勩復加賞一雲騎尉世職該督久駐邊陲染瘴成疾上年查閱營伍途次觸發舊疾疊次賞假調理本年四月力疾銷假方冀醫治就痊長資倚畀遽聞溘逝軫惜殊深岑毓英著加恩晉贈太子太傅入祀賢良祠並於雲南省建立專祠生平政績事實宣付國史館立傳賞銀一千兩治喪由雲南藩庫給發照總督例賜卹

任內一切處分悉予開復應得卹典該衙門察例具奏靈柩回籍時沿途地方官妥爲照料伊子山西卽用道岑春榮遇有道員缺出請旨簡放候選同知岑春煦著以知府選用應陞之缺陞用前工部郎中岑春煊著以五品京堂候補監生岑春莫著俟服闋後由吏部帶領引見岑春蔭並伊孫岑德純均著俟及歲時帶領引見用示篤念蓋臣至意雲南巡撫譚鈞培疏言臣自撫滇以來與岑毓英共事兩年見其誠恪忠勤老而彌篤又聞此間官紳述其功德之偉與閭閻愛戴之深實有不能已於言者敬爲聖主陳之咸豐六年滇回之亂起自與漢民仇殺初誤於當事不能分別良莠一意主剿以至三迤回衆蠱起肆擾而西回杜文秀則盤踞大理旁陷各郡東南諸回則圍省者二陷省者一又誤於當事一意主撫回得陽藉受撫爲名陰益肆其猖獗卒之剿撫兩乖全滇糜爛其間亦有知從事於剿者則又誤於未定東南遽事西征岑毓英自投筆入滇卽統籌全局堅持定見謂非專意於剿斷不能歸宿於撫而欲掃蕩池西必先戡定東南時以陳於督撫而慨然引爲己任自權宜良令起家皆任軍事入則決謀定策出則披堅執銳大小數百戰歷時十八年保省垣而反側靖克曲靖而糧運通埽鎮雄豬拱箐而川黔

之道無梗鋤激江臨南踞匪而東南之賊援以絕根本既固內患不生督師西征
剿撫並用元惡授首全滇肅清功業之偉實由於識力之定也其生平得力則在
矢忠義以作將士之氣假便宜以盡將士之長方用兵時滇中綠營官兵以承平
日久大半疴怯且多傷亡中原方苦粵匪協餉不至庫藏奇絀滇民人自爲戰家
自輸資岑毓英能以同仇大義身先激勸每戰短衣帕首輒爲前鋒屢受巨創百
折不回能與士卒同甘苦故人樂爲用賊尤憚之凡攻下城池分別脅從不妄誅
戮資賊械以濟軍用散賊財以犒將領一無所私賞罰必信慘淡經營卒以集事
比之饒裕省分洵屬獨爲其難迨再任滇督適值法越兵爭患在藩籬三次出關
歷四寒暑瘴癘炎毒侵爍肌膚而滇省奇窮餉需軍械皆賴他省接濟籌撥轉運
緩不濟急岑毓英與將士枕戈待旦併日而食將不偷安士皆用命卽越南義民
亦依如父母荷戈裹糧樂爲致死故馬尾基隆臺澎諒山皆有利鈍而滇軍未嘗
挫撓宣光之圍強敵奪氣臨洮之戰以少擊衆斬馘無算國威丕振夷人俯首請
成岑毓英猶以未能大張撻發引爲私憾力疾畫界沿邊布防又因緬爲英有勝
永邊隘亦加意戒備蓋達土司所屬蠻匪順寧邊境猓匪俱分連越緬慮資敵人

而貽後患皆以時遣將戡定復籌設電綫以速邊報仿製洋械以資禦侮勤勤懇懇莫不計慮周詳蓋其秉彝忠愛宏濟艱難殫竭盡忱不辭勞瘁數十年如一日傷發病纏不輕乞假此心力所由畢耗而沈疴卒至不起也尋賜祭葬予諡襄勤十月貴州巡撫潘蔚以毓英遺愛在黔紳民籲懇疏請在貴州省城建立專祠從之子春榮河南彰懷衛道春煦河南懷慶府知府春煊太僕寺少卿春莫湖北糧儲道

卞寶第

卞寶第江蘇儀徵人咸豐元年舉人先自附生捐輸獎主事分刑部五年補河南司主事充實錄館校對書成敘功洊補郎中九年考試御史奉旨記名以御史用十一年擢浙江道監察御史以軍興以來各省軍報多避罪冒功奏請檢視各省地理賊情與兵糧數目攻守要害諸路失守收復之時日各員先後功罪之緣由據實奏聞以資稽覈又疏陳防剿及籌兵籌餉之略時寇勢日盛地方吏多棄城不守免罪後輒藉他事開復保陞請嚴定限制以儆巧避從之十月應詔上言端聖學審人才明賞罰肅吏治慎薦舉保完善旋兼攝湖廣道監察御史因近畿多

盜奏請從重典又劾候補京堂聯捷防河大名縱賊滋擾狀及苗沛霖王來鳳等
乍服乍叛宜專意主剿上皆韙之同治元年遷禮科給事中七月星變陳言請嚴
禁衛治京兵遏邪說備人才振國紀又劾江北水師總統黃彬安坐瓜洲收取沿
江釐金侵吞肥己引致賊渠同舟宴會所部劫掠商民接濟賊米請飭查辦而於
彭玉麟楊岳斌黃翼升三軍中分一軍代之時陝回猖獗督辦陝西軍務兵部左
侍郎勝保貪淫驕蹇參寇殃民提督成明亦擁兵同州畏葸不戰寶第疏劾之而
請以太原鎮總兵和昌防河蒲州是月擢順天府府丞十一月上京師食米四策
曰籌海運曰議捐輸曰勸囤積曰招商販下所司議行二年遷府尹甄劾所屬南
路同知費濤等降黜有差三年以馬賊入邊請敕古北口提督密雲副都統等修
防邊牆捕斬巨盜王景澂李景周張雪子等畿輔肅然五年乞開缺養親溫旨慰
留八月授河南布政使復以才具不勝外任辭上不許六年擢福建巡撫七年以
命盜積案太多奏立新限以時清理時南安人謝嶮據永春何山寨與洪寇餘黨
相結官軍往剿輒逸去寶第至擒誅之當是時巨寇初平游勇士匪四出剽掠請
於捕得鞠實後就地正法得旨允行盜風爲之漸戢九年再乞終養諭曰覽奏情

詞懇摯本應俯如所請惟念卞寶第自簡任福建以來辦理一切俱臻妥協未便遽易生手下寶第著毋庸開缺賞假三箇月回籍迎接伊母赴署該撫於視事之餘晨昏侍奉既無負朝廷委任之意兼可慰該撫孝養之私母再固請既回籍復申前請上許之光緒五年丁母憂服闋命入覲病不能赴諭令病體稍痊卽行迅速來京八年授湖南巡撫湖南自軍興後哥老會尤盛平江方雪敖龍陽曹小湖安鄉周萬益張星來皆其魁也寶第悉置之法燄始息九年署湖廣總督湖北諸郡縣連年患水寶第偕湖北巡撫彭祖賢奏開賑捐活飢民無算又劾承修隄工縣丞張福鑽論罪如律時法人侵越南奉命偕彭祖賢治江防十年三月官軍潰於北寧寶第特疏請飭大學士左宗棠駐軍天津後路以衛京畿還兵部尙書彭玉麟於江南統水師舊部起前陝甘總督楊岳斌以備任使方法事起議築礮臺於出家鎮在南岸半壁山者三在北岸馮家山及吳王廟六墩隄者各一至是臺成分軍駐守購置外洋火器且製木簾儲石塊以備臨警塞江之用聞劉永福駐軍越南興化城時掘地營禦礮敵不敢犯迺訪求築法繪具圖說呈覽以備參考時御史趙爾巽請建樊口石牯寶第及彭祖賢酌議以爲樊口自三國來卽有此

名向爲疏洩江水要道內有梁子諸湖袤延八百里水皆無原因江入其中瀦爲巨浸此山川自然之形勢以分殺江漲者也若於此處建牐以民情論重在堵江水之入不在洩江水之出以地勢論則江水盛漲時失此八百里停瀦之地下游兩岸隄防沖決堪虞請暫除樊口以內最下田地額徵糧賦而監利子貝洲隄前所建牐以洩上游積水者因牐門狹隘不得下注爲北岸田畝害至是請建朝天石牐用資宣洩均允行十月以籌解新疆協餉功賞頭品頂戴十一年二月回湖南巡撫任時法人鎮南關之役款議成寶第以爲時事艱難通商各國皆有因利乘便之心暫時修好未足深恃須以臥薪嘗膽之計爲陰雨苞桑之謀因條上求才裕餉船政器械四事刑部侍郎薛允升請裁汰勇營於中外各旗兵加餉訓練下各省督撫議寶第所奏撤者凡節銀十二萬有奇又言綠營積弱由於餉少今宜以兩餉挑一兵而仿勇營規制其營官於現職副參游中選曾經戰陣有謀勇者任之都司以下充哨弁營兵有故革及老弱裁汰暫停招募卽挑現兵精壯者補之不足以營勇撥補庶幾兵歸實用勇可漸裁亦節餉之一道也附奏目前兵尙未練勇已議裁似不足爲緩急之備若爲節餉計與其專於裁勇易生他變不

如兼議裁兵爲有備而無患海軍初立議撤舊設沿海水師紅單艇船寶第請就其中擇取精銳改隸新軍餘兵俟新軍成後以漸撤之是年十二月引疾詔賞假一箇月毋庸開缺十三年澧州藍家垵居民爭隄而鬪飭所屬解散之因奏言泔河兩岸隄垵林立毫無隙地河道萬難開寬宜於曾家河以上興築隄陞上聯五通廟下接陳家灘以禦泔水而於合溪河建二涵俾上游積水仍可消洩入河而河水不致倒灌入垵沿河長隄已修者增培坍塌者補築益泔郝家溪各溝道其一切工程均由上垵民自備而令下垵居民毀橫隄永禁復築其最窪之地歸官開置塘堰俾資容納蘇家濠口舊有二涵令益疏濬以利宣洩如此則上垵隄防完固下垵亦水有歸宿矣疏入報可兩閱月而工竣澧州無水患焉是年八月河決鄭州南徙注淮寶第陳分道疏濬之策以爲黃河入海略分三途直隸則碣石山東則利津淮北則雲梯關直隸畿輔重地勢難施功雲梯關池上舊有河道督臣現議興挑利津一途自宋迄金實皆由此注海今若由石橋決口北達銅瓦廂以東循漫河故道開濬一河引歸大清分溜由利津入海可收一勞久逸之效其開濬宜參用機器撥派江北防營汴省則就募災民以工代賑云云尋兩江總督

曾國荃議濬下河寶第復奏駁之謂昔曾國藩左宗棠嘗議導河皆主雲梯關自古迄今未聞專以下河爲歸海去路者且淮揚財賦重地竈丁百萬變亂堪虞請飭督臣覈議務出萬全十四年擢閩浙總督十六年兼管福建船政奏設水雷營於海口建礮臺設防備甚固捕誅積寇吳富明何青蓮陳拱等創立織布官局購織器募民學織限三月卒業予之機令轉相仿效二年後推行漸廣乃爲奏請恩免進口稅釐其運布出口者則減其稅閩人至今利賴之十八年假歸就醫尋解職十九年卒遺疏入諭曰前任閩浙總督卞寶第由部曹洊擢府尹歷任封圻宣力有年克勤厥職前因患病准予開缺調理茲聞溘逝軫惜殊深卞寶第著照總督例賜卹任內一切處分悉予開復應得卹典該衙門察例具奏尋賜祭葬子緒昌戶部七品小京官

曾國荃

曾國荃湖南湘鄉人咸豐二年優貢六年逆匪竄江西陷吉安國荃與前吉安府知府黃冕請於湖南巡撫駱秉章勸捐募勇得三千人親率赴援以始攻吉安號曰吉字營十一月師次江口距安福三十里賊分路來拒國荃揮軍擊敗之乘勝

克縣城連破賊於大汾河千金坡賞加同知銜七年二月丁憂回籍十月江西巡撫耆齡奏請起復國荃治軍吉安又以吉安官軍失利奏派國荃總統全軍皆允之十一月敗援賊偽翼王石達開於吉水三曲灘吉安圍合八年四月旁克吉水萬安得旨以同知卽選並賞戴花翎八月率水師攻毀白鷺洲賊船並城外賊壘遂克吉安陞知府賞加道銜九年五月進剿江西景德鎮三戰皆捷水師直薄西瓜洲六月乘夜火其鎮市賊竄浮梁嚮明追及浮橋殲其半城賊出援亦溺死千人立克浮梁以道員卽用十年閏三月進規安慶駐集賢關十一月偽英王陳玉成大舉赴援國荃擊走之十一年三月陳玉成復來犯築壘菱湖北岸城賊亦築壘南岸以通往來國荃遣弟候選訓導貞幹等築壘湖東泊水師以制之連戰皆大捷陳玉成由馬踏石鳧水遁去仍留赤岡嶺賊壘四與菱湖之壘互相死守國荃困以長濠悉破其北岸十三壘南岸五壘擒賊五千餘斬級八千餘七月平城外賊營並拔東門外月城北門外三石壘陳玉成復率黨來援攻撲六晝夜國荃憑濠轟擊斃賊甚多城賊修月牆於濠外國荃遣壯士數十人踏毀之更築新壘伏精兵左右以防衝突賊傾巢出撲則夾擊之自夜達旦殲銳賊三千餘八月地

雷轟圻西北城垣揮軍入悍賊盡殲焉安慶克復賞加布政使銜以按察使記名
遇缺題奏並賞穿黃馬褂旋以追剿陳玉成各股竄匪獲勝賞給偉勇巴圖魯名
號九月進軍廬江奪泥汊口神塘河賊壘遂克無爲州偵知連漕鎮爲江寧賊糧
積聚乘勢攻拔進圍東關克之賞頭品頂戴十月回湘募勇同治元年正月授浙
江按察使二月遷江蘇布政使諭曰該員係兩江總督曾國藩之弟例應迴避惟
該省軍務緊要需員辦理著毋庸迴避以資得力三月率師東下敗賊巢縣望城
岡進拔桐城牯雍家鎮諸隘遂復巢縣含山旋下和州克裕溪口率輕兵襲取西
梁山埽平北岸賊壘下部優敘四月會兵部侍郎彭玉麟水師進逼金柱關賊被
水軍牽制國荃乘間潛師徑薄太平奪門入立復其城又引軍攻克金柱關僞城
平毀三汊河上駟渡數十壘既聞弟貞幹復蕪湖料賊必東竄令記名道員彭毓
橘豫伏薛鎮渡口而以輕騎追及於賈家灣乘賊半濟擊敗之賊轉走護駕墩掠
舟偷渡水師截擊不利遂趨薛鎮渡口伏軍起大破之五月復秣陵關收降卒四
百餘人進奪大勝關三汊河兩壘明日拔頭關水師進扼江寧護城河口國荃倚
之遂偪江寧駐營雨花臺賊連日猛撲皆擊卻之六月援賊至又敗之殲逆酋僞

對王八月大江南岸疾疫盛行營中病者逾萬閏八月僞忠王李秀成自蘇州率衆六十萬來援糾合城賊日夜攻撲大營不少休並分黨踞洲上截我糧路國荃乘夜於洲上急修十數壘分兵駐之並令補用道劉連捷遣死士縋牆出擊殲賊數十賊復爭湖橋營卡國荃移水師於藕塘築營隄上守之運道乃固賊攻大營六晝夜道員彭毓橘等乘其乏破賊四壘賊乃悉向東路負片板蛇行束草填濠前者拽屍後者更進國荃督軍策應礮傷頗猶力戰賊始敗退九月僞侍王李世賢自浙江率衆十萬繼至環攻礮臺益急國荃力破之時弁勇相繼傷亡乃令各營增築牆濠以自固賊用箱篋實土於中排砌濠邊上防礮子下鑿地道國荃挑銳卒誘賊近濠奮擊卻之繼見西南賊陣散漫出隊破其壘十二斬斃以三千計而東路之賊奮鍤負土者已及濠牆之下又以地雷轟陷營牆擁入塙口各營血戰斃賊近萬誅僞德王及僞主將等賊仍開地道不已國荃令諸將審賊所向掘地數仞隧而迎焉或內外洞穿適與賊遇抽刃疊刺盡瘞於地道之中或熏以毒煙灌以穢水或伐木作薪堵塞洞口或伺賊無備冒雨出濠襲破潛窆地道之壘賊始不得逞會蕪湖守將王可陞率兩營繼至國荃因整勁隊分道並出焚賊前

敵四壘餘賊棄壘爭竄立埽平數十壘斃賊近七千人大營圍解兩江總督曾國藩奏稱國荃以病餘之孱兵當非常之兇戰四十六晝夜以寡敵衆卒能保全大局賞江紬黃馬褂料袍料喜字翎管白玉柄小刀等物十二月拔谷里村朱門六郎橋十一壘二年三月賊自江浦上犯圍劉連捷等於石澗埠糧運汲道俱絕遣彭毓橘會剿大破之擢浙江巡撫諭曰曾國荃著仍統前敵之軍駐紮雨花臺一意相機進取毋以浙事爲念國荃具疏懇辭溫旨褒勉四月遣記名按察使劉連捷等會水師攻克東關又會提督鮑超軍再克巢縣含山時江蘇巡撫李鴻章方進規蘇州國荃度忠逆不回援蘇巢卽竄犯揚州裏下河計莫如急爭金陵老巢攻其所必救使城下之賊不暇遠趨蘇郡而北岸之賊亦不敢專注揚州乃激勵各軍督攻雨花臺僞城及聚寶門外三面石壘克之九洲洲者在急流之中城堅礮密對面有攔江礮中關諸石壘又有草鞵峽下關七里洲燕子磯十數壘賊以礮艦倚護之五月國荃遣水師攻克下關草鞵峽燕子磯等隘明日攻九洲洲賊殊死守各營負創角戰至日晡撲入盡殲之尋破長干橋印子山諸壘以上方橋爲賊糧道令提督蕭慶衍蕭孚泗等攻下之八月克江東橋上方門高橋門等

處石壘又克城東七橋甕及紫金山西南之博望鎮中和橋秣陵關各賊巢十月拔淳化解溪隆都湖墅三岔鎮等隘毀二十餘壘三年正月圍攻鍾山破天保僞城城圍始合諭曰曾國荃親督諸將攻破鍾山石壘奪回天保僞城金陵城北之圍始合所辦甚合機宜惟是官兵不滿五萬分布地段太長深慮困獸猶鬪亟思一逞曾國荃穩慎進攻晝夜嚴防必須就地殄除毋任竄突他處以竟全功而膺懋賞五月進攻龍膊子山地保僞城克之時朝陽神策等門地道久無成國荃以將士疲敝恐生他變六月益誓師督戰令提督李臣典從賊礮極密處重開地道而別軍力攻太平門龍膊子一帶及火發轟塌城垣李臣典先登彭毓橘蕭孚泗等繼之賊以火藥傾盆燒官軍無一退者斃賊十餘萬凡僞王僞主將天將及大小酋目約三千餘名僞忠王李秀成僞王兄洪仁達被擒伏誅江寧克復紅旗奏捷諭曰浙江巡撫曾國荃以諸生從戎隨同曾國藩剿賊數省功績頗著咸豐十年由湘募勇克復安慶省城同治元二年連克巢縣含山和州等處率水陸各營進偪金陵駐紮雨花臺攻拔僞城賊衆圍營苦守數月奮力擊退本年正月克復鍾山石壘遂合江寧之圍督率將士鏖戰開竈地道躬冒矢石半月之久未經撤

隊克復全城殄除首惡實屬堅忍耐勞公忠體國會國荃著加恩賞太子少保銜錫封一等伯爵並賞戴雙眼花翎尋封威毅伯七月國會藩奏言臣弟國荃困憊殊甚徹夜不寐有似怔忡據稱心血過虧欲請回籍調理一面親率遣撤之勇部勒南歸求所爲善聚不如善散善始不如善終之道諭曰國會荃所見雖合於出處之道而於盡臣謀國之誼尙未斟酌盡善況遣散勇丁祇須分派妥靠之員沿途照料現在江寧安慶等城均須督兵鎮守該撫正宜駐紮江寧安心調理一俟就痊即可幫同國會藩分任其勞卽著國會藩傳旨存問無庸遽請開缺回籍國荃仍申前請諭曰國會荃自隨同國會藩剿賊以來疊克名城勲績卓著本年親督將士苦戰數月攻拔江寧省城殲除巨逆厥功尤偉乃以連年辦理軍務心力交瘁遂致憂勞成疾請假開缺回籍情詞極爲懇摯若不俯如所請恐爲職守所羈未能從容靜攝轉非體恤功臣之道國會荃著准其開缺回籍調理並著賞給人贖六兩交該撫祇領用資保衛該撫係有功國家之臣朝廷正資倚畀尙其加意調治一俟病痊卽行來京陛見九月以收復江寧命詣明陵致祭四年六月調山西巡撫八月復請開缺賞假六月在籍安心調理十二月調湖北巡撫諭曰曾

國荃素嫻軍務朝廷爲地擇人正資倚任該撫速赴新任力圖報稱舊部中得力將弁兵勇酌量帶往湖北以資調遣五年七月命幫辦湖北軍務時捻逆任柱賴汝光等股盤踞河南葉縣舞陽國荃檄提督鮑超由棗陽趨淅川內鄉以防西路提督郭松林從桐柏唐縣橫截而出以防東路並遣總兵劉維楨等向新野爲鮑超聲援賊遂折而北竄十月諭曰賊蹤分合靡定南陽一帶空虛該撫務當確探賊情相機進紮並檄飭郭松林一軍越境會剿仍隨時與曾國藩咨商調度毋得顧此失彼致滋延蔓十一月賊竄信陽遣軍擊卻之又遣提督譚仁芳敗賊於孝感賊陷雲夢應城進攻德安遣郭松林擊走之遂克應城雲夢國荃疏劾總督官文貪庸驕蹇各節尋解官文任十二月遣記名布政使彭毓橘等敗賊於沙港賊犯安陸遣劉維楨擊敗之國荃以賊騎太多平地難與追逐擬困賊於棗陽鍾祥之下天門京山之上屢令彭毓橘劉維楨等迎擊獲勝賊復竄舊口至豐樂河將渡河而北遣水師擊走之六年五月賊由豫竄運河復竄山東泰安寧陽上以國荃防剿無功摘去頂戴先行交部議處七月遣譚仁芳劉維楨助守運河兼管蘄口至亨濟廂防務十月因病請開缺允之十二月東捻蕩平開復頂戴光緒元年

二月授陝西巡撫遷河東河道總督二年八月調山西巡撫十月因病請開缺賞假兩月調理三年山西旱荒國荃疏陳所有乏食貧民先行正賑一月口糧被災十分者極貧加賑四月次貧加賑三月被災九分者極貧加賑三月次貧加賑兩月被災八分七分者極貧加賑兩月次貧加賑一月被災六分者極貧加賑一月四年二月大青山後馬賊游勇肆擾又朔州匪徒熊六糾集飢民到處焚掠遣總兵馬陞葛清泰等剿平之三月奏言禁種罌粟非嚴懲重罰不能輓回錮習查兩江有將罌粟地畝充公章程立法不甚苛擾而小民最爲畏憚乘此大稔糧貴之時勸民改業可期事半功倍六月奏言大稔之後荒地甚多見擬酌給貧民籽種俾得耕種至無人地畝准其族鄰或客民承種如本戶歸來俟次年播種之時方許認回儻五年後本戶不歸卽由佃種之人承爲永業均如所請行六年三月以舊瘡復發請開缺諭曰曾國荃向來辦事認真山西疊被旱災該撫籌辦賑撫善後諸務尤能不遺餘力俾地方得以乂安見在時事多艱朝廷方深倚任著賞假兩個月安心調理毋庸開缺五月續假一月六月召來京七年二月擢陝甘總督賞兼兵部尙書銜因病賞假三月六月命馳赴山海關辦理海防事宜七月續假

三月八月請開缺諭曰覽奏殊深矜念自應俯如所請以示體恤陝甘總督曾國荃著准其開缺安心調理一俟病體痊愈即行來京陛見八年四月命署兩廣總督即赴新任九年六月召來京十一月賜紫禁城騎馬十年正月署禮部尙書調署兩江總督兼辦理通商事務大臣七月實授九月以南洋援閩兵輪三艘與國荃前議派五艘先後不符下部嚴加議處應革職上加恩改爲革職留任十一年京察屆期慈禧端佑康頤昭豫莊誠皇太后懿旨曾國荃夙著勳勤辦事諳練著開復革職留任處分十四年合肥西鄉匪首劉文弼句結教會各匪約期起事遣總兵郭寶昌等討平之十五年賞加太子太保銜十六年九月順直水災國荃捐製絲衣萬件又提用南浙賑捐餘銀趕製絲衣褲三十萬件分解災區存活無算十月卒遺疏入諭曰兩江總督曾國荃秉性沈毅蒞事公忠韜略閱深經猷遠大咸豐年間由優貢生從戎在江西湖北等省疊殲巨寇克復安慶之役出奇制勝懋建殊勳蒙文宗顯皇帝特達之知不次超擢同治初年簡任浙江巡撫仍帶兵剿賊激勵將士掃蕩無前直達江寧雨花臺苦戰兩年之久卒能攻拔堅城擒渠掃穴粵匪之平厥功最偉穆宗毅皇帝特沛殊施賞加太子少保銜錫封一等伯

爵賞戴雙眼花翎朕御極後優加倚任疊畀封圻均能盡職其在山西巡撫任內救災恤民政績尤著光緒九年來京召對命署禮部尙書旋即簡任兩江總督到任後整頓地方營伍撫綏鎮攝卓著聲威上年歸政慶典我皇太后追念前勞賞加太子太保銜該督感激圖奮雖傷病時發猶復力疾辦公並未請假忠誠篤棗實爲國家柱石之臣方冀克享遐齡長承恩眷遽聞溘逝震悼良深曾國荃著追贈太傅照總督例賜卹賞銀三千兩治喪由江寧藩庫給發賜祭一壇派護理江寧將軍副都統承綬前往致祭加恩予諡忠襄入祀京師昭忠祠賢良祠並於湖南原籍江寧省城建立專祠此外立功省分准其一併建祠其生平政績事實宣付史館任內一切處分悉予開復應得卹典該衙門察例具奏靈柩回籍時著沿途地方官妥爲照料伊孫特用主事曾廣漢卽著承襲一等伯爵毋庸帶領引見附生曾廣江著賞給舉人准其一體會試監生曾廣河著賞給員外郎分部學習行走伊曾孫曾兆龍曾兆祥曾蔭椿均著俟及歲時由吏部帶領引見候旨施恩用示朕眷念勲臣至意尋賜祭葬孫廣漢襲伯爵見官光祿寺卿

李瀚章

李瀚章安徽合肥人父文安刑部郎中瀚章道光二十九年拔貢朝考一等以知縣籤分湖南咸豐元年署永定縣知縣二年署益陽縣知縣未行粵逆犯長沙巡撫駱秉章屬守南門天心閣地道再裂瀚章率兵力禦城得完圍解始赴任獎六品銜三年調署善化縣知縣時侍郎曾國藩在籍練湘軍檄瀚章總理糧臺四年湘軍克湖北崇陽籌進兵牌洲對岸之新灘口新灘口要地也湖汶紛歧綿亙千里其間如蔡店繫馬口侏儒山各地逆壘林立瀚章率水師駐新灘口扼其衝使賊不敢自內河駛小舟以襲我後敘功奉旨免補本班以直隸州知州留湖南補用五年四月湘軍轉戰江皖瀚章移駐江西省城總理後路糧臺五月丁父憂曾國藩奏請仍留辦糧臺十一月克義寧州保知府並賞戴花翎六年曾國藩以禮去官湘軍糧臺歸併江西省局瀚章亦回籍終制安徽巡撫福濟奏留辦理團防捐務七年服闋八年曾國藩檄調瀚章回江西總覈糧臺報銷九年克景德鎮及浮梁縣城奉旨免補本班以道員仍留湖南儘先補用湘軍入江後兵數日增餉需尤迫江西入款錢漕外惟釐稅曾國藩商之巡撫毓科仿湖南章程設局經收專充湘軍之餉十年五月奏以瀚章廉正樸誠吏事精覈會辦江西釐稅事並改

歸江西以道員遇缺請簡從之七月授江西吉南贛寧道旋命襄辦江西團練同治元年五月曾國藩派充襄辦廣東釐務十二月調補廣東督糧道二年擢廣東按察使三年擢布政使四年二月擢湖南巡撫是時粵逆餘黨聚福建之漳州逆首李世賢汪海洋分股由上杭圖犯贛南窺伺兩湖貴州教苗各匪陰結粵逆侵軼楚界而霆軍奉調赴川道出鄂省降卒潰叛亦竄及湖湘於是湖南之與他省接壤者所在告警瀚章急飭前江蘇按察使陳士杰營郴州防閩賊在籍雲南按察使趙煥聯營岳州防叛卒閩賊聞引去叛卒上犯江西不得逞折入湖南攸縣竄陷安仁興寧副將張義貴擊走之陳士杰等率軍會剿疊戰於小良田百丈嶺斬獲無算先是瀚章飭總兵周洪印剿辦苗教各匪敗之晃州沅州九月賊圍貴州銅仁及所屬涼傘雪洞周洪印越境追剿解其圍五年正月奏言黔省下游羣盜如毛苗教各匪時伺楚邊已嚴飭周洪印逕取寨頭苗巢爲節節進擣之計第懸軍深入非得黔省知兵大員駐紮會辦難以成功請飭新任貴州布政使兆琛暫緩赴任專辦貴東軍務與楚軍共圖進取許之二月寨頭苗匪敗歸而銅仁教匪由黃瓜巖出擾謀踞壩開溪瀚章檄周洪印督隊截擊已革按察使李元度繼

之四月師進銅仁教匪大股竄沙壩場別賊謀由松桃伺隙入楚周洪印先於亢金盤陀寺設伏以待賊偵知不敢前未幾清江臺拱苗匪又相繼蠢動瀚章以苗教兩匪恆互爲掎角以牽制官軍使不能兼顧乃飭李元度由銅仁剿思南石阡教匪兆琛周洪印由思州天柱剿清江臺拱苗匪復增募水陸新勇設舢板戰船扼守江路使江內外賊巢聲援隔絕然後會合諸軍一敗之荆竹園再破之於頗洞其闌入晃州及鳳凰廳者亦望旗反奔自是賊不敢復窺楚境六年正月調江蘇巡撫並署湖廣總督五月擒匪任柱賴汝洸自鄂之棗陽入豫瀚章飭總兵宋國永等追擊破之分軍駐防黃安麻城隨州扼賊回竄因令各州縣修立寨堡力行堅壁清野之法六月擒竄山東登萊弟鴻章爲欽差大臣創黃運圈圍之議瀚章先後遣提督譚仁芳劉維楨唐仁廉赴濟寧助剿七月擒匪張總愚盤旋渭北蓄意東趨荆紫關爲河南腹地門戶豫軍力單命鄂省籌兵代守瀚章卽日令提督姜玉順往賊遂改道他竄十二月調浙江巡撫賞頭品頂戴七年籌議浙省新漕海運擬定規則十四條奏請施行江蘇諸府半食浙鹽兵後商販凋敝無本包運權由官銷八年瀚章議復其舊招徠引商先試銷六萬六千引並暫免州縣督

銷考成十二月調署湖廣總督九年偕長江水師提督黃翼升覆奏整頓長江水師汰老弱勤操巡以肅軍律會天津民教滋事法挾兵力爲要素計勢張甚詔嚴江海之防瀚章檄調水陸各軍分布要隘日夜爲備八月授湖廣總督湖北宣恩之哥弟會楊竹客爲亂延及湖南湘潭各糾悍黨揭竿鳳凰山十年四月遂陷益陽龍陽瀚章亟令所部四出收捕獲爲首者置之法隨嚴檄各縣舉行保甲亂始定十一年五月楚軍平定苗疆以瀚章和衷共濟克竟全功予優敘十二年奏免湖北行銷川鹽之陸課及湖南澧州行銷川鹽之鄰稅商民便之八月湖南臨湘巨匪傅春琳叛嘯聚數千人所經村邑恣行暴害瀚章飭提督劉維楨平之十三年五月復剿平鄖西會匪九月兼署湖北巡撫十一月詔江西湖北湖南自明年始悉運本色漕糧瀚章瀝陳湖北漕糧驟難改徵本色擬就漕折撥款購米三萬石由輪運津並請開辦海運時總理衙門會籌海防六策命各督撫詳議切實辦法瀚章迺參酌原議切實敷陳一練兵二簡器三造船四籌餉五用人六持久奏入命會議施行先是英國繙譯馬加里由緬甸歸雲南中途被戕案久懸光緒元年五月命瀚章往按旋調四川總督二年三月偕前侍郎薛煥臚呈全案請旨飭

下總理衙門會同刑部擬定罪名然後退與英使互相妥議則不惟英使少一藉口之端卽總理衙門亦多一轉身之地上如所請命總理衙門議奏九月調湖廣總督川淮鹽引歷年分銷楚鄂兩江總督沈葆楨欲全數規復淮引瀚章謂沈葆楨所奏包認餉銀章程困運商病場商誤國計蹙民生未臻妥善必欲規復全引亦應俟數年後量度事勢再行籌辦三年九月疏上允之四年侍郎袁保恆又請加川鹽釐稅抵還豫賑借款瀚章以川稅甲於他引若更非分抑勒旣病商亦病民況以豫省借款取償川鄂亦非情理之平至湘省加征尤多窒礙難行上命均無庸議鄂濱大江與湘豫陝皖相毗連會匪出沒其間時或爲患故始肆亂於湖北之天門繼又勾結刀痞周火星滋擾於河南鄧州瀚章遣將協剿皆定之御史李廷簫疏言近來各省州縣往往誅求百姓不遂所欲輒誣指爲抗拒率請派營彈壓以致民怨日甚一日匪徒裹脅亦日甚一日請飭各大吏嚴行申禁十月瀚章因奏言法貴求於無弊而患當慮其未然倘各省懷遵嚴諭稍有誤會轉致因噎廢食互相諱匿事發而州縣不敢請兵稟到而督撫不敢派隊徘徊觀望貽患養癰徒隳將士之心而長奸徒之志從前粵逆之亂卽因初起時辦理因循馴至

不可收拾足爲殷鑒可否責成各督撫查照原奏嚴申誥誡然遇土匪竊發地方官仍當星速稟報督撫亦立即調營往剿不得稍涉拘泥庶保良善藉杜亂萌上違之武昌縣屬之樊口外江內湖延袤八百餘里同治中紳民有建築插壩之請前任督撫暨瀚章先後查勘以不合地利節次斥駁嗣御史李廷簫奏樊口隄插關係農田民命特命尙書彭玉麟履視亦以建築爲然乃命瀚章速籌修築瀚章奏查樊口地界數千年來從無議建插壩之事蓋設隄防禦祇有順水直隄不聞阻水橫壩通籌全局其害實大是以歷任督撫嚴禁於先臣復力持於後茲蒙諭旨飭臣速辦已轉飭司道秉公安議嚴立規條重懲需索至黃柏山隄向係民捐民辦自當飭令興修詔如議行厥後黃柏大隄於五年八月工竣自樊口至黃柏山長約四十五里基址堅厚盛漲時距隄頂尙一丈餘利賴至今六年俄人窺瑣春湖南提督鮑超及提督劉維楨統軍北上以衛畿輔瀚章爲籌糧餉軍械事定寔軍裁撤十三營還至鄂瀚章善遣之無一譁者八年丁母憂十年服闋十四年五月入覲賜西苑乘船九月授漕運總督十一月賞加兵部尙書銜十五年七月調兩廣總督粵故患盜南海番禺順德尤大肆剽掠往往白日公行瀚章知水師

提督方耀夙有幹濟才委以三路緝捕事宜甫視事卽誅破姦猾殄其支黨未及數月盜風大戢粵東各局多冗濫瀚章細心釐定僅留海防善後十一局餘皆裁革歲節糜費以數萬計四月兼署廣東巡撫二十年正月慈禧端佑康頤昭豫莊誠壽恭欽獻崇熙皇太后六旬萬壽賞加太子少保銜八月日本謀預朝鮮亂事邊釁猝開諭令密備海防瀚章因巡閱各礮臺整飭營伍以固省會旋緝獲私與敵通代爲招兵之奸匪悉論如律九月議息借商款助餉瀚章以借款之舉所取信於民者惟在歸還有準收放無弊二端廣東將來還款以海關洋稅爲首稅務司經紀洋稅又多識略商民素所推重若令始終其事籤字蓋印則出入一手尤易取信而吏胥弊竇公式繁文皆可刪除奏入命派員與粵海關稅務司商定章程訂立合同票式咨由總理衙門轉遵二十一年三月因病奏懇開缺回籍調理允之二十五年卒安徽巡撫鄧華熙以聞諭曰前任兩廣總督李瀚章老成練達辦事勤能由拔貢知縣隨同曾國藩軍營綜理糧餉營務卓著勤勞洵擢監司旋膺疆寄歷任湖廣漕運兩廣總督於地方事宜悉心籌辦克稱厥職前因患病准其開缺回籍調理茲聞溘逝軫惜殊深李瀚章著加恩予諡照總督例賜卹任內

一切處分悉予開復應得卹典該衙門察例具奏伊子翰林院編修李經畚著俟服闋後以應陞之缺開列在前江蘇候補道李經楚著俟服闋到省以道員遇缺卽補用示篤念蕙臣至意尋賜祭葬予諡勤恪

劉坤一

劉坤一湖南新寧人咸豐五年粵逆竄擾湖南坤一以廩生領團練從官軍克復茶陵郴桂宜章等城殺功以教諭遇缺卽選六年從道員劉長佑軍援江西時臨袁撫建各郡皆爲寇據楚軍旣克萍鄉賊連營蘆溪宣風鎮來拒四月劉長佑令坤一進戰皆破之五月偪袁州而軍城賊出戰爲坤一所敗湖南巡撫駱秉章奏保以知縣歸部卽選並賞加同知銜時袁州賊勢尙盛相持久不下坤一密招降僞侍衛李能通能通在賊中負重名於是降者相繼守將何益發夜開西門以納我師坤一督楚勇先入據遂復袁州奉旨以直隸州知州卽選並賞戴花翎七年從克臨江府城奉旨以知府選用賞加道銜八年劉長佑以病歸駱秉章飭坤一暫領其衆偕道員蕭啟江渡贛而東規撫州克崇仁敗援賊於龍骨渡啟江在上頓渡爲城賊所困坤一率衆往援大破之賊棄城遁復撫州建昌府亦同時克復

江西肅清奉旨以道員歸部卽選九年逆首石達開黨衆數十萬由福建邊犯湖南坤一奉檄回援連解永州新寧之圍賞加鹽運使銜賊竄廣西坤一從劉長佑躡之二月復柳州賞加按察使銜劉長佑擢撫廣西乃飭坤一統率全師剿辦柳州餘匪兼扼石逆入湘之路十一年三月柳州悉平賞加布政使銜進規潯州七月拔其城命交軍機處記名遇有按察使缺出題奏並賞給父母一品封典逆首石達開將由粵黔之交回竄川楚坤一扼之於融縣賊死爭不得過坤一乘其情渡港掩之賊大潰石逆遁入黔九月授廣東按察使同治元年八月擢廣西布政使敕赴潯州接辦軍事逆首黃鼎鳳自道光末據貴縣咸豐閒累出攻破郡縣戕守令官軍屢議剿撫不能下在廣西羣盜中最爲狡悍坤一節節掃蕩駐師登龍橋當是時黃鼎鳳老巢在平天寨四面皆山壁立萬仞立重柵以巨礮守之其婦女財物皆在覃塘墟距平天十餘里爲犄角高牆深濠以抗官軍坤一陽爲欲撫黃鼎鳳也者撤軍回貴縣建醮祀陣亡將士各路將佐咸會祭饒鼓聲聞遠近乃部署諸將潛師夜起襲覃塘據之遂圍平天官軍以其間拔龍岩復橫州黃鼎鳳勢益蹙三年四月坤一遂擒黃鼎鳳與其黨皆伏誅潯州平賞給碩勇巴圖魯名

號並下部優敘四年正月搜剿思恩南寧各屬土匪三月復永淳縣城五月擢江西巡撫旋因洩漏寄諭部議革職留任是時髮逆汪海洋敗遁粵之連平州復謀趨閩邊上犯江西坤一飭按察使席寶田越境會剿並令提督黃少春赴長寧扼其竄路五年席寶田率軍入粵累戰皆捷會閩浙總督左宗棠軍殲汪海洋於嘉應州餘黨殲焉捷奏入以坤一調度有方賞給頭品頂戴旋擊散崇安齋匪清江西各屬伏莽六年湖北捻匪由靳水竄廣濟黃梅間蔓延數百里恣意焚掠距九江瑞昌僅隔一江難民紛紛東渡坤一亟調水師出江堵擊賊退因奏撥庫帑賑難民且資遣回籍未幾湖南瀏陽教匪旁擾萬載坤一飭兵團剿平之九年八月天津教案起坤一遵旨密籌沿江防務十一年正月奉新縣匪徒謀逆闖入靖安縣城討平之十三年正月江西紳士都察院左都御史胡家玉積欠漕糧又屢貽坤一書干預地方事坤一不以聞爲給事中邊寶泉所劾部議降三級調用加恩改爲革職留任並降三品頂戴尋奉恩旨開復十二月命署兩江總督兼署通商大臣光緒元年八月擢兩廣總督廣東號富穰庫儲實空出入恆不相抵議者請加鹽釐及洋藥稅坤一以粵鹽困於私梟驟議加釐則官引愈滯於是添雇輪船

嚴緝私販又恐鹽梟鋌險乃援康雍間成案官籌成本收買餘鹽發商領運官民交便廣東洋藥釐省城與外埠輕重不同坤一始令各口悉一律抽收無加稅之名而歲增巨萬廣東吏治久疲坤一以整飭之道在於久任飭藩司查令實缺人員各還本任不得輕調有應調看更動者悉遵部章不逾十分之一粵素多盜賭風尤甚坤一以賭爲盜源一切嚴禁各州縣水陸緝捕各營分定地段以專責成以故盜發輒獲二年八月兼管粵海關監督五年正月兼署廣東巡撫二月請將已故藩司楊慶麟事蹟宣付史館立傳並請予諡以所請不合下部議降二級留任十一月請開缺養親予假兩月調補兩江總督兼通商大臣六年正月大學士直隸總督李鴻章奏飭籌議海防坤一請由粵省自造蚊子輪船用守各口可以操縱自如從之三月俄人交還伊犁藉端要挾命將防務悉心經理以備不虞坤一奏曰我朝定鼎以後與俄從未交兵俄爲封豕長蛇久矣志圖薦食力强爲我勁敵地廣與我毗連必須策出萬全不可輕於一試陝甘有左宗棠及劉錦棠直隸山西有李鴻章曾國荃自足支柱惟東三省係我朝龍興之地向爲俄人垂涎如有侵軼之虞未審左宗棠李鴻章等能否兼顧及三省境內有無久經戰陣之

宿將勁旅緩急可恃以自固此則大局之亟宜綢繆者夫兵之強弱視將之勇怯亦視將將者能否識拔真才臣愚以爲現在西北沿邊將軍督撫宜用親歷戎行膽識並茂之員以期折衝禦侮儒臣不諳武備資望無濟時艱誠恐貽誤於萬一也至西北旣須戒嚴則東南不可復生波折日本於琉球之事似須設法彌縫毋使乘間蹈瑕與俄合而謀我前福建巡撫丁日昌謂宜責日本不能字小之義以示大公而激衆怒而於滅我藩服不必苦爭俾易轉圜所言亦未始無見日本終爲我患令人每飯不忘第目前不可遽啟釁端以免受其牽制英法德美諸國雖於東南各口棋布星羅祇求傳教通商別無覬覦之意卽遇事不免刁狡亦在地方官撫馭有方臣與諸國交涉多年頗能知其委曲目前決不至有決裂上貽宵旰之憂況英德等國與俄猜忌日深必不願俄逞志於我其應如何接爲聲援以伺俄人之後使之不敢併力東向廟謨廣運自己神而明之四月入覲賜紫禁城內騎馬九年法越構釁邊事戒嚴坤一奏言越南爲中國外藩本應保護如法之於西班牙英之於比利時以其鄰近極力維持況中國之於越南乎越南前有李揚才之亂法人尙無一矢相加今忽以捕盜爲詞狡焉思啟其如萬國公法何雲

南非通商口岸難任覬覦尤應據約與爭酌派兵船遊弋越南洋面以壯聲威並由廣東廣西遴派明幹文武大員統帶勁旅出關駐紮諒山省等處以助剿土匪爲名密與越南君臣共籌防法之策前此粵兵常駐關外似不致遽啟釁端並囑越南以收降將劉永福之法招太原宣光等處黑旗賊衆以免爲法人誘爲前驅雲南亦卽據險設奇以資掎角法人知我有備則其謀自阻矣雲南所擬加重越貨稅餉竊謂決不可行法人如得入滇通商自必循照沿海各口稅則及子口單照辦法加重之稅餉祇可行之於越人未必能行之於法人並恐越人因稅餉加重轉思暗啖法人入滇通商得以依託假冒如沿海各口奸商故智不可不慮越南前與法國立約受虧諸事被其鈐制現在中國派兵暗爲聲援越人倚以爲重當不至如前之畏法一味聽從如果與法別立新約中國縱不能禁亦應囑其慎重圖維或卽指示機宜免致一誤再誤既有輔車之誼自無越俎之嫌將來越南卽有邀求操縱仍然在我夫以越南積弱法人視之蔑如若不早爲扶持覆亡可以立待滇粵藩籬盡失將有偪處之虞此等情形已荷聖明洞鑒與其補救於後曷若慎防於先此又不可不明目張膽而爲之左提右挈者也疏入先後報聞十

二年丁繼母憂十六年仍授兩江總督兼通商大臣十七年命幫辦海軍事務十八年修築鎮江都天廟金山寺焦象兩山礮臺竣工坤一親往勘視二十年正月孝欽顯皇后六旬萬壽懿旨賞戴雙眼花翎七月署江寧將軍日本謀預朝鮮亂事敗盟內犯提督葉志超等軍潰於平壤於是九連城鳳凰城金州旅順悉陷命坤一爲欽差大臣所有關內外防剿各軍均歸節制坤一疏辭上諭劉坤一奏籲懇收回成命一摺見值軍務緊要統帥需人劉坤一從前帶兵多年威望素著是以特授爲欽差大臣該督惟當仰體朝廷眷注之意盡心辦理用副委任毋事固辭各營將弁如有不遵調遣不受約束者卽按照軍法從事以一事權二十一年和議成命回兩江總督任二十三年正月京察下部議敘二十四年十一月奏請開缺上諭劉坤一奏瀝陳下情籲懇開缺一摺前因兩江重地劉坤一在任有年平日辦事認真惟時局艱難用人一端尤關緊要諭令留心考查不可偏信並當振刷精神力任艱鉅以副期望此正國家禮遇舊臣殷殷垂誠之意該督自應感激知遇益加奮勉方不負大臣共濟時艱以身許國之誼茲據覆奏以兩江政務殷繁本非衰庸所能勝任懇請開缺是以退閒爲卸責之地殊屬非是朝廷待下

以誠臣下不可有一字之欺劉坤一所請開缺之處著毋庸議仍著懍遵前旨將用人行政各事加意講求悉心經理以副疆寄而濟時艱二十五年二月安徽渦陽土匪滋事坤一飭三省會剿平之五月奏於江寧省城設立練將學堂遵旨改練洋操六月復以病疏請開缺奉孝欽顯皇后懿旨劉坤一奏病體未痊懇請開缺一摺劉坤一老成穩練久任疆圻辦事具有條理著賞假一箇月毋庸開缺並賞人漚四兩俾資調理二十六年德宗景皇帝三旬萬壽賞加太子少保銜拳匪倡亂東南震驚坤一會同各督撫與各國領事訂約允爲保護並嚴禁謠傳煽惑人心賴以敕定時德宗景皇帝奉孝欽顯皇后駐蹕西安論者有遷都之議坤一力陳其弊籲請迴鑾上諾之二十七年上以欲求振作當議更張詔中外大臣各摠所見坤一偕湖廣總督張之洞三疏奏請變法一育才興學之大端宜參考古今會通文武者四曰設文武學堂曰酌改文科曰停罷武試曰獎勵遊學一中法之必應整頓變通者十二曰崇節儉曰破常格曰停捐納曰課官重祿曰去書吏曰考差役曰卹刑獄曰改選法曰籌八旗生計曰裁屯衛曰裁綠營曰簡文法一西法之必應兼采並用者十一曰廣派遊歷曰練外國操曰廣軍實曰修農政曰

勸工藝曰定鑛律路律商律交涉刑律曰用銀圓曰行印花稅曰推行郵政曰官收洋藥曰多譯東西各國書以上諸條所需經費不少此次賠款極鉅籌措艱難論者必以度支困絀爲詞謂諸事方求節省豈宜更增用費遂不免顧惜遲疑臣等之愚竊以爲不可今若竭海內之力百計搜括但供每年賠款以冀無事則外國必將視我中國皆苟安無志之人士無奮心民無固志各國之輕我侮我更將得步進步不待賠款還清而中國已不能立國矣竊謂節用之與自強兩義自當並行不宜偏廢疏上命政務處覈議施行十月迴鑾奉孝欽顯皇后懿旨見在時局漸定回京有期劉坤一等共保東南疆土盡心籌畫卓著勤勞自應同膺懋賞兩江總督劉坤一著賞加太子太保銜二十八年九月卒遺疏入諭曰朕欽奉慈禧端佑康頤昭豫莊誠壽恭欽獻崇熙皇太后懿旨兩江總督劉坤一秉性公忠才猷宏遠由諸生起家軍旅屢建功勳洊歷封圻克勤厥職嗣簡授兩江總督兼充南洋大臣十餘年來鎮撫地方軍民愛戴辦理交涉悉協機宜前年近畿之亂該督保障東南匡扶大局厥功尤著老成碩望實爲國家柱石之臣前因患病疊次賞假並頒給人養藉資調理方冀早得就痊長膺倚任遽聞溘逝震悼良深劉

坤一著加恩追封一等男爵晉贈太傅照總督例賜卹賞銀三千兩治喪由江寧藩庫給發賜祭一壇派署江寧將軍額勒春前往致祭予諡忠誠入祀京師賢良祠並於江寧省城湖南原籍及立功省分建立專祠生平事蹟宣付史館立傳任內一切處分悉予開復應得卹典該衙門察例具奏靈柩回籍時沿途地方官妥爲照料該故督子孫幾人著張之洞迅速查明具奏候旨施恩用示篤念蓋臣之至意十一月張之洞奏坤一起家軍旅擢任封圻垂四十年居官廉靜寬厚不求赫赫之名而身際艱危維持大局毅然擔當從不稍事推諉忠愛之忱老而彌篤每論及時事敬念聖恩未嘗不撫膺流涕近年以來臣與之共事深知其忠定明決能斷大事有古名臣風並將坤一子嗣奏聞得旨劉坤一之子候選道劉能紀加恩著以四品京堂候補伊孫一品廕生劉思銓著以郎中用候選同知劉思錡著以知府用劉思鏐劉思鈴均著以主事用以示篤念蓋臣有加無已之至意尋賜祭葬

楊重雅

楊重雅原名元白江西德興人道光二十一年進士改翰林院庶吉士二十四年

散館授檢討二十七年充武英殿纂修咸豐二年大考二等賞大卷紬袍料旋充武英殿總纂恭修宣宗成皇帝實錄書成議敘獎以應陞之缺開列在前三年更名重雅九月充武英殿提調十二月充文淵閣校理四年六月記名以御史用七月補河南道監察御史兼署山東道監察御史時朝廷變通鈔法商人因緣爲奸重雅洞抉利弊條列四事一曰收鈔宜籌妥速二曰還鈔不宜過遲三曰大錢宜並流通四曰商人宜示裁制適有奸商黃三劉七等私鑄事覺刑部治罪兩歧重雅復勘核案情疏言其失以昭平允均如所請行五年七月截取以繁缺知府用八月補授四川順慶府知府甫受事值土匪何幟樑與弟興順糾賊三萬餘由牛腹渡分竄資陽遂寧蓬溪以圖順慶其黨彭紹幅率匪二三千自清平鎮竄往燕子窩二郎場遙爲聲援勢張甚重雅浚重隍練鄉勇儲備薪糧以守爲攻賊至有備不得逞府治東南北三面臨嘉陵江舊隄橫障江心每盛漲漫溢輒毀民廬重雅倡建復隄利賴至今九年調署成都府知府十年補授當是時藍大順李短辮子二逆肆擾川疆警報徧省垣重雅布置防守一如在順慶時城周二十里每日夜巡行二次目不交睫者七十餘日偵賊至并研亟令其子霈霖率千三百人力

扼青神而自督前軍進至井研之分水嶺與戰大捷賊潰散尋以給事中趙樹吉保奏命幫辦四川團練八月駐藏大臣崇實署理四川總督人或誣控重雅崇實遽請解重雅任居民聞之不期而集者數萬人謂省城得全實重雅之力今去官民無所依環跪行館籲請復重雅職道爲之塞崇實復爲具疏昭雪有旨交督辦軍務駱秉章再行秉公確查初駱秉章曾保奏重雅明幹練達卓著循聲奉旨以道員儘先補用至是復奏白其枉仍請以道員儘先補用允之同治元年檄辦順慶潼川團練九月剿賊於三臺克之二年正月又敗賊於遂寧四月乘勝追擊立解順慶府城之圍五月駱秉章至軍嘉其功檄署川北道秉章時駐師順慶營山縣知縣濮文昇開辦畝捐以操切致怨奸民王禮謨嗾鄉民五萬餘人圍城報至秉章擬遣軍剿捕重雅謂愚民無知曉以利害將自散若大軍一臨禍且不測請單騎往諭甫入境見曳槍歸者召至諭之曰爾等皆良民不爲匪以王禮謨迫脅故耳既歸毋再往今但罪王禮謨一人餘悉不問可轉相告語各安其業無事矣比至縣果無一人卽入城安撫民心大定五日回報秉章奇之九月秉章署四川總督調重雅署成都府贊畫軍事重雅力薦降將唐友耕可大任卒破川陝各賊

擒逆酋石達開於大渡河濱紫達地髮匪盪平川境肅清雲南提督林自清不爲回逆所容率黨萬餘抵蜀號稱八萬川中震恐自清欲至省駱秉章慮與民鬩思以計止之重雅請先籌餉精安輯其軍使靜候朝命而令自清率百人來省商進止並與約嚴束士卒無生民釁自清竟不敢赴數月自清舉主署貴州巡撫張亮基至遣散其衆竟無一滋事者四年三月安岳匪徒何紹先倡亂聚數百人詐稱團民縛賊乘虛入縣劫獄踞城重雅帶勇馳剿賊駭走復令知縣趙基率團追剿屠其寨擒斬匪首何紹先於陣餘匪悉平雲南巡撫林鴻年深器之奏請調滇差遣駱秉章疏請留川用資臂助並追敘前勞以聞得旨賞戴花翎八月授四川按察使貴州威寧鎮總兵李有恆統虎威軍奉調來川至永寧部卒強市民物民執與爭有恆遂飛章告變請悉置諸法重雅力持不可次日得敘永廳報始知罪在兵不在民事遂寢所全活不可勝計巨匪王小老幺楊鵬霄等積爲民患常以刀盾自隨官吏幾不敢過問重雅悉捕治之姦宄悚息全蜀大治六年丁母憂九年授甘肅按察使甘省吏治窳壞州縣往往以貪縱虐民習爲故常重雅至約再有蹈此者悉論如律於是殘暴之吏望風解組仕路以清光緒元年調廣西布政使

司庫以出入輕重爲利藪州縣苦之重雅令就解作領以節勞費僚屬稱便尤以振興文教爲亟創設書局捐購經史子集諸書以資誦習邊省人士咸知嚮學三年陞授廣西巡撫四年二月全州匪徒蔣鵬飛等因饑倡亂亟飭桂林府知府黃師闇等擒斬之嗣是如鬱林匪首謝單爪虎蒼梧匪首梁試澹以及平樂柳州潯梧等府之游齋各匪均經先後剿捕以次收平記名總名李揚才以招撫越南股匪爲名募勇出關謀踞藩地重雅遣軍追擊敗之諒山時英國商人得請自領稅單入內地販運重雅疏言廣西逆孽未靖礙難遽行通商請俟全省綏安再行酌辦允之五年閏三月奉旨著開缺來京另候簡用十一月卒二十三年四川總督鹿傳霖臚陳重雅在蜀政蹟請宣付史館立傳並附祀前四川總督駱秉章專祠得旨允行子儀成四川龍安府知府霈霖安徽懷遠縣知縣穀成直隸雞澤縣知縣德成山東平原縣知縣

徐延旭

徐延旭山東臨清州人咸豐十年進士以知縣用籤分廣西請假修墓在籍辦理團練以河北肅清功賞加知州銜同治二年到省署容縣知縣尋以克復容縣戡

定梧州在事出力得旨補缺後以同知用四年調署桂平縣知縣補容縣知縣五年廣西巡撫張凱嵩以賢能保薦奉旨補缺後以知府用旋經吏部援案議駁會潯州官軍生擒巨寇姚新淙全股殲滅延旭偕鬱林州知州葉葆元遊擊黃才貴督軍攻破賊壘進克拳戀田賊巢轉戰半年不避艱險張凱嵩上其功復疏稱延旭民情愛戴無愧循良請仍照前旨給獎詔開缺俟補同知後以知府用並賞戴花翎尋署大平府知府兼理龍州廳同知值賊勢鴟張撲犯府城延旭督勇百餘擊破之捷聞命免補同知以知府儘先補用並加道銜九年廣西巡撫蘇鳳文疏稱延旭才長守潔辦事認真請補梧州府知府從之光緒二年克復越南省崖賊巢延旭與有功賞加鹽運使銜六年擢湖北安襄鄖荆道八年正月陞廣西布政使三月署湖北按察使六月抵廣西布政使任命出鎮南關會同提督黃桂蘭道員趙沃籌辦邊防九年正月民房失火延燒藩署科房下部議處九月授廣西巡撫仍駐軍越南諒山十年二月以邊防調度乖方革職留任三月北寧失守諭曰前因法國越南構釁交兵廣西邊防緊要諭令徐延旭出關督率防軍嚴密扼守以固邊疆門戶乃該撫遷延不進株守諒山僅令提督黃桂蘭道員趙沃等帶兵

駐守越南之北寧乃於法人撲犯該提督等防禦不力竟行潰退以致北寧失守實堪痛恨茲據徐延旭張樹聲先後奏到失守情形並據徐延旭自請從重治罪張樹聲自請加嚴處前已有密旨令潘鼎新馳赴廣西鎮南關外傳旨將徐延旭革職拏問並令王德榜將黃桂蘭趙沃革職拏問見計潘鼎新應已抵廣西著該撫派員迅將徐延旭解交刑部治罪十一月到部欽派王大臣會審議罪如律旋奉恩旨免決發往新疆效力贖罪途次病故

倪文蔚

倪文蔚安徽望江人咸豐二年進士改翰林院庶吉士三年散館以主事用籤分刑部十一年河南巡撫嚴樹森駐師陳州辟文蔚襄辦營務時叛練苗沛霖覬覦汴梁欲與汝捻合爲一氣分黨王金奎苗金開由潁西竄入沈邱突踞荆寨官軍乘賊築壘未定夾擊破之賊趨項城嚴樹森令文蔚率剛銳驍果等營馳援與參將劉鳳岐都司李永祿力解城圍陣斬僞軍師李鶴鳴等馘千餘級賊潰走沈項一帶肅清敍功加郎中銜賞戴花翎同治元年嚴樹森爲湖北巡撫疏調文蔚隨營帶兵命發往湖北差遣委用六年丁祖母憂七年捻匪平湖廣總督李鴻章以

文蔚在營出力請量予超擢得旨刑部候補主事倪文蔚始終兵事未進一階頗爲廉讓可風著加恩以該部郎中卽補十年二月補官九月捐免歷俸截取以知府用十一年授湖北荊州府知府興修萬城大隄光緒四年以河南旱災捐銀二千兩助賑河南巡撫涂宗瀛奏獎以道員用六年四月擢河南開歸陳許道八月擢廣東按察使七年閏七月擢廣西布政使八年正月陞巡撫先是關外匪首陸之平勾結股匪屢擾邊界稔惡二十餘年文蔚履任卽派兵追剿擒斬之又誅鬱林州匪首吳晚大破其大竹根老巢招撫覃思娣李亞生等九年九月調廣東巡撫瀕行疏劾廣西按察使國英恍惚舛謬不勝監司之任詔開國英缺十二月以山東黃水爲災倡捐賑銀十年閏五月籌助湖北賑捐出力均交部議敘尋以內閣學士周德潤疏劾文蔚在廣西濫保廣東知府鄒觀皋諭曰鄒觀皋赴廣西查辦案件綜計其往返程途日期何能遠至關外著有勞績其爲徇私濫保毫無疑義著交部議處尋議降二級調用上加恩改革職留任八月法蘭西構釁越南沿海戒嚴上聞文蔚等會銜示諭沿海居民措辭失當傳旨申飭十二年四月召來京時文蔚已得疾請開缺回籍就醫允之命俟病痊後仍遵前旨來京陛見十三

年正月起病入覲五月授河南巡撫八月河決鄭州文蔚以兼管河務疏於防範自請交部議處得旨寬免命妥籌賑撫會同河道總督成孚將搶護堵築事宜趕緊籌辦是月慈禧端佑康頤昭豫莊誠皇太后軫念災民頒發內帑交文蔚查明黃水經過被災地方覈實散放九月搶築東西壩裏頭工竣疏請籌款購料以便盤築壩基得旨先由部庫撥銀一百萬兩仍著戶部撥款接濟該撫身任地方亦屬責無旁貸前因甫經到任從寬免其議處務當激發天良同心協力速葺要工時黃沁兩河先後被淹災區甚廣文蔚飭屬勸募助賑先捐廉銀爲倡以鄭州倉卒興工土夫索價居奇因招集災民設立工賑營令總兵董明禮等分統之奏調前山西布政使紹誠前山東按察使潘駿文令赴工分司兩壩堵築又調湖北道員陳建侯直隸州知州何嗣焜綜覈款項辦理工賑詔皆允之先後命刑部左侍郎薛允升禮部尙書李鴻藻前往河南將見辦大工情形查奏又起前河南巡撫李鶴年署理河東河道總督十二月命李鴻藻督辦大工會同文蔚迅籌堵合十四年正月大壩開工三月疏言鄭州自去冬興工時日迫促工程浩大明知其棘手而不能不力任其難如近壩沙澗取土窵遠一難也日計不足必兼夜工燈燭

之光不能及遠二難也水集下游州縣稽料由周家口水路運工以輔路運之不
及逆流上駛牽輓無路三難也前與李鴻藻李鶴年會商用西洋鐵路土車以速
運土用電氣燈以速夜工用小輪船沂江入淮挖帶料船以速運料見在購備鐵
路電燈運至工次安設運土迅速較之士夫推送難易不啻倍蓰電燈照耀有如
白日可以晝夜趨工惟淮泗等河經黃流奔注溜勢趨向無定深淺靡常試行小
輪船時虞阻隔見令多集民船輓轆運送尙能源源接濟六月東壩共成二百四
十七丈西壩共成三百五十八丈七月連挑水壩共成占六百餘丈挑引河二千
九百餘丈功在垂成卒以伏秋大汛驟至金門東溜太急突陷數占而民間舊儲
稽料已罄新秫未收暫議停工固守上責李鶴年日久無功褫職遣戍文蔚革職
留任摘去頂戴李鴻藻回京八月御史劉綸襄燕起烈劾文蔚糜餉誤工等款上
令署河道總督吳大澂查奏尋言文蔚以辦料委之州縣係按照祥工成案辦理
該撫目擊河工待用情形催趨未免過急書差擾累並無確據在工人員薪水亦
係照案支銷得旨免議文蔚乃與吳大澂力持保守舊占之策俟秋汛稍平竭力
接築次第開放引河以分水勢十二月合龍上嘉文蔚督飭在工員弁認真襄辦

使大工剋期告成不負委任開復革職留任處分賞還頂戴仍交部優敘十六年正月兼署河道總督三月交卸署任卽赴南陽校閱營伍五月疾作回省六月卒布政使廖壽豐代遞遺疏奏言文蔚自任河南巡撫未及卅月卽值鄭州決口其時司庫款項奇絀籌工議賑事煩費鉅文蔚殫心擘畫年餘之久奔馳工次酷暑嚴寒不辭勞瘁遂得稽料應手功近垂成忽遇伏汛中變愈滋浮議文蔚以一占之費動需萬金已成之工守而勿失與河臣吳大澂和衷商榷霜清後次第接築大工卽慶合龍各屬災黎幸免昏墊而受病之由實基於此迨賑務卽蕝凡地方善後如興修水利抽收釐稅編查保甲整頓營伍諸大端皆已釐定章程次第修舉近年江浙東皖等省水旱告災尤能不分畛域首先捐廉續籌鉅款協濟以故豫災乞貸各疆臣感其厚誼皆有以報之上年夏間染疫因科場在邇不俟假滿卽力疾銷假視事嗣兼署學政接辦文武兩闈未敢一息暇逸本年正月兼署河督二月卽出省周歷南北兩岸查驗新舊工程甫卸河篆又復出省校閱營伍初抵南陽卽已攫疾猶按營訓練一切公事照常判覈迨至旋省病卽不起身後蕭然殊堪憫惻疏入諭曰河南巡撫倪文蔚由部屬歷任道府洊擢封圻宣力有年

克勤厥職前因患病賞假調理茲聞溘逝軫惜殊深加恩著照巡撫例賜卹在內一切處分悉予開復應得卹典該衙門查例具奏尋賜祭葬八月河道總督許振禕疏言文蔚忠清亮直始終不渝所在無表異矜奇之迹而去後每繫人思任事無畏難苟安之心而功成常居退讓鄭州一役當時定謀發議實抱孤忠而憂憤積勞其受病亦卽在此查文蔚前襄撫臣嚴樹森營務視師陳州還過通許捻匪猝至文蔚慮通許城守單弱回馬疾馳與賊爭先至城下僅而得入百計助守竟以擊退城賴以全迨嚴樹森撫湖北與督臣官文奏調來營相隨督師所向皆捷該撫臣贊襄之力居多大學士曾國藩督兩江時數稱其賢招致幕府以祖母年老辭愈益重之在江寧主講書院多所成就終養後復隨李鴻章剿賊德州計在軍營立功最久而始終謙退未進一階捻匪旣平特旨賞郎中補官截取擢守荊州在郡八年百廢具舉萬城大隄爲下游十數州縣屏障長二百餘里江流剽急每遇盛漲一場輒數十丈文蔚於濱江陡岸砌爲坦坡下列巨椿上累大石層層收築上游自是無傾塌之患沙市繁庶就隄列肆遷之則民悉重擾仍之則隄不可加乃因肆之廣狹分植石柱橫施插板以備不虞前次荆江大水恃此無恐文

蔚旣周知隄之險要而除其積弊乃著萬城隄志使後之莅事者有所法守尋擢廣西巡撫時積匪十餘股久擾關外抗拒官軍文蔚剿撫並用其經畫皆見諸奏牘調撫廣東日擊濱海居民貪沙田之利築垵基與水爭地故致氾濫遂嚴申基圍之禁至今賴之及撫河南到任卅月河決鄭州先是文蔚任開歸陳許道時卽以石家橋來童寨等處險工爲慮議於廣武山腳建壩挑溜旋卽去任議不果行人皆服其先見方河決時文蔚卽以搶築裏頭爲第一要策親歷災區察看情形議設鄭工總局賑撫總局委員分設賑廠拯救飢溺安集流亡當是時也羣情惶惑衆口沸騰謂口門過寬斷難合龍者十人而四五謂黃流當徙萬不可塞者十人而二三老於河務者欲引中牟成例擬請分年辦理通籌大局者又欲先疏南河故道然後堵此決口文蔚力持定見不爲衆說所淆請款集料一意塞決又奏募工賑營以工代賑以杜土夫之居奇於天津設轉運總局於省會設官錢局接濟不窮以杜奸商之壓價凡有益於工賑者無不纖悉圖之伏念鄭州一役前之不就在興辦之太遲後之速成在舊占之克保比吳大澂接續進築和衷商辦而計日程功矣際此大災昏墊而豫民不至流亡餓莩荒政之善確有明徵較之一

意督工尤有難者疏入諭曰已故河南巡撫倪文蔚前以主事從戎旋由知府洊擢封疆歷任廣西廣東等省除患安民政聲卓著其在河南巡撫任內鄭州一役督辦工賑事宜尤能實力實心不辭勞瘁著將生平事實宣付國史館立傳以彰蓋績子世熙花翎三品銜戶部候補郎中世燾鹽提舉銜候選通判

劉錦棠

劉錦棠湖南湘鄉人父厚榮剿賊戰歿岳州錦棠由監生入貲爲縣丞痛父殉難投老湘營隨叔父提督劉松山自江西轉戰安徽同治四年以堅守寧國府城功擢知縣賞戴藍翎尋皖南肅清加同知銜並賞換花翎五年松山剿捻山東解曹州圍追至江蘇銅山敗之又屢捷於河南之西華鄆城南陽新野錦棠戰功最保以同知直隸州用捻首張總愚竄擾陝西六年正月錦棠隨松山躡剿拔郿縣銀渠金渠二鎮追敗之涇陽竹范村破其壘賊竄同州朝邑及郃陽松山一捷於晉成堡再捷於姜彥村奪許家莊賊壘同朝圍解捷聞錦棠擢知府加道銜五月賊犯省城松山會衆軍大戰於山門口木塔塞齊王村陣斬數千級十月捻回勾結陷綏德州城松山躡其後立攻復之捻匪遂潛渡冰橋竄山西松山偕諸將且追

且戰克吉州鄉寧解河津稷山圍十二月及之平陽賊踞柏家莊拒戰不能抗遂奔垣曲入河南濟源擾衛輝由內黃犯直隸七年正月松山追及鉅鹿夜越賊屯疾馳至祁州時賊騎已至保定城下松山迅赴之省城獲全二月追抵獻縣商家堡歷深州博野深澤饒陽大小十餘戰所向克捷錦棠無役不從欽差大臣陝甘總督左宗棠錄其功請以道員卽選並加按察使銜詔從之三月賊還竄河南踞封邱之謝店陳道康店松山擊走之又追敗之滑縣小寨及陽武延州寨四月越運河趨山東武定府松山覘賊所向迎頭痛剿時官軍築長牆爲內外圍蹙賊於直東間六月逆首張總愚溺斃西捻平錦棠功冠諸軍旣而左宗棠西征檄松山助剿十二月進規陝西北路平懷遠大理川大理川匪巢追至靖邊鎮靖堡收撫董世有分軍敗洛珠川賊進擊定邊高家灣回逆敗之八年二月還定綏德叛卒陝境肅清彙前後功議獎加錦棠布政使銜賞給法福凌阿巴圖魯名號時甘肅回酋馬化澂踞靈州金積堡負隅自固七月松山道花馬池進剿飭錦棠偕總兵章合才分兵擊之追至天池子又敗賊於甜水河駐軍下橋陝回馬正和等股散處吳忠堡以西官軍進師會剿松山從南路迎擊而令錦棠攻北路賊皆敗之金

積堡逆回競出刈稻遇伏驚潰錦棠急起截之殲賊五六百人尋回酋馬正和復出挑戰崔三李經舉等繼之錦棠麾提督譚拔萃喻執益馳赴左右路助戰大敗之斃馬正和於陣乘勝擊下顧家馬家二寨馬化澹懼九月詣軍門求撫松山知其詐親至余家湖覘之回衆果悉銳來犯錦棠先登陷陣克敬家兩堡賊決秦渠自固錦棠擊下壩西賊壘乘勢掘水漫溝立破溝東賊寨松山薄靈州錦棠及提督蕭章開亮水進拔團圓寺賊卡收復州城連下海子墩買家莊馬清兒羅家橋四寨十月還壁下橋破里仁渠八寨兩莊賊震懾復乞撫而逆目陳林梗其事十一月松山會提督金運昌進剿逼金積堡四里而壘賊築兩壘官軍一鼓下之潛師抵胡家堡錦棠攻左躡蹤入馬家寨殄賊無算復夜襲趙馬兩寨拔之九年正月下石家莊三壘進擊馬五寨克其外卡松山策馬督攻中礮陣亡諸將憤力破之是月錦棠連敗金積堡胡家堡賊二月奉上諭劉錦棠著賞三品卿銜接統劉松山舊部於是錦棠分屯永寧洞口會金運昌皖軍屢破賊四月賊決二渠水建甌下官軍隨機堵禦引注永寧洞口入於黃賊計不得逞分黨劫廣武糧運錦棠令提督黃萬友設三伏殲之檄總兵沈先梅遮賊懼喜梁斬獲甚夥五月伏軍擒

回酋王洪斬之會克馬八條馬七兩寨六月拔杜家王紅連郭家馬宏等寨戮其渠七月越賊濠而壘兩戰皆捷擊下小何家蔡家寨克馬連渠賊壘三毀李花橋賊卡十一八月擊秦渠水口賊隘下之進薄秦壩關殲其精銳乘夜襲東關復飭軍功董福祥攻雙桅桿寨提督譚上連攻油坊寨先後破之九月徑薄金積堡西門錦棠與道員黃鼎提督雷正綰徐文秀金運昌各軍建長圍以困之分兵破棗圍堡三寨漢伯堡介洋麻湖波浪之間三面阻水錦棠令囊沙縛草以進克之復擊下楊明堡閏十月築礮壘壓賊巢賊益洶懼十一月回目陳林挈八千人就撫馬化澂因詣營降錦棠開壁納之令逆子馬耀邦平堡牆繳馬械籍戶口待命左宗棠以捷聞奉上諭道員劉錦棠接統湘軍克平巨憝著加恩賞給雲騎尉世職並賞穿黃馬褂十年正月磔馬酋父子及逆黨九十餘人初馬化澂既降而金積廢堡猶匿洋槍千餘桿左宗棠以王家疇未下慮他酋疑懼密請緩誅至是寧靈悉定乃正其罪賊目馬八條親害劉松山錦棠禱而祭之於是籍回衆萬口徙之華亭化平川六月乞假扶松山櫬歸十一年六月募兵度隴時陝回踞西寧府大小南川與土回楊乞撫左宗棠檄錦棠往八月進駐平戎驛分紮馬營灣三十里

鋪逆回遽兩路來犯一出檢柴溝一由府城趨峽口皆敗之乘勝破峽中石卡擊賊巴藏溝走之苦戰一晝夜攻下卓子山堅壘火高家堡賊巢又創賊於上紅莊小峽口奪駱駝堡賊卡十餘九月直隸州龍錫慶追賊沙溝賊大隊驟至環攻錦棠馳援燔觀音溝賊巢擊敗大堡及兩山賊錫慶圍解復擊散南北兩岸賊平戎橋工將竣賊大至薄我半濟官軍四出猛擊賊大潰復追敗之平川十月踏平高寨賊壘進奪小峽北岸三壘賊爭左山巔血戰歷五時始敗退同時克南北兩山賊卡時西寧被圍急錦棠自率各軍盡埽羊角灣羅家灣十里鋪一帶賊壘提督余虎恩追竄賊亦破南山賊隘十除所遙見附城火起錦棠迅進抵東關逆首馬桂源馬本源已先夕遁西寧圍解捷奏入賞白玉翎管一枝白玉搬指一箇大荷包一對小荷包兩箇火鏢一把十二月進規大通敗賊姑姑家莊十二年正月破向陽堡擒逆目馬進祿韓起壽磔之縛逆目馬壽以行抵縣城令撫回治復興周麾呼曰獻城者免死回衆數百開西門迎降而馬壽逆黨猶踞東門官軍蹂騰上立克之誅馬壽等百八十人逆回白彥虎竄走治復興阨之水峽再戰皆捷尋窮追遇伏死錦棠乃遷回民二萬安置平涼秦安清水時按察使陳湜旣克巴燕戎

格而循化界之青科莊逆回猶抗大軍錦棠會攻下之九月會提督徐占彪克肅州城事聞下所司優敘十三年十月署甘肅西寧道十一月河州降回閔殿臣叛撲州城及寧和鎮十二月錦棠間道馳擊斬逆黨黑里布兄弟及逆子閔福一合提督沈玉遂軍圍買家集賊憑高壓陣我軍騰踐山巔擊之賊潰走錦棠麾騎隊遮其前賊退入各莊堡縱火殲焉擒逆檻送省城伏誅河境復平光緒元年二月奉旨嘉獎交軍機處存記左宗棠督軍出關檄錦棠總理營務以所部從十一月補甘涼道旋調西寧道以關隴肅清優敘維時逆回白彥虎竄附安集延帕夏阿古柏遣賊助之聞大軍將至由紅廟子趨古牧地抗拒二年六月錦棠抵阜康九營街會都統金順進攻古牧地克之合圍輯懷城錦棠督軍猛進麾參將董福祥等鏖戰兩時拔之守賊五六千燔焉乘勝克烏魯木齊迪化州兩城當輯懷城既復錦棠得賊書一通知烏城空虛無備故軍不停趾獲此奇捷左宗棠奏稱劉錦棠忠勇罕儔機神敏速有謀能斷履險如夷實一時傑出之才尋得旨賞給騎都尉世職於是分軍一出七道灣指東山一出鹽池墩抵柴窩堡自率步騎歷小東溝至金口峽異有斬獲而白彥虎余小虎諸逆已遁托克遜獲其餘糧而還八

月遣軍助攻瑪納斯南城九月連戰克之三年三月錦棠自烏魯木齊踰嶺而南徑趨達板環城周覽坐馬中彈斃易騎復進擊敗山後賊援傍城東起礮壘連環測轟後一子擊中儲藥碎旬震蕩人馬碎裂賊開東門突圍不得出殲焉生擒夷官數十遂克其城軍次白楊河分馬步三千進攻吐魯番自以兵七千擣托克遜提督黃萬鵬急進賊圍之數重正鏖戰間大軍三路皆集賊驚潰白彥虎等燒糧械遽遁立復托克遜城納降二萬有奇是日道員羅長祜等亦會克吐魯番城五月賞戴雙眼花翎八月進兵曲惠檄余虎恩等徑指庫爾勒錦棠自循大路進賊決川沒徑迂蘇地百數十里梁開都河渡軍九月入喀喇沙爾城徙和碩特數百戶實之踰哈爾哈阿滿溝與間道兵會抵庫爾勒賊已先遁選銳卒疾追及之布告爾斬馘百餘詰朝行四十里賊裹脅數萬衆反撲擊敗之留提督陶生林安輯難民錦棠自追賊庫車擣其中堅羅長祜橫躍貫陣賊大潰斃賊日馬由布復庫車城拔隊經和色爾踏冰抵銅廠賊列陣回拒副將夏辛酉躍馬突陣生擒貂衣賊日賊奔潰遂度戈壁薄阿克蘇下其城撫纏回十數萬分隊追至胡瑪納克河斃騎賊數百拔出哈密回王之母及回衆二千餘人進駐烏什城東逐賊至阿他

伯什而返是役也一月中馳三千餘里收復南疆東四城詔以三品京堂候補十月沙雅爾回目麻木爾叛踞哈番旋竄屈烏克拱拜阻河自固錦棠督隊晁渡擊之槍創麻木爾俘斬八百有奇錦棠念西四城形勢當先規葉爾羌而喀什噶爾被陷員弁據漢城反正機不可失乃飭余虎恩黃萬鵬分道指喀什噶爾自出葉爾羌爲席捲四城計十一月黃萬鵬抵喀城北麻古木余虎恩抵喀城東牌素特聞賊攻漢城急馳援之殲騎賊千斬賊目王元林漢城復鼓譟助勢城賊開西門狂竄立克喀什噶爾城是月錦棠抵葉爾羌踞賊先一夕遁入其新城令提督董福祥略和闐自率馬步趨英吉沙爾至則城賊亦遁撫纏回二千戶進抵喀城與余虎恩黃萬鵬諸軍會方喀城之克也余虎恩追伯克胡里及之明要路陣斬叛回藍得全俘賊目余小虎伯克胡里與白彥虎同竄俄羅斯境擒賊目馬元白彥龍以下悉殲焉維時董福祥亦勘定和闐諸軍銳進俘戮帕夏子女九人逆回金相印父子夷回悍黨千餘獲開花礮百餘尊戰馬萬數千匹軍械無算於是西四城肅清紅旗捷入四年二月諭曰劉錦棠智勇深沈出奇制勝用能功宣絕域著由騎都尉世職晉爲二等男爵遇有三品京堂缺出開列在前四年授太常寺卿

七月轉通政使司通政使九月竄回自俄境來犯遣羅長祜截之沖壳罕陣斬賊目碎屹塔黑振江惟逆回金山逸去布魯特人縛以獻磔之十月安集延賊寇邊賊目阿里達什夷酋帕夏舊黨也至奈曼結布魯特酋阿布都勒哈瑪謀襲喀城錦棠遣提督方友升譚慎典等分兵擊敗之回目庫彌什斬阿里達什以獻阿布都勒哈瑪竄俄屬阿來地方復嗾安集延酋愛克木汗條勒等再圖內犯五年正月南趨博斯塘特勒克踞焉錦棠調賊將襲烏帕爾營駐軍以待令羅長祜等潛師覆其巢且設伏比曉賊果至擊敗之追三十里斬買賣提斯拉木於陣並殫啜買提和卓及阿布木汗條勒餘賊悉殲捷入奉旨嘉獎並賞白玉柄小刀火鏢大荷包七月阿布都勒哈瑪愛克木汗條勒復犯邊侵色勒庫爾城錦棠督馬步二千馳援八月抵哈引恰提聞伯克素唐夏誘斬阿布都勒哈瑪賊黨忿攻愈急疾進次勤的克偵賊北竄飭提督張俊張宗本總兵夏辛酉田九福等輕騎躡賊及之木吉再戰大敗之窮追至黑子拉提達板六年正月命幫辦新疆軍務八月詔左宗棠入京以錦棠署理欽差大臣督辦新疆軍務九月移駐哈密布置南路暨哈密等處防務十一月奉旨哈密及鎮迪道所屬文武地方官均著暫歸劉錦棠

統轄七年授欽差大臣督辦新疆軍務錦棠疏辭溫詔不允八月覆陳裁撤營勇
挑選標兵復步兵舊額之半改行糧爲坐糧新疆旣平錦棠策善後請設新疆行
省仍隸陝甘總督兼轄設巡撫布政使加鎮迪道按察使銜駐迪化改迪化州爲
府是爲省治於南路設迪化昌吉綏來阜康奇臺五縣回疆東路四城設巡道阿
克蘇直隸州庫車烏什直隸同知及拜城縣西路四城設巡道疏勒莎車和闐直
隸州英吉沙爾直隸同知瑪喇巴什水利通判疏附葉城于闐縣移烏魯木齊提
督駐喀什噶爾裁吐魯番暨南路舊有參贊辦事領隊大臣省哈密北至伊犁都
統暨辦事領隊大臣伊犁將軍舊轄南北兩路請改從各省駐防將軍例專治滿
營併烏魯木齊庫爾喀拉烏蘇等處所餘旗丁歸伊犁滿營訓練裁回官阿奇木
柏克等名目酌設頭目額數設回疆各城義塾教育回童上並嘉納焉九年擢兵
部右侍郎錦棠疏辭溫旨不允十年上統籌新疆議一擬留兵勇以定餉數一酌
改營制以歸實用一酌定官制以一事權一屯田歸兵徐議抵餉又更定營制改
營爲旗十月恭逢慈禧端佑康頤昭豫莊誠皇太后五旬萬壽懿旨賞加尙書銜
並賚錦棠祖母陳氏匾額珍綺旋授新疆巡撫仍以欽差大臣督辦新疆事宜十

一月請設南路佐雜各缺十一年議置省會布政司以下僚屬升迪化州學正爲府教授劃哈密通判歸鎮迪道管轄十二年奏設撫標城守營員缺十三年定屯墾章程復奏設伊犁道改伊犁廳爲府隸以綏定寧遠兩縣設拱宸分防通判精河直隸廳同知改塔爾巴哈臺通判爲塔城直隸廳同知移拱宸巡檢於博羅塔拉伊犁理事同知於惠遠城籌哈巴河防務請以原借科布多地段劃歸塔爾巴哈臺管轄設喀什喀爾阿克蘇巴里坤提鎮各營員缺定俄羅斯通商稅則十四年定迪化府學額先後歸劃詔旨如所請行十五年慈禧端佑康頤昭豫莊誠皇太后歸政懿旨賞加太子少保銜十六年皇上二旬慶辰晉太子太保銜自新疆救平建置略定錦棠卽引疾且以祖母老病陳請終養章累上均溫旨慰留疊賞人濩調治至十三年二月復申前請上以情詞懇切予假回籍旋以祖母病劇先後呈請湖南巡撫代奏懇暫開缺仍優詔不許並頒賞錦棠祖母人濩八兩諭令錦棠弟河南候補道劉蔭回籍侍養二十年恭值慈禧端佑康頤昭豫莊誠壽恭欽獻皇太后六旬萬壽懿旨晉封一等男爵六月寄諭來京陛見會病發七月卒遺疏入諭曰前甘肅新疆巡撫劉錦棠秉性忠勇卓著勳勤同治年間隨同劉松

山剿辦回匪接統湘軍克復金積堡身經數十戰屢破回巢廓清關隴由道員洊擢京卿授爲欽差大臣督辦新疆軍務運籌決策悉合機宜於撫輯民回創辦屯墾事務尤臻妥協補授甘肅新疆巡撫賞加尙書銜辦理新疆善後及地方事宜均能悉心歸劃勞瘁不辭前經疊次懇請終養賞假回籍省視旋以丁憂開缺本年正月欽奉懿旨晉封一等男爵六月間有旨召令來京方冀爲國宣猷長資倚畀遽聞溘逝悼惜殊深劉錦棠著照巡撫例賜卹加恩予諡准其於立功省分建立專祠生平戰績事實宣付國史館立傳賞銀一千兩治喪由湖南藩庫給發任內一切處分悉予開復應得卹典該衙門查例具奏伊子監生劉道謙著以員外郎用優增生劉篤篤烈著賞給舉人准其一體會試伊孫劉家璠著以主事用以示篤念蓋臣至意尋賜祭葬予諡襄勤二十一年以錦棠功在桑梓命於湖南省城及原籍湘鄉縣各建專祠地方官春秋致祭子道謙員外郎篤烈舉人國祉州同孫家璠主事

張煦

張煦甘肅靈州人咸豐三年進士以主事用籤分刑部同治元年補貴州司主事

二年補雲南司員外郎三年京察一等遷奉天司郎中五年覆帶引見記名以道府用六年授貴州鎮遠府知府時捻逆竄擾直隸署總督大學士官文疏請留煦襄治軍事旋保道員在任候補畿甸肅清復請開缺以道員留直隸補用部議仍赴新任八年抵黔鎮遠淪於賊奉檄權思南思南故無城郭距郡四十里之荆竹園箐深林密爲賊窟穴數出焚掠圖犯郡治煦部署壯丁分守要隘乘便出擊輒獲勝復以計鉤致其黨使爲我用賊遂平十一年調補貴陽府知府當是時兵事甫定悍苗驕卒良莠雜集煦旣受任謹保甲嚴緝捕姦宄惕息由是課最光緒元年丁母憂三年服闋八年擢貴東道九年補陝西按察使十一年遷廣東布政使陝西巡撫鹿傳霖以煦治獄平允留歲秋讞上可其請十二年調補山西布政使十三年協濟甘肅新餉敍功賞給頭品頂戴十四年擢陝西巡撫秦中兵燹後繼以大侵民病官困煦抵任裁一切冗費奏除科場積弊士民翕然十五年調補湖南巡撫十八年以疾疏請開缺上不許調山西巡撫值邊外大旱赤地千里煦騰章告糴轉順直粟往賑之全活甚衆二十一年三月入覲四月還任七月卒遺疏入諭曰山西巡撫張煦由部員簡放知府擢任封圻宣力有年克勤厥職茲聞溘

逝軫惜殊深加恩著照巡撫例賜卹任內一切處分悉予開復應得卹典該衙門察例具奏尋賜祭葬

馬丕瑤

馬丕瑤河南安陽人同治元年進士以知縣卽用分發山西巡撫鄭敦謹一見器之辟置幕府又檄攝平陸縣事至則以孝弟力田慰勉鄉民有構訟者必委曲開導俾各知悔悟轄境大治六年捻逆張總愚陷吉州警報達平陸丕瑤激勵紳團嚴備城守而躬赴河防多方抗禦匪不敢犯城賴以完巡撫趙長齡上其績得旨俟補缺後以直隸州用並加運同銜客軍過境強市民物幾激變丕瑤白其帥戮五人事遂定旋補永濟縣知縣除差錢數萬緡有蠹役爲民害者廉得其狀杖殺之民困大蘇所治聞有盜警卽單騎往捕雖夜中及大風雨雪不避屬地名過村者素爲劇盜藪獲其渠魁寘諸法餘黨爲改行易名新村上源夏陽各村爭灘地械鬪歲以爲常百餘年莫能決丕瑤親履其地周視原址得舊界石於重泉下訟立解十年丁憂十三年服闋仍赴原省署河東監掣同知光緒三年山西歲大饑人相食解州鹽梟乘機謀爲亂工部侍郎閻敬銘查賑至晉知丕瑤多幹濟才言

於巡撫曾國荃以署解州不旬日捕斬甘餘人衆皆駭散隨貸紳民粟十餘萬石躬督散放全活無算故晉饑雖甚惟解州民無流亡田鮮荒者事畢擢知府並賞加鹽運使銜旋補遼州仍署解州又以土田無魚鱗冊吏民得因緣爲奸飛灑寄脫詐僞百出手定清丈章程數十條詳爲圖說匿契未割投印者許免其稅於是投契及執照以萬數千計悉請於巡撫曾國荃奏免之分里清丈積弊一空復廣勸蠶桑開設機局建常平新廩積穀足支十年均減蒲絳差徭籌買晉南耕牛實以一州而代任數郡之事七年赴遼州本任八年署太原府尋奉旨補授例凡首府員缺以實任知府調補丕瑤獨以候補知府特簡異數也適汾河決平地水深七八尺會城當其衝勢岌岌不可保丕瑤建議修城西金剛隄以捍橫流關文峪河以洩支流水有分瀉得不汎溢爲患總司讞局平反張白氏冤獄巡撫張之洞以循良入奏得旨嘉獎十年陞冀寧道巡撫奎斌保薦循良奉旨交軍機處存記十一年署山西按察使尋署布政使十三年二月授貴州按察使尋署布政使八月遷廣西布政使廣西州縣交代或數任不結丕瑤至力除積弊庫款積數十萬向未有也十五年八月授廣西巡撫奏開書局刊刻經籍並行取各省局本百餘

種分頒各縣俾寒畯得嚮實學又舉辦蠶桑教民縲織奏免其稅設機坊二十餘處由是歲增出產五六十萬金以唐臣柳宗元劉蕡宋臣趙抃黃庭堅國朝于成龍等皆廣西名宦已故大學士陳宏謀爲粵儒冠冕請立專祠元臣額爾吉納有功廣西忠節凜然並請列入祀典均得旨允行十六年以助賑江浙賞給頭品頂戴時法越勘界甫定丕瑤以與他族接壤非隨地置防不可然張大其事又恐外人藉端阻撓乃以校閱行伍之時奏請行邊廣西沿邊千七百餘里毗連越壤三關百隘防不勝防惟據險憑高多置礮臺一臺足顧數隘恃有聯絡相爲應援龍州爲通商總口鎮南關爲陸路孔道平而水口兩關爲水陸兼衝上思廳之吉普嶺彬橋河之石山思陵州之寶蓋山寧明州之飯包嶺伏波嶺憑祥州之白雲嶺歸順州之隴邦隘鎮邊縣之平猛隘等處尤爲西南門戶置礮臺二十所稱重戍焉土司考試向由土官送多抑遏不得上達丕瑤奏請准赴承審之州縣及管轄之知府報名照苗童例以廣登進二十年授廣東巡撫二十一年奉旨查辦兩廣總督李瀚章及將軍繼格等參款據實以聞分別解任奪職當是時倭氛甚熾兵輪十餘艘直犯澎湖廣州一日數驚丕瑤按行海口六門因險增壘量測海綫層

列大礮復於虎門內河道密布鐵樁木槓購數十大船載滿巨石備臨時堵口之用以粵民強悍可任且習與島夷往來知其長技迺督同紳民凡沿海十餘州縣編設團練與防軍互爲聲援粵人恃以無恐惟賭風最盛闖姓外名目尤多自前任巡撫蔣益澧後無復有能禁者丕瑤以縱民爲賭實縱民爲盜奏請一律革除之其遵旨疏陳時務多繫安危洞明利弊老成謀國之言九月卒於任遺疏入諭曰廣東巡撫馬丕瑤由進士卽用知縣洊擢道府簡任封圻宣力有年克勤厥職茲聞溘逝軫惜殊深加恩著照巡撫例賜卹任內一切處分悉予開復應得卹典該衙門察例具奏尋賜祭葬子吉樟四品銜翰林院撰文

許振禕

許振禕江西奉新人咸豐三年由拔貢生捐內閣中書時侍郎曾國藩治軍湘中辟置幕府襄軍事四年水師爲粵寇所乘困於江西南康國藩賓從四散獨振禕留左右不去常一夕治官書八十通國藩益重之六年撫州吉安相繼陷振禕與內閣中書鄧輔綸募鄉兵剿賊於進賢東鄉等縣大捷八年從曾國荃復吉安獎以同知遇缺卽選九年中式江西鄉試舉人仍隨大軍十一年克安慶賞戴花翎

同治二年成進士改翰林院庶吉士四年散館授編修充國史館協修六年以捐輸獎五品頂戴仍賞戴花翎八年充貴州副考官九年復因捐輸換五品銜十年充陝甘學政時河州降回復叛肅州西寧甘涼諸郡縣所在蹂躪試久廢振禕奏言甘肅爲西陲要地華戎雜處民氣囂動近日漢回仇殺釀成大亂究因讀書識理者少故始爲風俗之憂終遺疆場之患必有文教以銷其强悍有儒生以爲之倡率而後皇仁可洽反側自安遂按試各郡所至宣布朝廷德意餐宿俱入回堡示以無猜多錄降人子弟入學回衆大服抵武威道遇賊酋白彥虎嚴陣以伺從者股慄振禕呵禁之按轡徐行賊相顧不敢犯陝甘總督左宗棠疏稱軍興以來學臣不入甘肅者十餘稔許振禕不避艱險以次按試多方激勵漢回驩迎爭拜馬首計補行八次歲科試入學者近萬人轉移風化邊氓長治久安之效基此矣詔嘉許之關隴被兵久士鮮知經術振禕建味經書院於涇陽購置書籍敦勸生徒繇是人知向學又苦甘肅之鄉試於陝者地遠數千里迺會同陝甘總督奏請兩省分闈及各設學政得旨允行陝甘分闈自此始十三年任滿乞終養歸旋丁父憂光緒二年服闋回京充教習庶吉士國史館纂修武英殿纂修起居注協修

功臣館纂修本衙門撰文淵閣校理八年京察一等記名以道府用八月授河南彰衛懷道沁河發源山西沁州流入河南境經河內武陟縣地以達黃河每遇盛漲水勢湍悍幾與黃埽歲修費向歛自兩邑民戶恆六七萬緡不足請庫帑益之振禕至倡捐五百金設局復借款發交紳士試辦一年卽以一年實用之數定爲歲修常款吏不便謀尼所爲適小虹橋等處疊出大險人咸惴恐謂此舉若敗不惟賠償鉅款且不能自全振禕仍請奏罷兩縣苛歛年由司庫發銀二萬四千兩官督紳辦著爲例河南巡撫鹿傳霖據以奏聞允之黃沁廳民堰故民修者頻年黃沁交囓湍深土薄久將不支振禕以大侵後民不堪再擾乃輸己財建兩壩舊堰民困大蘇初河北各郡皆有差徭歷爲民病而以安陽爲最重按畝攤收每畝上則地向派錢千胥吏經收守令但以不誤差則不究詰振禕廉得其情首發輕徭議羣起梗阻勢將止而振禕毅然不爲所撓創設車馬局以紳經理之民納糧時銀一兩祇別輸錢六百歲減可二十餘萬貫其他州縣之有差徭者遞減有差九年十月以河工安瀾賞二品頂戴十年署河南按察使十一年六月補授七月署河南布政使先是河南軍需交代積壓或數十年甚至卷册有散佚無稽者

事聞於朝爰有清釐之命顧日久無所成護理河南巡撫孫鳳翔檄振禕清查既受代與吏胥約除骹骸故習不兩月而事竣十月以河工搶險下部優敘十二年正月入覲六月擢江寧布政使十三年河決鄭州倡義集款十二萬往賑之全活無算時黃流南趨勢奪江淮而下振禕以裏河地處低窪淮海爲產鹽之區場竈林立東南財賦所關設有疏虞不獨膏腴盡失如數百萬生靈何乃與兩江總督曾國荃亟籌保障之策先擇要所浚道築防以時蓄洩故次年春水盛漲淮海得保無虞十二月以前署河南布政使籌協餉功賞頭品頂戴十四年徐州諸屬災振禕力籌賑濟又假公帑貸民耕種俾無誤農事而自捐款鉅萬代爲之償十六年二月擢河東河道總督是時竭天下財力經營鄭州而河事窳敝一如昔日會言者指陳河工積弊上令振禕查議振禕奏請改章以爲言官條陳河工重在保險先保險而後籌減費人所共知也先減費而後任保險人所不敢言也此事固非改章不能行實非河臣身任其事亦不能行請先臚弊端後明辦法其一曰把持之弊各署皆有幕友河工獨曰庫儲其於例案茫然不解獨鈔撮部中報銷之冊以爲祕本在河督署中者則以險工恐嚇使之不敢輕議更張而於奏報無工

處所亦必故作張皇鋪排以爲見好受謝地步在河道署中者則以力請添款暗阻發款爲務其在各廳署中者則以節省工料勸留銀錢爲務此弊不除各官皆爲蒙蔽而河臣受累尤深擬請改章以後河臣一概不延用庫儲其二曰轉轄之弊各廳歲辦稽料磚石本係領款所購而於交卸時復將餘存列入交代且於道庫陸續扣領故有已故廳員其子孫仍支領一二十年者因之有料亦不辦工留積異日家私其實稽料早化灰塵輒石亦歸烏有紙上鑿空坐收厚利此弊不除政體何存擬請改章於霜清後查取各廳所存稽料輒石概行充公不准再立交代名目以斷葛藤其三曰失算之弊大凡稽料早買則價廉後買則價貴輒石先辦則有濟後辦則無及同一支放早可供急變之需遲則有貽誤之患查河工款項名目糾紛有所謂額款者有所謂奏添節省防險者有所謂另案輒工埽工土工石工者其實皆取之司庫分別各名以便報銷而弊端卽由此出約計每年報銷六十餘萬兩而司庫必陸續撥給或遲之又久而後撥給有事不能爲先時之備無事究可便中飽之私此弊不除無從覈實擬請改章每年請款卽以六十萬兩爲率尋常搶險不必加添而將各種名目概加刪除特名曰歲修額款六十萬

兩而已其四曰忙亂之弊河臣以公事責之兩道兩道以公事責之七廳七廳以公事責之外工問其底蘊半未深悉遇有險工加倍張皇卽求添款計較已定先請河道次請河督至則人工紛紜無從稽覈用料無料用石無石臨時採辦輒稱借墊河臣但主添款了事不思歲領之款所辦何事何至有工卽爾竭蹶謂爲無弊其誰信之此弊不除則奏報幾無實語擬請改章河臣宜以身率羣屬先事預防庶不淆混四弊旣明然非另設河防一局究竟不能更易舊轍擬請歲支司庫銀六十萬兩其四十八萬兩概歸七廳赴司支領另提十二萬兩設一河防局專管先時籌備臨時策應隨時稽察每估有工程其款由司庫徑領到工銀錢不許入局疏上從之先是振禕任河北道時欽差大臣孫毓汶烏拉布查辦河工振禕卽進以改章之說幾爲通工所不容及是迺得行其志十七年加築滎澤大壩九堡十堡建築楊橋順河長埝十八年加築廣武山石壩建築胡家屯來童寨各石壩河以大治十九年因連年督辦河防諸臻妥協予優敘十一月命振禕會同李鴻章查勘永定河工振禕旣周視固安東察天津尾閘復折西出居庸關及懷來審河上流知河首受馬邑定周諸川束於軍都高峰怒行數百里挾勢出峽鬱極

難制其下游宣之直沽者又五河盛漲所會洩不以時隄庫沙壟勢必中決決且難治乃以保近險濬中洪築減壩治下游請如其議二十一年詔舉人才振禱疏言國家圖治莫若上法祖宗下培民命孔子之策治衛不外富教孟子之論王道特重農桑非如今之測量機器格致製造火輪鐵路掘礦求財操術之奇古來未有而富强之效茫如捕風就使偶效一二亦非祖宗所取而民生日蹙民力日窮其不乘機思亂者乃深感列聖累朝寬徭薄賦之恩與皇上積年仁民愛物之誠耳宋臣司馬光云天地生財祇有此數利不在民則在官披覽此語爲之惕然利在民此國家之所以長治而久安也利在官此國家之所以深憂而隱患也與其謀利不如節用與其好奇不如務實從古四夷之亂皆乘中國元氣之虛而起試觀前史各朝開創初年兵不求多賦不加取自然平一海內蠻方致貢契丹西夏欺一積弱之趙宋而不能安石蔡京壞一全盛之兩京而甚易皇上可思其故也曩年曾國藩胡林翼諸臣皆非別有過高之論任用出奇之人惟以實心爲本愛民爲務問之洋學則不能舉其詞問之軍器亦未嘗購諸外卒能削平羣盜光輔中朝至不得已而取用釐金借資民力終以一時權宜大奪民利中心歉然思欲

軍務稍平卽奏停止此前事之可取鑒者也今天下攘臂鳴異實繁有徒非西學不得謂人才非變法不得謂作用又有假飾理學侈談經濟實則結黨干時希弋顯位今吏治日壞將才日少人才之頽靡如此則保者之冒濫可知且於國脈民命安危所繫未曾加意此臣之私心所大懼也尋乞病歸諭賞假一月毋庸開缺十二月調廣東巡撫振禕以粵地多沙田田不載於冊官使吏稽吏得金輒爲匿其數否則虛造溢報以相傾陷又或強豪兼并莫能誰何因奏定章程分畝清丈俾無無田之稅亦無無稅之田利歸於國而民不病粵東闖姓爲歷年積弊振禕亦奏請革除之二十四年五月粵西會匪事起匪首李立亭黨號萬人未一月連陷鬱林陸川北流興業容縣諸城侵軼廉防廣州戒嚴振禕亟籌備禦增募五營檄提督劉永福統之粵民賴以無恐七月諭裁廣東雲南湖北三省巡撫缺召振禕內用旋乞假修墓諭賞假兩月二十五年二月卒江西巡撫松壽代遞遺疏並奏言振禕學有本源持躬廉謹所至剏建書院以振興文教爲己任力除積弊與吏民相更始巡撫廣東務持大體皆實事求是見諸施行雖歸田未久而江省人士述其遺言軼事莫不欵欵感喟其平日推重於鄉邦已可概見綜覈振禕生平

立身行政始終無間家居臥病猶以時局艱難國恩未報爲深疚其忠愛之忱發於天性者然也二十六年四月署兩江總督江蘇巡撫鹿傳霖臚陳振禕服官各省政績請附祀故大學士曾國藩專祠二十九年七月河南巡撫張人駿亦請以振禕附祀豫省故大學士曾國藩專祠並將政蹟宣付史館立傳詔均如所請行子恩緝候選道

劉銘傳

劉銘傳安徽合肥人咸豐四年粵匪踞皖陷廬州銘傳倡團鄉里屢遏賊氛九年率鄉勇從官軍收復六安十年援壽州由千總獎都司銜同治元年江蘇巡撫李鴻章募淮勇東下銘傳以管帶從至上海連戰皆捷乃立銘軍招撫南匯降賊吳建瀛劉玉林以其衆屬銘軍賊將吉慶元自川沙來寇擊卻之擢都司加游擊銜旋攻復奉賢縣金山衛以參將補用並賞給驃勇巴圖魯名號又敗賊野雞墩暨四江口擢副將二年會攻福山克之常昭圍解擢總兵時楊舍汛爲沿江要隘悍賊堅守四月銘傳隨水師提督黃翼升推鋒直前猛攻六日而江陰至無錫數十里賊營之來撲楊舍者屢受創遁逆酋李秀成乃率水陸數十萬分路回援銘傳

會各軍迎擊七月乘勢進攻江陰擒斬二萬餘遂克其城詔以提督記名簡放旋復無錫賞頭品頂戴十一月進剿常州銘傳由羊頭橋閒入奔牛鎮降其賊目邵小雙卽令扼丹陽援賊而身自督軍攻城破賊壘十餘降賊萬餘人十二月賊復犯奔牛冀解城圍挾小輪舟以渡銘傳回援擒斬數千剗賊壘三十餘座並燬其舟賊不得逞三年官軍再攻府城四面圍合銘傳破門入生擒護逆陳坤書等於陣常州平賞穿黃馬褂是時金陵老巢新破洪逆幅瑱竄據廣德銘傳擊走之復其城四年忠親王僧格林沁殞於曹州捻匪大熾欽差大臣曾國藩奉命督師山東調銘傳赴濟寧奏設四鎮重兵以周家口屬銘傳旋破賊於瓦店於南頓於扶溝嗣又改銘軍爲游擊之師詔授銘傳爲直隸提督仍率以援鄂克黃陂躡賊至潁州大敗之銘傳以捻逆各股回竄豫皖中原平曠之地飄忽靡常官軍疲於奔走未有以制賊死命乃建議扼守沙河督軍士築長隄蜿蜒七百里以達於運防屹然若長城驅賊沙河以南以蹙之築甫竣而汴梁隄防爲賊所破銘傳分軍追剿創之於鉅野會曾國藩請疾銘傳軍仍屬李鴻章逐捻東至鄆城西至京山大小數十戰皆捷六年正月捻走尹隆河銘傳與鮑超約期會戰銘傳雖先期失利

卒能轉敗爲功四月破賊於黃安東又追至南陽由棗陽與賊馳逐東自應山黃
陂西出安陸襄棗又由南陽至鄭州日蹕百里莫敢與爭鋒遂蹙賊至山東又創
防守運河進扼膠萊之議與諸軍共築長牆北起夏店南至柳林口以遏賊西趨
八月解沅陽城圍追逐至諸城日照復殲逆曾任柱於贛榆又由閒道馳濰東北
夜銜枚急擊大破之賊西走新城復截擊東走壽光蹙之海濱洋河濰河之交任
賴匪黨殲焉東捻平李鴻章奏稱扼守運河併軍兜剿大獲奇捷剏自銘傳曾國
藩亦疏稱巨憝肅清餘氛盡埽論功以銘傳爲最詔賞三等輕車都尉世職旋以
積勞致疾乞假歸七年西捻張總愚竄河朔銘傳奉詔馳抵東昌會各軍進剿於
鹽山滄州德平賊趨博平清平一帶圖撲運河適馬頰河黃水漫入河西北岸長
牆築甫就銘傳會諸軍縱橫合擊賊衆盡殲張逆挾數十騎走追之在平南鎮赴
水死降賊四千西捻平晉一等男爵詔紮張秋以資彈壓九月奉命督辦陝西軍
務分調提督唐定奎副將滕學義遊擊黃桂蘭諸軍駐防邊境旋搜剿北山回匪
因病假歸光緒六年奉詔力疾至京條陳開造鐵路言鐵路之利於漕賑商礦以
及釐捐行旅者不可殫述而於用兵一道尤爲急不可緩之圖鐵路造成呼吸靈

通聲勢聯絡裁兵節餉併成勁旅轉運槍礮軍火朝發夕至十八省合爲一氣一兵可抵數兵之用將來兵權餉權盡在朝廷不爲疆臣所牽制言尤摯切十年法人擾海疆銘傳奉旨賞給巡撫銜督辦臺灣軍務因條陳整頓海防講求武備十條一各海口設防宜分輕重緩急以期握要一各海口礮臺亟宜改建以重防守一洋面水師兵船宜次第籌辦以固海疆一長江太湖水師亟宜改制以收實用一福建船政局上海機器局宜加意整頓一請籌購大批槍礮以節經費而免欺朦一稽查軍械整頓礦務宜特設軍器局切實講理以專責成一新募勇隊宜加裁併參用練軍以節餉需一嚴定賞罰以求將才一請設局譯刻泰西各書引掖後進以造人材凡數千言切中時事多見施行五月行抵臺北六月法人來犯燬礮臺銘傳以無兵艦不能爭鋒海上誘之登陸與戰於基隆斬法酋三人兵百餘奪燧二軍械數十件奉旨嘉獎並奉慈禧端佑康頤昭豫莊誠皇太后懿旨發內帑銀三千兩賞給戰士銘傳以滬尾距臺北僅三十里形勢尤要於基隆後路有失則基隆亦不能守乃令提督孫開華守之而退軍後山其後法人三犯滬尾皆不能得志銘傳旣回淡水策應滬尾愈靈然礮臺已燬全恃我軍肉薄相當時馬

江已挫上海用三輪舟以濟師皆不克達銘傳獨力措持八閱月尋奉特旨補授福建巡撫十二月法人犯月眉山我軍力薄將士忍飢冒雪誓死拒守營官至跣足督戰僅乃克濟十一年和議成上以臺灣爲南洋門戶議改設行省授銘傳爲福建臺灣巡撫乃奏增設一府一廳三縣又綜籌全臺形勢生番橫互南北七百餘里與民地交錯年戕民命至千餘匪盜則藉番地以出沒聚衆搶劫土豪則藉防番以斂費養勇抗官號令不行賦稅不清值時多故內患不除無以禦外侮乃奏辦撫番事宜檄將領分路剿撫或親督大隊入山威德兼施於是南中北三路及前後山生番多薙髮歸化皆安置而教養之辦理清賦較舊額溢出三十六萬三千三百兩有奇又興造鐵路以通南北臺防益固是年正月奉懿旨賞加太子少保銜十六年正月恭逢皇上二旬萬壽慶典得旨賞加兵部尙書銜三月奉慈禧端佑康頤昭豫莊誠壽恭欽獻皇太后懿旨幫辦海軍事務旋乞病歸二十六年卒遺疏入諭曰劉銘傳秉性忠勇卓著戰功咸豐年間粵捻各匪竄踞安徽倡辦團練爲曾國藩所識拔同治初年隨同李鴻章募兵東下連拔郡縣會合諸軍苦戰克復常州積功補授直隸提督剿捻山東河南等省與悍賊縱橫追逐大小

數百戰旋授三等輕車都尉世職復與各軍窮追首逆張總愚斬首無算擒匪一律蕩平晉封一等男爵朕御極後特授巡撫疊加太子少保兵部尙書銜於一切應辦事宜克稱厥職嗣因患病准其開缺回籍調理方冀寵眷克承長資倚畀茲聞溘逝軫惜殊深劉銘傳著晉贈太子太保銜照巡撫例賜卹加恩予諡准其立功處所建立專祠生平戰績事實宣付國史館立傳任內一切處分悉予開復應得卹典該衙門察例具奏伊長孫劉朝仰著賞給員外郎伊子拔貢生劉盛芸著賞給舉人准其一體會試附貢生劉盛芾著以員外郎用用副篤念盡臣至意尋賜祭葬予諡壯肅子盛芸舉人候選道盛芾員外郎盛芥舉人孫朝仰員外郎承襲男爵朝望舉人刑部郎中

色楞額

色楞額郭其爾氏滿洲正白旗人咸豐六年由六品廕生賞藍翎侍衛九年擢三等侍衛十年隨其叔父督辦江北軍務荊州將軍都興阿剿賊江蘇揚州十一年儀徵賊糾合蘇州句容等處股匪犯揚州都興阿敗之胡家場既由槐子橋北進攻復大捷斬馘無算色楞額在事出力陞二等侍衛同治三年都興阿調任西安

將軍督辦甘肅軍務色楞額隨攻寶豐克之負重創賞頭等侍衛四年五月敗賊
寧夏城東三月固原竄匪趨平羅寶豐色楞額帶所部馳赴橫城扼後路兼護運
道既官軍敗賊金積等堡賊北竄邀擊又敗之誅賊酋馬生顏色楞額以功擢副
都統五年隨剿賊奉天七年以捕獲孤山賊首王慶等出力賞戴花翎光緒元年
偕總兵左寶貴剿捕香爐溝大西山等處匪擒斬甚多賊首宋占魁伏誅地方
一律肅清賞納恩登額巴圖魯名號九月署興京副都統二年實授三年調成都
副都統五年二月賞副都統銜作爲駐藏幫辦大臣十一月擢辦事大臣九年調
庫倫辦事大臣十二年遷伊犁將軍十六年卒諭曰伊犁將軍色楞額老誠勤慎
前在軍營帶兵剿賊著有戰功歷任副都統駐藏大臣洊陞將軍宣力有年克稱
厥職茲聞溘逝軫惜殊深著加恩照將軍例賜卹任內一切處分悉予開復應得
卹典該衙門察例具奏靈柩回旗時沿途地方官妥爲照料該將軍子孫幾人著
魏光燾查明具奏候旨施恩尋賜祭葬

依克唐阿

依克唐阿扎拉里氏滿洲鑲黃旗人吉林駐防由馬甲從征江南咸豐七年十月

破王家溜子集賊圩敘功賞戴藍翎十二月破安徽亳州趙家七屯奉旨以驍騎校儘先卽補九年二月剿賊於河南商水縣老湖坡力戰克之賞換花翎十一年八月隨欽差大臣科爾沁博多勒噶台親王僧格林沁剿賊山東沂州積功以防禦儘先卽補十月補防禦同治元年補三姓滿洲鑲白旗佐領四年轉吉林滿洲鑲黃旗佐領五年正月馬賊王洛七王傻子等陷伊通奉天戒嚴署吉林將軍德英檄依克唐阿往剿以少襲衆斬其酋劉果發姜洛道又破賊於昌圖德英以依克唐阿屢戰皆克命幫統步勇破賊於劉家店長春廳等處三月奉旨賞加副都統銜並以協領卽補旋在吉林關家大橋缸窯等處節次進剿每戰皆爲軍鋒殲賊甚衆督辦吉林軍務將軍富明阿稱其膽識過人奮不顧身奏入賞加法什尙阿巴圖魯勇號六年八月吉林肅清以豐次剿捕勞績交部議敘九月吉林將軍富明阿考驗軍政薦舉卓異七年依克唐阿剿捕餘匪並獲逆首白陵阿悍黨焦西平富明阿上其功詔交軍機處存記以副都統簡用八年授墨爾根城副都統十一年署黑龍江將軍十二年調補黑龍江副都統光緒二年以黑龍江協領以下各官員多缺少奏請變通成例敘補以擴仕途許之自吉林與俄接壤通商控

制之地以呼蘭爲重鎮議設副都統員缺專理中俄通商事務五年七月奉旨新設呼蘭副都統員缺著依克唐阿調補六年六月丁母憂請假回旗時俄人以改議伊犁條約有違言遣兵屯吉林近界邊防孔亟烏里雅蘇臺參贊大臣喜昌會辦吉林琿春防務疏言琿春邊防緊急非得謀勇兼優熟習戰事如依克唐阿其人不能克保障疆域該副都統現在制中請敕就近於伊通招募滿漢獵戶暨蘇拉西丹進紮琿春以資守禦奉旨允行十一月吉林戒嚴增練馬步隊五千分防各隘省防既固乃馳駐琿春琿春地當要衝中俄商民雜沓自定界以來俄人設官於此交涉益繁距琿春東南二十里之海參崴俄人悉力經營已成重鎮數有窺伺之志銘安喜昌疏言體制不尊不足以資鎮守事權不重不足以專責成擬請添設副都統一員駐琿春城內俾邊防要務有所專寄七年五月奉旨調補新設琿春副都統十年以依克唐阿籌辦防禦悉合機宜命幫辦吉林軍務十二年會同都察院左副都御史吳大澂與俄羅斯勘分邊界十五年擢黑龍江將軍二十年九月日本陷朝鮮之平壤義州遂窺鴨綠江時四川提督宋慶率軍扼守九連城而長甸蒲石河口一帶防務空虛命依克唐阿前往堵禦疊復蒲石河口古樓

子等處十月軍抵寬甸縣奉旨不得株守一隅致誤大局依克唐阿親督大隊在鳳凰城一帶防勦屢戰於賽馬集雙山子張家嶺草河口等處時毅軍盛軍鎮邊軍相繼失利日本連陷九連城牛莊旅順大連灣鳳凰城營口廳奉旨依克唐阿卽行革職仍統所部帶罪圖功以觀後效十一月奉旨長順防守遼陽兵力尙單卽著依克唐阿督軍前往會同嚴防以杜北竄是月率師進規海城在騰龍堡鞍山站甘泉堡海城雙廟子駝龍寨疊次力戰擒斬甚衆二十一年二月賞給頭品頂戴旋授鑲黃旗漢軍都統八月授盛京將軍十月奏請開缺奉旨申飭二十二年正月疏言奉天營務吏治敗壞已極其故皆由於官邪不除請褫候補道員余濬營口同知陳忠偉職以儆貪婪又以統領耿鳳鳴派索營私奏劾落職審訊二月復奏言東邊木貨各稅屢經密查歲約收銀五六十萬兩歷年冊報僅十七八萬兩昌圖府河稅斗租歲約收銀十萬兩冊報僅三四萬兩收報懸殊浸成積習請變通辦法極力整頓以裕餉源先後均得旨允行三月奏請派盛京戶部侍郎良弼辦理大圍場墾荒事務五月統籌奉天滿漢營制從實整頓分立旗隊練兵日盛軍綠營練兵日奉軍督轅練軍日親軍凡二十八營詔從之二十五年卒遺

疏入諭曰依克唐阿持躬清正忠勇性成咸豐年間隨征江南轉戰安徽江蘇湖北河南山東等省屢殲巨寇疊克名城粵捻平靖前赴吉林剿辦馬賊積功洵保協領以副都統記名簡放歷任墨爾根黑龍江呼蘭瑋春副都統陞任黑龍江將軍光緒二十年調赴奉天辦理軍務籌畫戰守卓著勤勞旋授盛京將軍到任以來經理善後悉臻妥協清查釐稅剔除中飽歲增餉銀數十萬所部敵愾各軍訓練有方一切事宜均能認真整頓勞怨不辭方冀克享遐齡長資倚畀遽聞溘逝軫念殊深依克唐阿著照將軍軍營病故例賜卹加恩予諡任內一切處分悉予開復應得卹典該衙門察例具奏賞銀一千兩治喪由盛京戶部給發靈柩回旗沿途地方官妥爲照料其生平戰功事蹟著宣付國史館立傳並於立功省分建立專祠伊嗣子副都統銜協領富隆額著以副都統交軍機處記名請旨簡放用示篤念蓋臣至意尋賜祭葬予諡誠勇子富隆額頭品頂戴記名簡放花翎協領兼雲騎尉孫恩貴一品廕生

清史列傳 卷六十

新辦大臣傳四

延茂

延茂杜氏內務府漢軍正白旗人同治二年進士以主事用籤分禮部光緒四年隨同禮部尙書恩承吏部左侍郎童華前往四川查辦事件五年八月補主事旋擢員外郎六年七月補郎中七年九月以孝貞顯皇后永遠奉安禮奉旨著在任以五品京堂候補八年京察覆帶奉旨仍以五品京堂候補二月補鴻臚寺少卿以八旗官學廢弛奏請變通章程修校舍購器具並指撥各省閒款以裕經費得旨下所司議行九年調光祿寺少卿奏請慎民命勤稽覈嚴申儆上嘉納之十年調通政使司參議旋授內閣侍讀學士時中法構釁外交日棘延茂奏以時值今日開古今未有之奇局合地球萬國爲戰場外人於中國之土地人民政事罔不留心默識或繪爲輿圖或編爲紀載興衰利弊類能言之而我國士夫於外洋情形鮮能實力講求擬請自今慎選使才飭令於各國之貧富強弱利弊興衰以及

山川夷險隨時隨地密爲考證附電奏聞若一日有事外情虛實無一不在宸算之中似亦控馭外人之一助會越事日急朝廷分遣重臣督辦防戰延茂又奏稱名將必知地利而後可以行師廟堂必知地利而後可以馭將今越南用兵臺灣喫緊邊防海防均關緊要而朝廷之上既無總圖以提綱挈領又無分圖以縷析條分止憑累牘盈尺之奏章以察其形勢縱使擘畫無遺而勢異形殊終非懸擬所能得亟宜北起盛京南踰嶺廣暨閩之臺粵之瓊聯爲一氣繪一總圖由滇粵之邊外迄越南全境繪一總圖再令諸臣於所轄駐境地各繪分圖均應上準緯度下準方斜俾知相距里數至於屯駐大軍以及分防分守境地如何聯絡如何堵擊統令詳細帖說進呈宸覽並令諸臣各備一分昕夕考察隨事講求似於籌備海防不無小補疏入上皆踴其言旋充正黃旗官學管學官十一年調太僕寺少卿十三年調奉天府府丞兼學政十七年調詹事府少詹事旋調大理寺少卿十八年賞給副都統銜作爲駐藏幫辦大臣並賞給荷包等件二十年奉旨開缺來京另候簡用二十一年奉旨前往吉林查辦事件旋署吉林將軍二十四年補吉林將軍奏稱交涉事繁請於省城置交涉總局並請擴充俄文學堂以造譯才

先後皆得旨俞允是年因倉廩災自請議處奉旨寬免二十五年奉旨開缺來京另候簡用二十六年補黑龍江將軍未赴任值聯軍入京闔門殉節留京辦事大臣大學士宗室崑岡等以事聞諭曰將軍延茂持躬恪謹秉性篤誠由部曹補授京卿歷任駐藏幫辦大臣吉林將軍均稱厥職本年簡放黑龍江將軍尙未赴任七月間臨難捐軀從容就義洵屬大節凜然延茂著追贈太子少保銜加恩予諡入祀昭忠祠照將軍例賜卹任內一切處分悉予開復應得卹典該衙門察例具奏伊妻李氏同伊兄弟之妻唐氏董氏李氏李氏陳氏並姪女四人同時自焚盡節情尤慘烈允宜特予旌揚以彰貞節李氏等俱著准其旌表該部知道伊子主事肇鴻著俟服闋後以員外郎分部行走用示篤念忠盡至意尋賜祭葬予諡忠恪

英廉

英廉伊克明安氏蒙古正藍旗人咸豐三年粵匪謀北竄英廉由筆帖式隨科爾沁郡王僧格林沁督師防天津逾年事平撤防六年補護軍校八年英法連兵由海道徑窺天津於是大沽港口山海關及通州所在設防英廉亦無役不從同治

元年調派神機營練兵積功獎委護軍參領是年九月隨江寧將軍富明阿出師江皖二年敗賊於安徽宿州之唐家莊保以副護軍參領儘先卽補旋攻解蒙城圍逆練苗沛霖伏誅賞戴花翎三年二月補副護軍參領六月江寧平有旨以參領儘先卽補四年七月復從鑲紅旗漢軍都統福興赴直隸之遵化薊州剿捕馬賊十月補護軍參領時奉天吉林馬賊尤猖獗英廉常往來馳逐於奉吉之間所至必捷其逸匪之逃入朝陽坡者五年二月亦經英廉斬捕略盡有旨以副將遇缺儘先卽補六年管帶八旗漢軍排槍隊官兵防霸州七年兼帶八旗滿洲擡槍隊防天津青縣賊皆斂迹九月回京詔記名以副都統用九年派管精字威遠隊官兵駐張家口十年九月奉命往伊犁幫辦事務十一月歷敘管理旗營功詔以副都統記名遇缺題奏十一年七月赴庫爾喀喇烏蘇駐紮辦理防務上以瑪納斯爲伊犁東來要地諭令署伊犁將軍烏里雅蘇臺參贊大臣榮全預修戰具隨飭英廉領兵赴庫爾喀喇烏蘇先圖攻克瑪納斯再與景廉聯絡規復烏魯木齊以壓敵勢十二年三月賞給副都統銜作爲塔爾巴哈臺參贊大臣六月抵塔城甫視事卽躬赴達敏郭勒臺各地履驗臺站十三年疏言塔城荒廢未易修復請

俟新疆事局大定再度適中之地別建城垣以資控制上躡其議光緒二年回匪竄擾塔境剽掠軍臺英廉飭藍翎公中佐領于珊率大同馬隊爲軍鋒而親督所部隨方抗禦多所斬獲臺路賴以無阻三年以塔境粗定商務漸興請復貿易稅課俾資軍餉並調甘肅營兵循舊出防以代大同馬隊均得旨允行署伊犁將軍榮全先後陳其功賞頭品頂戴九月克復瑪納斯城下部優敘十月詔令英廉來京當差八年充神機營全營翼長精字威遠隊管帶官九年補正藍旗漢軍副都統旋署馬蘭鎮總兵十年補馬蘭鎮總兵兼總管內務府大臣十九年以親老奏懇留京當差允之二十年正月授鑲紅旗漢軍副都統四月派充八旗漢軍礮隊專操大臣中東事起十一月統帶八旗滿洲內火器營馬隊八旗漢軍排槍步隊官兵駐防薊州旋以病乞假二十一年正月奉旨卽行開缺二十六年三月卒遺疏入諭曰前任鑲紅旗漢軍副都統英廉由筆帖式於咸豐年間隨同出師在直隸新疆等處防剿著有勞績洊擢副都統茲聞溘逝軫惜殊深加恩著照副都統例賜卹任內一切處分悉予開復應得卹典該衙門察例具奏尋賜祭葬子恩存

西安左翼副都統

沙克都林扎布

沙克都林扎布岱劄羅氏滿洲正白旗人咸豐六年承襲騎都尉兼雲騎尉世職賞二等待衛同治三年入西安軍營隨同欽差督辦甘肅軍務陝甘總督都興阿征剿各處回匪八月克復平羅及中衛等城擢頭等待衛四年進剿黃河西岸竄匪大獲勝仗賞副都統銜五年河東橫城堡花馬池定邊各要隘復有匪徒出沒沙克都林扎布率所部黑龍江馬隊馳赴定邊督飭在防馬步各軍妥爲布置邊境以安都興阿旋授盛京將軍奏調沙克都林扎布領隊同行時沿邊馬賊猖獗四月賊由紅廟子竄進邊內過廟爾嶺至一面山滋擾都興阿聞報兼程前進偵知柴河溝猴兒石有馬賊往來游弋竄擾李家臺五月副都統色爾固善督隊迎剿將至西朝陽溝該匪由猴兒石直撲勢甚兇猛沙克都林扎布首先衝入賊陣繞出賊前奮勇進擊斬捕首虜捷上賞庫楚特依巴圖魯勇號會岫巖州屬匪徒王作幅糾結匪黨三四百人由大東溝乘船駛至莊河肆擾勢張甚沙克都林扎布時在李家臺奉檄由岫巖進搗平之七年四月隨都興阿剿辦直隸髮捻旋調赴新疆幫同署伊犁將軍榮全收復伊犁十一年授巴里坤領隊大臣欽差大臣

烏魯木齊都統景廉奏留派充馬隊全營翼長八月賊圍哈密帶兵馳援連獲大勝城圍立解賞穿黃馬褂十三年正月陝回白彥虎率黨攻撲上馬橋防營參將徐學功兵力不支景廉命沙克都林扎布進駐沙山子與徐學功扼要防剿賊不敢東向而西路一帶大肆焚掠意欲占踞西湖阻我前敵餉道迺會同孝順一軍聯絡聲勢前後夾擊賊稍稍遁去光緒二年幫辦軍務烏魯木齊都統金順以古牧地事急復奏留沙克都林扎布緩赴巴里坤領隊大臣任派充吉江六起馬隊翼長偕副都統薩凌阿進攻古牧分兩路併進諜知距古牧地十餘里之黃田地賊騎縱橫其村堡踞賊謀乘間突出沙克都林扎布與薩凌阿馬隊先至據黃田地東北山岡由東北西北兩路迎擊沙克都林扎布奮勇先進賊大潰堡賊亦棄巢走復與各軍分路窮追賊踞大小堡寨悉皆平毀追至輯懷城之西陝逆白彥虎由烏魯木齊糾合安集延各匪來援擊卻之並平其破城子沙河沿三箇泉等十餘壘遂復輯懷城乘勝克復鞏寧昌吉各城命以副都統記名簡放並賞加頭品頂戴尋攻克瑪納斯南城賞給三代正一品封典上以巴里坤爲北路要地疊令沙克都林扎布赴領隊大臣任以資鎮撫均經金順以前敵軍務需人奏留許

之六年督隊疏通精河廳一帶地方剿辦餘匪擒斬淨盡賞撥指荷包小刀火鏢八年以收復伊犁功下部優敘俄約既定勘分南路界務七月馳抵納林哈勒噶同俄官分道勘畫遂踰冰嶺而南周歷邊疆安設卡倫十月界務完竣復下部優敘十年金順以沙克都林扎布器宇沈雄勇敢善戰在營多年每於攻堅奪壘無不身先士卒特疏保薦詔交軍機處存記旋命爲科布多參贊大臣十一年八月抵科布多參贊任十二年奏言漢三塘驛站與科城所屬土爾扈特扎哈沁等旗地界毗連萬里沙漠四通八達更兼白塔山往返商賈由此經過屢被匪徒搶掠北八臺邊卡一帶蒙哈搶劫臺站層見疊出若不早爲防守嚴密搜捕爲害匪淺同治九年經前任大臣奏由扎哈沁旗內揀派官二員兵八十名均月支減半柴薪羊價駐紮扎哈沁界內察罕淖爾等處巡邏防守奉旨允准擬將此項官兵移紮各該處鄂隆布拉克臺駐兵四十名官二員北八臺駐兵四十名再添官二員仍由蒙古旗內揀派管帶惟官兵等每月所領減半柴薪羊價不敷糊口擬再加添以資用度詔下所司議行十三年辦理科布多屯田邊疆晏然十五年詔授吉林副都統俟辦理哈巴河安插蒙哈事宜完竣後再行赴任十八年十二月抵吉

林副都統任十九年三月署吉林將軍二十年恭遇慈禧端佑康頤昭豫莊誠壽
恭欽獻崇熙皇太后六旬萬壽懿旨派來京祝嘏會日氛不靖命赴山海關桂祥
軍營統帶察哈爾馬隊剿辦錦州馬賊十二月賞壽字帽纓袍褂料命前往遼陽
幫同吉林將軍長順保固遼瀋加募神虎四營二十一年十一月調補寧古塔副
都統二十二年又調補琿春副都統並幫辦吉林邊務事宜二十三年二月卒事
聞諭曰琿春副都統沙克都林扎布於咸豐年間隨同都興阿等轉戰陝甘新疆
直隸奉天各省屢立戰功洊陞領隊大臣參贊大臣副都統於旗務邊務均能認
眞整頓茲聞溘逝軫惜殊深加恩著照副都統例賜卹任內一切處分悉予開復
應得卹典該衙門察例具奏尋賜祭葬

升泰

升泰卓特氏蒙古正黃旗人由閒散入貲爲員外郎籤分戶部同治元年補官旋
充內倉監督加四品銜三年以軍興以來十有餘載戶部司員專司撥款著有微
勞賞加三品銜六年授山西汾州府知府八年四月陝西回土各匪竄擾晉省升
泰以守土功經山西巡撫鄭敦謹奏請量予恩施奉旨升泰著以道員在任候補

十年調太原府知府十月陞河東道十三年三月伊犁將軍金順以壬申綱鹽課升泰籌餉出力請賞加布政使銜允之光緒三年遷浙江按察使四年陞雲南布政使六年諭令來京另候簡用七年賞副都統銜充伊犁參贊大臣尋授內閣學士兼禮部侍郎銜八年署烏魯木齊都統十一年丁母憂解任十三年復以副都統銜充駐藏幫辦大臣十五年充駐藏辦事大臣十八年八月卒諭曰駐藏辦事大臣升泰老成練達懋著勤勞由部曹外任知府洊擢藩司簡放伊犁參贊大臣署理烏魯木齊都統補授內閣學士兼禮部侍郎銜派爲駐藏幫辦大臣旋授辦事大臣抵藏以來於地方利弊加意講求力圖整頓籌辦邊界事務尤能精心區畫勞瘁不辭遽聞染瘴在仁進岡行營病故殊深悼惜加恩著照都統例賜卹任內一切處分悉予開復應得卹典該衙門察例具奏賞銀一千兩由藏庫給發准其入城治喪靈柩回旗時著沿途地方官妥爲照料伊子壽蓉著賞給主事俟及歲時分部行走用示篤念盡臣至意子壽蓉主事

文海

文海費莫氏滿洲鑲紅旗人同治元年繙譯舉人考取內閣中書軍機章京三年

江寧平上念軍機大臣及章京等與有勞勩文海得遇有中書缺出不計旗分卽行奏補並加侍讀銜賞戴藍翎旋由中書洊補侍讀七年軍機處恭修清字檔冊奉旨以道員在任卽選嗣捻逆張總愚全股肅清賞換花翎光緒九年保送御史尋補山東道監察御史奏言人心不正風俗日漓中上之資無由觀感奮興故操用人之權者每有乏才之歎今欲人才繼起宜令中外大臣杜徇情抑奔競勵廉恥以爲培養之本上嘉納焉十年巡視北城十二年以兄文治補詹事御史例迴避調戶部郎中十四年京察一等記名以道府用是年授貴州安順府知府十八年調貴陽府知府二十年遷雲南池東道二十二年擢貴州按察使署布政使詔加副都統銜作爲駐藏辦事大臣二十五年靖遠禪師第穆呼圖克圖與其弟洛布策忍延致康巴喇嘛用邪術咒詛達賴喇嘛文海以事近巫蠱請將呼圖克圖大禪師名號暫行撤銷以正風化詔如所請行時野番肆擾博窩博窩者川藏之要道也地險而僻橫亘千餘里番衆負嶠自雄每相聚剽掠爲行旅患官軍由昂多往捕則預踞縮隆崗隘塞以扼來路崛強不能制文海迺督率員弁先聲進剿而別遣通曉番語之人設計繞道馳抵各巢宣朝廷德意諭以禍福於是上博窩

之業魯第巴宿木宗中博窩之雨茹寺下博窩之蒲隆寺瓊多寺皆相率投誠先後就撫數閱月而事平二十六年二月捷入賞頭品頂戴嗣因病請就醫四川道卒事聞諭曰駐藏辦事大臣文海由京職簡放知府洊擢臬司陞授駐藏辦事大臣到任以來辦理藏務及交涉事宜均能悉心擘畫卓著勤勞上年因博窩番情不靖力疾前往收撫本年二月間回川就醫歿於王卡塘途次殊深軫惜文海著加恩照尙書例賜卹任內一切處分悉予開復應得卹典該衙門察例具奏賞銀一千兩由四川藩庫給發准其入城治喪靈柩回旗時著沿途地方官妥爲照料該大臣有無子嗣著該旗查明具奏候旨施恩用示篤念蓋臣至意尋賜祭葬子成楷恩賞主事

郭松林

郭松林湖南湘潭人咸豐六年隨同知曾國荃援剿江西賊匪克安福縣城獎七品軍功又分兵西向剿永新太和萬安蓮花廳龍泉各屬之賊每戰皆捷保以把總拔補並賞戴藍翎進圍吉安府城七年二月逆酋石達開率悍黨來援松林隨隊邀擊於吉水之三曲灘衝鋒陷陣殺賊無算又引兵東向收復新喻峽江吉水

等城復分兵至袁州臨江助剿八年攻克吉安府城保以守備儘先拔補九年克景德鎮浮梁縣城擊敗李世賢楊輔清楊雄清大股賊衆江西肅清保以守備留於江西補用並賞換花翎十年隨曾國荃移軍圍安慶二月會剿陳玉成大股於小池驛四月進札集賢關無日不戰無戰不捷十一年擊敗僞英王僞侍王援賊三十餘萬其精銳殲滅殆盡八月克安慶府城奉旨免補都司以遊擊仍歸江西補用並賞給奮勇巴圖魯名號於是湘軍長驅東向進擊廬江無爲州賊克之並連克連漕鎮及沿江各要隘保以參將遇缺卽選同治元年四月疊克巢縣含山和州及銅城牯雍家鎮裕溪口各要隘維時江蘇巡撫李鴻章新立淮軍圖於湘軍中挑撥驍勇健將於是松林改隸淮軍隨同克復柘林奉賢南漚川沙金山等城奉旨以副將儘先推補會大軍攻克嘉定賊慮我乘勝進剿崑蘇因糾合各路踞賊由崑山水陸並進迎拒我師松林率千總李長樂縱馬入賊隊往來衝突賊勢披靡旣而賊由青浦犯四江口蔓延數十里官軍分路迎剿松林居中路擊敗之會賊出隊渡河松林先已伏兵乘賊半渡突出奮擊斃賊千餘名賊屢被創猶踞趙屯橋抵死不下李鴻章以四江口圍困已久議添兵督戰松林遂統松字介

字雲字及督標親兵直倡賊營踰濠以洋槍小隊膝行向前擊斃黃衣賊酋數名賊稍卻而槍礮仍疊施不止軍士冒煙直入松林乘勢踏毀頭營兩座賊潰官軍三路追殺四江口之圍遂解奉旨以總兵記名簡放二年四月攻雨花臺破之尋攻崑山新陽松林與諸軍水陸夾擊賊敗走城遂復奉旨遇有總兵缺出儘先題奏並賞加二品封典五月會剿江陰無錫援賊先是賊自江陰至無錫憑河結營連亙數十里布置嚴密及今負固日久李鴻章議分路滾營而進飭松林進攻南澗率兵爲先鋒賊築兩石卡阻我進兵之路松林督隊猛擊賊稍稍潰遂合諸軍循前後大河分紮三營賊退長涇水師與之戰松林乘閒越南澗趨長涇賊不虞其至也驚甚於是攻其東石營賊悉衆趨街西松林繞撲街西賊以洋槍死拒松林急切持門版護首擁入石營大軍乘之斬賊百餘級衣爲血染賊不支相率狂奔松林復與諸將乘月渡浮橋以火器還襲南澗賊大敗盡燬其壘賞加提督銜南澗旣捷回剿長涇賊出衝突戰輒敗之江陰爲官軍圍急賊更以大股來援松林率八營橫衝之破祝塘橫塘逆巢鈔出周莊馳至江陰率馬步隊由山背繞越十餘里伏於賊後乘賊與官軍戰猝自山後翻上賊衆疑從天降松林大呼殺人

縱橫決盪賊陣亂遂大潰八月克江陰縣城詔以提督記名簡放尋督隊規取無錫時由南門至梅村坊三十餘里賊蹤徧滿松林先飭馬隊搜剿各村散賊並遣將繞過河南設伏以待而自率馬步洋槍隊在張弓橋往來誘擊伏發賊隊悉向梅村坊前敗走乘勝攻梅村賊分股來拒松林大呼陷陣繼之以洋槍隊賊奔潰燬其營旣而援賊麇集松林以猛戰受槍傷乃回營十月賊由梅村繞出阻浮橋以拒會松林創愈率馬隊至與諸軍合力圍攻連獲大捷遂將忠逆侍逆兩大股一律殲盡進紮無錫南門逆首僞潮王黃子澂父子負嵎死守十一月官軍四面環擊松林攻其南破南山石卡土營遂率衆登城擒黃子澂父子復無錫縣城賞加頭品頂戴大軍進規常州松林紮大南門之左賊衆排列西南分三路迎拒官軍亦分三路敵之自辰至未鏖戰數時之久大破之旣而金壇溧陽援賊數萬營於西門之奔牛鎮以輪船圍攻松林馳救先自出隊諸軍繼之以排槍衝過浮橋焚燬其輪船是時也李鴻章以賊踞宜興荆溪久飭松林會同洋將戈登合擊三年松林率隊與戈登同至宜興北門松林被槍穿右肘裹創力戰猝有援賊數萬自張渚來松林嚴陣以待賊撲近以洋槍擊之死傷相繼援賊旣敗城賊勢孤開

門遁松林與戈登併力追殺有竄死者餘悉降正月克宜興荆溪縣城乘勝圖溧陽行至張渚賊懼出降立克溧陽縣城移軍金壇遇賊船千餘艘揮軍截之賊棄舟登岸松林督軍緣河兩岸鈔擊大敗之賊復糾合宜興溧陽敗衆循江岸直竄腹地圖解常熟之圍李鴻章調松林回援松林回至王村賊退守橋口松林督隊過橋追殺二十餘里將顧山陳市踞賊一氣殲除由大河口徑趨常熟會諸軍循江追賊至楊舍而反常熟之圍亦解三月補授江蘇福山鎮總兵楊舍敗賊尋復糾集於雲庭花山一帶欲渡三河口浮橋回竄丹常松林列陣南牖躍馬橫出直撲三河口營賊不支棄壘爭渡而浮橋五道遽斷其四人馬堆積河爲不流於時大軍方剿常州松林率軍至戚墅堰填濠而進賊聞風潰走松林督軍縱橫馳殺以炸礮轟塌城牆將由缺口分路衝鋒而上賊以火藥擲下官軍稍卻松林橫刀直前兜砍諸軍繼之四月克常州府城賞穿黃馬褂於是乘勝進剿丹陽賊聞常州已克驚且潰不戰克之會李鴻章助剿浙逆調松林進規長興松林至營於東門城賊固守不出湖州賊二萬自東南來援廣德賊四五萬自西北來援洶洶然與城賊相應松林擊援賊賊以槍礮奮拒軍不爲動及其氣懈一呼齊進賊敗走

方擬架浮橋攻城而援賊復添大股折回思逞松林馳擊之復敗去松林意其必爭長興遂率軍自攻東門而飭礮船攻東南東北兩隅轟塌城垣十餘丈松林先登城大軍隨之城內悍賊次第擒斬復長興縣城奉旨優敘六月丁父憂李鴻章奏改署理福山鎮總兵仍留營協剿七月破賊於湖州之尹隆橋大德橋等處堵逆黃文金於尹隆橋南岸築壘防守極嚴松林以開花礮隊擊之黃文金撥悍黨繞呂山八字橋阻官軍糧道而別撥大隊自尹隆橋至八字橋延袤二十餘里傾巢來爭松林遣將分路迎敵迨山上羣賊衝下松林捲旗突入槍傷左膀力戰不退並飭礮船由河內助擊賊力竭倉皇紛竄陣斬數千名遂克湖州府城松林以奮勇剿賊疊受槍傷得旨存問並賞給雲騎尉世職松林之克尹隆橋大德橋也會有旨署理福建陸路提督至是命赴署任時閩省漳州一帶踞逆未下四年三月松林率所部抵廈門與諸軍會剿大破賊於赤嶺乘勝踰嶺羣賊辟易漳州踞逆亦漸窮蹙松林以漢南地勢古縣最扼要必先分軍近紮始可斷漳州漳浦踞賊往來四月率所部入營進紮距漳城十里之古縣東山城賊突出撲營松林飭軍迎剿賊勢盛復飭各營鎮靜以待自午至酉賊撲十餘次氣漸餒松林麾軍急

進賊不能支相率潰竄乃與諸軍偪攻漳州別飭一營由石亭仔小浦南前進使賊首尾莫顧松林親督洋槍隊於夜半沿山疾行直抵烏頭門與東路官軍夾擊賊面面受敵仍死拒不退官軍愈攻愈猛賊漸潰松林揮軍截殺會石亭仔小浦南前進之軍亦乘勝直抵城下諸軍合攻遂克漳州府城賞給白玉四喜搬指白玉翎管大小荷包火鏢等件雲霄廳所轄之岳坑居萬山中形險可恃其內如溪坪大洞梁山等村尤險惡髮逆陳仔率其黨匿迹於此而朱姓匪首則糾集各悍黨堅踞岳坑意圖死拒松林行近岳坑將助逆朱姓各小村悉數掃蕩直逼岳坑賊固匿不出松林麾軍急攻並以西洋火箭射人霎時煙燄蔽天官軍乘勢衝入遂將岳坑匪巢攻毀乃飭分攻大洞猝不易拔松林馳至繞視一周令各營圍定直逼寨腳鑿一穴填入火藥納以引線囊土封固疾馳回陣踰時火藥轟發各軍一擁而進生擒陳仔餘逆悉誅乘勝遂薄溪坪松林見偏北牆垣微缺因以炸礮轟擊歷一時之久牆垣摧塌各將士於缺口先登官軍蟻附而上立將溪坪攻破復飭各營入山搜剿將髮逆陳仔匪首朱起運朱庭燎朱庭獻等正法閩匪肅清松林率軍回江蘇候調並由李鴻章代奏懇恩開缺終制上不允賞假四箇月並

諭之曰郭松林援閩之師崎嶇轉戰疲憊異常業經凱撤回蘇自應暫行休養郭松林謀勇兼優受恩深重自必以國事爲急現以降旨賞假四月回籍葬親屆期卽著銷假以副委任五年湖北巡撫曾國荃奏豫捻竄入鄂境上命松林赴湖北防剿十一月督軍征捻克應城雲夢二縣又敗賊於阜河楊澤楊墩等處十二月大軍追賊至安陸之白口正猛進間伏兵陡起松林與其胞弟補用副將郭芳珍馳援芳珍歿於陣松林左足及胸前連受七傷脛骨爲槍子擊斷臥地不得起諸將士不知松林所在因回鬪見之乃負之出曾國荃奏請准其回籍養傷六年十月李鴻章奏稱山東膠萊潰防亟須選用戰將郭松林前在金陵蘇常浙閩所向克捷驍勇絕倫上年在鄂防剿以新募數千人驟擊捻衆先勝後挫非戰之罪而歷練更較深矣臣復勛以大義強起治軍應請將郭松林向所統帶之松字各營改爲武毅軍咨令接統並抽撥運防馬步湊集二十營交該提督總統馳赴前敵與劉銘傳等掎角並進上從之是時東捻任柱賴汝洸等走壽光松林要擊於杞城大破之松林與劉銘傳盡棄輜重裹糧與捻相逐捻將沿海南走阻瀾河不能遁逆酋牛喜子率白旗犯劉銘傳軍賴汝洸率藍旗犯松林軍松林與劉銘傳縱

擊軍士無不一當十擒大潰壽光民圩皆從壁上觀見官軍勝開圩助殺擒多死於瀾河浮尸二萬餘俘亦稱是任柱伏誅賴汝洸亮水南奔松林追至清江爲揚州官軍所獲東擒平賞給騎都尉世職於時西擒張總愚由秦晉乘冰渡黃河七年正月犯畿輔李鴻章調松林援剿二月敗賊於安平三月復要擊於山東在平大破之五月擒自陽信還奔海豐松林擊敗之擒出寧津吳橋間復西南馳至德州松林督軍窮追擒不得喘息諸軍會合進剿歷十六晝夜擒益不支六月大破之於沙河擒疾逃又爲官軍困於黃運徒駭河之間松林率馬隊縱橫要擊賊黨四散張總愚赴水死西擒平詔由騎都尉晉爲一等輕車都尉八年調補湖北提督九年正月李鴻章奏調援黔二月又奏調移師援陝七月隨李鴻章帥師至直隸八月回湖北提督任十年二月松林以母病請假歸省上責其不俟諭旨輒卽回籍交部議處仍予假一箇月十一年丁母憂光緒五年七月仍授湖北提督六年正月調補直隸提督四月以積勞傷發卒直隸總督李鴻章奏聞略曰郭松林初以親兵隨現任山西巡撫曾國荃攻克江西安福縣城遂以驍勇著名同治元年以遊擊投臣上海大營臣察其英果邁倫饒有膽略始令募帶松字兩營交臣

弟鶴年在前敵調遣逐漸添至八營疊克名城殲除羣醜郭松林常領一隊爲先鋒旋復航海援閩克漳州府城迨至率師北剿捻逆郭松林復統武毅軍連蹙賊於山東膠濰一帶戰無不捷東捻賴以肅清未幾而西捻犯河朔蔓延山東郭松林縱橫馳擊大小數十戰扼守運防俾捻衆不得喘息全股蕩平同治九年臣督師入陝郭松林仍以統將隨行旋任湖北提督多年頗能整頓營伍綜計郭松林在臣部下前後將近十載剿辦粵捻諸寇無役不從忠勇廉明善馭士卒戰功卓著實爲不可多得之將才本年調補直隸提督臣方倚以集事乃莅任未久贗志長暝實堪憫惻合應仰懇特恩賜諡並敕下國史館立傳其湖南原籍及江蘇福建山東立功省分建立專祠以獎忠績而昭激勸再郭松林有子郭人濟郭人鴻郭人彥年尙幼穉皆在原籍合併聲明疏入諭曰直隸提督郭松林隨曾國荃李鴻章出師江西江蘇浙江福建等省克復城池殄除羣醜旋因李鴻章督剿捻逆該提督戰無不捷東西捻股賴以肅清實屬忠勇性成功績懋著迨授任湖北提督亦能整頓營伍此次調任直隸方資鎮攝遽聞溘逝憫惜殊深郭松林著照提督例賜卹加恩予諡並將事蹟宣付史館立傳其湖南原籍江蘇福建山東立功

省分准其建立專祠靈柩回籍時地方官妥爲照料伊子郭人濟郭人鴻郭人彥俟及歲時帶領引見以彰忠績旋李鴻章奏稱郭松林之子他人開報錯誤實名郭人凱郭承舉郭人漳尋賜祭葬予諡武壯

蕭孚泗

蕭孚泗湖南湘鄉人咸豐三年侍郎曾國藩募入湘營隨諸生羅澤南轉戰江西湖北輒有功洊保守備加都司銜六年隨同知銜曾國荃帶吉字營攻克江西安福吉水萬安等縣進規吉安七年克峽江晉遊擊賞戴花翎八年曾國荃圍攻吉安賊出三大股撲孚泗營孚泗開壁奮擊斃悍匪多名餘衆披靡旋克吉安湖南巡撫駱秉章疏稱孚泗膽略素優躬親矢石敍功以參將歸部選用九年五月隨知府曾國荃等攻景德鎮進復浮梁江西全省肅清擢副將十二月楚軍圍攻太湖曾國藩分飭孚泗等駐小池驛及潛山之落溪河十年正月官軍擊援賊悉敗走太湖賊宵遁遂復其城孚泗功多賞勳勇巴圖魯名號十一年四月隨攻安慶時僞英王陳玉成築壘凌湖南北岸置划船通往來道員曾國荃豫撥水師礮船數十號越東岸入湖轟擊派孚泗等於東路橫濠倚水築新營陳逆無隙可抵亮

水遁五月孚泗等破賊北岸十三壘擒斬五千餘人南岸五壘同日拔之又會各軍分道攻城平城外各壘七月賊援復麕集築壘四十餘與城賊相接應尋撲官軍後濠築濠外月牆以避礮孚泗縱壯士數十人往毀之增新壘置礮伏精兵於濠左右以防衝突賊欲奪我新壘更番猛撲孚泗等且戰且築賊不得逞壘成賊又築壘濠湖北岸十餘座舁小艇泛湖汶齎糧入城水師副將蔡國祥截獲之賊計窮蹙八月地雷發城圯孚泗隨曾國荃整隊進遂復安慶兩江總督曾國藩上其功擢總兵加提督銜九月隨克無爲州旋授河南歸德鎮總兵仍留營剿賊同治元年布政使曾國荃循江東下孚泗充前鋒壘復安徽桐城插雍家鎮及巢縣含山和州等城賊之踞江寧也以全力扼東西梁山爲金陵鎖鑰三月孚泗等隨曾國荃攻拔西梁山四月會水師克太平蕪湖破金柱關東梁山進攻秣陵關江心洲克之乘勝偪江寧捷入命以提督記名簡放五月駐軍雨花臺僞忠王李秀成分黨來援以六萬人徑趨江心洲截我運道孚泗等截擊之九月援賊攻孚泗後營礮臺曾國荃馳救賊來愈衆相持十餘日賊地雷起糾黨千餘衝入場口孚泗力禦以火藥數十桶擲轟之賊不得入久之賊疲諸軍分路出剿孚泗暨道員

彭毓橘兩路夾擊踏平賊壘數十座追至牛首山賊遁論功賞穿黃馬褂二年四月官軍攻雨花臺孚泗與總兵李臣典夜蛇行薄石城東草填濠克之並與道員陳湜追至上方橋賊投水死者無算斬馘數千孚泗由是聲威大著曾國荃令偕陳湜總理金陵營務城東諸軍盡歸孚泗節制又進攻上方橋斷賊運道城賊糾衆悉出孚泗率馬步包鈔迫之秣陵關破十餘卡悉奪其戰具令軍士夜負薪填濠遂拔上方橋結筏渡河扼雙橋門以東連破賊隘於是七橋甕羣賊惶懼孚泗與彭毓橘扼其東走之路夜縱火拔之十月陞福建陸路提督三年三月巡撫曾國荃以江寧附城諸要隘悉爲我有惟東北鍾山賊壘未克令孚泗出鍾山北列隊太平門築三壘守之大軍圍始合賊糧路絕六月進占龍膊子山石城孚泗與李臣典卽山築礮臺距城僅十餘丈賊礮如雨軍士版築如故復積蘆葦溼草高與城齊立登堞口以薄城先於其下鑿地道埋藥六萬斤設引線於外越日火發城圯二十餘丈將士爭登賊拋火藥抵拒死者數十衆方錯愕孚泗手刃數卒士氣乃奮盡從缺口入奪朝陽洪武等門於是江寧九門皆破時李秀成走匿民舍孚泗率兵索獲並擒僞王兄洪仁達等悉寘於法紅旗報捷諭曰福建陸路提督

蕭孚泗督辦礮臺首先奪門而入並搜獲洪仁達李秀成巨逆實屬勲勞卓著著加恩錫封一等男爵並賞戴雙眼花翎是年丁父憂光緒十年卒兩江總督曾國荃疏請優卹略云孚泗起自田間深明大義從軍十餘年大小數百戰身受重傷屢瀕於危會有天幸卒成偉烈其出奇制勝暗與古合彬彬有名將風平生馭軍極嚴而寬仁有惠祿糈所入悉以犒賞戰士身無餘財人樂爲之用及大功告成以憂去職薄田數畝躬耕自給不復言昔年戰績見者不識爲立功之勲貴也疏入諭曰前福建陸路提督一等男爵蕭孚泗於咸豐三年隨同曾國藩轉戰江西湖北等省所向克捷六年以後隸曾國荃部下疊克名城勲績卓著薦擢至福建陸路提督同治三年克復江寧省城首先奪門而入搜獲李秀成等巨逆厥功尤偉蕭孚泗著照提督軍營立功後病故例議卹於江南立功地方建立專祠生平戰績宣付史館立傳加恩予諡以彰忠盡尋賜卹如例予諡壯肅子候選主事有名襲

吳全美

吳全美廣東順德人道光二十九年廣東洋面盜起全美應募爲團練勇日習水

戰冠其曹屢獲巨盜遂由議敘把總陞補海安營千總咸豐元年署龍門營都司賞戴花翎二年署水師游擊時儋州土匪劉汝楷等結黎人數千肆擾州境全美討平之斬賊首曾超於陣論功遷參將並賞加副將銜三年粵匪陷福建之廈門同安蔓及仙游莆田各縣全美應調往攻復其城陞副將並賞加總兵銜四年江寧踞賊復於瓜州倚江爲壘大修水戰之具以抗官軍全美管帶紅單船五十隻由閩赴江合力攻剿都司陳國泰爲前鋒戰不利全美遂帶船二十五隻直偪賊壘奮勇轟擊連燬金山礮臺土木皆飛賊始駭潰繼伺官軍盡駐下游密遣賊船由南岸大溜下駛潛圖東壩全美又由北岸迎擊敗之立復高淳閏七月又敗之七橋甕賊勢蹙乃立水營於九泐洲八卦洲環以木城外樹重柵阻我師船往來之路九月全美領隊直前先攻八卦洲令敢死士持炬潛自上流夜襲其柵縱火焚之因鼓譟進擊賊衆驚亂死者數百計九泐洲之賊亦望風奔潰於是兩洲皆克積功超擢浙江温州鎮總兵五年賊復於下關兩岸築礮臺鎔鐵爲巨練以鎖江面堅不可拔全美率師船由南岸揚帆上泝自七里洲河嘴斬關而入手刃守關賊數十人立斷鐵鎖衝浪直上燬逆船三百餘隻生擒僞前鋒陳長順孫元章

大中等直搗蕪湖大破賊於采石乘勝下攻金柱關賊衆愕然無敢當者遂克蕪湖賞給迅勇巴圖魯名號六年江寧大營陷上命留全美等紅單船分泊大江南北牽制賊勢十月全美移泊魯港賊知有備不敢近賞加提督銜十年署兩江總督曾國藩奏調全美率師船二百餘全數下駛分泊狼山福山焦山各地以通鎮揚且扼賊北竄之路九月全美由蕪湖赴揚且戰且行至九洲賊悉衆來拒全美奮擊沈賊船三四十隻焚燬十餘隻餘逆遁入內河十一年六月江陰常熟竄匪踞江心壽星沙多作木簾外駕槳船圖擾北岸上命全美總統水軍擊走之於是官軍日勝江寧賊勢不支恆思竄擾江北全美扼要堵截嚴密防禦遂使下河完善之區得以安堵同治三年江寧平下部優敘五月補授福建水師提督四年二月閩浙總督左宗棠奏請飭全美速帶紅單拖罈等船赴閩助剿八月馳抵廈門凡塞港守港禦礮及召募義勇稽察奸民一切機宜皆先事預籌海疆大治嗣以捐輸歷年欠餉及廉俸銀兩得旨嘉獎並加廣本省文武鄉試中額各五名五年因病陳請開缺回籍調理允之光緒六年病痊兩廣總督張樹聲廣東巡撫裕寬奏留廣東辦理海防旋署廣東水師提督統帶輪拖各船九年署瓊州鎮總兵

時法人屢以兵船往來瓊州窺探量水警報紛紜全美督水陸兵勇躬赴海口各礮臺殫心布置昕夕嚴防瓊州水土毒惡瘴癘交乘十年十月卒於防所十一年兩廣總督張之洞臚陳全美戰功事蹟以聞諭曰已故署廣東提督瓊州鎮總兵前福建水師提督吳全美於咸豐年間在福建江南等省疊著戰功嗣署廣東瓊州鎮總兵於籌防事宜亦能實力經營遽因染瘴身故殊堪憫惻著照軍營立功後積勞病故例從優議卹並將事蹟宣付史館立傳以彰勞勩尋賜祭葬十五年慈禧端佑康頤昭豫莊誠皇太后歸政追念從前功績最著諸臣各賜祭一壇全美與焉

譚上連

譚上連湖南衡陽人咸豐八年由武童投效卽選道李續宜軍營隸副將蕭慶衍部九年因解寶慶圍出力獎六品頂戴十一年三月李續宜督軍克湖北孝感五月復德安上連均先登負礮石傷擢把總並賞戴藍翎同治元年隨解安徽潁州圍並乘勝復霍邱陞千總賞加守備銜二年三月蕭慶衍會道員毛有銘軍攻無爲州草鞵嶺援賊至被圍兩軍聲息不相聞上連潛入賊中得口號徑達毛有銘

營約期夾擊賊潰走四月隨拔巢縣銅城牯超擢都司三年官軍轟塌江寧城垣上連先登負矛傷城克超遷參將並賞換花翎五年隨皖南鎮總兵劉松山進剿河南捻逆六月敗賊西華又敗之上蔡雙廟七月連捷於南陽新野擢副將六年捻逆犯陝西同州朝邑劉松山疾趨入關擊賊乾州境敗之追至同州城東北攻許家莊小濠上連先登負重創卒奪其堡同朝圍解陞總兵七年正月劉松山赴援畿南敗賊獻縣商家林又敗之深州賈家村賊走祁州追及又敗之賊圍總兵郭寶昌於博野南鄧村力戰解其圍上連皆有功賞揚勇巴圖魯名號三月追賊至河南封邱力戰被重創六月捻匪平得旨交軍機處記名無論提督總兵缺出儘先題奏並賞給正一品封典八年八月隨劉松山進剿甘肅靈州回匪拔郭家橋賊巢二十餘屢敗吳忠堡金積堡援賊九月克劉家寨西北賊壘七進薄靈州拔其外卡克之賞頭品頂戴並賞換伯奇巴圖魯名號九年八月以三品卿銜卽選道劉錦棠檄攻吳忠堡附近油坊寨拔之殲賊二百餘擒回目馬重生等伏誅十一月金積堡平賞穿黃馬褂十一年九月赴援西寧敗賊三十里鋪又敗之小峽十月賊大股復出小峽圍撲官軍新卡勢垂破上連偕提督何作霖挺矛直出

立斬悍賊三十餘始敗去府城圍解陝甘總督左宗棠奏稱上連隊伍整嚴樸實
勇敢請遇有陝甘提鎮缺出儘先題奏允之十二月劉錦棠由西寧進規大通敗
賊姑姑加莊十二年正月克向陽堡進復縣城九月移軍肅州復其城上連以功
歷保下部優敘並賞三代正一品封典駐防肅州光緒元年左宗棠以關隴肅清
再上其功下部優敘二年二月授陝西漢中鎮總兵四月總理新疆行營營務劉
錦棠督軍出關以上連爲前敵六月攻古牧地用大礮轟塌東北城垣填濠入巷
戰之賊盡殲焉烏魯木齊踞賊聞風遁捷奏賞雲騎尉世職三年自烏魯木齊踰
嶺而南乘夜銜枚疾趨達坂城環轟之賊不支開門遁官軍刀矛攢刺卒不得出
擒斬無漏網者乘勝擣托克遜城提督黃萬鵬率所部急進遇賊大隊從空莊衝
出被圍上連由左路橫衝賊陣始驚竄逐北三十餘里斬馘三百餘立復托克遜
城賞騎都尉世職六年駐防新疆瑪納斯城九年調甘肅西寧鎮總兵尋署烏魯
木齊提督十年以新疆底定六年巡防出力下部照頭等軍功優敘十五年授新
疆喀什噶爾提督十六年卒護理新疆巡撫魏光燾疏言上連忠誠幹練曉暢戎
機每戰身先士卒猝遇巨寇復好整以暇故在軍數十年未曾挫衄在喀什噶爾

提督任內選材練兵彈壓諸部尤能恩威並用中外翕然上年舊創復發猶強起巡閱各旗營以固邊防死之日案無積牘筐鮮藏金尤有足多者諭曰已故甘肅新疆喀什噶爾提督譚上連於咸豐年間投效湘軍轉戰湖北安徽江南等省驍勇善戰疊克名城嗣後隨同劉松山及劉錦棠各軍剿辦陝捻甘回並蕩平新疆各城回逆埽穴擒渠厥功尤偉譚上連著照軍營立功後積勞病故例從優議卹生平戰蹟宣付國史館立傳並准附祀陝西甘肅新疆左宗棠專祠以彰勞勩尋賜卹如例子尹鋼襲世職

陶茂林

陶茂林湖南長沙人由武童投效湘軍咸豐五年隨克江西弋陽廣信等縣保把總尋克義寧州晉千總賞戴藍翎六年隨克湖北咸寧拔金口賊巢擢守備七年隨攻江西吉安賊與哨官葉必信蕭孚泗等分路兜擊斬賊二百餘又敗之叢樹嶺及白鷺洲擊退東門援賊二千餘毀賊壘一擢都司賞換花翎八年復吉安府城陞遊擊加參將銜湖北巡撫胡林翼調茂林赴鄂管帶楚軍扼防黃州進剿安徽霍山樂兒嶺等處股匪堵舒城援賊克建德十年四月晉參將時逆首陳玉成

糾捻首龔瞎子孫葵心各悍黨竄桐城茂林會剿大捷十一月湖廣總督官文等請以副將儘先補用允之十一年攻桐城及安慶援賊五戰皆勝五月詔加總兵銜八月荊州將軍多隆阿克安慶桐城茂林偕駐防潛山營官趙克彰進攻石鎮諸賊壘軍至施家山賊擁衆五六千拒之茂林等分兩路誘敵以一軍兜襲其後賊失措遂潰擒僞丞相周汝康等官文胡林翼彙敘戰績以聞賞鋒勇巴圖魯名號同治元年三月多隆阿進規廬州檄茂林率本營及楊德峻張養吾等營列隊德勝門南門小東門總兵雷正綰等攻大東門外賊壘逆首陳玉成率悍黨出東門來援雷正綰等敗之陳逆旁遁不敢入城方是時茂林等各樹雲梯緣城而上城賊初猶死拒繼見陳逆敗走遂散亂各軍蠡擁登城克之捷入命軍機處記名遇有總兵缺出題奏五月多隆阿奉詔督辦陝西軍務以茂林從七月毫穎捻匪數萬由豫西永寧陝州併力西趨茂林固守武關閏八月多隆阿軍至茂林偕總兵譚仁芳等出關夾擊大敗之先是逆首賴汝洸等竄踞襄河池北屢爲官軍所敗至是逆首陳德才遣賊目羅正舉等接應多隆阿飭茂林選精銳分路進逼賊悉衆來拒茂林等會擊賊大潰追至李家樓殲賊三千餘名十月敘功俟補總兵

後以提督用先換頂戴二年進剿回逆解同州圍拔羌白鎮王閣村二月賞應得封典四月借補陝西興安營遊擊七月授漢中鎮總兵八月署甘肅提督時鳳翔被圍久甘回四起固原未復平涼失陷秦州西寧所屬暨蘭州附近之安定等縣復相繼煽亂多隆阿派提督雷正綰赴援飭茂林先擊鳳翔以清後路十月茂林以三千人解鳳翔圍詔授甘肅提督並飭將鳳翔附近賊壘及所屬回巢趕緊掃蕩迅赴甘省會合雷正綰之師剿辦回逆茂林遂將鳳邠各路餘匪並麻子崖陶園堡等賊壘次第平毀三年甘肅徽縣兩當髮逆出寶雞山口由郿縣欲擾盩厔茂林扼之雨門鎮二嶺關等處敗之另股由鳳縣之黃牛鋪竄郿又敗之進克汧陽復隴州餘匪西竄遂移師入甘會雷正綰等軍謀取平涼四月分道進兵陣斬著名逆首木仲沅訥三等五月克平涼賞穿黃馬褂尋率所部攻張家川賊巢後路賊負嵎死拒士卒多傷六月雷正綰赴援合擊獲勝毀田家山賊卡及張家川土城外木城七月大雨兼旬賊乘間復立木城並營田家山舊巢八月又與雷正綰以全力破之又拔龍山鎮蓮花城餘匪北竄靜寧一帶十月河州陷十一月賊擾會寧安定茂林派兵進剿解安定圍攻破會寧之孫家集白草原金縣先爲賊

陷至是亦復之時靖遠被圍茂林飭總兵高餘慶往援破惠城一帶賊卡生擒逆目黑牙古等四年正月移營喬家雪灘高餘慶戰死茂林聞警督兵疾趨靖遠拔楮栗園杜家山通糧道尋取黑城賊巢擒悍賊馬如虎等分軍剿吳家溝十五里鋪約城內紳勇夾擊之城圍遂解追殺餘匪於郭城驛殲焉三月移剿新城堡及會寧進擊王家集踞匪忽部下五營以索餉潰走賊乘虛圍撲又陷其六營茂林令總兵陶世貴等突圍調後路四營來援自率殘兵奮擊而出遂退駐安定五月丁父憂諭曰陶茂林著改爲署任賞銀三百兩治喪卽由甘肅藩庫撥給其營內潰勇竄逃何處著設法招集並飛檄各路軍營及沿途州縣一體遏截勿任滋擾其見存各營務當妥籌鎮壓以固軍心毋再稍涉疏懈是月陝西巡撫劉蓉疏陳甘省軍營積弊劾茂林貪劣狀茂林亦以兵潰自請治罪上命甘肅總督楊岳斌確查具奏八月茂林營勇又潰九月諭楊岳斌迅將該營潰變之由及陶茂林統率不善之處據實參辦尋覆疏言茂林所欠該營口糧實由餉絀所致尙無不合其移紮安定時茂字五營及圍隊右營因索餉所獲無多藉詞侵蝕相率譁散該提督經過地方收受陋規州縣官往往執贄門下其心跡貪污已可概見至收納

回女一節該營女眷甚多是回是漢實難明悉惟該提督於上年赴援靖遠一聞眷屬行抵蘭州輒自回省垣至本年正月始行出省該營勇丁紮營地方搶掠淫虐不堪言狀奏入諭曰陶茂林以專閫大員輒敢廢法營私以致所部兵勇到處滋擾始而潰逃繼而叛亂實屬咎無可辭著卽行革職以示懲儆遂回籍十年貴州軍務方亟巡撫曾璧光提督周達武合詞奏調茂林赴黔協剿從之十二年以收復新城殄除首要各逆得旨開復原官免繳捐復銀兩並賞還翎支黃馬褂勇號尋兵部議以所犯情節較重奏寢之嗣以剿辦安順府屬扁擔山等處伏莽擒渠埽穴一律肅清又以十三年攻剿古州丹江叛苗斬擒首要經曾璧光一再奏保下部議准其開復原官仍完繳捐復銀兩光緒元年收復下江永從廳縣各城二年攻剿六峒賊巢搜擒著名首逆得旨賞加頭品頂戴並換愛星阿巴圖魯名號九年巡撫林肇元奏派統帶練軍並會同地方官勸化苗民改裝事宜十六年署古州鎮總兵九月卒於任

方耀

方耀廣東普寧人咸豐元年由軍功帶勇剿高廉各匪獎給六品頂戴三年五月

剿化州官橋石角土匪及挪霧太平各墟股匪擒首逆朱十四以外委儘先拔補賞戴藍翎九月調赴信宜合江墟剿賊陣獲逆酋鄧應駒解散脅從多人十二月補興寧營外委旋因攻破思迴思旺各賊巢轉戰八閱月所向有功以把總儘先拔補並以千總記名賞五品頂戴六年逆匪梁培友踞廣西潯州復分屯大黃江墟耀隨營進剿先後三十餘戰擒斬甚多四月赴四會塔壘江谷剿捕七月助剿潯州竄匪斃賊百餘七年賊擾清遠耀疾驅解其圍復回防省垣四月遷連平營中村汛把總六月調剿朱子儀股匪毀禾雲賊巢八年二月攻拔朱坑禾洞石馬江谷各村墟並解廣寧城圍五月解德慶州圍拔古樓莫村七月截擊連州竄匪平跌馬橋流沙墟賊巢擢潮州鎮左營千總留軍陽山八月署南雄協中軍都司九年九月兩廣總督黃宗漢疏保廣東文武賢員稱耀謀勇爲諸軍冠並敘連陽肅清功得旨免補守備以都司補用賞換花翎給展勇巴圖魯名號十月逆匪陳四虎侵及廣寧兇鋒四應耀取道浚洸由英德之大灣麻埠與水師並進抵三峽青蓮擊沈賊船水路始通進解陽山之圍而婆逕黃陂各踞逆遂皆膽落耀悉擊走之十年六月總督勞崇光彙敘耀功請以遊擊儘先補用先換頂戴允之嗣賊

竄韶州白土墟耀進軍截殺疊破逕頭賊巢七月克復仁化簡精銳兼程解南雄州之圍勞崇光倚耀破賊飭將潮普飛虎德義彰信四軍皆歸統帶檄赴江西信豐等縣躡蹤追捕十月解安遠圍晉參將十二月復平遠十一年三月督師越境克福建武平永定兩城時僞興王陳金缸竄陷信宜旁擾茂名陽春化州電白各州縣屢撲高州府城六月耀馳剿先破西山大嶺各賊巢復於將軍村車頭等處與賊鏖戰毀芝蔴嶺賊壘十餘座進攻塘角深塘等隘均獲勝十一月潛師夜破崩山頭賊壘身受礮子三裹創血戰俘馘千計同治元年六月補瓊州鎮右營都司仍留帶勇十一月署三江協副將駐軍高州二年秋肇羅逆勢蔓延加以客匪勾結奔突披猖衆十餘萬耀與副將卓興以所部八千人兩路進擊擒匪首高柱國麥主政等斬首三千餘級連破南山白花塘各賊巢收復二十餘鄉進拔嵩坡石骨龍頭垌堅壘並焚賊所屯糧軍威大振匪黨鄭金遂密約劉超襲殺陳金缸率衆來歸立復信宜縣城其大林東岸及化州之石紅堡西寧之挑埠等處餘黨皆薙髮投誠陳逆踞信宜三年蹂躪數百里一日授首廣西岑溪縣同時並復遐邇壯之嗣鄭金更名紹忠隨耀建功卒得其力總督勞崇光毛鴻賓等先後上其

功詔俟補缺後以副將陞用先換頂戴復奉旨遇有廣東副將缺出儘先補用並加總兵銜三年二月赴平遠之八尺墟防剿尋以縣城失守耀進兵遲誤暫行革職時逆酋丁太陽等分黨踞武平縣及武平所新城耀由平遠節節進偪駐軍武平之牧中嶺賊大股來撲奮力擊退之十月分派方勳方敖等率兵四路設伏以數百人薄城河誘敵賊果磨至佯敗將至嶺腳伏兵三路包鈔耀分兵繞賊後夾攻之斬賊目五槍斃千餘生擒數十名餘匪走鄭家坪是晚耀下令齊隊自領輕銳徑斫賊營焚其更樓營壘賊驚棄巢遁城賊潰遂克武平所新城翌日克武平縣丁逆等踞永定負固不下耀進兵上杭之蚌蛇渡再進恩全覓敢死士入城訶賊情離間之偵賊將赴金砂鄉預伏以待賊至遇伏反奔追襲之盡平城外礮樓土壘附城鑊子嶺鳴岐山皆據形勝可俯瞰城中因移營山脊日夜遙擊賊屍山積逆黨亦自相驚疑夜開東門遁龍巖耀等追至雷塘而還事平毛鴻賓檄耀由上杭進亟清濯龍田下官莊之匪以固嘉應藩籬四年正月詔開復暫行革職處分二月截竄匪於白沙碣石勝之僞康王汪海洋竄偪大埔耀移軍扼守屢擊卻之追至永定之陳東坑降賊目郭雄才高得順等總督瑞麟疏敘耀功請交軍機

處記名遇有總兵缺出請旨簡放從之閏五月與鄭紹忠會合閩軍克福建平和詔安賞加提督銜八月再會閩軍克長樂拔鎮平令都司方鼇等襲燒黃河坑賊糧耀率隊夜抵魚墩燬其二營殪賊日劉天保張人桂再戰於慈溪賊奔柯圩耀躡剿屢捷卒以餘匪闖入和平未克兼顧撤銷提督銜暫行褫職既而耀攻毀上下坪賊壘招撫僞將黃標等復嘉應州城閩浙總督左宗棠疏陳戰狀詔開復七年三月署南韶連鎮總兵旋調署潮州鎮總兵八月授南韶連鎮總兵十月查辦陸豐縣鬪案嗣以甄敘前勞賞三代一品封典潮屬風氣强悍搶擄械鬪習以爲常甚至負嵎築寨拒兵抗糧良民脅於兇燄莫可如何耀以爲不除積匪其患不息而發兵剿辦則元氣傷而患更大乃剏爲選舉清鄉法擇豪族正人爲鄉約正副任以稽查分別良莠准予自新以爲綱領先辦陸豐縣鬪案明正其罪潮人始稍知官法其拜會戕官之陳獨日恃險拒兵之謝奉漳等俱次第就擒治如律訪獲悍匪無算清查強占民田悉歸本戶仍會同文武句稽積欠錢糧使民自完從前占久未經升科之沙田至是皆丈量輸賦潮關稅額亦歲增鉅萬剏設書院義舉風氣一新潮人頌之總督瑞麟疏請獎勵得旨交軍機處記名遇有提督缺出

題奏嗣復賞穿黃馬褂光緒三年調署廣東陸路提督五年籌辦潮州南澳碣石等處防務復回潮州鎮總兵任九年法越構兵兩廣總督曾國荃令耀募勇赴欽州督防九月詔以耀素頗勇往著調回省時海防甚亟總督張之洞稱耀勇略兼優威望夙著奏充海防全軍翼長署廣東水師提督十年歸善會匪起耀往平之回駐虎門與督撫諸臣籌畫布置並飭潮普五營往援福建十一年詔實授十三年入覲十六年恭遇上二旬慶典賜耀母林氏御書扁額玉如意袍褂料十七年總督李瀚章巡撫劉瑞芬等疏報耀母林氏年逾八旬親見七代五世同堂奉旨旌表六月卒於行營李瀚章疏陳耀戰蹟略曰耀當咸豐初元粵逆倡亂粵東盜賊乘機並起耀隨其父方原集勇投效忍飢誓師裹創力戰解各州縣城圍所向無敵前督臣黃宗漢疏保文武賢員極稱潮普營自此得名嗣由廣東轉戰江西福建等省大小數百戰克復十餘城同治初土客滋事巨逆陳金缸占踞高州各處耀率兵剿擒首逆旋赴福建上杭截剿白沙碣石逆匪勝之逆由間道敗竄耀迴軍扼守大埔遇僞侍王李世賢大股於五道廟以少擊衆血戰三晝夜降其悍黨賊遂遁沿途州縣得以不遭蹂躪每戰必救出難民多人隨時資遣與客軍共

事推功讓能不自矜伐故能敵愾同仇肅清全境自署潮州鎮總兵勦爲選舉清鄉之法潮州患水則設法疏禦以保農田惠州被災則出資平糶以活飢民至今猶稱頌弗衰平生戰蹟皆有奏報可憑獨其查辦匪鄉精心規畫使多年貌法之區不敢終同於化外各屬豪強之族不敢相率而效尤實爲全粵治亂之關有功於大局者甚鉅粵中士庶倚若長城故提臣束髮從戎與軍務相終始感激圖報出於血誠疏入諭曰已故廣東水師提督方耀於咸豐初年募勇剿匪疊解城圍嗣由廣東轉戰廣西江西福建等省克復名城殲除巨逆同治年間於署潮州鎮總兵任內勦爲選舉清鄉之法除莠安良並籌辦一切善舉兩任水師提督捕獲要匪保全地方遽以猝疾歿於營次深堪軫惜加恩著照提督軍營立功後積勞病故例從優議卹平生事蹟宣付國史館立傳子方廷珍著俟及歲時交兵部帶領引見以彰勞勩尋賜祭葬

孫開華

孫開華湖南慈利人咸豐六年由武童投入霆軍隨同參將鮑超征剿髮逆擊賊於九江北岸之小池口生擒賊目直擣其巢攻之未克傷右臂七年三月隨鮑超

擊賊於嚴家壩斃賊甚多復傷左足皖賊分竄湖北之黃梅踞大河鋪爲巢穴開華擊之於大河鋪渡河橋皆捷復隨鮑超進攻黃蠟山等處賊巢大敗之給六品軍功復進軍安徽宿松扼守二郎河十一月破賊於楓香驛八年二月隨鮑超赴援湖北馳至麻城賊遁日夜窮追矛傷左膝七月回軍宿松追剿太湖逆匪八月敗賊於花涼亭敘功以千總儘先補用並賞戴藍翎時逆首陳玉成糾捻首龔瞎子等聚於潛山之地靈港開華管帶霆新中營中哨隨同鮑超會諸軍進剿至小池驛霆軍被圍以孤軍力抗十倍之賊士卒傷痍開華志氣彌奮自誓不退一步不棄一壘適道員唐訓方等來援遂定內外夾攻之計十年正月大敗之擒斬僞職崇天富藍承宣等署湖北巡撫胡林翼以開華剿賊有功奏保以守備儘先補用並賞換花翎從之是年四月管帶霆新中營九月進攻休寧官軍擊敗徽州援賊開華會同各營乘勝攻之城賊出戰斬馘殆盡隨鮑超赴援江西景德鎮比至賊已退踞鄱建交界之石門洋塘等處與官軍相持謝家灘黃麥埔之捷開華血戰擒斬尤多欽差大臣曾國藩上其功奉旨以都司儘先補用十一年隨剿陳玉成於安慶集賢關玉成先遁留四壘於關外赤岡嶺以梗我師官軍晝夜環攻降

其三壘追殺至馬踏石河餘黨悉數就獲六月隨鮑超剿僞忠王李秀成於江西敗豐城白馬寨等處之賊解撫州圍攻破雙港湖坊河口賊壘克復鉛山縣城解廣信城圍曾國藩以開華督兵助剿疊克堅巢請免補都司以遊擊儘先補用並加參將銜允之旋隨鮑超進援安徽青陽克之開華帶傷追賊以數百人殲賊萬餘又攻取石埭甘棠鎮太平涇縣四月進攻寧國平毀寒亭管家橋梅家店獅子山賊壘又破之於望城岡抱龍岡安宜口碑林岡敬亭山夏家渡石橋諸處隨復府城以功免補遊擊參將以副將儘先補用自寧國克復後餘賊勾結花旗廣匪進逼涇縣開華隨鮑超馳援擊破之乘勝戰於黃村大坑殲賊甚衆同治二年三月逆首李秀成糾衆數萬兩次圍廬州開華奉調往剿比至圍立解追擊至和州與水師環壘急攻城遂下奉旨以副將先行拔補九月進剿建平之賊旋又奉調援江蘇句容戰於塔岡破賊方海宗等進逼城下四鼓克之逆黨項大英方成宗伏誅方海宗遁至寶堰與賊袁得厚合謀阻我進兵之路官軍摩壘而攻悉平之又敗賊於茅山克復金壇是役也開華督軍鏖戰擒斬最多奉旨加總兵銜並賞給擢勇巴圖魯名號嗣因江浙逆匪先後竄入江西大股盤踞許灣意在圖撫州

另股盤踞金溪意在圖建昌其瀘溪東鄉新城南豐宜黃崇仁等縣均爲賊踞三年四月鮑超援剿開華率所部爲前敵馳抵撫州七月開華以計攻破雙鳳嶺許灣一帶賊壘進攻金溪毀北門外賊壘城賊出援卽乘虛由東門斬關而入以次收復南豐新城賊敗竄瑞金合丁太陽李世賢諸匪衆號十餘萬分擾寧都開華率所部先敗之後軍繼至遂解寧都之圍九月鮑超檄開華統帶霆副五營追賊至瑞金克其城又追至閩界剿撫兼施江西肅清得旨交軍機處記名遇有總兵缺出請旨簡放並加提督銜賞一品封典四年十一月開華率師進剿廣東嘉應州踞逆馳抵相公亭賊逆戰擊之追至城下而返斃賊四千生擒老賊二百遂與大軍合圍追賊於黃沙障擒斬二萬餘誅其酋何天亮丁德泰等開華功尤著奉旨遇有提督總兵缺出請旨簡放五年五月補授福建漳州鎮總兵仍督軍隨同鮑超赴河南剿辦擒匪賴汝洸等開華追賊至湖北安陸之永樂河楊家泮拖船埠疊有斬獲又追擊於多寶灣豐樂河豫鄂邊界漸次肅清九月赴漳州任鎮兵多新募開華訓練逾月始有紀律九年閩浙總督文煜巡撫王凱泰以開華久歷戎行熟習戰陣奏統省標八營藉資訓練十一年復奏保開華年力正壯遇事勇

往堪勝專闕之任十二年五月統帶擢勝全軍辦理廈門海防解嚴後赴臺北蘇澳地方辦理開山事務並署理福建陸路提督光緒二年十二月巡撫丁日昌以臺灣防剿生番地廣兵單宜遴選威望素著之員統領鎮攝因奏委開華督率所部帶印東渡駐紮雞籠淡水等處以顧北路時後山阿綿訥訥等社生番叛服無常三年十月與臺灣鎮總兵吳光亮會籌剿辦進抵成廣澳詳求地勢密查番情進紮水母丁突有悍番千餘名分路迎拒開華揮軍鏖戰陣斬紅衣番目數名餘番敗向高崦深箐而逸官軍由海畔捷徑緣磴攀崖直攻其巢該番拌力死鬪官軍奪其險要追擊至訥訥社外皆破之潰番竄併阿綿其地港深流急峭壁懸崖且又徧築礮臺較訥訥社拒守尤力開華令礮隊連環轟擊益以火箭又繞出其後番衆驚亂遂克阿綿開華以巢穴雖傾渠魁未獲因駐師訥訥旋擒獲首惡馬腰兵猛益裏夏加早卓律等自此大小番社皆向化矣開華以剿番有功賞穿黃馬褂四年六月加禮宛番蠢動於新城花連港官軍失利七月開華督軍親赴新城進紮花連港巾老耶社與加禮宛社勢相犄角欲攻加禮宛必先攻拔巾老耶開華出隊進攻加禮宛番目大肥宛收率衆來援官軍擊敗之先破巾老耶社卽

進軍攻加禮宛該番棄社而遁結壘社後官軍追殺立將該社平毀並破其壘斬
馘甚多奏聞諭曰孫開華等帶兵進剿巾老耶加禮宛番社均經次第攻破陣斬
番目殲除悍番多名辦理尙爲迅速所有在逃餘衆著該提督察看情形分別搜
除招撫該番衆果能悔罪自投卽著妥爲安插撫綏使之復業開華旋將番日姑
乳斗玩等搜獲正法餘俱就撫閩浙總督何璟以開華豐克堅巢連戰皆捷懇恩
破格獎敘以勵戎行報聞五年二月署福建陸路提督八月以海防緊要復督軍
渡臺七年十一月撤防入覲九年八月回任旋統率擢勝三營帶印渡臺辦理臺
北防務十年六月法船攻犯雞籠礮臺八月法船八艘聚泊滬尾港外開華督令
開礮先攻敵亦開礮相擊明日法兵千餘上岸猛撲開華督軍迎擊血戰半日短
兵相接斃其悍酋手然巨礮沈其鐵艦敵勢不支遂潰退奏聞賞騎都尉世職及
白玉翎管白玉搬指白玉柄小刀火鏢大小荷包各件十二年和局成復回提督
署任旋補授福建陸路提督十五年慈禧端佑康頤昭豫莊誠皇太后歸政恩詔
加級十六年入覲恭逢皇上二旬萬壽頒賞珍物予加級十月回任十七年德化
匪首陳拱陳衆聚衆焚燬鹽釐各局豎旗謀叛開華督兵剿平之解散脅從惟逆

首陳拱等未獲自請議處部議降一級調用十八年正月以逆首陳衆就擒奉旨改爲降二級留任七月以副將余宏亮所部弁勇滋擾開華失於覺察部議降三級調用不准抵銷開華先於六月已擒斬陳拱奉旨改爲革職留任十九年八月卒於任閩浙總督譚鍾麟奏聞諭曰譚鍾麟奏提督因病出缺請旨優卹一摺福建陸路提督孫開華由武童投效鮑超軍營轉戰湖北江西安徽河南等省衝鋒陷陣身受多傷進剿廣東嘉應州剿平粵逆戰功卓著同治五年補授福建漳州鎮總兵兩次渡臺剿撫番社辦理海防幫辦臺灣軍務尤著勳勞旋簡補福建陸路提督整頓營伍綏靖地方諸臻妥協茲聞溘逝軫惜殊深孫開華著照提督軍營病故例從優議卹任內一切處分悉予開復加恩予諡原籍及立功省分准其建立專祠並將戰功事蹟宣付國史館立傳以彰勞勩尋賜祭葬予諡壯武子道仁三品銜福建補用道

黃翼升

黃翼升湖南長沙人少孤育於鄧氏因以爲姓長由行伍隸協標咸豐元年從征廣西粵匪之陷江寧也詔湖南在籍禮部侍郎曾國藩治鄉兵曾國藩創設水師

調翼升來營四年逆黨由長江上踞岳州襲湘潭翼升隨守備楊載福馳救連戰皆捷復其城拔補把總充水師右營哨官六月隨楊載福進攻岳州伏舟君山雷公湖遣疑兵誘賊出戰伏兵起併擊之賊宵遁遂入岳州七月賊由城陵磯來犯官軍分五隊迎擊翼升由湖東擊賊走之再敗之道林磯羅山等處以功敘千總並賞戴藍翎是月杪賊再犯岳州提督塔齊布等率陸軍戰城下曾國藩以賊勢全注陸軍飭楊載福率翼升等以水軍助剿至城陵磯遇賊船十餘艘往來馳突冀以虛聲阻遏官軍翼升燭其奸如牆而進追至擂鼓臺荆河腦等處伏賊從道林白螺等磯擁出翼升用小船當先大呼奮擊餘船繼駛賊大潰紛紛投江死閏七月隨楊載福搜剿支河餘匪燬賊船殆盡八月偵賊金口下游至鹽關賊船圍擊力戰卻之積功以守備歸湖南補用並賞換花翎時湖北武昌漢陽並陷於賊金口入漢之路東岸花園西岸蝦蟆磯賊於其間環築營壘護以礮船曾國藩定水陸三路進攻之策是月翼升隨楊載福合諸軍轉戰而前縱火焚燒鹽關賊船二百餘艘復進攻西岸會我兩岸陸軍已大敗賊水陸夾擊盡轟燬沿江木柵並破漢關白沙洲金沙洲各賊營翼日復戰隨楊載福等直下塘角賊礮子雨下翼

升挺立迎擊賊不支揚帆下竄追至青山盡焚賊輜重回軍入漢又盡焚口內之船兩岸火光上薄賊膽落夜遁遂同日克復武漢兩城並搜剿襄河內賊舟悉燔之九月曾國藩進攻蘄州翼升與諸軍駕舢板自蒜花墩出戰大敗賊酋白人虎等焚其艘百餘曾國藩上其功得旨晉都司十月賊於田家鎮之半壁山置橫江鐵鎖四衛以木簾徧列槍礮簾內分泊賊船無數水師分四隊擊之斷其鐵鎖翼升與諸軍駛舟驟下縱火反燒遂拔田家鎮進復蘄州拔充本營營官曾國藩移師規江西九江議先破湖口進搜內湖以斷九江之援十一月翼升與諸軍駕舢板進攻賊以油葦小船縱火翼升等衝突於烈燄中燬賊船十餘艘旋潛師斷其簾上鐵鎖箴纜衝而入賊所掠江西之船燔燒略盡賊瞰翼升舟入內湖復堵隘口以斷官軍出路又冒官軍謀夜襲營翼升擊走之追至湖口復回泊姑塘偵聞都昌賊擄有大小船艘停泊縣河乃會諸軍進攻侵晨煙霧迷漫乘賊未覺驟掩之賊棄船奔縣城翼升還過雞公湖見小划三百餘慮爲賊有悉燬之曾國藩以內湖水師與外江阻絕無大船以資棲止備食具又慮春夏水漲舢板不能壓浪乃撥江省長龍快蟹並設局添造巨艦歸蕭捷三暨翼升等分統之各成一軍五

年四月會國藩進駐南康飭翼升爲前隊進泊青山爲會攻湖口計五月追賊至鞋山燬賊舟奪回前失坐船並賊目長龍花船及小划數艘大礮十八尊七月賊由鞋山分路來犯翼升與諸軍併擊再敗之乃會陸軍輪攻湖口蕭捷三首先陷陣翼升繼之捷三中礮亡翼升大憤衝入賊卡賊潰盡燬下鍾巖賊船夜出奇兵數驚賊賊乃懼不敢出尋錄水師屢捷功詔以遊擊儘先選用九月賊上竄至姑塘翼升追剿至鞋山十月乃約諸軍進泊其島以扼賊吭十二月賊復竄姑塘翼升與陳炳元等誘卻之六年賊大股犯撫州南昌告急會國藩檄翼升退泊吳城鎮以衛省城翼升至吳城湖口賊尾追而上分泊老爺廟渚磯等處與德安建昌土匪相聯絡伺隙思逞三月突至吳城後河翼升飭所部由前河包鈔賊船而以其半赴後河攻陸賊賊船見官軍至卽遁渚磯而陸賊仰攻不下翼升乃督水勇登岸衝擊斃老賊十餘名賊乃潰越日陸賊復由涂家埠來犯時道員彭玉麟甫至軍飭翼升率舢板敗賊於前河上游彭玉麟以吳城水師之患不在湖口之水賊而在德安建昌之陸賊與其日夜防堵不如先行往剿乃商令翼升專攻陸賊翼升至涂家埠燬浮橋二船百餘賊大挫援賊至又敗之五月賊冒民船來犯翼

升合軍圍擊勝之追至德安河口乃還自水師退泊吳城賊竄踞南康不時上犯彭玉麟以爲此賊不除終爲隱患飭翼升與諸軍進剿焚賊船六直抵城下賊嬰城拒守翼升仰攻焚賊船材之在沿岸者賊見城外火起開東門遁七年二月曾國藩以親喪回籍外江內湖水師以楊載福領之彭玉麟協理翼升所部右營仍泊內湖尋授直隸提標左營遊擊八月楊載福下小池口進圍九江與內湖水師並規湖口九月李續賓楊載福彭玉麟定議夾擊飭翼升攻其西羅勝發等攻其東羅勝發戰沒翼升轉鬪而前楊載福更遣萬化林助之盡燬梅家洲賊船東岸諸軍亦斷湖口鐵鍊遂復湖口破梅家洲僞城外江內湖水師至此乃得復合越日翼升又糾合諸軍進奪彭澤縣賊船破小姑山賊卡江而肅清湖廣總督官文等奏獎得旨著免補參將以副將儘先選用時安徽安慶援賊陳玉成糾僞丞相曾逆駛船數百分泊馬當峽華陽鎮等處翼升隨楊載福轟燬之乘勝復東流疾趨安慶破西門外鹽河口及對岸賊壘連破樅陽大通各壘克銅陵至舊縣峽與江南軍紅單船會駐軍守湖口林逆啟榮竊踞九江十年矣湖口旣復南岸肅清翼升乃與諸軍進駐江之北岸以遏賊援長圍遂合八年春水陸諸軍晝夜環攻

賊死拒不卽下四月李續宜穴地道轟城翼升於北門外助戰陸軍從城缺衝入乃克之官文等以捷聞得旨加總兵銜九月補河間協副將九年七月曾國藩爲翼升奏請歸宗乃復姓黃九月池州賊韋志俊反正彭玉麟飭翼升赴池州受其降賊酋古隆賢等糾楊輔清大股來撲翼升擊卻之旋以奸人內應復陷於賊十年曾國藩奏言淮揚宜設水師以保鹽場而遏賊氛詔曾國藩於所部將領中簡其才略素著謀勇兼全者酌保數員時翼升方合圍安慶曾國藩以翼升有爲之材必能練河標爲勁旅卽以翼升與福建延建邵道李鴻章應命並懇恩簡授翼升總兵以保要區得旨許翼升先赴淮揚管帶戰船尋授江南淮揚鎮總兵十一年四月安慶援賊陳玉成旣遁城賊恃有所築菱湖堅壘十三座築南岸堅壘五座死守翼升與諸軍力攻悉破之復梭巡江面斷賊接濟賊益困八月遂克之以功賞給剛勇巴圖魯名號於是翼升欲統所部淮揚軍往援蘇常以望江銅陵旣克復陷道阻不能進乃與王明山等進圖沿江各府縣督所部鄧萬林王東華蔡東祥等並載陸師東下與王明山連克安徽池州銅陵九月與記名按察使曾國荃復無爲乃進攻運漕鎮鎮外濱大江內通巢湖賊踞之以接濟江寧安慶者也

翼升奮擊賊稍卻諸軍乘之焚賊艘賊遁入銅陵插越日又與陳湜進攻東關亦
卽克之曾國藩奏請獎敘賞加提督銜旋奉檄協陸軍守無爲同治元年三月翼
升遣所部王東華蔡東祥等疊克巢含和三城及西梁山各隘而金柱關一隘以
東梁山賊援迄不能下四月曾國藩檄翼升進駐裕溪口彭玉麟飭李朝斌等攻
上游翼升等遏下游賊爲水師所牽制不暇內顧曾國藩遂襲克太平翼升進攻
金柱關輦礮登岸環僞城而轟賊死拒矢石交下至夜翼升束草爲炬指麾督戰
飭所部歐陽利見等蛇行越溝以火箭射西門樓賊衝突出而翼升麾水師躍登
岸短兵接刺遂克金柱關襲東梁山一鼓下之乃移師攻蕪湖時賊目陳星斗等
與曾貞幹有約兵至當內應適翼升飛檄而至萬礮齊轟羣賊內亂棄壘狂奔立
克其城又擊賊清水河俘馘以千計曾國藩奏言太平府屬莫要於蕪城尤莫重
於金柱關一隘自攻奪此關未逾三日上下名城悉爲我有從此全局一振金陵
有可乘之機懇予優敘得旨黃翼升著交軍機處記名遇有提督缺出請旨簡放
五月水陸軍疊克秣陵關江心洲等隘翼升下駛近九洑洲與賊血戰遂踰金陵
與諸軍援蘇常旋以江南水師提督曾秉忠挫敗褫職詔曾國藩派員接署曾國

藩以江南營務廢弛須久歷戎行威望素著者方足以資整頓卽請以翼升代上許之於是松江上海各軍悉歸節制六月與李鴻章行抵松江由泖湖澱山湖進駐蘇州之周莊鎮賊踞橋爲卡翼升督王東華等破之並夾擊賊之登岸者時翼升部十營二百艘二營留駐浦口四營留駐揚州所帶止四營八十艘李鴻章因遣翼升復回上海製造舢板飛划諸船七月李鴻章克青浦翼升移軍守之逆酋譚紹洸踞浙之湖州欲回援江寧聞青浦已爲官軍所克乃合嘉湖蘇崑之衆圖窺上海先後撲青浦西門及北簞山翼升與陸軍台擊屢敗之賊不得逞遂繞犯北新涇大營八月李鴻章督諸軍解圍賊走吳淞北岸翼升聞警駛往相持至夜半燬賊營七又飭王東華敗賊於湖澱之石人廟閏八月賊復築壘於湖西之蘆墟鎮復遣張元隆燬之九月李鴻章克嘉定譚紹洸糾蘇杭嘉興之賊分道來犯而青浦西北之賊益蔓延擾及張堰翼升督王東華等分隊往援且戰且進至白鶴江賊死守乃毀賊橋而還翼升以賊衆我寡更調揚州各營會剿李鴻章攻賊黃渡約翼升並進翼升由趙屯橋截擊追至三江口轟斃無數毀其沿岸橋壘殆盡滬防肅清十月督諸軍剿賊蘆墟鎮尤家莊汾湖三官塘盡毀其卡進距蘇州

三十里越日復回軍下田廟洪家灘進至窯街距嘉善數里十一月常熟踞賊駱國忠等以城降賊酋譚紹洸糾衆來爭陷福山侵常熟翼升與常勝等軍往援至福山燬賊岸卡二進攻河西白茅徐六涇各口日有斬擒二年正月翼升於福山上游之西洋港會陸營連破賊壘並壘卻悍賊之犯我軍者當是時賊攻常熟益急李鴻章議先破福山以解常熟圍二月翼升遣王東華等四面列隊並設伏於西山之內常勝軍以大礮轟城謝家橋等處賊衆來援翼升分路搏戰賊披靡遂復福山石城駱國忠等見福山火起由常熟西門殺出圍乃解李鴻章奏言翼升自去夏督師來滬無戰不與實屬忠勤耐勞懇請給予優獎得旨遇有提督缺出儘先題奏四月與劉銘傳進攻揚舍汛汛爲江邊著名險要賊衆死守以蔽江陰翼升沿江兜剿賊衆分黨來援輒擊走之閱七日遂克其城擒斬首逆趙尙林等多名翼升乃與諸軍進圖江陰賊黨援江陰者自顧山至無錫連營數十里尋定議以劉銘傳攻北溇爲左路總兵滕嗣武等攻麥市橋爲中路郭松林等攻南溇爲右路翼升督水師各營分助之時蠡口有賊甚衆翼升慮其由水路內犯先遣鄧長里等破之移堵羊尖湖各隘復令張桂芳等往謝家橋排列船艘遙爲聲援

而自移營右路南抵陳市賊以礮船相拒翼升立毀其四軍威大振劉銘傳等軍遂大敗賊時仲夏酷暑翼升與李鴻章謀約劉銘傳等於月出時劫賊營鼓譟而進破賊壘八十餘天明江陰無錫賊合隊來援復擊卻之顧山以西肅清六月賊再犯揚舍汛擾至長涇翼升迎擊賊卒不得逞七月賊酋陳坤書糾衆援江陰翼升進扼江干誘賊出戰與郭松林劉銘傳夾擊殲賊無數乘勝盡破極西山邊賊營八月克江陰李鴻章奏稱翼升踴躍衝鋒堅忍效命厥功甚偉得旨賞穿黃馬褂李鴻章尋移勝兵規無錫翼升檄礮船護之賊目李秀成糾衆撲大橋角營翼升率洋槍隊橫截賊船俘賊二百餘九月合諸軍攻蘇州擒逆酋萬國鎮燬其壘先是苗沛霖既降復叛唐訓方以淮揚無水師奏調翼升會剿上諭李鴻章於黃翼升所部半留防滬半令翼升統赴臨淮曾國藩亦以淮揚爲翼升職守疊催進剿及是李鴻章以蘇松之戰多仗水師奏言蘇州無錫克在旦夕應請暫留翼升俟克復二城後再行馳赴臨淮允之時賊勢漸促於蘇州婁齊葑盤四門憑河築壘悉精銳爲負嵎計十月記名提督程學啟偕常勝軍破婁門石壘翼升乘勢蹙齊門賊營賊潰入城城外賊壘悉平諸軍乃進薄城下分攻四門翼升督水軍牽

制閫門截賊竄路賊愈促賊目郜雲官等遂殺譚紹洸以降其餘黨奔出者截殺無算遂復蘇州李鴻章以翼升謀勇兼全蘇州之克厥功爲最上聞賞雲騎尉世職並下部從優議敘十一月再克無錫十二月分帶所部五營赴臨淮旋因苗沛霖走死餘黨瓦解諭令仍回江蘇三年二月陳坤書復糾衆分犯江陰無錫常熟等城蘇州以西大震旣而江陰無錫賊爲官軍所敗乃並犯常熟翼升回自江北卽由白茅口馳入會副將鄭國魁李紹慶等軍出東北門與郭松林援軍合擊敗之並克王莊顧山陳市各賊壘賊復由大河回撲又遣水師截擊之城圍乃解更遣王東華等協攻常州屢戰皆捷四月常州亦復捷入詔再下部從優議敘旋授江南水師提督曾國藩以江南無水師提督之缺奏言江南全省額設提督一員兼轄水陸別無水師提督員額臣曾有添設長江水師提督之請此次所授翼升江南水師提督當係長江新設之缺應請敕部鑄新印以昭信守得旨允行時江蘇全境皆平楊岳斌有督師江西皖南之命所部外江各軍曾國藩卽調翼升統之五月抵安慶與曾國藩妥商防務旋會圍江寧六月翼升督許雲發等攻奪中關攔江磯石壘乘勝急攻濱江之賊江寧克復捷書馳上詔普行賞賚加恩給翼

升一等輕車都尉世職四年二月擒匪渡運河趨山東郟城侵及江蘇贛榆岌岌有南下之勢時徐州水陸軍已撤上命翼升帶礮船百餘艘赴清江浦駐防會賊勢日迫詔速其行四月翼升至清江浦賊爲官軍所敗回竄郟城翼升卽移駐邳宿之間與諸軍策應旣而科爾沁親王僧格林沁遇害五月擒逆張總愚糾合逆黨任柱牛老洪賴汝洸等攻撲雉河安徽巡撫英翰請援閩五月曾國藩檄翼升由高良澗進洪澤湖以達臨淮翼升駛往將近雉河會援軍四集團亦解五年四月擒逆復竄徐州南伺清江李鴻章商令翼升布置水路翼升至浦會賊竄泗州署兩江總督吳棠復商令翼升撥礮船協防以固門戶翼升尋由運溯淮周歷濟寧臨淮等處分布扼堵八月擒賊破汴南衛河隄悉衆東竄上命李鴻章駐防徐州曾國藩因檄翼升回駐江寧以資鎮撫六年西擒由河南南陽竄汴將入山東境李鴻章復調翼升守清江時東擒賴汝洸爲劉銘傳大敗於壽光窮蹙南奔撲渡沭陽城南之六塘河李鴻章急調翼升與諸軍兜剿之賊復由清江竄淮安翼升督諸軍追擊而南賊奔寶應翼升又馳抵淮城下之平橋值賊渡運縱兵迎擊賊敗南循河隄下走翼升督駛礮船與諸軍水陸鶩追賊不能軍分股散逸賴逆

旋爲道員吳毓蘭所擒翼升追搜餘匪俘馘甚衆東捻遂平論功頒賞翼升白玉翎管荷囊佩燧白玉柄小刀等件七年四月西捻張總愚竄直隸東光撲渡運河李鴻章籌圈制之法調翼升赴運河分設守禦閘四月翼升至濟寧旋往張秋鎮察看形勢張秋鎮爲黃運交匯之處淤成平陸黃水低不能入運翼升恐不足以制賊心憂之爲文禱於河神越日大雨黃水暴漲自運河至馬頰盈隄拍岸運防益固六月翼升乘伏汛陡長駛入張秋口進至德州郭松林潘鼎新敗賊沙河張總愚遁至德州之高家渡遣賊騎冒官兵喚渡翼升部將徐道奎察其僞轟擊之賊大隊踵至鳧水競進會運河水陡高丈五六尺礮船旋轉自如賊迄不得越猶上下數十里偵伺期偷渡會大軍環集張總愚溺水死西捻平詔再加雲騎尉世職合前兩次恩命併爲三等男爵自江寧克復後曾國藩彭玉麟遵旨詳定水師章程於是以前所募水勇改爲經制水兵設提督署於安徽太平府行轅於湖南岳州自荆岳下至崇明支河內湖悉歸統轄計五千餘里所有六標二十四營船七百七十四艘總兵五營官副參遊二十四哨官都守千把外委七百七十四兵萬二千兵餉雜費月五萬有奇至於船廠藥局書吏衙署俸廉兵米疏防禁約之

制與夫大衙小補之變通設汛分防之經界略陳事宜三十營制二十四商權籌畫翼升與有力焉曾國藩奏言水師事務繁重惟翼升可以綜攬全局彭玉麟亦奏言翼升精明強幹練達營務故此額新設翼升首膺其選云七月曾國藩復與翼升奏陳長江水師未盡事宜得旨允行是年彭玉麟奏請開缺回籍終制上以長江水師係屬初創恐翼升一人不足以資控制令彭玉麟於百日後迅赴江皖養疴彭玉麟奏言水師章程業已大定但能恪守規模即可遠資控制黃翼升資格最深廉潔勤慎所有補缺各員大半曾隸麾下情誼相聯不虞隔閡且臣總須調理精密交代清楚俟明春再行起程卽與黃翼升將分汛未盡事宜妥商布置八年正月翼升飭營哨員弁次第赴防以專責成旣而彭玉麟就醫江浙解軍符歸翼升翼升隨定營規提鎮月住船十五日副參遊月二十日都守以下無虛日員弁不許衣蟒袍兵丁不許著靴帽仿曾國藩水師得勝歌著棹歌二十七章使營勇習之以相激勵復遵定章歲巡上下江簡閱營伍時大亂初平江西盜不時竊發九年諭翼升認真講求無稍懈弛翼升奏言上年章程初定僅能布置汛防察看營哨各官而於兵弁之技藝未暇詳加考校今水師歸汛踰年操練漸熟擬

卽於三月杪前往岳州次第操閱至護商防盜各事宜關繫長江之餉源實爲水師之專責尤不敢稍涉懈弛疏入報聞五月直隸天津民焚燬教堂法人有意挑釁上從侍郎宋晉之請飭翼升實力整頓海防翼升以輪船可入腹地者惟天津與長江卽赴下遊江陰口察看要隘與江蘇布政使張兆棟籌商修理礮隄爲全力扼險之策宋晉又以長江水師漸形疏懈行旅戒嚴等情入告請飭彭玉麟前往經理有詔飭翼升時加整頓並令彭玉麟迅赴江南以資控制十一年彭玉麟出巡長江先後奏參水師庸劣將弁記名總兵蔣振元等百一十六員會翼升亦巡閱至九江以病增劇屬彭玉麟代請開缺回籍養疴上以翼升於庸劣不職各員不能隨時參劾殊屬顛預所收外來候補人員至二百七十餘員之多亦屬不合姑念從前帶兵江上屢著戰功從寬免其置議准其開缺回籍調理光緒十五年恭逢歸政典禮懿旨以黃翼升久列戎旃賢勞尤著下部議敘旋命繪像紫光閣十七年署兩江總督沈秉成以翼升傷病就痊才力堪用專疏奏聞略曰翼升自咸豐初年隨曾國藩彭玉麟創立水師剿賊江上苦戰十有餘年復地二千餘里同治元年隨李鴻章管帶淮揚水師攻克江蘇各城戰功卓著旋簡授長江水

師提督巡操無懈十一年八月以前在軍營受傷病常舉發經彭玉麟奏准開缺回籍調理今閱數載病軀就愈僑寓江寧臣來此攝篆察訪人言灼知前事其於各營劣員先經查明以彭玉麟巡閱將至待與晤商會銜參奏係爲慎重起見所收候補人員大抵曾隨征剿凱撤後趨投圖效尙非皆自外來翼升愛惜人材留備緩急給廉銀以資養贍於公項尙無虛糜似一眚之微不足掩其前列可否垂念舊勞酌加錄用十八年六月遂再拜長江水師提督之命八月到京賜紫禁城騎馬二十年恭逢慈禧端佑康頤昭豫莊誠壽恭欽獻崇熙皇太后六旬萬壽懿旨賞加尙書銜七月日人寇朝鮮翼升時巡閱岳州聞警星夜馳赴江寧與兩江總督劉坤一會商防堵事宜與總兵謝濬畬調集師船爲戰守具旋卒於軍遺疏入諭曰長江水師提督黃翼升忠勇性成勳勞卓著由水師將校隨同曾國藩剿辦粵匪轉戰江南湖北等省克復城隘所向有功疊蒙先朝恩遇賞給勇號黃馬褂補授淮揚鎮總兵洊擢江南水師提督賞給三等男爵嗣因患病開缺調理前年補授長江水師提督賞給紫禁城內騎馬本年正月欽奉懿旨賞加尙書銜治軍三十餘年整頓營伍實力操防克勤厥職方冀得享遐齡長資倚任遽聞溘逝

軫惜殊深黃翼升著照提督例賜卹加恩予諡並將戰功事蹟宣付國史館立傳其原籍立功省分准其建立專祠伊子候選道黃宗炎著俟服闋後以道員卽選伊孫黃恩綬著俟及歲時帶領引見用示篤念勲勤至意尋賜祭葬予諡武靖子宗炎廣西桂平梧鹽法道襲爵

李朝斌

李朝斌湖南善化人本姓王自幼育於李氏長由行伍隸長沙協標道光二十六年隨防新寧咸豐二年粵匪竄湖南朝斌以防守省城給六品軍功四年欽差大臣曾國藩調充水師中營哨官從克湖北武漢敘功以把總儘先拔補並賞戴藍翎十月克廣濟田家鎮賊巢出力以千總補用並加守備銜五年移防東岸屢遏賊鋒擢守備加都司銜六年攻鮎魚套踞賊勝之湖廣總督官文上其功陞都司並賞換花翎再復武漢經巡撫胡林翼彙案奏保得旨著以參將留湖北儘先補用復會攻武昌縣黃州府蘄州城克之尋隨湘軍援江西合內湖水師攻克湖口並梅家洲僞城乘勝沿江而下七百餘里復彭澤望江東流縣城破樅陽大通泥汶河賊壘揚軍而還以功晉副將八年官軍圍九江朝斌督水師登岸策應合攻

克之捷入賞加總兵銜旋隨水師提督楊岳斌再復東流攻安慶拔樅陽銅陵賊壘奉旨以副將遇缺卽補並給固勇巴圖魯名號十年克蠟磯賊壘十月間道援南陵拔總兵陳大富全軍及難民十餘萬人賊復陷東流朝斌回軍黃石磯再克之十一年下荻荅洲白茅菁賊壘先後敘功得旨以總兵記名簡放復乘勝會同陸軍克無爲州詔以總兵儘先題奏九月再復銅陵及攻克泥汶神塘河運漕鎮東關各要隘曾國藩官文先後奏請優獎得旨賞加提督銜是年補授湖北竹山協副將同治元年上命海疆督臣於水師副將內遴選堪勝水師總兵者各保二三員以備簡用曾國藩以朝斌上聞奏言自設水師以來朝斌卽隸部下身經百戰膽識俱優實堪勝總兵之任旋陞浙江處州鎮總兵仍留營剿賊四月以克復巢縣含山和州並攻奪銅城閘雍家鎮裕溪口西梁山各城隘功下部優敘時髮逆久踞江寧以蕪湖爲屏障東西梁山爲鎖鑰而尤以金柱關爲關鍵兵部侍郎彭玉麟定計水陸合攻飭朝斌統所部從上下游環擊會合水陸各軍四面兜剿於是連克蕪湖進攻金柱關朝斌束草爲炬與諸將指麾督戰遂克之東梁山亦於是役一戰而下朝斌尤爲出力得旨記名以提督遇缺簡放時東南郡縣皆淪

於賊曾國藩謂江浙濱江帶湖非水師不能制賊議設太湖水師奏派朝斌赴湖南造船募勇剋日成軍統領東下當過鄂時官文卽飭朝斌率所部暫防黃州之三臺河雞子河羅家溝等處二年四月率師下駛五月會鮑超等水陸各軍攻江浦浦口克之連破草鞋峽燕子磯賊壘而九洑洲湍流箭急僞城高峙猝不可拔時朝斌初至銳氣方新人殊死戰攻擊竟日賊守益堅乃夜率舟師潛薄其壘登岸縱火躍濠斬隘而入聚殲羣賊無有脫者至是江面一律肅清論功賞穿黃馬褂八月江蘇巡撫李鴻章會合水陸官軍進偪蘇州朝斌統太湖水師會剿南贛鎮總兵程學啟一軍近偪於東南劉銘傳李鴻年各軍遠包於西北逆酋李秀成糾合逆黨七八萬欲奪寶帶橋朝斌迎擊血戰八時之久賊始退九月湖州嘉興之賊分竄吳江東南朝斌親赴葉澤湖察看形勢賊方造橋欲竄朝斌督令總兵李助發等四面攻擊立將斷中魚栅土卡數十處埽平時封門及覓渡橋撲出之賊亦爲太湖水師擊退朝斌復與程學啟攻克五龍橋賊壘分軍駐守悍黨屢撲屢敗之十月朝斌與總兵張遇春副將楊鼎勳督軍奮進追賊至城下擒斬甚多又毀賊壘四旣而程學啟攻婁齊兩門朝斌攻葑盤兩門晝夜轟擊賊黨震懼逆

酋李秀成逸出踞賊郅雲官斬其黨譚紹洸以降遂復省城李鴻章奏言朝斌疊次苦戰謀勇兼裕蘇州面面皆水惟水師之功居多請旨酌予優獎奏入賞給雲騎尉世職並下部從優議敘十一月李鴻章檄朝斌偕編修劉秉璋常鎮道潘鼎新等水陸各軍赴浙會剿平望爲江浙交界之區賊結壘抗拒官軍分路進剿嘉興賊萬餘來援朝斌督將士由湖南岸附堞而發副將龔生陽由湖北岸蛇行而前各破石壘一其乘舟竄逸者悉爲槍船截殺遂克平望鎮是役也斃賊無算再破賊營於九里橋黎里之賊望風狂奔平望附近一律肅清旋署江南提督三年正月官軍進規嘉興朝斌督太湖水師由官塘進五鼓達賊營城逆分路出與壘賊橫衝官軍前隊已爲撼動程學啟急督親兵由小西門繞達北門鈔入賊後朝斌與提督歐陽利見等左右環攻自卯至未擊退城賊並連破七壘湖州援賊圖竄盛澤平望兩鎮以解嘉興之圍亦爲朝斌所扼不得逞嘉興旣復進規湖州旋奉補授江南提督之命五月督師由夾浦口進偪長興湖州廣德各逆率數萬人分路依山築壘綿瓦山谷楊鼎勳劉士奇等軍與賊相持正急朝斌飭所部登陸繞出賊背自山梁疾趨而下投擲火器各軍乘之盡燬西北沿山逆壘乘勢急攻

長興克之進復湖州捷入賞白玉四喜搬指玉柄小刀燧囊大小荷囊等件並下部從優議敘五年正月李鴻章奏請朝斌由吳江之同里移駐蘇州省城江南古稱澤國所轄江湖河蕩多與浙境毗連匪徒易於出沒散則爲良聚則爲匪江蘇有華亭之金幅爲首浙江有秀水之卜小二爲首聯檣拒捕爲閭閻害自江蘇巡撫郭柏蔭擒斬金幅後餘皆歸浙而卜小二聲勢遂張朝斌派水師營官熊殿元等潛入浙界擒獲卜小二及其子卜長生檻致蘇州正法盜風以戢八年天津教案啟釁詔江海籌防上命朝斌調外海內洋太湖各師船勤加操演嚴密巡防朝斌悉心區畫酌設經制水師著爲成例尋赴松江府城駐劄光緒四年兩江總督沈葆楨奏稱輪船操防緊要非熟諳海洋之大員不足以資統率朝斌忠勇出於天性威望足以服人爲近時所罕有請就近兼轄允之五年詔以朝斌爲外海兵輪統領各省兵輪均聽督操十一年以巡視洋面屢受風潮觸動左膊舊傷籲懇開缺回籍就醫上以朝斌統領水師深資得力賞假三次明年五月兩江總督曾國荃爲申前請詔始許之十五年慈禧端佑康頤昭豫莊誠皇太后歸政覃恩褒錄勛舊奉懿旨下部議敘二十四年四月卒於籍朝斌本生父王正儒有子四人

朝斌最幼襁褓育於李氏不通聞問朝斌既貴同治六年王正儒呈請朝斌復姓而李氏族人謂王氏恩誼已斷寄書詳論極陳不應歸宗之義兩江總督曾國藩援據本朝尙書秦蕙田五禮通考所引金史張詩一事與朝斌所處相同並以定例出嗣之子亦視所繼父母有無子嗣爲斷今若令朝斌歸宗在本生王氏之父母不過於三子之外又增一子而在李氏撫養之父母竟至斬焉不祀考諸古禮參以今律朝斌應於李氏別爲一子但後其撫育之父母而不承其以上之祖宗於王氏則不通昏姻一以報顧復之深恩一以別族屬之大義其於王氏之父母未盡殘年當由朝斌致養庶爲兩全之道疏入詔如所議行其卒也湖南巡撫吳大澂奏言朝斌忠勇出於天性身經百戰削平大難事定之後復爲江南議設經制水師統領外海兵輪講求西法不辭勞瘁有古名將風疏上諭曰前任江南提督李朝斌於道光年間從征廣西轉戰湖北安徽江南等省疊克名城戰功卓著擢授江南提督整頓水師訓練操防均能稱職前因觸發舊傷賞假回籍茲聞溘逝悼惜殊深李朝斌著照提督例賜卹生平戰蹟宣付國史館立傳准其於立功省分建立專祠伊子廣東候補通判李達璋著以同知補用尋賜祭葬二十二年

湖南巡撫陳寶箴復牘陳朝斌戰蹟請於原籍建祠允之子十一人國琛江蘇候補道先朝斌卒達璋廣東赤溪廳同知國琮江蘇候補知縣璜甘肅候補道佛肩分部主事倏應分部員外郎國璠江西候補道國琳候選知州國瑜分省補用知府甄四川補用知縣公輔候選同知孫同壽雲南思茅廳同知同福湖北補用知縣

周達武

周達武湖南寧鄉人咸豐四年由武童投效候選知府羅澤南軍營隨剿賊岳州高嶺破城陵磯賊營出力獎六品頂戴五年羅澤南克復江西義寧赴援湖北轉戰蒲圻咸寧進攻武昌省城疊破附城賊壘達武皆有功歷保至千總並賞戴藍翎六年五月擊賊小龜山力戰負槍傷十一月省城克復擢守備七年按察使李續賓圍攻江西九江出賊不意潛軍繞道伏湖口後山會水師大破賊衆遂復湖口達武以先登負重創陞都司八年五月皖賊陷湖北黃安達武隨李續賓自九江馳援賊敗宵遁截殺無算遷遊擊並賞換花翎九月攻安徽舒城力戰負槍傷九年隨知府劉嶽昭解湖南寶慶圍擢參將十年充營官五月隨劉嶽昭進規廣

西賀縣招降逆目包立安等遂進拔蓮塘乘勝渡河破河東街賊壘同克縣城敘功加總兵銜八月擊賊湖南永明縣境屢捷旋以楚境肅清陞總兵十一年逆酋石達開復糾合廣西潯州股匪竄犯湖南靖州分股陷會同達武會知府席寶田軍迎剿旋復其城賊走湖北陷來鳳同治元年正月隨劉嶽昭越境攻克之賞二品封典七月四川總督駱秉章檄赴川東剿賊時逆首周紹湧久踞涪州鶴遊坪閏八月達武率所部由涪州進剿賊聞風遁追及之開縣盤壩口大破之斬馘三千餘復追至陳家場降殿後賊三千餘擒賊目江之桂周逆旋由達縣竄至大竹之吉安場達武接踵追至揮兵急進各軍四面兜剿賊不支悉棄械降生擒周逆及大小賊目一百六十八名駢誅之捷入賞質勇巴圖魯名號十一月逆首郭刀復自陝西寧羌州竄回川境踞儀隴土門鋪達武以駱秉章檄由保寧兼程迎剿遇賊大儀寨陣斬僞統領馬玉音並郭逆之弟郭占彪賊大潰奔入大山福林場明日追及又敗之郭逆率餘黨向封相門疾遁達武乘夜疾馳一百二十里追及之巴州鼎山鋪擒郭逆之兄郭幅明知賊精銳已竭遂揮隊疾攻陣斬三百餘名餘賊棄械乞命立擒郭逆及其弟郭幅友暨僞統領何得潰等二十餘名誅之

賞加提督銜十二月授建昌鎮總兵署提督三年髮逆由陝西竄陷甘肅階州達武率所部出境會剿疊破城外東江水嚴家灣等處逆壘四年五月用地雷轟塌城垣督參將周家盛等冒險衝入擒僞啟王梁成幅等置於法得旨賞白玉翎管玉柄小刀火鏟大小荷囊各珍物並交軍機處記名遇有提督缺出請旨簡放八月由甘肅文縣進規松潘南坪奪柴門關進復南坪逆首歐利哇勢窮乞降南坪三十六寨及羊崗前山八寨後山五寨和藥九寨各番目一律就撫得旨以提督遇缺儘先題奏仍下部優敘十二月授貴州提督駱秉章因川省防剿喫緊奏請暫留達武以資統率允之五年馬邊逆首宋仕傑熊汝才等圍攻廳城達武自瀘州馳至清水溪節節進剿立解城圍悉平喬盧子笄箕坪胡家城官帽場黑虎寺煙登山風溪峽等處賊壘熊汝才宋仕傑均就擒七年越嶲賊盤踞普雄依山列堡閏四月達武督軍討平之賞換博奇巴圖魯名號十一月由越嶲進克西昌交脚夷巢既攻昨牛壩羣賊懾服大小部落一律就撫建南肅清賞穿黃馬褂九年十月總督吳棠因川省援黔一軍未能得力奏請飭達武赴貴州本任接辦軍務上諭該提督赴黔後迅率所部剋期進兵與楚黔各軍聯絡夾擊周達武本係貴

州提督著曾璧光飭令黔省帶兵各大員遇有應剿應防事宜悉聽周達武調遣十一月抵任遣軍復麻哈並克桐梓仁懷等處賊巢十年收復八寨三腳各城並克鎮寧歸化等處賊巢十一年連克丹溪貞豐各城及安南縣境樂唐白寨各賊壘既以僞元帥張臭迷就擒下部優敘十二年因克復新城老巢賞騎都尉世職十三年上以貴州軍務肅清達武始終出力敕部優敘光緒元年因病奏請開缺回籍調理允之三年授甘肅提督十年肅州南山九家窰游匪竄踞高臺吳家堡遣兵剿平之十七年以捐助順直賑需下部議敘二十年正月賞加尙書銜是月卒陝甘總督楊昌濬奏聞諭曰甘肅提督周達武於咸豐年間由武童投效湘軍轉戰湖南江西湖北安徽等省所向有功嗣在四川剿辦股匪及平定貴州苗匪厥功尤偉補授四川建昌鎮總兵洊陞貴州提督朕御極後簡放甘肅提督在任十有七年講求軍政紀律嚴明兵民悅服茲聞溘逝軫惜良深周達武著照提督例從優議卹加恩予謚准其於立功省分建立專祠戰功事蹟宣付史館立傳以彰忠藎尋御史安維峻奏劾達武在任多年並無異常勞績高臺縣噍噍會一案誤聽知縣捏報派兵剿辦殃及無辜請降旨不准建祠旋經陝西巡撫鹿傳霖查

明奏稱匪徒李九明等創立噍噍會煽惑居民聚衆滋事竄踞高臺縣屬吳家堡等處經肅州清水營都司龔得勝高臺縣知縣羅佐清先後具稟尙非捏報故提督周達武聞信卽派甘標參將劉德騰等率領兵勇前往相機剿撫旋將匪徒全數撲滅該匪不致日久勾結地方未被蹂躪其功誠不可沒惟於剿辦之際派去員弁未能分別良莠以至玉石俱焚雖該提督未之行閒而事後未能查實參辦其過亦不可掩得旨仍准於立功省分建立專祠毋庸予諡

羅孝連

羅孝連湖南郴州人咸豐二年粵匪陷郴州父明秀罵賊死孝連誓復讐會匪擾郴州孝連募勇三百充隊長初扼兩路司繼保州南連戰皆捷而土匪潛爲內應州復陷官紳倡辦團練孝連率精銳八百居顏行自九月至十一月三十餘戰竟復郴州獎六品軍功六年十月投效統領虎威軍遊擊田興恕營從援江西十一月克袁州十二月克上高七年二月破賊鸚哥嶺四月進攻臨江克之拔外委並賞戴藍翎八年克崇仁樂安黃南豐各城四月克撫州建昌保以千總儘先拔補加守備銜貴州九股苗匪合廣西懷遠盜圍黎平駸及楚邊湖南援軍失利巡

撫駱秉章令田興恕赴黔援剿孝連從九月師次黎平之潭溪賊大股分踞漢寨樓梯哨築壘九而逼黎平南門孝連議先破其壘設伏誘之賊果中伏遂火漢寨及樓梯哨立解黎平圍十月破賊於古州之地里九年正月進軍月寨距古州八里賊萬餘來犯不爲動俟其飢疲開壁縱擊大破之連復古州錦屏永從擢都司並賞換花翎方擬進兵肅清貴東粵匪石達開驟糾大股由江西竄擾湖南之寶慶田興恕督孝連回援四月敗賊於九拱橋黃泥塘七架坡五月石逆續糾悍酋賴豫新傅忠信各股犯寶慶田興恕選敢死士八百屬孝連統之駐望城坡賊數萬猛撲孝連壘孝連迎禦虎威軍亦馳至賊乃退然城東北賊壘林立饒道文報阻絕會道員劉長佑李續宜以援軍至內外夾擊壘破賴逆等於半邊街清水塘田家渡餘衆退保東南七月復會各軍破賊於賀家坳龍安橋追抵九拱橋先後擒斬無算石達開遁入廣西自是不敢窺湖南境捷入諭以遊擊留於湖南補用統領長勝軍駐靖州以防黔邊長勝軍卽虎威軍所選之八百敢死士也於時黔亂益甚上游則有回狎下游則有苗教石逆復潛糾粵匪自廣西竄入黔境與回苗各匪合股肆擾省城四面皆賊田興恕以提督奉命督辦貴州軍務議令諸軍

分道入黔飭孝連取道銅仁先規印江由思南石阡達貴陽以牽賊勢十年三月
教匪安太然大股分踞印江之楊家坪何家灣轎子頂聯壘三十六逼攻縣城孝
連至一戰卻之斬安太然盡平其壘閏三月進擊思南之牌坊孝連手大旗趨壘
門遣所部繞出賊後破壘直入剷平思南石阡附近大小各寨壘自思南石阡至
甕安四百里其間賊巢以木影頂松坪猴場紅峒堡爲最自甕安至貴陽二百里
其間賊巢以黃隆壘黃金壘玉華山尙大坪爲最九月軍次木影頂頂壁立千仞
賊伺官軍登運矛攢刺孝連挾賊矛飛登其壘平之於是松坪三十餘壘猴場及
紅峒堡賊皆相繼遁乃偕總兵楊巖寶合軍逐北甫及甕安賊反拒楊巖寶忽退
孝連左右僅數人殊死鬪斃賊五甫得脫猝遇甕安援賊復還戰會田興恕遣八
騎來覘孝連遂大呼衝出賊不審官軍之多少也大奔且懼追及不敢入城甕安
遂復孝連先以思南石阡之戰晉參將至是賞給驃勇巴圖魯名號並賞加副將
銜十月督軍攻黃隆壘夜躋其顛火壘樓賊分五路來撲官軍嚴陣以待不得逞
又乘霧逼營譟呼孝連誡諸軍勿動密遣輕騎拊賊之背陣遂亂官軍乘之斬刈
過半燬黃金壘玉華山尙大坪諸賊皆遁歸省垣之道始通貴陽解嚴十二月剿

粵匪於定番州克之旋定番再陷十一年正月復克之賊首張應恩糾粵匪大股自廣順州破官軍於安平之大水橋孝連馳援語諸將曰賊不還廣順勞師遠來犯兵家忌我以逸待勞破之必矣分軍進剿自辰至午戰大捷斬張應恩並克長寨廳城命以總兵交軍機處記名遇缺請旨簡放安順府屬狎匪憑恃山險綿亘二百餘里滋擾累年孝連奉飭督剿十月平毛口莊烏束隴養馬寨十一月平水西莊阿達洞蜜蜂重陽望十二月平猛董大山同治元年正月平大石頭寨盛麟甲上中下三望二月平者斗小石頭烈山黃桶寨安順狎匪一律殲除賞加提督銜初髮苗各匪竄陷平越田興恕飭古州鎮總兵楊巖寶將萬人克平越進剿尙大坪賊首何得勝陽乞撫楊巖寶信之頓軍王卡既而何逆勾結苗匪猛撲各營五月孝連破之於花押溪援王卡解其圍而所部總兵王萬祥等十七營駐清水江總兵趙德光等三營駐光沙相距稍遠賊訶孝連懸軍深入嗾大股潛渡花押扼我歸路孝連堅壁待援久不至賊集益衆乃突圍趨光沙與趙德光等轉戰至大麻窩孝連曰何逆悉衆在此尙大坪老巢必虛出不意擊之賊可不戰而敗也夜選敢死士千人馳入尙大坪立破賊壘焚其輜重積聚大麻窩之賊聞警相顧

色駭孝連檄清水江各營夾擊大破之總兵沈洪富亦克玉華山平越乃定當是時官軍潰於下游何逆上竄省垣孝連回援遇賊於清鎮親搏戰將士咸奮賊大敗省垣得無恙三年正月何逆潛由斑竹園圍清鎮二月敗之於三橋復敗之於茶盤寨大關五月賞一品封典並署鎮遠鎮總兵仍留營四年賊復擾清鎮安平貴陽大震先是有大股苗匪撲龍里孝連飭別將赴援輕進敗績何逆乘機復熾省中僅銅仁兵數百孝連率以行令每日夜出朝還以示衆並多發鼓角火器疑之賊驚竄安順官軍躡蹤追剿何逆遁後卒就擒安順各屬苗匪蠡起磨雄哪叭大坡頂恃其雄險尤猖獗三月孝連以奇兵克磨雄哪叭壘有二上壘儲糗糧下壘碉卡林立前阻深溪不易攻乃飭軍取道僻徑逕達哪叭破下壘賊退保上壘久之糧罄謀他竄降卒以告孝連選精銳伏壘外誠之曰伺賊出卽入張吾旗幟而督大軍伏壘後要之賊出遇伏顧見壘上旗大亂就擊之斬獲無算大坡頂賊酋黃姓最兇悍孝連力戰始下斬黃逆於陣餘匪皆降七月大定匪爲官軍所敗圖擾安順不得逞八月竄廣順孝連移師剿之賊走定番躡及上馬司殲其衆十月賊襲陷清鎮另股陷安平孝連以兵法衢地必爭賊所以屢犯清安也清安若

失則賊踞上游不啻扼黔之吭急督軍進晝夜環攻卒克清鎮安平二城十一月回匪犯安順之耶岱廳陷永寧州孝連馳剿復其城命遇有貴州總兵缺出儘先題奏五年五月苗匪陷鎮寧孝連合諸軍圍攻兼旬州石城故堅厚賊以全力守之不易克會大雨乘懈飭勇士踰城入開門納大軍賊驚起巷戰不勝棄城去八月再陷安平尋克之貴州上游肅清下游苗氛尙熾孝連奉敕赴署任時鎮遠未復暫駐銅仁兼攝銅仁協事六年四月授鎮遠鎮總兵七年正月會合統領湘軍按察使席寶田李元度攻克荆竹園龍家坳十二月復鎮遠九年復台拱廳奉諭交軍機處記名遇有提督缺出請旨簡放十年三月定丹江四月克凱里麻哈黃平清平下游肅清賞換業普肯巴圖魯名號九月署安義鎮總兵光緒元年正月賞加頭品頂戴二年調署古州鎮總兵時古州匪起麕聚蕨菜坪三年孝連督軍破之七年擢貴州提督二十年正月慈禧端佑康頤昭豫莊誠壽恭欽獻崇熙皇太后六旬萬壽懿旨賞加尙書銜十月恩賞用寶壽字大緞帽緯賞給三代正一品文封典二十五年卒雲貴總督崧蕃以聞諭曰貴州提督羅孝連由咸豐年間投效田興恕軍營轉戰江西貴州等省剿平苗匪戰功卓著同治六年補授貴州

鎮遠鎮總兵旋簡授貴州提督在黔年久治軍撫民並著威惠茲聞溘逝軫惜殊深羅孝連著照提督軍營病故例從優議卹任內一切處分悉予開復加恩予諡原籍及立功省分准其建立專祠並將戰功事蹟宣付史館立傳伊長子貴州補用通判羅仰懷並著賞給同知仍留原省補用以示優異尋賜祭葬予諡武勤子仰懷貴州古州同知仰經江蘇補用道仰昫廣西宜山知縣仰煥湖北公安知縣孫綱廕生

雷正綰

雷正綰四川中江人咸豐四年由四川督標右營把總從軍湖北積功至都司六年克武昌漢陽以遊擊陞用並賞加直勇巴圖魯名號八年協領多隆阿率楚北馬步各軍援皖以正綰從十月援宿太遇賊石簪大破之並破沿江賊壘以通官軍入皖之路晉參將加副將銜十年克潛山太湖擢副將加總兵銜十月逆酋陳玉成大舉援皖衆十餘萬自舒城竄桐城屯挂車河冀解皖圍正綰率左路七營至廖岡鈔出賊背衆軍夾擊賊敗走廬江詔免補副將以總兵記名簡放十一年逆黨黃文金復渡江由天林莊竄安慶合陳玉成再圖上犯正綰敗之蔣家山項

家河江家橋麻子嶺一月五捷賞加提督銜卽以得勝之軍進剿桐城宿松拔之時黃梅猶爲賊踞桐宿逸匪皆依以自保聞正綰至相率狂奔遂克黃梅而廣濟蕪州兩城亦下詔以總兵交軍機處遇缺題奏旋補授陝安鎮總兵同治元年四月克復廬州詔遇有提督缺出請旨簡放是時豫匪句結皖粵之賊竄入陝境陷渭南出華州華陰肆擾潼關省城戒嚴上命荊州將軍多隆阿率正綰援陝并命正綰速赴陝安鎮本任七月抵襄陽移兵援南陽破賊鄖西八月軍抵藍田補授陝西提督命幫辦欽差大臣勝保軍務駐防西安閏八月由咸陽進攻馬家堡解涇陽圍九月敗之永樂店賊竄塔底又躡擊於蘇家溝會勝保有罪逮問多隆阿以欽差大臣接統全軍正綰仍幫辦軍務降將劉占考宋景詩所部驕悍難制官軍多畏之朝廷以屬正綰馭以恩威莫不用命二年三月丁母憂懇請終制不許特旨改爲署任鳳翔時被圍久正綰由鞏鄠徑擣鳳翔賊潰圍走復分兵馳往三原防剿八月回逆渡河撲營擊卻之諭曰雷正綰自入陝以來先後攻破賊巢多處隨機應變以少擊衆洵屬謀勇兼備著交部從優議敘由是威名稜然復有督師援甘之命十一月至靈臺卽攻破王村花所鎮蹙賊雙廟集斬賊酋木三隨進

軍鎮原鎮原有當原北原地皆衝要久爲賊踞正綰督軍薄其原誘之而先遣總兵成祿魏添應等伏兵於旁賊出前後合擊盡奪兩原賊壘餘賊竄平涼三年連破賊於靈臺崇信四月又敗賊新城斬悍賊木仲沅訥三於陣偪平涼而屯是月多隆阿卒於軍命西安將軍都興阿督辦甘肅軍務仍以正綰幫辦五月克平涼斬賊酋鐵西羽輕材生擒八百餘人餘衆解散賞穿黃馬褂頒賞搬指翎管荷包等件於是賊之踞固原瓦亭驛及張家川木城者皆向龍山鎮敗竄八月進拔龍山鎮賊回竄固原城復陷正綰聞警疾趨蓮花城欲先襲其巢穴以通隆靜大道再圖固原遂孤軍深入山險遇伏中矛傷頷部下多傷死優詔慰勞十月力疾攻蓮花城克之上獎其調度有方勇略出衆十一月進規固原由石家溝進偪東山賊駭走追奔至打河店據鸚哥嶺而軍四年正月固原賊度勢不敵皆東竄正綰躬率親兵窮追一晝夜馳三百餘里河州鎮總兵曹克忠馬隊亦至遂復固原餘賊奔涇州南關爲正綰兵所追斬略盡蕭河城青家驛之賊望風遠遁自是威戎鎮以西至洛門會寧以南至寧遠空無賊蹤迺留陝西按察使張集馨鎮撫固原而躬督兵進攻黑城子斬賊首黑虎復進克官橋李旺二堡獲賊首木混等斬於

軍乘勢薄預望城攻破下馬關半角城賊壘進規靈州以安定圍急分兵往援解其圍七月同曹克忠攻金積堡自回變起甘肅地荒人稀耕種失時徵餉不繼冀破賊巢因糧於回而回逆偵官軍疲豫伏馬賊萬餘自十里外圍鈔兵士飢潰戰失利傷亡至二千餘人自請議處上責正綰不能約束兵勇致有此敗撤去黃馬褂勇號及幫辦軍務歸陝甘總督楊岳斌節制九月固原兵變總兵雷恆提督胡大貴副將李高啟等以主將失職倡亂涇州正綰聞變馳入固原諭撫軍士糧臺提督周顯承斬叛將何成蛟等事乃定陝西巡撫劉蓉劾正綰由紅河溝率兵潰變聲言直犯陝西州縣告急陝甘道爲之梗上命山西巡撫趙長齡陝甘總督楊岳斌查覈正綰輕騎往見涕泗引咎縛送雷恆等置之法趙長齡楊岳斌以聞得旨雷正綰免其治罪仍責令整飭營伍實力剿賊以贖前愆四川總督崇實復疏言正綰功語侵劉蓉上責劉蓉張皇妄奏傳知雷正綰奮勉立功并准其專摺奏事以一事權五年三月蘭州兵變圍莊浪陷隆德正綰往來截擊得不逞五月克隆德轉戰平固乘勝進剿橫河川塬俘斬以萬數盡平其壘橫河川賊老巢也地處慶涇平固之中延袤且百里賊踞之以東窺陝境西寇鞏蘭官軍疲於奔命正

綰既平橫河川陝軍迺無西顧憂楊岳斌上其功下部優敘十一月賊突至平涼急攻城正綰夤夜馳百餘里奮擊大破之又克平涼賞還黃馬褂並賞還勇號六年十月欽差大臣左宗棠莅陝視師有旨令正綰與記名提督張在山分督各軍相機進剿十一月進援慶陽攻鄧家堡以通運道七年五月回酋馬正和合涇河川賊南竄攻長武道員黃鼎軍擊敗之正綰亦率軍來援賊遂破散七月正綰復大敗賊於長武所殺及溺涇死者無算十一月又敗賊於長武北之封頭堡擒回酋馬順兒虎秀哩斬之獲羸馬二百餘匹十二月克董家堡八年二月回酋禹得彥以數千騎南渡涇竄靈臺攻掠寨堡正綰方擊賊宮河得諜乘雪夜馳抵獨店賊臥未覺掩擊大敗之賊遁去捷入得旨優獎時官軍勢盛悍賊悉伏董志原踞險自守正綰會諸軍分路進逼先平其旁蕭金鎮焦村什社各堅卡三月遂克董志原斬擒悍賊以千數敘功賞換達春巴圖魯名號八月陝回白彥虎合甘回李正榮復回預望城黑城子以窺固原正綰時屯古城川扼南北要衝急分兵擊卻之斬逆酋楊文治進攻李旺堡令驍健數百人出間道迎擊賊驚潰遂毀李旺堡破穆家潭擒逆黨楊輝雲直逼鹽茶西抵打拉池平東北梁山甘回大震款營求

撫者日至北路漸平餘匪得脫者悉併入金積堡於是提督劉松山道員黃鼎各軍始得與正綰會專攻金積堡金積堡者甘肅極東北地當靈州西南其西北距大河秦漢二渠環之山隴湖泊犬牙穿錯東去陝境不二百里兩省逆回之淵藪也其旁堡寨無慮百數十而金積最堅大扼其要酋之悍者亦無慮百數十而馬化澂尤桀猾爲之魁自陝甘軍興官軍未嘗至堡下正綰嘗一至輒敗去諸軍莫敢言攻金積故馬化澂尤橫其西有堡爲張恩東西凡四堡化澂悍黨袁希孟所屯也正綰乃先攻破其三堡袁希孟率餘衆降正綰遂進軍偏秦渠而屯距金積僅十餘里馬化澂懼請降於劉松山松山察其詐會正綰軍急攻之堡堅甚又跨渠爲濠凡數道猝不可進九年正月馬化澂出死衆乘不意襲奪正綰峽口屯士卒死者二百人詔革職留任正綰以金積天險難以力拔徒多傷士卒非盡克其附堡以斷糧援然後合圍困之殆未可平迺與劉松山分路進攻連克漢伯王洪各堡皆金積東南要地復奪峽口屯陣斬逆酋鄒麻子馬化澂大懼請獻洪樂堡以降正綰知洪樂逼近金積地勢散漫而馬家等堡鄰其左右馬化澂不並獻馬家堡者欲給官軍聚屯洪樂而鈔圍之絕我餉道也姑乘其降據洪樂速分兵襲

取其近堡馬化澁計窮八月正綰平金積西南各堡凡百餘所長圍乃合奉諭正綰連克堅堡當乘此機勢以收擣穴擒渠之效十一月堡賊飢困日甚謀突圍走正綰潛伏諸軍於要隘以待之賊出輒擒斬馬化澁窘蹙面縛出降金積堡平河西一路聞金積平亦皆詣軍前繳馬械請撫十年正月詔開復正綰革職處分並照一等軍功例優敘十一年正綰復盡平西路餘寇李汝虎狗牙齒等全省肅清又下部優敘光緒六年陝甘總督左宗棠以新疆南路平定正綰功最多詔交部優敘八年兵部侍郎許應騤疏薦人才稱正綰戎行久歷卓著戰功勇略過人長於撫馭洵將領中傑出之才十年法蘭西侵我越南海疆戒嚴命正綰率甘軍出關屯鳳凰城爲京師東防會和議成仍回本任十六年以上二旬萬壽賞加太子少保銜二十年恭遇慈禧端佑康頤昭豫莊誠壽恭欽獻崇熙皇太后六旬萬壽賞加尙書銜二十一年甘肅循化廳撤回爭教倡亂正綰督兵進駐河州力保危城旋以逆勢日熾師久無功詔革職留任二十三年開缺回籍是年卒四川總督鹿傳霖臚陳正綰戰績請量予加恩奉旨開復革職處分交部從優議卹尋賜祭葬

唐友耕

唐友耕雲南大關廳人咸豐九年滇匪李永和竄入川境圍攻敘州友耕自賊中投誠率所部連克華嚴菴真武翠屏等山賊巢立解城圍賊走青水溪進圍犍爲友耕馳至毀其營賊遁積功以千總拔補賞戴藍翎十年正月署通江營守備時賊踞敘州貢井天池寺由馬鞍山進攻賊分股撲犯新橋友耕扼橋堵禦斬賊目五名越日再戰復敗之賊旋入蒲江踞五通廠閏三月友耕迎剿連毀百丈場夾門關賊營又敗之百丈場外大坡頂古魯山等處逸賊分竄邛州友耕攔頭截擊大戰於水口受重傷邛州圍解陞守備賞換花翎四月會援峨眉抵索橋賊大至友耕衝鋒矛傷左頸猶力戰斃悍賊二十餘賊遁而北遂由夾江渡河攻洪雅雙福場踞匪破之賊尋踞天全州境之象鼻橋復同各軍進擊悉平茅山貓子墳一帶賊營擢都司賞給額勒莫克依巴圖魯名號六月署川北左營遊擊十月進攻丹棱礮斃守陴賊數十乘勢奪門入立復縣城以遊擊遇缺卽補並賞加參將銜尋敗賊溫江手刃逆酋藍二順十二月授會鹽營遊擊十一年賊由射洪竄撲潼川府城四月友耕與遊擊陳祥興等進剿疊毀黃連壩三臺山鳳凰山賊營三十

餘府城圍解陞副將八月四川總督駱秉章督師援綿州檄友耕由石橋鋪進攻友耕觀望不前致左右各軍敗退駱秉章奏請革職從之既以攻毀羅江略坪賊營仍留營效力十月官軍援眉州友耕由邛州引軍先至連破張鞍子快活山賊壘復攻張家坎水寨克之州城圍解開復原官十一月進擣青神途遇伏賊礮傷左腕仍督戰卒敗之既逆酋卯得興率悍黨數千攻參將陳祥興營壘勢甚危友耕怒馬衝入斬偽統領張興卯得興挺矛衝出友耕瞋目大呼格鬪良久卯得興帶傷遁友耕縱騎急追悍賊麕至刀矛環刺友耕血戰突出重圍身受矛傷者再諸勇趕至裹創復戰斬馘甚夥賞加總兵銜同治元年二月由邛州派隊迎剿髮逆賴裕新餘黨遇賊高家場與都司唐大有夾擊斃賊千餘三月粵逆石達開進圍涪州友耕由青神水路赴援攻其中堅敗之圍解以總兵陞用七月授四川重慶鎮總兵石逆自涪州大挫後由綦江永寧竄踞長寧友耕進圍之賊率衆來撲友耕以槍礮輪擊伺其疲開壘出戰由右路從山梁壓下賊衆披靡棄城去閏八月賊渡仁懷河竄至江津白沙鎮友耕督隊躡追襲賊大母山破之扶歡壩十二月賊踞敘州雙龍場分黨屯橫江爲犄角友耕分隊嚴扼安邊屏山自督所部直

趨橫江南岸執矛突陣斃悍賊數十名乘勢掩擊平賊卡數十二年二月橫江西岸敗賊數千竄至會儀溪新灘溪一帶與屏山一江之隔友耕恐逸賊乘閒偷渡遂過江設伏誘賊復大捷六月石逆搶渡金沙江爲官軍所扼不得進遂撲松林小河冀趨天全土司嶺承恩等絕其糧道賊知被困悉銳爭渡友耕督兵擊沈賊筏石逆奔至老鴉漩爲土兵所遏遂就擒捷入詔記名遇有提督缺出請旨簡放尋駐防江津綦江十二月授雲南提督是時貴州正安桐梓號匪紛擾川境駱秉章奏留友耕駐軍川南居中策應三年三月號匪竄南川友耕督隊會鄉練夾擊敗之賊旋由梓潼竄至綦江縣境復撥軍分路追剿抵蓋石洞斬馘數百八月粵匪踞甘肅階州駱秉章檄赴川北駐防昭化廣元陽平關一帶四年丁母憂詔改署雲南提督友耕呈請終制五年開缺回籍守制七年三月服闋閏四月署四川總督崇實奏留暫緩陛見募勇防堵川北允之八年奉調援滇軍至昭通值漢回構釁回匪李本忠等率黨剽掠村寨遂留駐昭通籌辦回務友耕剿撫兼施回衆獻首乞降魯甸肅清賞穿黃馬褂十二年因討平四川敘州土匪郭心齋等下部優敘光緒四年山西災友耕捐賑銀四千兩得旨照各省賑捐章程請獎六年署

四川提督八年卒諭曰署四川提督唐友耕於咸豐同治年間在四川帶勇剿賊屢著戰功洊陞雲南提督丁憂開缺後募勇援滇復經著有勞績光緒六年署理四川提督勤慎操防馭兵嚴整茲以舊傷舉發遽爾病故殊堪軫惜唐友耕著照軍營立功後病故例從優議卹並附祀四川提督占泰專祠以彰忠藎尋賜祭葬子紹聞四川候補通判

譚拔萃

譚拔萃湖南湘潭人咸豐九年由武童投效湘軍從參將劉松山攻髮逆於江西浮梁景德鎮及星子禾洞上下門村所向有功歷保至千總加守備銜賞戴藍翎十一年克復徽寧皖南肅清晉守備加都司銜並賞換花翎同治五年擒匪竄陝西省城戒嚴拔萃從松山馳剿戰於西安城南屢挫其鋒賊走同州朝邑分悍黨踞流曲王寮等鎮冀圖復逞拔萃乘勢急趨朝邑出賊前攔擊賊驚潰六年克復綏德州並解河津稷山圍積功擢免補參將以副將儘先補用賞給策勇巴圖魯名號當是時擒匪蔓延陝西河南山東直隸所在告警拔萃領軍躡剿七年二月大破賊於直隸深州之賈城村瓦口莊梨園村又敗之於祁州賊圍總兵郭寶昌

營不得出拔萃以數十騎直入重柵拔之得旨免補副將以總兵交軍機處記名遇有總兵缺出儘先題奏並賞加提督銜賞給正一品封典十二月陝回白彥虎倡亂結黨肆擾關隴震動劉松山率拔萃旋陝剿捕連破小理川店子寺周家嶮賊巢擒定邊回酋馬萬得馬棘子於陣餘衆奔竄陝北肅清詔以提督記名請旨簡放八年駐軍定邊越花馬池進規靈州八月與甘回戰於甜水河郭家橋回酋馬正和馬長順等傾巢出拒勢悍甚劉松山飭諸將分道接戰自率拔萃直搗中堅奮力衝突賊陣大亂各營乘其後毀賊壘二十餘賊由吳忠堡北遁阻阨不得前官軍合隊薄之擒斬千餘顧家寨踞賊懾於軍威結陝回崔三同踞顧家馬五等寨以抗官軍拔萃偵知乘夜掩擊破其外卡親督所部越濠入內薄先登舉火焚其堡乘勝進攻靈州勒諸軍爲壘俾選輕騎左右夾擊賊勢不支開東北兩門狂奔遂復靈州十一月分隊攻金積堡拔堡北村寨二十餘九年正月賊由東南胡家堡竄至秦渠南踞石家莊一帶空堡及馬五馬八條馬七等寨復由西南廢堡增置三壘拔萃等三路並進各指一壘奮力齊攻盪決無前擊斃回酋馬幅喜俘誠甚衆並下其壘賊竄踞馬五寨寨大而堅悍賊麇集提督劉松山躍馬督攻

歿於陣卽選道劉錦棠接統其軍拔萃隸焉是時賊謀犯吳忠堡營扼永寧洞水口以阻葉昇堡運道諸軍就河西採運賊騎聞出鈔掠錦棠議夾河築壘以護之未就而賊衆蠶至拔萃鈔賊後擊卻之復連下吳家堡王銀柵馬八條杜家寨賊壘陝甘總督左宗棠上其功賞換嘎什普祥巴圖魯名號十年六月進攻王紅連寨拔萃率壯士緣梯而登墜而復上者六七次斬首逆王紅連盡殲其衆郭家馬宏等寨亦平七月破賊於李花橋西及秦壩關西南八月又破之於金積東關賞穿黃馬褂十一年分防肅州北路賊騎竄炭井拔萃潛師襲之斬捕過當旋駐防靈州十三年署寧夏鎮總兵光緒元年六月督辦新疆軍務左宗棠檄辦西征採運局七月補寧夏鎮總兵二年正月以護防運道功賞頭品頂戴四月隨總理行營營務三品卿銜劉錦棠馳剿新疆回逆六月拔黃田賊卡追至古牧地斬關奪其隘復克烏魯木齊迪化州城賞雲騎尉世職九月進攻瑪納斯南城賊勢窮蹙盡棄眷屬輜重誓以死抗拔萃會同伊犁將軍金順督軍猛擊賊不敢近遂各就撫捷入奉旨照一等軍功例從優議敘三年三月攻達坂又馳會張曜徐占彪軍克復吐魯番城詔改騎都尉世職九月克復喀喇沙爾及阿克蘇烏什等城十一

月搜捕葉爾羌和闐逸賊生擒逆酋麻木爾哈的胡里吐爾的奴爾巴易等回疆肅清詔改一等輕車都尉世職十一年卒事聞諭日記名提督甘肅寧夏鎮總兵譚拔萃於咸豐同治年間隨同已故提督劉松山帶兵剿賊轉戰湖南江西安徽河南山東山西直隸陝西甘肅等省嗣經隨同劉錦棠出關豐克名城戰功卓著茲以積勞身故殊堪軫惜加恩著照提督軍營立功後在營病故例從優議卹並將生平戰蹟宣付國史館立傳以彰勞勩尋賜祭葬妾金氏殉旌表如例十五年慈禧端佑康頤昭豫莊誠皇太后歸政追念從前功績最著諸臣各賜祭一壇拔萃與焉

張得勝

張得勝湖南瀘溪人咸豐元年粵匪倡亂得勝投提督向榮營掌大纛臨陣屹立不少動向榮壯之以保守桂林追賊至湖南獎給七品頂戴二年隨道員李金鑾守長沙賊穴地轟南城二十餘丈悍賊執大旗率衆先登得勝手刃二賊股亦中矛卒奪其旗賊退城得無恙論功加六品頂戴三年三月從至湖北擒逆酋秦明九補經制外委四月乘夜泅水焚賊輜重奪其一船尋隨隊毀雞窠賊營七湖北

巡撫青磨保以把總拔補四年大軍克漢陽得勝與有功擢千總賞戴藍翎五年九月破賊仙桃鎮追北二百餘里陞守備十一月攻拔周家堡進克漢川晉都司六年武昌漢陽再陷七月按察使李孟羣檄領三百人攻漢陽西門屢刃賊首奪獲旗械身亦受重創敍功賞換花翎十一月率隊襲賊營縱火大軍乘之賊潰走斬溺無數生擒五百餘名再克漢陽擢遊擊賞愨勇巴圖魯名號七年五月李孟羣遷安徽布政使檄得勝率英山羅田團勇沿途剿賊連捷於金家堡一帶保參將十二月率八百人馳援河南固始突圍入城與知縣張曜固守之八年正月地雷發城圯得勝銜利刃手執火器直抵塌口殊死戰且鬪且塞賊不得入二月欽差督辦軍務勝保暨李孟羣兩路來援得勝自南門夜縋城斫逆壘賊驚竄李孟羣因得破西門賊營遂解重圍捷聞以副將陞用先換頂戴四月克安徽六安六月攻懷遠屢捷勝保疏稱得勝樸直性成勇敢出衆請交軍機處記名遇有陸路總兵缺出請旨簡放從之旋增募二千五百人號凱字營兼統湖南提標官兵時李昭壽擁衆二十餘萬竊踞滁州全椒一帶盱眙天長五河江浦浦口皆爲所有勝保欲降之計無所出得勝偵昭壽父母家屬皆匿潁州密啟勝保檄潁州守護

而善遇之得勝因取其父手函請往說降率親兵四人抵昭壽寨外大呼曰爾主帥相約會議可速報蓋知洪逆方遣使增昭壽僞封故大言相約以離間之至則昭壽盛陳兵衛露刃相向叱親兵四人分置別所得勝不爲動直入倨坐責其棄親不孝謀叛不忠害及生民累及宗黨不仁不義言未竟昭壽氣奪愧形於色得勝爲陳利害始出其父手書昭壽讀之俯首涕泣不能仰視得勝述主帥意勸之降且恐其疑貳密令昭壽族叔斬逆使以絕其念蓋稔知其叔屢勸昭壽反正而未果者李昭壽遂以所踞各城降洪逆聞之遣其黨大股來攻得勝迎擊於全滁連敗諸馬家壩三河集復在界牌池河藕塘等處累戰皆捷十二月授湖北宜昌鎮總兵留營帶兵如故九年二月總統楚勇馬步諸軍攻三汊河破僞忠王李秀成賊壘七以江浦浦口再陷馳往復之而僞英王陳玉成又率大股趨梁園圖北犯勝保檄得勝截剿至則賊已先抵梁園得勝簡精銳千人易賊裝攜火器夜分三隊由石塘橋出梁園之背自率一隊復分爲三先赴各村縱火約二將見火起猛撲賊營焚其帳賊疑內變驚亂得勝合兵大戰賊悉潰走方簡輕騎議追賊謀報李逆犯清江浦前鋒幾及汊河得勝星夜馳扼之持數十日賊不得逞六月捻

匪龔瞎子糾廬州踞匪吳汝孝等陷定遠得勝分駐明光鎮一帶堵剿八月賊大至力守十餘日糧絕退守盱眙勝保奏奪得勝職九月賊屢撲盱眙得勝先後擊敗之且斬吳汝孝於陣捷入詔開復仍授原官十一月剿平臨淮踞逆加提督銜十二月調福建建寧鎮總兵留營如故十年正月進規鳳陽親致擒首張滌出城擒之及賊目三十二人正法復其城三月下部優敘八月擒逆復圍鳳陽擊卻之十一年四月定遠踞逆分兵渡淮約蒙亳各捻併力北犯得勝遣將截擊屢挫其鋒得旨遇有提督缺出由軍機處題奏十一月克定遠十二月擊走固鎮橋逆匪命照提督例賞加封典同治元年二月進攻廬州扼紮北門破其附城堅壘四月偕各軍克之時陳玉成北竄又率兵追擊大敗之瓦埠河陳逆窮蹙走死壽州下部優敘五月剿撫定遠西鄉匪圩未兩月而定二年剿叛練苗沛霖累捷十月克蚌埠復懷遠既苗逆就殲巡撫唐訓方疏請遇有提督缺出儘先題奏從之三年八月六安土匪文占魁築圩抗官得勝捕斬之十月粵匪由湖北竄英山霍山得勝扼之於流波礮賊窮迫降者二萬餘人親王僧格林沁令簡輕騎追賊由皖之豫之楚之秦轉戰五千餘里回駐六安嗣以皖境肅清下部優敘四年五月擒首

張總愚賴汝洸等大股入皖圍布政使英翰於雉河集得勝赴援閏五月拔高爐集暨張圩賊壘復平渦河南岸賊圩數十六月圍解遂由龍山永城躡剿又豫遣三營繞出河南長葛以截其前是役也賊精悍傷亡殆盡命交軍機處記名遇有提督缺出儘先題奏並交部從優議敘十月賊擾河南光州固始偪近三河尖得勝繞出賊前設伏大敗之五年四月馳斬山東教匪許廣山等十一月擒首任柱等竄固始圍商城得勝進解其圍六年二月賊竄山東兩江總督曾國藩恐擾清淮檄赴窯灣防守運河南岸賊至郟城宿遷迎擊大破之賞換達春巴圖魯名號旋偕湘淮各軍撲滅任賴大股髮捻東豫肅清安徽巡撫英翰入告七年正月得旨加恩賞給雲騎尉世職閏四月赴山東臨清會合湘淮東豫各軍協剿西捻六月張總愚全股殲除賞穿黃馬褂凱旋留統水陸七營分駐皖豫間十年廣德州土匪嘯聚十一年業家集李六滋擾均撥隊往平之十三年日本肇釁臺灣調防江浦光緒元年駐東西梁山頻年江水泛漲派隊搶護和州屬沿江民圩數十處六年撤遣所部全軍五月陛見敕赴本任七年建陽客民聚衆械鬪得勝逮其魁治之解散其衆旋兼帶鎮武左營練兵九年法蘭西兵擾越南海防戒嚴得勝復

統凱字水陸各營籌辦福州海防十年正月營於長門海口閏五月法兵輪船進泊馬江得勝條陳戰守十事嗣聞基隆開仗稟請先發不果行七月館頭法輪以礮擊凱軍中營得勝率隊越嶺赴援法兵不敢登岸尋攻長門礮臺得勝偕將軍穆圖善發巨礮洞穿其船乃退既而法船由閩安攻長門金牌各營得勝豫爲布置攻四晝夜我軍皆伏溝眠脞伺其至急擊之法兵三登三敗多斬獲及溺死者擊沈划船數號又獲其二奪得地雷洋槍火箭等具法船盡退出口久之見無隙可乘乃他去事平敘戰功晉騎都尉世職十一年正月以上年恭遇慈禧端佑康頤昭豫莊誠皇太后五旬萬壽賞得勝母曹氏御書扁額玉如意江紬八絲緞袍褂料六月卒於防次遺疏入諭日記名提督福建建寧鎮總兵張得勝由行伍出師著績補授總兵上年在閩省扼守長門極力鏖戰尤爲奮勇見在因病出缺加恩著照提督立功後病故例從優議卹嗣福州將軍穆圖善等疏請將生平戰績宣付史館諭曰張得勝樸直性成勇敢出衆前在湖南河南江南直隸山東等省剿辦髮捻卓著勛勞屢膺懋賞上年扼守福建長門尤爲奮勇前經降旨優卹著將生平戰績宣付史館立傳並加恩予諡於福建省城建立專祠以彰忠藎尋賜

祭葬予諡剛勇十五年慈禧端佑康頤昭豫莊誠皇太后歸政屆期追念前勞賜祭一壇子桂芬襲世職大智安徽候補通判

趙鴻舉

趙鴻舉河南涉縣人道光二十五年一甲三名武進士授二等待衛三十年以遊擊揀發湖廣咸豐元年署荆門營遊擊調署督標右營遊擊赴黃沙河堵剿髮逆敗之於柳公廟又赴湖南永州防剿湖廣總督徐廣縉調赴行營三年正月調回湖北二月署武昌營參將四月因在永州剿賊出力保以參將儘先補用旋題補湖南綏寧營遊擊仍留營防剿四年六月奉檄赴沔陽會合營勇克復州城與賊戰於仙桃鎮楊林溝敗之又破賊於長江埠先是武昌城陷部議鐫秩至是以沔陽長江埠之捷准其免罪五年三月剿漢陽賊獲勝七月連破賊於八步街鮎魚套九月署湖北按察使李續賓奏調鴻舉隨赴漢陽中路十一月攻克蔡店十二月以鴻舉前在劉家橋截剿德安府賊並克復漢川有功賞戴花翎鴻舉自抵漢陽歷敗賊於西門橋五顯廟六年克復漢陽巡撫胡林翼上其功得旨俟補原缺後以參將儘先陞用七年三月仍補湖南綏寧營遊擊湖廣總督官文以鴻舉年

力強壯勇於攻戰仍奏留湖北差委許之旋隨湖北按察使李孟羣援安徽廬州克復英山霍山敍功免補參將以副將儘先補用先換頂戴又隨李孟羣追敗賊於蘇家埠麻埠八年正月髮捻諸匪合攻河南固始縣鴻舉救之城圍立解李孟羣以鴻舉隨剿獲勝疊有斬獲奏保得旨遇有總兵缺出請旨簡放四月由豫追賊至皖克復六安州九年四月回楚總督官文奏請開鴻舉本缺遇有兩湖副將缺出奏請陞補十年二月署理湖北提標右營遊擊九月湖北提督顏朝斌檄鴻舉統提標各營駐樊城操防十一年捻匪竄擾老河口鴻舉往剿克之四月署河南南陽鎮總兵赴歸德辦賊隨欽差大臣僧格林沁解界溝集團攻克王廟吳廟閻集賊寨九月復隨克盧廟邢大莊孟樓王新莊賊寨旋仍馳赴歸德防堵十月欽差大臣順天府府尹毛昶熙檄鴻舉前赴陳州一帶截剿亳匪屢勝之逆首陳大瀆等在汝寧一帶盤踞勢甚鷓張鴻舉隨毛昶熙馳赴汝寧十一月抵正陽關攻克閻家集楊家圍葉家圍各寨並收撫徐家圍二十餘寨乘勝進克楊莊孫樓等處得旨趙鴻舉馬隊已進紮銅鐘所有陡溝賊巢卽責令該總兵迅速攻拔並派兵駐防明港以便圍攻邢集迅殲醜類十二月鴻舉等攻克小王寨又收撫三

十餘寨官軍進規張鳳林老巢四面兜圍難民乘機內應縛送逆首李小成等開門降旋進攻邢集大敗之同治二年正月攻克李家寨並收撫譚家寨四十餘處嗣會同各軍追剿陳大濤至新蔡之陶園突有皖捻大股來援官軍迎擊殲斃甚多擒匪西竄沈項餘黨猶負嶠張岡等處二月鴻舉攻拔楊樓進偪張岡挑挖長濠晝夜圍攻壘卻援賊六月補湖南乾州協副將仍督隊移紮濠邊夜令各勇負蒿填濠登寨牆施放噴筒火彈奮勇直入拔之賊黨斬擒殆盡奉旨交軍機處記名仍以總兵遇缺請旨簡放時亳州東南一帶賊寨甚多命毛昶熙督飭鴻舉統帶各營扼要進剿並將該處擒巢次第掃蕩以期進擣雉河集等處老巢三年三月仍調赴汝寧攻克息縣趙寨王姓水圩及簡寨張寨誅賊首趙國良又以計斃巨捻簡世然五月馳赴新蔡阜陽攻克時玉洗寨張家大圩梁家灣寨擒斬擒首徐心田等八月隨僧格林沁堵剿羅山光山逆匪疊獲勝仗嗣以麻城敗賊被剿狂奔鴻舉馳赴信羅防剿賊東竄上巴河鴻舉隨僧格林沁探蹤迎剿進扼商城之松子關四年四月敘剿辦汝光擒匪功得旨著開副將本缺遇有總兵缺出儘先題奏並賞加提督銜八月張總愚大股圍攻南陽衆懼將潰鴻舉督兵團固守

手然大礮擊退之次日追剿七十餘里賊遁去六年襄匪程岱滋事鴻舉選兵三百馳剿平之七年剿平唐泌一帶土匪八年交卸署南陽鎮篆河南巡撫李鶴年奏請留豫差委詔如所請又因歷年防守宛城出力命以提督記名簡放十年補授南陽鎮總兵十一月入覲十一年二月回任五月皖豫交界捻匪李六等滋事鴻舉帶兵赴固始縣黎家集等處督剿擒斬匪首搜捕餘逆地方一律安靖十二年五月裕州小頂山捻匪復起鴻舉往剿平之光緒元年上御極恩詔加一級賞二品廕生內浙連界之四峰山刀匪嘯聚四出搶劫鴻舉會合陝楚各軍兜剿殲之三年以父憂去官六年服闋抵豫巡撫涂宗瀛奏留差委八年補山東曹州鎮總兵買莊河口頻年疊出險工鴻舉鑲修埽壩添築雙合嶺魚鱗舊磨盤各埽大隄又增築圈隄十年五月孫樓河隄大溜直衝平各埽鴻舉親冒風雨督率勇弁搶救全隄得以完善六月剿土匪於荷澤之沙土集十一年剿平鉅野鄆城土匪捕要犯吳極田於濮州之葛鉞寨東省伏莽未盡馬賊刀匪嘯聚出沒鴻舉所至剿平之十五年二月率隊赴鄆城范縣緝盜中途大雪感寒觸發舊疾卒十八年南陽紳民以鴻舉功績卓著遺愛在民稟請巡撫裕寬代奏在南陽府捐建專祠

並將事蹟宣付史館立傳疏入詔如所請

左寶貴

左寶貴山東費縣人咸豐六年由行伍投效江南軍營八年三月攻克烏江賊壘
獎六品軍功四月攻試姬橋七星塔連戰皆捷九年由揚州衝圍出赴六合大營
祕達軍書有功敘外委十年七月僧道菱塘等橋克復賞戴藍翎八月署兩江總
督薛煥檄寶貴以把總回江北招募并管帶六起勁勇駐防寶山十月燬平羅店
賊卡獎五品頂戴十一月擊斃援寶山賊首剝取繡龍黃馬褂以千總歸江南督
標儘先拔補並賞換花翎十一年九月嘉定逆酋糾合蘇城大股圍攻諸翟華漕
諸營偪近上海寶貴分隊出閒道迎擊賊不得逞同治元年復以固守寶山疊著
勞勩洊擢都司二年援解安徽蒙城縣圍隨同擒斬匪首苗沛霖遷遊擊三年堵
剿陽坊並克復金陵得旨以遊擊留山東儘先補用並頒賞獎武金牌一面四年
正月借補直隸固關營守備旋奉欽差大臣科爾沁親王僧格林沁檄赴前敵管
帶忠勇營五月解山東嘉祥縣圍五年莅守備任六年二月管帶河閒練軍赴山
東齊河等處防河尋回直隸追剿捻匪七年補天津鎮標遊擊捻匪蕩平晉參將

並賞加副將銜十年正月管帶古北口練軍馬隊後營六月調補廣平營遊擊十一年熱河朝陽縣東荒馬賊蠡起都統崇實檄寶貴統練軍馬隊馳往剿辦偵知賊由賓圖王旗沙坨子竄擾朝陽卽督隊截擊獲賊匪出一敖什布等十四名匪首周振升吳振英等又糾集餘匪意圖劫犯寶貴急追擊之於奉省林家窩鋪斬匪徒二十餘名手刺周振升於蘇家店並生擒吳振英等十五名波波屯及法庫門等處之匪首莊恆潰及悍賊劉洛疙痞馮海等以次成擒而巨匪王江王海等復自哈力套改老巢竄集招蘇臺河東一帶嗾悍黨出犯下馬格鬪勢尤兇悍寶貴身先士卒摧鋒直前立破賊圍擒王江等三十餘名而歸匪衆潰散東荒肅清以副將儘先補用並賞加總兵銜由是聲譽日起光緒元年刑部尙書崇實奉命赴奉吉兩省查辦事件請於朝以寶貴所部與俱當是時奉天湯溝逸匪方所在旬結謀相聚爲亂聞寶貴至遂惴於軍威悉黨竄依大東溝木匪宋三好宋三好者始因伐木徼利繼則私卡徵釐歷十餘年官吏不過問也駸駸入邊內肆剽掠爲居民患蓋大東溝夾山倚海僻在邊陲前阻潮溝陷甸馬步難施遂內樹木城多置槍礮復於沿海各岸預泊快船爲敗屢計自巨匪高希珍等由海洋島遁入

其燄愈熾署將軍崇實令寶貴急領練軍益以捷勝營八旗馬隊會同天津鎮總兵陳濟清分道進攻復命寶貴先馳騷陽邊門擇要策應匪徒知官軍四出亦三道分擾以相牽制使不得兼顧陳濟清由上游繞出賊前節節兜剿斃賊多名追及土門嶺突困賊伏力不支寶貴飛軍衝入東邊西決立解重圍匪衆奔潰斬酋日高希珍宋允導並悍賊二百餘名於陣生擒匪黨宋澆和王受山等三十餘名乘勝追殺於紅石砬子得宋三好誅之隨搗巢穴焚木城積匪殲焉捷入詔以總兵記名簡放並賞給鏗色巴圖魯名號嗣邊外東北之廟兒溝有金匪宮四負嵎自固糾黨渡江而西先發以圖再逞崇實以地近興京復飭寶貴馳剿甫出邊賊卽遁追之過江先焚燬老巢且追且戰自五道江至八道江多所斬捕窮追至二道江林木叢蔚軍士懼伏發寶貴督隊冒險直入搜獲宮四斬之其餘匪首張振東李豁子等無一倖脫者詔以提督記名簡放並賞白玉翎管白玉搬指大小荷包等件寶貴自是以客軍駐防奉天二年剿滅哈力套改一帶馬賊三年剿撫建昌朝陽一帶邊匪四年擒獲積年巨寇趙西來奉境無賊蹤矣六年古北口練軍回防將軍岐元奏留寶貴統領奉軍並總理營務翼長署將軍崇厚將軍慶裕以

營務嚴肅謀勇兼全直隸總督大學士李鴻章以勤明忠實驍果耐勞曉暢兵事謀勇兼優先後入奏得旨以提督總兵記名簡放十五年授廣東高州鎮總兵仍留奉天十七年秋熱河朝陽教匪事起寶貴由彰武臺門出邊會合各軍躬先陷陣連下賊圍五處並其西岸老巢復於白塔二十家子擊斃匪千餘名事遂平賞穿黃馬褂並賞給頭品頂戴二十年正月恭逢慈禧端佑康頤昭豫莊誠壽恭欽獻皇太后六旬萬壽慶典賞戴雙眼花翎五月日人肇釁侵我東藩詔趣各軍進兵朝鮮寶貴督師東下十日至平壤布置未定日人猝以衆數萬環攻寶貴急與豐陞阿合軍設伏奮力齊進日敗退追剿數里擒斬二百餘槍斃無算日人復由龍崗分道回攻寶貴卽令得勝之軍內外夾擊又斃千餘名日人憤甚遂率大隊越山猛撲鋒銳不可當我軍分段堅守別選精銳從旁游擊日陣仍不稍卻槍礮對施連夜達旦越日來攻益急知寶貴所統奉軍三營礮臺峙立城北爲諸軍冠遂併力疊犯葦葦此隘寶貴益嚴督兵弁奮勇血戰躬踞礮臺手燃大礮左右轟擊雖屢受槍傷猶裹創指揮誓死抵禦忽飛彈洞胸歿於陣事聞諭日記名提督廣東高州鎮總兵左寶貴久歷戎行卓著勞勩此次進援朝鮮在平壤接仗力疾

血戰奮不顧身已受重傷仍在礮臺督隊旋因胸前中槍陣亡實屬忠勇性成深堪憫惻左寶貴著照提督陣亡例從優議卹任內一切處分悉予開復加恩予諡入祀昭忠祠所有戰績及死事情形宣付國史館立傳並准於立功省分建立專祠該總兵子嗣幾人著李鴻章查明具奏候旨施恩用示褒揚忠烈至意尋賜祭葬贈太子少保銜予諡忠壯賞騎都尉兼一雲騎尉世職襲次完時以恩騎尉世襲罔替子國楫國棟國璋

劉明鐙

劉明鐙湖南永定人咸豐十年由武舉赴襄辦兩江軍務四品京堂左宗棠軍營隨同剿賊攻克江西德興及安徽婺源等縣有功保千總並加守備銜時逆酋李世賢率衆竄江西樂平明鐙拔營進剿擒斬悍賊甚衆建德德興股匪不能支大破之詔以都司儘先補用並賞戴花翎同治元年攻克浙江開化遂安江山及衢州府城詔以參將留浙江補用二年統帶新左三營又克復湯溪龍游蘭溪金華斬逆目倭天豫謹天豫拔難民數千十二月乘勝進攻餘杭克之遷副將武康德清石門竄賊以次蕩平閩浙總督左宗棠上其功得旨交軍機處存記遇有閩浙

總兵缺出請旨簡放三年湖州之賊分竄衢嚴意圖復逞明鐙率所部會同黃少春各軍出蜀口扼要兜剿復追擊逆首洪幅瑱於昌化斃悍賊萬餘斬賊目莫桂先李士貴等於陣賞加提督銜四年三月補授福建福寧鎮總兵四月統領五營由福建興泉赴安溪邊界相機進剿七月馳抵武坪進攻下瀾擊汪逆海洋於廣東鎮平縣克之會簡桂林賴長立等營駐軍西洋市偪攻嘉應州城賊負嵎自固不能制明鐙疾督隊直前並力合剿遂復其城賞加斐凌阿巴圖魯勇號五年調補臺灣鎮總兵並帶楚軍新左營九年正月回籍募勇赴甘肅援剿回寇八月行抵平涼大營與寇戰於靜寧秦安清水連敗之卽以得勝之師進攻狄道渭源賊望風遁去河州金積堡逸匪及岷州潰卒皆就撫詔以提督遇缺題奏十一年派委統領安西各軍十二年正月克復巴燕戎城交部優敘三月進規循化攻破上四工下四工卞勤等處窮回乞撫盡繳軍器馬匹四月又收復迪化十三年關內肅清仍帶安西中營駐防碾伯光緒元年移駐西寧二十一年二月卒遺疏入諭曰已故遇缺題奏提督前任總兵劉明鐙於咸豐同治年間隨同左宗棠轉戰江浙陝甘等省疊克名城卓著功績著准其照軍營立功後病故例賜卹生平戰功

事蹟並著宣付史館立傳以彰勞勩尋賜祭葬

劉步蟾

劉步蟾福建侯官人同治六年由文童選入福建船政學堂學習英國語言文字並測量駕駛等藝屢列優等獎八品頂戴十年學成隸建威兵船歷往南北洋及新嘉坡麻六甲檳榔嶼各島練習風濤沙綫十二年船政大臣沈葆楨奏獎五品頂戴光緒元年二月派往歐洲學習槍礮水雷等藝益臻精密保以守備留閩儘先補用並加都司銜詔如所請尋以步蟾曾在臺灣踏勘番社測量海口詳繪地圖沈葆楨追敘前勞請以都司補用五年北洋大臣李鴻章以步蟾穎邁英俊學有心得保奏擢遊擊並賞戴花翎以定購快船駕駛回華賞加副將銜十一年十月幫帶定遠鐵艦回華晉參將並賞加總兵銜十二年充定遠鐵艦管帶十四年以出洋接帶四快船回華敘功以副將儘先補用並賞強勇巴圖魯名號北洋新設海軍右翼總兵詔以劉步蟾補授二十年八月從海軍提督丁汝昌禦日人於奉天大東溝步蟾督同將士血戰三時之久擊沈日船三艘經北洋大臣直隸總督李鴻章奏聞詔以提督記名簡放並賞換格洪額巴圖魯名號二十一年正月

日人犯山東威海衛步蟾督率礮船迎擊斃敵甚夥卒以奮不顧身中礮死之事
聞諭曰海軍右翼總兵劉步蟾見危授命忠烈可嘉著照提督例從優議卹尋賜
卹如例賞騎都尉世職襲次完時以恩騎尉世襲罔替

郭寶昌

郭寶昌安徽鳳陽人咸豐十年由武童隸欽差大臣袁甲三軍解鳳陽圍獎外委
並賞戴藍翎旋改隸處州鎮總兵陳國瑞楚勝軍兼充全軍營務處十一年陳國
瑞駐師江蘇之高郵寶應捻酋龔瞎子以衆萬餘來犯寶昌率騎健十八人從間
道迎擊無不一以當百賊小卻大軍乘其後遂敗四月隨剿髮逆於同城鎮克之
六月進攻安徽之天長與賊大股相拒於龍岡寶昌兵才三百賊易之寶昌出不
意直搗中堅賊驚擾擒斬無算遷守備並賞換花翎同治元年正月捻酋李成任
柱等竄清江浦漕運總督王夢齡檄楚勝軍往援鏖戰於淮城之東車橋鎮賊勢
不支分衆劫淮關稅銀數萬兩而去寶昌亦分隊截追復奪還所劫稅銀賊益蹙
狂奔衆興集地險而僻賊夙倚以自固且饑疲弛臥不設備寶昌偵知之潛師夜
襲一夕破二十餘壘立拔衆興集捷入免陞都司以遊擊儘先選用並賞給卓勇

巴圖魯名號三月擒黨劉天幅韓四李永等憤衆興集之敗各糾合餘匪同竄泗州意圖再逞山東棍匪高圭宋三岡王廣才亦聚衆響應警報達邳州漕運總督吳棠檄楚勝軍剿之寶昌領所部精銳一戰克之於汭河再戰克之於沙浦莊所至莫敢與爭鋒二年三月土匪孫化祥據中村與任柱等陰相結納及中村人聞任逆疊爲寶昌所敗知外援已絕自縛化祥出降匪遂平積功洊擢副將由是軍聲大震五月科爾沁親王僧格林沁督師山東調楚勝軍赴白蓮池助剿甫至卽生擒賊目劉雙印斬其黨劉金春等於陣六月任柱勾連棍匪謀犯官軍淄州匪徒短辮子復煽誘寶泉山教匪分道肆擾僧格林沁令寶昌引兵討之任逆聞風宵遁短辮子當之輒披靡殺傷萬計僧格林沁上其功奉旨以總兵交軍機處記名簡放時賊仍踞白蓮池寶昌隨陳國瑞分兵由姬山康山兩路並進賊營綿亙二十餘里堅不能破會大風雨寶昌潛師踰濠攀垣而入陳國瑞繼之賊覺併力抗禦官軍不敢逼寶昌手刃怯卒一人衆懼奮勇直前賊大潰率其餘寇退保鳳凰山官軍四面兜圍相持卅月勢窮卽舉衆降白蓮池平時苗逆沛霖復叛江北州縣半爲所據獨蒙城未下苗逆攻之急僧格林沁令陳國瑞率寶昌馳救軍次

洪城立破賊三壘九月又攻破王家圩迺移軍河北與苗逆對壘夤夜引軍渡河築三壘爲掎角勢以斷賊饋運賊見大驚悉銳來犯寶昌堅守不出援軍續至賊斂隊自保寶昌亦深溝高壘以困之僧格林沁至命發開花礮攻擊賊營自亂宵遁苗逆死焉遂收復板橋集龍岡張家灣雙橋集駱駝鋪等二十餘圩削平苗家老寨擊散十八岡教匪下蔡賊懼亦以城降穎上壽州懷遠正陽關等處以次蕩平淮北肅清賞加提督銜三年五月命陳國瑞率寶昌赴安徽六合堵髮逆東竄適值髮逆擾及湖北麻城寶昌移師攻之圍立解僧格林沁諭寶昌才堪濟變令與國瑞分軍名曰卓勝至是寶昌獨當一面聲威駸駸與楚勝相頡頏矣八月賊酋陳得才及賊將馬融和等擁衆十餘萬闌入英山東北寶昌連敗之黑石渡馬融和議投誠未決寶昌單騎入其營呼酒與飲反覆數千言曉譬禍福融和感涕卽日降賞穿黃馬褂四年四月僧格林沁戰沒曹州寶昌以不能救護主將詔革職發往新疆五年三月安徽巡撫喬松年奏請暫免發遣留營效力允之六年正月命喬松年爲江總督曾國藩暨喬松年奏請暫免發遣留營效力允之六年正月命喬松年爲陝西巡撫松年率寶昌入陝征剿捻回乾州臨平鎮者捻匪勾結回逆麇聚之地

也東出則醴泉危西掠則鳳翔陷南北分擾則武功興平整屋邠州皆旦夕岌岌三月寶昌偕廣東陸路提督劉松山會師臨平一鼓下之未三旬而各城皆下卽以得勝之師移攻惠店捻首張總愚踞老巢不出官軍日夜挑戰四月張逆率悍黨萬餘陣於富平城下寶昌知逆計狡而悍非縱詭間伺虜隙時時出奇兵襲之不足制勝乃飭部將宋朝儒等設伏村莊自率親軍與戰佯敗走伏兵處賊至伏起寶昌回軍蹙之斬首萬餘級五月奉旨免其發遣留營剿賊六月賊入蒲城擾大荔寶昌由北山兼程疾走至永豐鎮探賊踞大荔之大濠又敗之九月奉旨開復原官賞還勇號欽差大臣陝甘總督左宗棠檄寶昌協同各軍於富平一帶築長牆以資堵禦十月克復綏德州賊由延長入山西吉州又由邠陽竄絳州官軍節節防剿賊乃由高平南走竄入河南懷慶彰德府等處寶昌日與衆軍躡擊所向克捷十二月補安徽壽春鎮總兵七年正月賊由彰德犯直隸磁州擾及邯鄲趙州破深州圍保定畿輔戒嚴有旨傳諭郭寶昌速顧西陵先行交部從優議敘寶昌聞警卽由東道馳援日夜連百八十里鈔出賊前於保定城西嚴陣以待賊見官軍盛急引去賞換法凌阿巴圖魯名號時各軍集直境賊迺復入豫寶昌追

至封邱東南之黃河套知張逆匿村民家諸軍謀生劫之寶昌怒馬獨出突遇賊受傷墮馬部將宋朝儒冒險直入東西盪決翼之以出事聞特賞假兩月安心調理並賞給荷包翎管搬指小刀火鏢等件以獎勞勩六月直東肅清賞還黃馬褂交軍機處記名遇有提督缺出請旨簡放並賞給騎都尉世職尋奉命從左宗棠赴陝征回土各匪以傷未痊愈命安心調理俟痊日西行八年正月赴陝敗賊於宜川二月又平叛卒於綏德州其延安交界各縣之遊匪潰勇皆懾於聲勢莫敢抗犯回逆意圖東竄河防不靖復命左宗棠飭寶昌前赴山西聽候巡撫李宗羲調遣九年二月河西土匪剽掠呼家寨等處寶昌派兵渡河搜剿敗其衆湖廣總督李鴻章來陝赴援奏調寶昌搜緝北小土匪殲焉十年赴壽春鎮任十一年霍邱縣蔡家集土匪李六叛破附近村莊勢將蔓延寶昌遣輕騎百人誅渠魁而還事定賞頭品頂戴光緒二年以平河南永城叛匪李玉龍及渦陽李家破樓等處土匪功上嘉其不分畛域下部優敘嘗建宗祠一所內立義塾俾族人子弟貧不能讀者肄業其中置田二千餘畝供祭祀義塾之用有餘則爲贍族中婚嫁死喪及恤養孤寡諸費安徽巡撫裕祿以聞賞給匾額一方六年以議交收伊犁條約

與俄羅斯有違言上命寶昌領軍守榆關十年法蘭西侵我越南以兵艦分擾南洋長江震動寶昌率所部卓勝四營駐東西梁山及蕪湖一帶以固江防十月恭遇慈禧端佑康頤昭豫莊誠皇太后五旬萬壽賞御書扁額及如意紬緞等件十二年以母老乞終養允其開缺仍留統帶二十年日本犯遼陽詔寶昌率師北上二十一年三月至京授廣東南韶連鎮總兵旋和議成寶昌以終養人員不當遠官兩江總督劉坤一爲奏請開缺回籍不許七月調補壽春鎮總兵二十二年丁母憂特旨改爲署任二十四年渦陽匪變寶昌馳剿擒斬匪首劉疙痞邵大發等餘衆解散賞給翎管搬指小刀荷包等件是年服闋補授壽春鎮總兵二十六年卒總督劉坤一奏聞諭日記名提督安徽壽春鎮總兵郭寶昌於咸豐年間投效軍營轉戰直隸江蘇安徽河南山東山西湖北陝西等省所向克捷卓著戰功歷膺專閫均稱厥職統帶卓勝全軍辦理皖防尤資得力茲據奏稱因病出缺深堪軫惜郭寶昌加恩著照提督軍營立功後積勞病故例賜卹任內一切處分悉予開復應得卹典該衙門查例具奏尋賜祭葬二十七年劉坤一復臚陳戰功卓著遺愛在民籲懇宣付史館立傳並准捐建專祠詔如所請行

鄧安邦

鄧安邦廣東東莞人年少僑居省城東門有孝友之稱咸豐三年紅匪倡亂安邦應募爲東關團練勇日四年六月賊酋李文茂犯省城安邦率三百人敗賊小磨盤山追至佛嶺市焚賊巢二總督葉名琛於五層樓觀戰見其縱橫盪決所向無前稱爲鄧勇士獎六品軍功閏七月隨護新會營參將衛佐邦防剿省垣東路三寶墟燕塘踞匪連捷於東明寺發瘋院斬馘數百進攻燕塘賊以大礮扼橋頭抗拒安邦奮進殲悍賊數十名賊潰獲礮四官軍攻入燕塘毀其巢三寶墟賊聞風遁八月同破北路棠夏村三家店踞匪並燬東路賊巢六九月攻北路牛欄岡填濠先入拔之再敗賊松柏嶺同拔蕭岡義勇祠乘勝助攻佛嶺市平賊營二十餘餘匪聚陳田江夏馬務各鄉乘勢攻破之越日官軍復大捷賊遁殺功以外委撥入廣州協營拔補五年二月隨同知林福盛等進攻順德拔陳村賊營三月林福盛會水陸各軍由大門窰直擣縣城克之安邦手擒逆首馮大親吉遷把總賞戴藍翎六年提督崑壽攻和平安邦乘大霧拔小南門各軍繼之復其城擢千總七年補陽春營頭司把總八年英人犯廣州安邦敗之城東榕樹頭追至西牛角斬

馘二百餘越日再戰復敗之九年補肇慶協右營左哨千總十年調廣州城守左營右哨千總同治二年以查獲會匪出力陞守備三年五月擒盜首葉烏欖頭除省城積年巨患擢都司賞換花翎既髮逆汪海洋竄踞福建汀漳分黨陷武平永定將窺廣東安邦隨按察使李福泰帶勇堵剿十一月安邦以五千人疾趨武平會副將方耀知府吳贊誠等軍破賊伏拔其壘直薄東門克之十二月偕方耀復永定四年逆酋丁太陽陷詔安衆二十餘萬三月安邦進駐下饒之分水關賊出大隊如牆而進安邦躍馬以擡槍隊擊之賊不少卻乃分兵鈔其右賊驚走遂薄詔安城二十餘戰皆敗之五月鑿隧道引火轟其郭賊棄城遁蹙之河溺斃無算降其衆五千餘解散難民八千有奇閏五月汪海洋陷鎮平分兵圍平遠安邦赴援馳兩晝夜抵城下飢疲無糧雜取芋薯食之力戰解圍再敗賊大柘超竹平其壘降嘉應龍虎圩踞逆僞利王朱興隆僞稽王吳玉堂六月汪逆犯嘉應安邦自龍虎圩折回與副將林保等合兵擊卻之時福建延建邵道康國器督所部自州境松源移駐嵩山安邦爲之鄉導戰屢勝賊尋陷嘉應十二月官軍環攻遂宵遁安邦追至黃砂嶂殪尾賊百餘各軍分路追及悉殲之東南餘孽平擢遊擊留廣

東補用並加參將銜賞給銳勇巴圖魯名號五年補廣州協左營中軍都司六年巡撫蔣益澧督攻新寧曹冲客匪安邦與總兵周廷瑞副將謝德元等連營節節進剿踰冲金山直徧田頭寨築礮臺環之屢戰皆捷賊窮蹙赴營乞降曹冲一律就撫擢參將賞加副將銜七年調崖州協陸路中軍都司尋署撫標中軍參將十二年總督瑞麟奏稱安邦才具穩練勇敢有爲督率各員弁辦理緝捕事宜實力實心不辭勞怨數年以來拏獲要犯甚多迄今外洋內河盜匪斂迹海道又安商旅得免戒心覈其勞績實屬異常出力請俟補參將後以副將儘先卽補從之光緒三年補清遠營遊擊尋署廣州協副將四年盜首歐就起等結黨二百餘人乘間襲踞佛岡廳安邦約署南韶連鎮總兵鄭紹忠督帶民團結內應乘勢攻入擒斬逆黨百餘名復其城歐就起旋就獲總督劉坤一奏入諭曰鄧安邦於本年進剿佛岡廳匪徒迅速歲功其平日剿辦各股土匪亦能得力著交軍機處記名遇有總兵缺出請旨簡放十年剿捕惠州捻山匪黨擒逆首黃金鞍李亞都等尋丁憂十二年服闋授廣東潮州鎮總兵十三年辦理東莞增城積匪十四年卒兩廣總督張之洞奏安邦以勇目奮迹行間大小三百餘戰未嘗敗衄捕斬巨盜尤不

勝數平日躬行節儉而厚於養士遇事推誠故士卒樂於用命所向有功所部兵勇頗多驍悍難馴之徒該故鎮善於駕馭能令各盡其長與提督方耀鄭紹忠齊名有粵東三將之稱光緒十年臣來督粵時防務方殷該故鎮尙未服闋臣奏署廣州副將駐守魚珠築成洋式礮臺七座自創地雷地營軍民輯睦深資捍衛連年講求海防所有籌款咨商閩廠協造兵輪以及添購臺礮船礮查勘沙田辦理土鄉等事該故鎮贊成之力爲多臨歿之際語不及私所具遺稟惟以綏靜地方爲念實屬一時良將未易多得請敕部照軍營立功後病故例從優議卹並將該員戰功事蹟宣付國史館立傳詔如所請子禮賢舉人仕康前刑部郎中吉暉守備仕奇把總

徐占彪

徐占彪四川西充人咸豐十一年以勇目投效本省軍營同治元年剿賊於天津坪有功獎六品翎頂以把總補用嗣隸道員黃鼎軍歷戰陝甘所至常爲軍鋒五年克復階州擢守備加遊擊銜六年陝西叛回崔三糾甘回米賈張非等分道寇汧陽鳳翔黃鼎率占彪邀擊張非於汧川黃里鋪大敗之張非收餘黨與崔米合

竄擾鳳翔岐山扶風間占彪隨黃鼎追擊復大敗之賊遂遁散詔以副將儘先補用並賞給堅勇巴圖魯名號七年與賊戰於靈臺生擒回酋禹得彥復以總兵留於陝西補用八年二月董志原回逆陳林等糾集悍黨傾巢東犯分踞正寧南北兩原及永樂堡白吉原官河原各地黃鼎時官陝安道偕占彪統所部由邠州渡涇嚴陣以待並約提督雷正綰會剿陳林馮君福率騎賊千餘來犯馬正和于彥祿等分十餘路蜂擁續至路約一二千人橫亙十餘里占彪率先鋒迎擊中軍繼進賊氛四合官軍結方陣環攻冲其中堅截賊陣爲兩前後不得相應馬隊乘之賊遂大敗陝甘總督左宗棠上其功奉旨以總兵遇缺儘先題奏並加提督銜九月進剿甘肅中路土寇敗賊首張貴於底店鎮賊黨悉衆來援分隊擊敗之陣斬悍賊數百平門扇岔等處賊壘遂進攻岳家堡賊望風棄堡去乘勝攻克威戎堡馬建堡擒斬約四五千名平賊巢十餘處中路土寇以次肅清賞換哈西巴巴圖魯名號十年平金積堡賊巢賞穿黃馬褂金積堡者靈州所屬最稱險固賊首馬化澂父子踞爲老巢黨徒四出寇擾兩省以此堡未下終不能平左宗棠派軍四面兜剿占彪率敢死士冒險深入奪其隘賊遂大亂馬化澂父子兄弟及逆黨譚

生成等俱伏誅當是時蜀軍鋒銳甚占彪每戰必身先陷陣左宗棠尤倚任之十一年進規肅州大小數十戰輒出奇制勝賊悉斂入城閉門自守占彪苦兵單難合圍分隊紮要害處蹈瑕卽攻使不得逞泊諸軍雲集左宗棠督師親臨逆首馬四窮蹙乞撫遂收復州城捷入得旨徐占彪身先士卒卓著戰功著加恩賞給雲騎尉世職事平移軍關外從左宗棠攻取新疆克騰木關展連沁等處旋克吐魯番滿漢兩城駐軍木壘河以時操防光緒八年署巴里坤鎮總兵旋奉旨補授十五年因傷病奏請開缺十六年卒遺疏入諭曰已故前任甘肅新疆巴里坤鎮總兵徐占彪於咸豐同治年間在陝甘軍營剿辦髮捻回逆復隨同左宗棠出師關外勇略過人戰功卓著徐占彪著照提督軍營立功後積勞病故例從優議卹生平戰蹟准其宣付國史館立傳並附祀陝西甘肅新疆等處左宗棠專祠以彰勞勩尋賜祭葬

徐邦道

徐邦道四川涪州人咸豐五年由武童投效湖北軍營隨攻漢陽府城克之獎千總七年按察使李孟羣援安徽連下英山霍山兩城邦道以功陞守備賞戴花翎

是年攻賊六霍之間毀蘇家埠賊巢加都司銜八年克三仙莊進都司加遊擊銜九年四月再復霍山縣擢參將十二月粵逆竄至六安州二十里鋪副將盧又熊令邦道等分路迎擊掩殺數十獲旗槍刀矛稱是巡撫翁同書以捷入報聞尋回本籍籌防同治元年逆首石達開從南沱一帶偷渡朱家觜撲涪州城四川總督駱秉章檄軍進剿邦道帶練首先陷陣奪據山梁官軍乘勢縱擊盡毀仰天窩賊壘俘斬數千城圍立解邦道擢副將二年越境援陝西漢中俘偽瑞王藍城春之弟巡撫瑛棨奏聞奉旨候補副將徐邦道著賞給冠勇巴圖魯名號旋因漢中府不守褫職時副將楊鼎勳從援江蘇邦道往隸其營三年正月攻宜興荆溪燔附郭賊卡再敗之上湖橋遂克兩縣城乘勝復溧陽進擊金壇城外賊壘平之二月援常熟疊克王莊顧山陳市圍解三月進薄常州陳渡橋楊鼎勳中賊槍揮將士格鬪破賊營十餘復會各軍墮小南門西門賊壘四月巡撫李鴻章督攻益急各軍奮進遂克常州府城五月助剿浙江長興擊退賊援剗平上莘橋鴻橋跨塘橋賊壘謀而登克其城七月進拔湖州府四年四月隨提督郭松林楊鼎勳航海援福建連克漳州府漳浦縣五月克復詔安閩境肅清閩浙總督左宗棠彙保開復

邦道原官六年四月隨提督劉銘傳剿捻湖北大勝於黃安紫屏鋪賊竄山東境十月踞濰縣松樹山劉銘傳令邦道輕騎致師大呼殺入銳不可當官軍乘之三路並進燼賊館十餘殪賊衆二千逆首任賴牛三股糾集悍黨分道來犯邦道等縱橫盪決連擊破之疾馳而下追至江蘇贛榆邦道等以偏師由城西進兜剿牛賴兩股使首尾不能兼顧大軍萃於任逆大破之任逆伏誅餘衆擒斬略盡湖廣總督李鴻章保以總兵記名簡放十一月邦道以騎隊追賊連敗之諸城注溝壽光安堦鎮及洋河巨瀾河之間陣斬僞首王范汝增僞列王徐昌先賊目鄭馬糊生擒萬餘殺斃不可勝計十二月賊越沭陽六塘河趨淮安爲漕運總督張之萬軍所敗餘賊竄揚州灣頭道員吳毓蘭邀擊俘僞遵王賴汝洸斬之賊衆悉殲東捻平論功邦道保以提督記名簡放七年正月捻首張總愚由陝東竄馳突直東豫三省三月大軍邀賊於濬縣大伾山楊鼎勳督邦道等扼山左搏戰兩時賊潰走擒悍酋常虎兒等十餘老賊數百陣斬甚夥賊從東昌李海務渡運東趨官軍縱騎疾擊邦道等掩其旁賊復潰於是官軍西防運河東守滄州滅河四月賊撲滅河牆邦道嚴扼橋口擊卻之六月諸軍蹙賊在平滅之西捻亦平捷奏入奉旨

徐邦道著賞換鏗僧額巴圖魯名號並賞給正一品封典旋奉部議層遞駁正開復副將之案改爲寬免處分總兵保案改爲開復原銜提督保案改爲開復副將八年中原肅清命以總兵記名既領楚軍馬隊入陝援剿十一年二月提督曹克忠檄防鳳縣寶雞十二月收撫奇營潰勇在事出力賞加提督銜借補甘肅中衛協副將十三年署江蘇徐州鎮總兵光緒四年特旨擢提督六年調駐直隸天津軍糧城十五年補授正定鎮總兵二十年正月上諭朕欽奉慈禧端佑康頤昭豫莊誠壽恭欽獻皇太后懿旨直隸正定鎮總兵徐邦道著賞給如意一柄用寶壽字一方十月調防遼陽田莊臺白廟子因蓋平失守赴援遲緩革職留任二十一年在防病故諭曰依克唐阿奏總兵在營病故臚陳戰績請旨優卹一摺革職留任直隸正定鎮總兵徐邦道前在軍營轉戰湖北四川江蘇直隸山東河南等省屢著戰功擢任直隸正定鎮總兵訓練操防均能稱職茲在防所病故軫惜殊深徐邦道著開復處分照軍營積勞病故例從優議卹尋賜祭葬

清史列傳 卷六十一

新辦大臣傳五

王德榜

王德榜湖南江華人咸豐二年髮逆竄擾江華德榜以監生偕兄吉昌散家資募勇剿賊三年團練大臣侍郎曾國藩檄吉昌剿寧遠道州常寧土匪四年剿龍陽益陽湘潭等處土匪獎六品軍功五年巡撫駱秉章檄吉昌援江西從官軍克復萬載新昌上高安義靖安等縣進攻奉新吉昌戰歿德榜領其衆七年正月拔奉新進攻瑞州裹創力戰復其城歷保府經歷州同賞戴藍翎復從官軍攻豐城埽平白馬寨賊壘援廣信肅清江西東路隨將軍福興率師援浙克壽昌解衢州圍克復江山常山開化處州遂昌等城德榜功爲多擢知州九年二月轉戰至安徽克婺源晉直隸州知州加捐道員先是逆匪踞江西景德鎮扼江西安徽浙江三省門戶官軍久攻不下六月德榜會諸軍攻克之十年剿賊廣信連戰皆捷賊遁入浙德榜移防玉山十一月賊來犯擊走之賞換花翎十一年三月僞侍王李世

賢自開化圍玉山六月賊復自常山來犯德榜連戰破之八月僞忠王李秀成糾股大至志在必逞德榜激勵士卒隨機堵禦俘斬甚衆卒卻之先後論解圍功賞給銳勇巴圖魯名號並加按察使銜同治元年三月以所部索餉譁爭又違浙江巡撫左宗棠節制越境駐廣豐爲江西巡撫沈葆楨所劾革職留營尋回援浙江平江山花園港賊壘克十字街逆巢進軍龍游賊以死拒久不拔二年正月築三壘城南以偪之賊窮蹙宵遁左宗棠奏請開復奉旨以道員留浙江補用並賞給二品封典三月移防江西浮梁逆酋黃文金踞鄱陽石門司陶溪渡增壘浚濠負隅死守五月德榜率師進剿及賊於崇光渡斬千餘級削平諸壘遂會諸軍攻陶溪渡偪壘而陣縱火焚之斃賊無算捷聞奉旨仍以道員留浙江儘先補用進攻石門大敗援賊於鐵鑪岡賊竄走三年三月攻賊華埠乘勝進解廣信圍賞布政使銜四月僞烈王林彩新犯弋陽德榜力戰敗之詔軍機處存記遇有道員缺出請旨簡放五月擊逆酋汪海洋於陳湖坊進軍安仁敗賊鷹潭羅田六月攻東鄉七月克之八月攻湖州竄賊於開化復其城回剿江山玉山廣豐鉛山連戰皆捷受降數萬人於是湖州廣信諸路皆平論功詔以按察使記名簡放時逆酋李世

賢汪海洋游弋浙粵邊界由廣東犯福建之武平遂陷龍巖南靖古田永定諸縣
閩浙總督左宗棠調德榜援閩四年正月署福建按察使二月實授德榜次師汀
州與幫辦軍務大臣劉典分路進剿敗賊新泉賊退踞下車南嶺一帶德榜令部
將李運勝王福泰夜襲賊壘拔之躬率諸軍繼進破賊馬洋洞禾樹凹賊自南陽
來援又敗之斬悍賊無算斃賊目汪海林於陣德榜以古田不克後路堪虞乃飭
諸將攻其南自攻其西兩軍夾擊乘勝逐北追之小池當是時李世賢踞漳州汪
海洋踞南陽相爲犄角海洋雖疊屺其黨皆驍悍能戰謀與世賢合德榜回軍新
泉以截之海洋糾其悍黨分道猛撲德榜率諸將奮擊復合劉典軍躡賊前後夾
擊斬賊精銳略盡半溺於河海洋回竄南陽官軍攻之急棄不守走金豐苦竹梅
林上下奎洋一帶德榜分攻金沙賊壘斃賊無算逆酋丁太陽窮蹙率衆詣劉典
降李世賢於漳州東北烏頭門增築營壘謀襲官軍後四月德榜檄諸軍合擊遂
奪烏頭門復漳州李世賢走永定餘賊竄南靖德榜率軍追敗之汪海洋既爲劉
典所敗由大埔走南靖德榜適至與典合軍奮擊復南靖海洋走廣東鎮平殺功
賞換達冲阿巴圖魯勇號旋擢布政使海洋復自鎮平南竄嘉應州德榜會援粵

各軍築長圍困之海洋遣其養子汪長林僞王李海清等三百餘人與其妻張氏圖出走爲德榜所俘皆伏誅十二月官軍復嘉應誅海洋搜捕逆黨招降四萬餘人捷入賞穿黃馬褂五年督軍回剿興化泉州各屬積匪閩境肅清德榜以親老力請終養允之六年丁父艱十年欽差大臣陝甘總督左宗棠奏調德榜剿河州逆回攻邊家灣三家集踞賊裏創血戰平賊壘數百回匪以河州大東鄉太子寺爲巢穴德榜進攻甘坪拔之會各軍剿大東鄉奪其要隘分軍攻太子寺擒斬悍賊馬哈思等十一年總統甘南四百餘營底定全境招撫回衆十餘萬復以狄道河渠湮塞廣開水利溉田百餘萬畝甘民便之尋以關隴肅清賞加頭品頂戴光緒元年丁母憂回籍六年起復奉旨交陝甘總督左宗棠差遣委用時俄羅斯以改議交收伊犁條約有違言宗棠督師出屯哈密令德榜率舊部取道蒙古草地赴張家口備俄七年宗棠入京調德榜教練火器健銳營復從宗棠勘治永定河上游工程八年工竣九年正月奉旨交浙江巡撫劉秉璋差遣委用德榜旋乞假省墓允之三月兩江總督左宗棠奏留德榜修治朱家山河工十一月法越構釁奉旨馳赴廣西關外助剿十年二月抵越南時廣西巡撫徐延旭固守諒山遷延

不進以提督黃桂蘭道員趙沃駐守北寧戰不利北寧陷桂蘭及趙沃皆逮問上命德榜署廣西提督駐軍觀音橋以遏法軍閏五月復命蘇元春代之旋詔德榜入關九月奉詔出關當那陽一路進偪船頭累戰皆捷以援諒山不力革職十一年二月駐軍油隘法軍攻鎮南關德榜自閒道出法軍後敗其援軍奪糧械無算越日進軍甫谷遇法軍又敗之盡獲其槍礮子藥復揮軍夾擊法軍大潰追奔十餘里斃法兵二千餘乘勝合諸軍攻諒山克之進克谷松觀音橋屯梅前失地盡復捷入奉旨開復革職處分賞給白玉搬指白玉翎管大小荷包和議成德榜乞假回籍十五年授貴州布政使十九年卒巡撫崧蕃奏聞諭曰貴州布政使王德榜前於咸豐年間在籍募勇剿辦髮逆調援江西安徽疊克堅城身受多傷嗣後轉戰浙江福建廣東廣西甘肅新疆各省均著戰功擢任貴州布政使克勤厥職茲聞溘逝軫惜殊深著照布政使例賜卹生平戰蹟事實宣付國史館立傳以彰勞勩尋賜祭葬子漢雲戶部郎中漢文分省補用知府

劉連捷

劉連捷湖南湘鄉人咸豐五年以外委隸知縣劉騰鴻湘後營擊賊湖北之咸寧

蒲圻遂與寧紹台道羅澤南合軍規武漢肉薄而登受傷幾殆卒復其城羅澤南以謀勇兼優薦諸湖北巡撫胡林翼卽委帶副後營獨當一路六年敍剿賊功獎千總並賞戴藍翎嗣江西瑞州臨江袁州吉安四府相繼陷連捷偕劉騰鴻由新昌上高以援瑞州軍其南城賊懼詐降期夜分獻城而陰伏大隊於城廂左右乘間來襲連捷嚴陣以待得不逞翌日劉騰鴻督師攻城中礮陣歿連捷憤甚百計苦攻竭三日夜之力拔之擒逆首嚴守和於陣團練大臣兵部侍郎曾國藩許爲儒將改保文職八年三月奉旨以知縣留江西補用並賞加同知銜先是賊屯吉安阜田擾臨江爲知府張運蘭軍所敗竄走峽江至是連捷會九營之師馳剿賊分三路拒戰中路賊佯令騎解鞍放馬陳輜重餌我他軍失次連捷獨整隊山立人殊死戰賊駭奔乘勝進駐吉安隸同知曾國荃軍八月克吉安九年三月奉旨以同知補用並賞換花翎曾國藩復檄連捷赴皖助剿十年正月大敗逆酋陳玉成於小池驛太湖潛山兩城皆下擢知府三月從道員曾國荃屯集賢關進攻安慶援賊陳玉成率悍黨大至十月破走之十一年三月陳玉成再至句結捻黨二十餘萬入集賢關圍攻曾國荃軍連捷出奇襲擊大小數十戰陣斃賊之精銳於

菱湖及集賢關先後以六七萬計八月復安慶晉道員賞給果勇巴圖魯名號自是廬江舒城及泥汊口神藤河各要隘皆平九月敗賊無爲州同治元年三月又敗賊巢縣含山和州加按察使銜四月連克太平蕪湖各郡縣並奪回金柱關東西梁山秣陵關江心洲賞三品封典六月江蘇布政使曾國荃進規江寧連營雨花臺連捷所部居顏行逆酋李秀成以勁賊六十萬來援官軍固不滿三萬賊圍數重壘土列巨礮環攻復穴地轟官軍營壘兵士死亡枕藉有議暫退江北避賊鋒者連捷不可使其弟歸訣父母誓以身殉日率死士捍營礮發卽伏稍閒則乘懈出擊令善聽者循聲知所穴處迎而掘之殲其人歷四十六晝夜如一日賊計窮遁去詔以按察使記名簡放加布政使銜時金陵圍師倚無爲州通餉運連捷急率三千人繞出賊前扼城以守賊至卻之二年與道員毛有銘合軍營城外石澗埠李秀成復困我長圍軍糧垂盡雜驢馬爲食猶不得一飽侍郎彭玉麟蠟丸爲書謂兵少賊多徒死無益宜伺隙突圍出以圖再舉自願代爲任過連捷得書感泣仍決計堅守嗣道員彭毓橘援軍至表裏合擊賊敗退交部優敘四月移攻東關賊所恃爲窟宅也連捷飭驍健數十人木罌渡江縱火焚壘水陸夾擊之再

復巢含和州諸城賞穿黃馬褂江北事稍定乃謀合圍江寧約水師進攻九洑洲遏賊接濟連捷力爭下關賊壘兼斷城援突賊礮如雨飛中左右從者皆殫血濺衣不爲動賊衆愕然無敢偪者三年六月龍膊子地道成連捷促諸軍即日舉火從倒口衝入戰於太平神策儀鳳等門東邊西決當者辟易江寧平兩江總督曾國藩上其功詔以布政使記名簡放賞頭品頂戴給騎都尉世職十月逆首汪海洋敗竄廣東嘉應州境連捷追殲之四年東南底定凱撤旋籍光緒四年山西巡撫曾國荃奏令駐防關外包頭六年俄羅斯以議交收伊犁條約有違言國荃遣連捷移屯山海關備戰守十年曾國荃總督兩江適法蘭西侵我越南沿海戒嚴復奏令連捷募舊部防守沿江一帶十三年監修江陰黃山洋式大礮明臺工甫竣七月卒曾國荃臚陳戰蹟以聞諭曰頭品頂戴記名布政使劉連捷秉心忠摯謀勇兼優於咸豐同治年間經曾國藩胡林翼曾國荃檄令統帶湘營轉戰湖北江西安徽江蘇等省身經千數百戰收復大小城隘百餘處同治三年克復江寧省城厥功尤偉嗣於光緒四年曾國荃派包頭一帶駐防六年移軍山海關屯守十年派赴沿江等處扼紮歷著勳勞深資倚任茲聞溘逝軫惜殊深劉連捷著照

布政使軍營立功後在營病故例從優議卹加恩予諡原籍及立功省分准其建立專祠由地方官春秋致祭並將戰功事蹟宣付國史館立傳以彰忠盡尋賜祭葬贈內閣學士銜予諡勇介

劉倬雲

劉倬雲湖南寧鄉人兄陝西巡撫諡果敏典自有傳少隨兄讀書長沙與湘鄉羅澤南友善既冠食餽縣學會髮逆石達開圍湖南寶慶所在震動巡撫駱秉章檄典主寧鄉團練倬雲佐兄治軍書兼任籌餉事同治元年浙江巡撫左宗棠調典統楚軍赴浙助剿倬雲充營務處克遂安援衢州平石門花園港賊壘十四倬雲遂領偏軍獨當蘭溪一路二年正月克蘭溪斬賊二千餘龍游湯溪及金華府城同時皆下乘勝進克浦江諸暨二月赴援皖南大破賊於潛山進規休寧拔黟縣父病假歸旋丁憂三年左宗棠以軍事急調典兄弟仍赴浙助剿會江寧平巨酋李世賢汪海洋迸走江西倬雲力扼臨江使賊不敢西遣諸軍分襲崇仁東鄉宜黃各城克之倬雲先以功獎訓導至是晉知縣並賞戴藍翎旋從左宗棠入閩四年正月敗賊龍巖躡擊至南靖降賊將丁太陽閩中郡縣悉定汪海洋駭竄廣東

倬雲兄弟從左宗棠追之入粵各軍皆集會克嘉應汪海洋伏誅保以同知直隸州補用並賞戴花翎其克龍巖也城中糴米半爲賊焚掠軍民乏食倬雲倡議假鄰縣倉米並遣員渡臺購運糶之龍巖懷其德爲立生祠五年省親歸適鄰境有哥老會之亂倡辦團練捕獲略盡事遂平七年左宗棠奉命督辦陝西軍務劉典爲之副倬雲亦奉西安將軍庫克吉泰檄委統先鋒後勁營從左宗棠入陝大小數十戰戰輒居顏行八年提督高連陞帳下卒爲變殺連陞謀與回寇合倬雲聞變馳入其軍擒斬首惡諭撫其餘衆敗回寇來援者於山河鎮逆謀遂沮克綏德鄜州正寧平馬蘭雲巖橋扶谷三不通諸險壘時典爲巡撫引嫌不敘倬雲功特旨以知府仍留原省補用當是時陝甘全境皆爲回寇殘破慶陽尤甚賊平後荒土彌望人至相食倬雲分設賑局於慶陽五屬又於正寧興屯政其墾熟者則招民領耕不數月間流民還業往往爲倬雲兄弟立生祠以全陝肅清賞加道銜假歸值湖南會匪猖獗陷踞列縣巡撫劉峴復委統鄉團往捕立復龍陽益陽二縣詔以道員用並加鹽運使銜光緒十年法人犯閩總督何璟調倬雲總營務七月法人闖入馬江倬雲力陳兵船不宜聚泊一處主兵者不能用乃率所部扼鼓山

以鐵練聯船塞海口敵不敢入十一年法人犯浙倬雲復統師備温州寧波防禦甚嚴浙江巡撫劉秉璋薦於朝請送部引見得旨報可而閩督復奏留辦善後事尋署福建按察使十二年閩浙總督楊昌濬亦奏保送部引見命交軍機處存記八月回閩仍委辦興泉漳械鬪殲渠解脅人無冤者海盜張阿知張野橫行閩粵爲行旅患倬雲遣兵逐捕至香港始就擒而外人留不遣倬雲據約爭於總理衙門卒寘於法自是海盜屏跡外人亦重其名賞加二品頂戴並交軍機處存記十四年署興泉永道冬總督卞寶第復委充保甲局總辦倬雲以閩俗輕忍習於強很立章程十餘條勸民相聯以情相安以分相接以禮相裁以義惡習爲之稍變十五年又率兵船出洋捕沿海盜二十餘人洋面一清署延建邵道有江西鹽商與廣東茶商相仇殺奸民因緣爲亂禍且不測大吏將戡以兵倬雲曰是速亂也諭解之執爲首者十餘人論如律餘悉縱不問八月奉旨補授汀漳龍道汀龍介萬山中漳州枕山面海民俗尤僥悍好劫奪倬雲以爲教民當先富之漳地宜桑而蠶利未溥乃遣員航海購浙湖蠶種桑苗著種桑飼蠶法下之州縣督吏勸課數年絲利大興復出廉俸建丹霞書院延名師購書籍訂學約公暇輒至院親與

諸生講論實學其他卹災修隄諸政動必利民民尤敬而愛之然倬雲亦以監視隄工積勞感溼熱患風痺請開缺閩督譚鍾麟巡閱至漳重其能固留之二十一年復請開缺回籍家居數載日與父老子弟講求農桑經史及立身大節仿呂氏鄉約撰條教刊行力以挽救弊俗爲己任二十九年九月卒湖南巡撫陸元鼎奏請照軍營立功後積勞病故例從優議卹及生前戰功事蹟宣付史館立傳並附祀其兄典專祠以慰忠魂得旨允之尋賜卹如例贈內閣學士銜廕一子知縣子本鍼郎中銜主事本鍾光祿寺署正銜承廕知縣

宗室敬信

宗室敬信正白旗人咸豐九年由宗人府效力筆帖式授七品筆帖式同治元年陞經歷六年玉牒全書告成奏保免補副理事官以理事官補用九年補理事官光緒元年監修普祥峪工程出力賞加四品銜二年京察一等記名以四五品京堂補用二月調補戶部銀庫郎中三年接充普祥峪工程處監督五年二月京察一等仍以四五品京堂補用三月授內閣侍讀學士十月普祥峪工程處奏保欽奉懿旨遇缺題奏十二月遷太常寺卿六年九月擢內閣學士兼禮部侍郎銜十

月授正紅旗蒙古副都統十二月陞刑部右侍郎八年三月署左翼前鋒統領四月充右翼監督五月調兵部右侍郎授左翼總兵六月調工部左侍郎九年二月調鑲藍旗滿洲副都統六月調戶部右侍郎兼管錢法堂事務十一月以病乞開缺允之十年七月病痊授禮部右侍郎八月兼署工部右侍郎兼管錢法堂事務九月補鑲白旗漢軍副都統十二月兼署鑲紅旗蒙古副都統尋充經筵講官十二年二月調鑲白旗滿洲副都統三月兼署戶部左侍郎兼管三庫事務五月轉補禮部左侍郎九月兼署正藍旗滿洲副都統十月充玉牒館副總裁十三年二月兼署工部左侍郎並兼署管理三庫事務八月兼署正藍旗滿洲副都統十四年八月兼署吏部右侍郎復兼署正藍旗滿洲副都統九月禮部奏上大婚典禮繕摺疏漏懿旨下部議處尋議降四級調用加恩改爲革職留任十一月調戶部右侍郎兼管錢法堂事務十五年三月調吏部右侍郎七月兼署禮部右侍郎十六年二月充會試知貢舉五月補左翼總兵六月以吉林官紳互訐命偕侍郎汪鳴鑾往讞之尋奏論如律十二月兼署戶部左侍郎兼管三庫事務十七年十一月調鑲黃旗滿洲副都統復命署都察院左都御史十八年三月署正藍旗護軍

統領八月轉補吏部左侍郎十月賜紫禁城內騎馬十一月兼署刑部左侍郎十二月充左翼監督十九年正月兼署正黃旗蒙古副都統九月擢都察院左都御史二十年恭逢孝欽顯皇后六旬萬壽正月奉懿旨賞戴花翎旋授兵部尙書補正白旗蒙古都統七月命在總理各國事務衙門行走八月兼署理藩院尙書十二月兼署鑲紅旗滿洲都統二十一年六月調戶部尙書十一月署步軍統領二十四年七月命毋庸在總理各國事務衙門行走十一月奉懿旨加恩在西苑門內騎馬並坐船隻拖牀二十六年三月調兵部尙書五月奉上諭京師戒嚴著敬信等晝夜梭巡七月乘輿西幸充留京辦事大臣署步軍統領復調戶部尙書留京辦理旗務閏八月授步軍統領管理神虎營事務九月調吏部尙書十月充崇文門副監督十二月兼署禮部尙書補授內大臣二十七年四月召赴西安行在六月詔管理理藩院事務七月以病命先行回京調理旋得旨仍接管崇文門副監督二十八年四月開步軍統領缺六月命前往東陵查辦差役聚衆滋事並官役扣減錢糧案尋查實覆奏得旨照所擬自守護大臣以下議處治罪各有差二十九年二月署步軍統領旋調正紅旗滿洲都統四月命以吏部尙書協辦大學

士八月授大學士旋授爲體仁閣大學士三十年九月因病奏請開缺溫旨慰留
頃之再申前請遂以大學士致仕仍賞食全俸先後歷充覆覈朝審揀選官缺磨
勘武進士試卷考試筆帖式繙譯進士覆試閱卷考試應封宗室考驗軍政點驗
軍器大臣管理咸安宮三學雍和宮事務溝渠河道火器營新舊營房烏槍處稽
察左翼宗學右翼寶坻四處事務充鑲黃旗總族長三十三年七月卒諭曰致仕
大學士敬信恪慎持躬老成練達由宗人府筆帖式洊躋卿貳擢任尙書旋登揆
席管理部旗事務宣力有年克盡厥職前因患病奏請開缺以大學士致仕方冀
克享遐齡長承恩眷茲聞溘逝軫惜殊深著賞給陀羅經被派散秩大臣溥倬帶
領侍衛十員卽日前往奠醑加恩追贈太子少保銜入祀賢良祠照大學士例賜
卹任內一切處分悉予開復應得卹典該衙門察例具奏伊次子玉麒著以道員
用以示篤念耆臣至意尋賜祭葬予諡文恪子墨麒興京副都統玉麒特用道

崇禮

崇禮蔣氏內務府漢軍正白旗人咸豐七年由拜唐阿助捐議敘六品苑丞八年
補清漪園苑丞十年陞員外郎同治元年京察一等奉旨交軍機處記名十月派

充殺虎口監督七年充粵海關監督因恭辦木器陳設賞給二品頂戴並賞戴花翎十一年捐助直隸賑務交部從優議敘特加內務府大臣銜並加二級十二年奉旨以內務府三院卿候補八月粵海關差滿回京呈進貢品賞加頭品頂戴旋因捐辦洋礮命以副都統記名簡放十三年補授正黃旗漢軍副都統光緒元年調補山海關副都統二年十月因病奏請開缺三年九月病痊召見十一月署鑲白旗滿洲副都統旋補正紅旗蒙古副都統四年二月署理左翼前鋒統領九月署正白旗滿洲副都統十月署鑲白旗護軍統領十二月派管右翼查城大臣旋調補正白旗滿洲副都統五年正月署鑲黃旗護軍統領二月署正黃旗漢軍副都統六月署鑲藍旗漢軍副都統七月擢內閣學士兼禮部侍郎銜八月暫署左翼總兵九月奉上諭在總理各國事務衙門行走十一月署刑部右侍郎六年三月署左翼總兵八月署鑲黃旗護軍統領旋補禮部右侍郎十月補左翼總兵七年兼署戶部右侍郎旋署步軍統領時新疆初定奏請裁勇節餉以籌善後之計八年三月步軍統領衙門技勇兵訪拏土棍古香臣輒拘鎖舉人古銘猷攢毆多傷御史鄧承修奏劾之諭崇禮查明據實具奏翰林院侍講學士陳寶琛復以爲

言命大學士刑部會審五月訊實覆奏兵弁論如律上以崇禮於所屬司員營弁不職漫無覺察降旨交查之件並不確切查明僅據捏稟之詞率請交部訊辦意圖諉卸迴護掩飾著交部照例議處旋議革職奉旨加恩改爲降三級調用九年三月授光祿寺卿六月晉通政司通政使十二年陞理藩院左侍郎十四年調補兵部右侍郎兼署工部左侍郎十五年調補戶部右侍郎十六年簡放左翼監督十二月兼署刑部右侍郎十七年兼署理藩院左侍郎十一月復命在總理各國事務衙門行走十八年轉補戶部左侍郎十九年奉旨諭加恩在紫禁城騎馬十一月德宗景皇帝詣大高殿拈香還宮時神武門外人聲喧雜御前大臣晉祺等奏參以崇禮約束不嚴交部議處二十年恭逢孝欽顯皇后六旬萬壽正月奉懿旨賞加太子少保銜並賞穿黃馬褂旋擢理藩院尙書兼署禮部尙書八月補熱河都統二十一年因病奏請開缺二十三年病痊召見奉旨著在總理各國事務衙門行走是年八月署都察院左都御史二十四年三月補鑲白旗蒙古都統四月補刑部尙書旋署步軍統領八月工部主事康有爲結黨營私莠言亂政牽涉大小臣工多員崇禮以案情重大奏請欽派大學士軍機大臣會同審訊九月派

充崇文門副監督十一月奉懿旨在西苑門內騎馬並乘坐船隻拖牀十二月充經筵講官二十六年調補戶部尙書十月兼署鑲白旗漢軍都統旋奉上諭以戶部尙書協辦大學士二十七年六月總理各國事務衙門改爲外務部特設專官遂開去兼差二十八年三月上謁東陵派爲留京辦事大臣七月兼署吏部尙書二十九年二月上謁西陵命與慶親王奕劻等分日輪班在內值宿四月授大學士五月補東閣大學士閏五月奉旨加恩免其帶領引見七月充國史館總裁八月補授文淵閣大學士三十一年因病奏請開缺三十三年五月卒遺疏入諭曰致仕大學士崇禮恪慎持躬老成練達由部曹洊陞卿貳擢任尙書旋登揆席管理部旗事務宣力有年克盡厥職前因患病奏請開缺以大學士致仕方冀克享遐齡長承恩眷茲聞溘逝軫惜殊深著賞給陀羅經被派副都統溥倬帶領侍衛十員卽日前往奠醮加恩入祀賢良祠照大學士例賜卹任內一切處分悉予開復應得卹典該衙門察例具奏伊子錫鑫著賞給員外郎用示篤念耆臣至意尋賜祭葬予諡文恪

錢應溥

錢應溥浙江嘉興人道光二十九年選拔貢生朝考一等以七品小京官用籤分吏部學習期滿奏留以本部主事候補咸豐八年奉旨記名以軍機章京用十年七月充軍機章京十一年以親老乞終養時粵寇猶盛兩江總督曾國藩調赴安慶勦辦營務同治三年官軍克復江寧以應溥贊畫有功保加五品卿銜並賞戴花翎五年隨營馳剿擒匪復經曾國藩奏保疏曰五品卿銜軍機處行走吏部主事錢應溥隨臣安慶軍營佐治章奏參贊戎機臣察其器識閎通久欲登諸薦牘共濟時艱惟該員家有老母情殷侍養不願敷歷仕途在營五年之久僅攻克金陵案內奏保一次上年隨臣北征馳驅數省艱險不辭情形尤熟實爲臣營不可多得之才仰懇天恩特加優異奉旨上諭賞加四品卿銜賞給三品封典以示鼓勵光緒五年養親事畢服闋來京有旨仍在軍機章京上行走九年二月補主事六月擢員外郎十月記名以御史用十一年八月奉旨加恩開缺注銷記名御史以五品京堂候補十二年三月授光祿寺少卿十三年改太僕寺少卿十五年四月遷太常寺卿六月署都察院左副都御史七月授宗人府府丞奉旨上諭著仍在軍機章京上行走十六年十一月除禮部右侍郎十二月轉左侍郎十七年八月署

工部右侍郎兼管錢法堂事務九月遵旨偕禮部尙書崑岡馳驛前往河南查辦參案查明覆奏自巡撫裕寬以下議處降革有差並陳防範游勇之策如遇裁撤勇丁時派員押送回籍不准沿途滋事詔如所議十八年五月署刑部右侍郎十月賜紫禁城內騎馬十九年八月署戶部右侍郎兼管錢法堂事務二十年四月兼署吏部右侍郎五月賞頭品頂戴二十一年二月兼署工部右侍郎兼管錢法堂事務六月命在軍機大臣上行走尋充方略館副總裁二十二年十月授都察院左都御史二十三年京察優敘是年七月擢工部尙書十二月兼管溝渠河道事務二十四年五月因病疊次乞假十月得旨西苑門內賞坐二人肩輿並免帶領引見二十五年三月假滿病仍未痊專疏籲請開缺奉旨賞假一月安心調理五月奏陳病狀如前奉旨准其開缺加恩賞食半俸二十六年德宗景皇帝三旬萬壽應溥以年逾七旬恩賞蟒緞二十八年二月卒上諭前工部尙書錢應溥持躬恪慎練達老成由部曹軍機章京經大學士曾國藩調赴軍營運籌決策悉合機宜賞給四品卿銜回京供差加恩以五品京堂候補洊涉卿貳命在軍機大臣上行走補授工部尙書夙夜靖共克勤厥職嗣因患病准予開缺並賞食半俸茲

聞溘逝軫惜殊深加恩著照尙書例賜卹任內一切處分悉予開復應得卹典該衙門察例具奏伊子侍講銜翰林院檢討錢駿祥著服闋後以應陞之缺陞用伊孫兩淮試用運判錢蘇頌著以運副用以示篤念蓋臣至意尋賜祭葬子駿祥翰林院侍講孫蘇頌雲南鹽提舉

徐會灃

徐會灃山東諸城人同治七年進士改翰林院庶吉士十年散館授編修十二年充順天府鄉試同考官光緒三年充文淵閣校理六年五月上以出使俄國大臣侍郎崇厚擅定條約獄久未決敕廷臣集議時俄人方介英德使臣以釋崇厚爲請會灃偕檢討黃自元疏稱今日之事莫如堅持前議任其恫喝不爲所搖卽或不能亦當俟前議旣廢然後徐減崇厚之死庶幾權自我操事出有名九年二月補國子監司業八月擢詹事府司經局洗馬十月轉翰林院侍講十年閏五月充日講起居注官十月命在上書房行走授輔國將軍溥侗讀十一月轉侍讀十一年授詹事府右庶子十二年轉左庶子十三年命授貝子溥倫讀十四年二月擢侍講學士七月充山西鄉試正考官十月轉侍讀學士十五年充武會試副考官

十六年七月授詹事府少詹事十一月署光祿寺卿十七年擢詹事十八年陞內閣學士兼禮部侍郎銜十九年二月授工部右侍郎兼管錢法堂事務六月充江南鄉試正考官二十年恭逢孝欽顯皇后六旬萬壽正月奉懿旨賞戴花翎八月提督順天學政二十二年轉補禮部左侍郎二十三年八月兼署吏部左侍郎九月調補吏部右侍郎兼署禮部左侍郎充玉牒館副總裁二十四年三月充會試副考官五月充國史館副總裁於時上銳意圖治令部院司員及士民皆得上書不准稍有阻格禮部主事王照條陳時政尙書懷塔布一再駁斥不卽爲上下部議處部議上奉硃諭罪其抗違會豐亦坐是革職八月命署戶部左侍郎兼管三庫事務旋補吏部右侍郎仍在上書房行走十月賜紫禁城內騎馬署兵部左侍郎十一月賞西苑門內騎馬並坐拖牀十二月充經筵講官二十五年授都察院左都御史二十六年四月補工部尙書七月署禮部尙書八月命兼管順天府府尹事務二十七年轉兵部尙書二十九年充會試副考官先後歷充大考翰詹考試試差新貢士朝考考試漢廕生庶吉士散館經濟特科閱卷大臣三十一年十二月卒遺疏入諭曰兵部尙書徐會灃持躬謹慎學問優長由翰林院侍講入直

上書房洊陟卿貳疊掌文衡擢任尙書並兼管順天府府尹事務宣力有年克勤厥職前因患病賞假調理遽聞溘逝軫惜殊深加恩著賞給陀羅經被派載搜帶領侍衛十員卽日前往奠醊照尙書例賜卹任內一切處分悉予開復應得卹典該衙門察例具奏伊嗣子一品廕生徐桂軫著以郎中用用示篤念耆臣至意尋賜祭葬

廖壽恆

廖壽恆江蘇嘉定人同治二年進士改翰林院庶吉士七年散館授職編修九年提督湖南學政十三年充國史館纂修光緒元年五月大考二等奉旨以洗馬陞用尋授司經局洗馬充廣西鄉試正考官二年十月擢翰林院侍講十二月充文淵閣校理三年九月恭纂穆宗毅皇帝實錄全書過半壽恆曾充纂修詔遇有應陞之缺開列在前並賞加隨帶三級四年二月以旱災連歲春雨愆期兩宮下詔修省壽恆上疏曰臣維應天以實不以文今日事勢正如身有痼疾飲食起居無異平時藐視之以爲無恙也不知元氣久虧一遇外邪誠恐不支同治初年賊氛徧地府庫空虛朝廷勵精圖治擢任賢才實事求是洗因循陋習卒成奠定之

功自是以後政事務爲寬大而臣工不知仰體上意遂相率爲具文一若晏然無事者然昔也大吏少瞻徇之情猶能綜覈名實今則取巧徇私粉飾之積習如初也昔也州縣修廉潔之名猶能講求民事今則復多貪縱疲玩之積習如初也吏治壞則民情鬱所謂以其愁苦之氣薄陰陽之和而災氣爲之生也夫此上下相蒙者皆以爲天下已治勢可苟安耳豈知外人之窺伺其旁者方將幸我之怠而乘我之隙此臣所謂痼疾也近雖新疆恢復而強鄰密邇以後措置方廬聖慮臣聞皇太后皇上於紅旗報捷之時以近畿荒旱命廷臣勿遞如意此其憂勤惕厲之忱凡有血氣莫不感涕且我皇上已下詔罪己矣亦罰樞臣矣有諫必納有言必從臣復何言所願皇上與廷臣持以實心審敬怠明是非覈功罪信賞罰重申有名無實之戒上下交儆勿仍爲具文庶幾人心振而天變弭矣旋以內務府覆陳用款含混失實疏請嚴飭以爲疲玩因循者戒五年正月提督河南學政二月擢侍講學士八月命留學政任十二月穆宗毅皇帝實錄慶成復命以應陞之缺開列在前七年二月轉侍讀學士六月遷詹事府詹事十月授內閣學士兼禮部侍郎銜八年以疏察生員欠考案下部議處九年法兵占據越南安定壽恆上疏

曰自咸豐十年換約以來我中國之待外人亦可謂誠信相孚懷柔備至矣而外人動輒以事要挾難厭所求各國惟利是圖一意專營商務法蘭西則以傳教爲事蔓延幾半天下今乃思開闢商務而偏取徑於越南夫越南我朝屬國也歲時貢獻恭順有加內與粵滇依爲唇齒萬無棄而不顧之理顧方今而談兵事船隻無多戰具未備一言輕發患在目前誠不可以孟浪嘗試而越南使臣待命於津法國兵船且將游弋於外然則聽其深入而靡所底止乎越南可讓凡係屬國皆可讓屬國可讓邊境之地亦將可讓夫固不能不早爲之計矣臣愚以爲此時有必戰之勢而後有必和之局議者謂當今辦理洋務宜專責北洋大臣李鴻章一人或云當催之來北籌防以固根本或云當命之駐粵統兵以圖進取或云當遣其居中調度以爲可北可南之計臣竊謂李鴻章威望最隆不容輕褻且與各國使臣朝夕謀面固結邦交一旦言兵雖李鴻章操縱有權不難出奇制勝而情勢究不免有窒礙之處況驟改駐紮之地風聲徧布勢必決裂又慮一發難收北洋勁旅非他人所能指揮而別求經略三省之重臣尤非伉直樸誠久經戰陣之員不能勝此鉅任爲今之計求其機勢便捷進退自如莫若飭李鴻章仍回北洋大

臣本任整頓防軍並兼署直隸總督坐鎮津門以衛畿輔見署直隸督臣張樹聲忠勇深沈將才夙裕上年朝鮮之役先聲奪人外人頗爲懾服如令回兩廣總督本任節制兩廣雲南三省相機調遣進兵越南以伸保護屬國之義該督臣辦事精密諒能動合機宜當此時局艱難亦斷不敢意存諉卸法人逆料中國之決無戰志故敢狡焉思逞苟聞宿將南來兵機難測亦必不肯恃強蠢動致敗各國和好之謀知己知彼勢固如此矧我中國之進兵保護屬國條約昭彰並非與法人構難儻在彼有轉圜之意一切儘可緩商若必欲併吞越南是兵端自彼而開不得謂我不修鄰好以此詰責法人亦當俯首無辭且兩督臣各回本任事屬循例可不啟外國之疑而進戰退守能發能收又非零生枝節致將來或有罅隙可指此善基者所以貴藏活著也六月稽察中書科事務九月法越和議成壽恆以洋務機會可乘復奏請先發制人以杜後患略謂臣風聞法使到津稱越南和議已成以分界撤兵等事要求於北洋大臣李鴻章李鴻章不允法使卽擬來京與總理各國事務衙門辯論議者謂越南已去事無可言法使此來祇宜遷就臣以爲此不足慮法使之所欲者皆我之所必不與者也何也據越南而去我屬國之名

分逐黑旗而撤我邊省之藩籬通紅江而奪我滇江之大利此皆患在眉睫顯而易見當局諸臣孰不知之而顧肯委蛇隱忍聽其得寸進尺以壞我全局哉是則法使之來直可置之不答或屏之弗見然而先機已失不可不圖挽回時事所乘不能不謀結束日復一日將越裳又蹈中山之轍何以尊國體何以懾羣夷且我不保越法且竊笑於我我不逐劉法且遷怒於我何能相安於無事爲今之計直宜以欺陵屬國之罪布告各國折以公法責令將所立條約全行改削河內南定一律讓還然後緩議法越通商之約況彼國於香港澳門等處屢次招募華人充當勇丁結以種種違背之條何辭可辯見聞津粵各海防早已飭備嚴陣以待軍容改觀臣謂仍須選派知兵大員酌帶兵輪船數艘駛赴越都以觀動靜無論爲戰爲和有此勁旅一枝法人必倉皇失措一面飛檄廣西防軍援助劉永福刻期進赴河內法人雖悍斷不能四路屯兵比聞其國政出多門實無鬪志卽欲興戎構怨不特苦糗糧之告罄亦且畏德國之乘虛該使臣勢已窮蹙無可自恃乃以孤注之謀來此嘗試與其舌敝唇焦啟彼族難填之欲壑孰若名正言順斷後來無數之葛藤聲威振則辭氣強卽法人自覺靦顏未肯遽爲哀乞而各國顧全商

本亦必力解兵爭待其違約而來然後一言可定謂因此而兵連禍結竟無已時又事理所必無者也苟不得已而思其次則河內一省爲越南之精華實爲粵滇之屏蔽法人所力據卽中國所必爭儻任其久踞此都則東由海陽以達廣東北擾北寧以窺廣西西犯山西以直趨雲南三省邊防從何布置及今越議未定惟有籌餉數十萬金專責劉永福添兵製械迅拔河城以扼敵衝而固門戶河城既下北圻乃安並聞充鶴東西土田肥沃此後不勞轉餉徐圖以墾爲防保越國之舊都亦可以留越君之權勢蓋我不與法構兵劉永福不能不爲越守土況近來暗助黑旗有戰必捷法人早已深知掩耳毀鐘徒煩饒舌聲言保護彼將奈何劉永福忿懣填胸苟奉詔書無不以一當百該敵被創之餘勢必屈求於我畫界而守或可言和如此則粵滇之邊患稍紓而法越之兵端可戢伏惟聖明採擇越南幸甚天下幸甚尋以根本至計首在宸躬復上疏曰臣聞一人有慶兆民賴之所謂有慶者蓋德業輝光神明強固足以作四方之觀而絜萬民之原薄海內外莫不引領焉伏維皇上御極九載於茲仰承慈訓力輓時艱未明求衣日不暇食聖經古史以次貫通講學之勤崇德之懋無逾於此更何庸臣之颺颺過慮者然而

盈廷贊襄之際有師保可以匡維深居燕息之時非外臣所能調護竊慮皇躬暇豫自有陶情適性之常而近侍之妄爲揣摩者或任意以迎合恐日久遂不自覺臣愚以爲崇德之要典學爲先而慎選近侍尤不可緩昔宋臣程頤上疏曰今日至大至急爲宗社生靈長久之計在輔養上德而輔養之道非徒涉書史覽古今而已要使跬步不離正人乃可以涵養氣質薰陶德性其論經筵曰請於左右服侍內臣並選年四五十已上厚重小心之人不使侈靡之物淺俗之言接於耳目程頤有言曰人主當防未萌之欲夫欲之未萌何從窺測要在平日目所見耳所聞跬步所不離者不至隱導所欲而後能力杜其萌也我皇上春秋日富轉瞬舉行大婚親裁大政萬世之基繫於一人知慮益開綱紀獨攬危微之漸敬肆之幾閒不容髮殆有不可不深長思者周書曰侍御僕從罔匪正人出入起居罔有不欽先儒謂陪僕摯御之臣後世視爲賤品而不知擇者曾不知人主朝夕與居氣體移養常必由之潛消默奪於隱隱之中而明爭顯諫於昭昭之際抑末矣三復斯言誠可警惕朝廷家法相承整飭宦寺律令從嚴杜漸防微一洗前代弊政伏讀高宗純皇帝聖訓有曰總管等保舉首領務擇其行走勤慎爲人誠實已過三

十年者方准保舉煌煌聖訓允宜遵守臣擬請皇太后皇上御前服役之太監慎加選擇務取厚重樸實之人其有年紀太輕性情浮動者一概屏勿使近飭下總管敬謹遵行並請懿旨時加訓飭凡一切淺俗委瑣之言勿許達於宸聽大抵便佞之徒鮮知體要老成之輩較識艱難其中閱歷年久者於列聖宮中遺範尙能稱述前聞隨事隨時亦可獲知往行蓋至灑掃之役亦守禮章晏佚之時不踰繩度庶幾深宮居息無往非崇德之端或可補毓慶宮課程所不備皇上冲齡踐阼一日之間勤勞過半祇此數時以爲游息必須於寢膳之常度備求攝養但使左右得人於聖躬實不無裨益所謂氣體移養常必由之者其謂此歟抑臣更有請者凡宮廷土木之工內府傳辦之件事屬尋常卻最易導引侈念外間傳聞多係無稽臣知皇太后崇儉黜奢時以民生爲念卽偶有飭辦者亦皆御用所必需力求撙節無可議擬第念皇上瞻依問視一惟懿訓是遵日染耳濡動關德性臣總願皇太后燕翼貽謀隨時用意所以薰陶成就者無微弗周如是則慈闈教胄更勝於典樂命夔聖主守身何必以達孝讓武德業日益輝光神明日益強固根本之計立乎不敗臣民之望慰於無窮而時勢艱難不足言矣十年三月署刑部左

侍郎閏五月命在總理各國事務衙門行走旋往天津會同李鴻章等商議法國
詳細條約十一年二月命偕尙書崇綺查辦安徽鳳陽關宿弊六月充江西鄉試
正考官十二月遷兵部右侍郎十三年正月轉左侍郎十五年二月調禮部右侍
郎三月充會試副考官八月署戶部左侍郎兼管三庫事務十六年閏二月兼署
兵部右侍郎三月轉左侍郎十二月調戶部左侍郎兼管三庫事務十七年八月
充順天鄉試副考官十八年調吏部右侍郎二十年恭逢孝欽顯皇后六旬萬壽
正月賞加太子少保銜時御史鍾德祥給事中吳光奎先後奏參四川鹽務積弊
吏治貪縱上遣壽恆偕左都御史裕德馳往查辦尋察明覆奏自道府以下請旨
降黜有差十二月兼署戶部左侍郎二十一年三月兼署禮部右侍郎五月以閱
卷失察下部察議六月調倉場侍郎二十三年七月遷左都御史命在軍機大臣
上學習行走仍兼總理各國事務衙門大臣八月署兵部尙書九月擢刑部尙書
兼署兵部尙書二十四年閏三月充會典館副總裁六月壽恆年屆六旬恩賚有
加八月調禮部尙書十二月充經筵講官先後歷充揀選官缺大臣考試御史漢
廕生筆帖式舉人覆試貢士覆試庶吉士散館閱卷大臣殿試讀卷大臣朝考閱

卷大臣二十六年以病開缺回籍二十九年八月卒遺疏入諭曰前禮部尙書廖壽恆秉性肫誠持躬端謹由翰林洊陞卿貳疊掌文衡補授禮部尙書夙夜靖共克勤厥職嗣因患病准予開缺回籍茲聞溘逝軫惜殊深加恩著照尙書例賜卹任內一切處分悉予開復應得卹典該衙門查例具奏尋賜祭葬子世蔭直隸試用道世雍二品廕生孫家駒二品廕生

立山聯元

立山土默特氏內務府蒙古正黃旗人咸豐八年由官學生獎奉宸苑筆帖式同治元年補官九年京察一等旋陞八品苑丞十一年恭辦大婚典禮事竣賞加委護軍參領銜俟陞六品苑丞後以員外郎儘先陞用十二年擢六品庫掌光緒元年遷員外郎十一月以觀德殿供差奏獎賞加護軍參領銜遇有應陞之缺儘先陞用二年國史館議敘賞加武備院卿銜三年署本苑郎中五年命管理蘇州織造六年四月擢郎中八月詔仍接管織造先後凡歷四任尋以丁憂回京百日孝滿仍回織造任九年還京供職十四年承修南海工程完竣奉懿旨賞給二品頂戴花翎以三院卿候補十五年兼管南苑郎中事務自二年至是五更京察皆列

一等四蒙記名十七年二月擢奉宸苑卿十一月命在總管內務府大臣上行走旋授總管內務府大臣兼管奉宸苑事務復授正白旗漢軍副都統十八年正月充右翼監督三月遷戶部右侍郎兼管錢法堂事務十九年調鑲白旗滿洲副都統二十年孝欽顯皇后六旬萬壽正月奉懿旨賞加太子少保銜並賞穿帶膝貂褂尋轉左侍郎兼管三庫事務二十四年十一月奉懿旨賜西苑門內騎馬並乘坐船隻拖牀二十五年賜紫禁城內騎馬二十六年三月遷戶部尙書時義和團起以仇教爲名宗親大臣多惑之者立山頗議其失當事者滋不悅由是構陷蜚語日上聞立山遂獲罪下獄於七月十七日棄市及事平上知其冤十月奉上諭本年五月間拳匪倡亂勢日鷓張朝廷以剿撫兩難疊次召見臣工以期折衷一是乃內閣學士聯元等經朕一再垂詢詞意均涉兩可而首禍諸臣遂乘機誣陷交章參劾以致身罹重辟惟念立山聯元宣力有年平日辦理交涉事件亦能和衷尙著勞勩應著加恩開復原官二十七年十二月奉旨前戶部尙書立山之子奉宸苑員外郎聯榮著以郎中補用前內閣學士聯元之子筆帖式椿壽著以主事用宣統元年三月奉上諭朕恭讀光緒二十六年二十七年疊奉諭旨特將誣

陷被罪之前戶部尙書立山兵部尙書徐用儀吏部左侍郎許景澄內閣學士聯元太常寺卿袁昶開復原官並錄用子嗣仰見我德宗景皇帝秉承我孝欽顯皇后慈恩垂訓一秉至公惟念該故員等心存君國忠蹇可矜允宜再沛恩施嘉名特錫立山徐用儀許景澄聯元袁昶均著加恩予諡用示朕推廣慈仁之至意尋予諡忠貞十月順天府兼尹陸潤庠府尹凌福彭據八旗順天紳商公呈疏請在京師宣武門外捐建專祠合祀立山聯元允之聯元崔佳氏滿洲鑲紅旗包衣人同治七年進士改翰林院庶吉士十年散館授檢討十二年六月充協辦院事七月遷侍講十一月充功臣館纂修十二月充文淵閣校理十三年充國史館協修光緒元年大考三等以中允降補二年三月補右春坊右中允七月充奏辦院事兼功臣館提調五年二月京察一等記名以道府用三月擢侍講六年補國史館纂修八年二月京察一等復以道府記名三月授安徽安慶府遺缺知府補太平府知府十二年安徽巡撫吳元炳以聯元明決爽直調署安慶府知府尋回本任十三年二月復調署安慶六月兩江總督曾國荃疏薦聯元慈祥愷悌寬則得衆請調補安慶府知府詔從之十七年大計卓異引見奉旨回任候陞二十年署安

廬淦和道二十一年授廣東惠潮嘉道二十四年七月遷安徽按察使十月入京
陛見奉旨著開缺以三品京堂候補並在總理各國事務衙門行走二十六年三
月補太常寺卿四月遷內閣學士兼禮部侍郎銜值義拳之變爲人構陷七月與
尙書立山同時棄市追諡文直子筆帖式椿壽以主事用

薛允升

薛允升陝西長安人咸豐六年進士以主事籤分刑部同治八年補主事民人呂
二落河身死團勇王鳳與王宏罄挾嫌陷以謀害刑倡誣服允升爲之平反賞加
四品銜十一月陞員外郎九年二月京察一等六月補授郎中十一年七月俸滿
截取奉旨記名以繁缺知府用十二年七月授江西饒州府知府十三年訪獲鄱
陽匪徒王勝揚等句結外匪潛謀起事稟請正法光緒三年擢四川成縣龍茂道
旋調署建昌道四年陞山西按察使五年閏三月授山東布政使八月署理漕運
總督旋授刑部右侍郎籌防邳宿運河又挑濬河清等六閘其餘各壩一律興堵
江北徐海沭陽一帶素爲積匪出沒之區允升飭各巡道會同馬步各營殲滅匪
首多名居民安堵六年四月至京供職七年二月承修東陵西陵工程四月轉左

侍郎五月出使俄國大臣崇厚以擅定條約議斬英法使臣從中調停欲減其罪有旨交王大臣各衙門會議允升亦議以減等罪名可示法外之仁以釋外國之嫌江寧三牌樓民人周五等謀殺朱彪脫逃未獲參將胡金傳誣拏僧紹棕曲學如二人不勝酷刑誣服論死爲翰林院侍講學士陳寶琛所劾允升奉命偕理藩院尙書麟書往查得實承審各員皆按律定擬八年八月兼署工部左侍郎十月充順天武鄉試副考官十一月兼署兵部左侍郎九年三月署刑部尙書時戶部雲南報銷案發事連太常寺少卿周瑞清御史李郁華等命允升會同查辦五月奏結革降有差會光祿寺卿尙賢御史曾培祺等先後陳奏奉天吏治疲玩民不堪命上命允升偕吏部尙書徐桐往查十年三月查覆自奉天府府尹以下開缺黜降有差仍爲奏減各項攤款之半以紓民力是年法人尋釁攻越南諒山兵船內犯奪占臺灣雞籠上命廷臣妥籌戰和利害允升主籌戰備以遏兇鋒十一年七月奏請裁減募勇並將中外各旗營加餉訓練略曰我朝綠營兵額五十八萬四千有餘乾隆時增兵六萬六千餘名復裁去一萬七八千名咸豐初始爲招勇之計嗣後各省視爲成規均以辦防爲詞甚或託言盜風甚熾伏莽堪虞資勇彈

壓上年法人構釁增添尤多統計勇數不下三十餘萬費餉不下一千餘萬乃勇日增而制兵仍舊兵餉外又加勇餉是兵之耗財有定勇之耗財轉無定況現在所招之勇與額兵相去無幾當國家財賦支絀之時何堪糜費我朝開創八旗兵力居多乃漸染習氣日益偷窳一經畿輔設防輒紛紛徵調外兵當日所稱勁旅反置之可有可無之列似非設立旗營本意臣愚以爲與其以有用金錢招致游勇何如就旗兵領項量爲加增現在東三省業經練兵加餉京旗及各省駐防旗營應一體照辦總之各督撫募勇爲權宜之計朝廷應以練旗兵爲固本之圖奏入廷臣會議請酌裁營勇浮濫者從之十二年三月復署工部左侍郎十三年四月湖南巡撫卞寶第爲人所劾言其貪劣皆有狀允升奉旨查辦力辨其誣時河南鄭州黃河決口九月上諭允升就近馳赴工次會同禮部尙書李鴻藻確查洛陽知縣王道隆非法拷斃民人李延湧捏報病故允升劾之落職鄭州民女蒲愛妮者叩閭代兄鳴冤皆具情實以聞十六年隨扈德宗景皇帝謁東陵十月賞在紫禁城內騎馬十七年八月署兵部右侍郎九月兼署禮部左侍郎十八年十二月西苑門外直廬忽有太監投遞紙條允升嚴拒之十九年十二月補授刑部尙

書二十年恭逢孝欽顯皇后六旬萬壽正月奉懿旨交部從優議敘八月充順天鄉試正考官十月御史鍾德祥奏參內務府各員扣侵工款允升查明具奏獲罪有差二十二年三月上耕藉田充從耕禮大臣四月太監李萇材張受山等糾衆逞兇殺傷捕人上諭刑部照康熙年間諭旨從嚴定議具奏允升援光棍例分別首從定擬上以例內有傷人致死按律問擬之語令按照本律再行分別定擬允升具疏分晰略曰李萇材等糾衆殺傷捕人上諭從嚴定議其非尋常傷人致死可比故特明降諭旨宣布天下天下人民咸曉然於聖主之嚴明將以遵祖訓飭紀綱也且莫不翹首望部臣之有以副朝廷辟以止辟之心以成此令出惟行之舉乃臣部遵旨定擬奏聞又復奉旨再行定擬臣亦知皇上是欽恤刑章之意非輕縱寺宦之心然而天下不知不以爲聖主之慎刑而以爲臣部之縱惡臣部問刑衙門以飭法明刑爲要而刑法之允協以情真罪當爲先李萇材等一案論其起釁之由既非有心致死固不得謂之謀故論其執械逞兇之情形又何得謂之鬪毆既非謀故又非鬪毆則與道光年間上諭內傷人致死一語其不能強爲附合也明矣謀故鬪毆各律均不可擬將謂之拒捕殺人按律或可稍稽夫顯戮依

例亦當立置之典刑然較之光棍例文究有區別臣愚昧之見太監與平人不同我朝家法甚嚴凡所以整飭寺宦者無不加倍治罪亦深恐一時姑息異日或致養奸此防微杜漸之深心實寓成全之至意所以我國家宮禁肅清實爲前代所未有溯自康熙年間辦理太監劉進朝一案之後數百年來太監尙知畏懼不敢以身試法實以懲一警百其爲保全若輩者誠匪淺也此次從嚴懲治私心竊謂當可上邀允准豈知辦理過嚴亦有未愜聖心之處總由臣等拘滯鮮通不能仰體聖主欽恤哀矜之意已覺有愧於心儻因此又復遷就其詞依違定讞致情法不得其平並置初奉諭旨於不顧則負咎更深此臣等所以幾經籌畫幾經詳審而不敢冒昧從事者也伏查朝廷法令輕重各殊而法之最嚴者無過光棍一項爲首者擬斬立決爲從者俱擬絞候秋審入於情實所以懲強暴儆兇頑凜然示人以不可輕犯之意臣等亦知此條例文不可輕用惟既經諭旨指明從嚴定議舍此再無可引之條而又恐後來援爲定式特於片奏內聲明情節較輕者不得率引此例荷蒙聖明早鑒及此臣等何敢仍執原議竊維立法原以懲惡而法外亦可施仁臣等爲守法之吏原不容涉於兩歧皇上宏解網之恩或可稍寬其一

而昔宋臣蘇軾有云當堯之時皋陶爲士將刑人皋陶曰殺之三堯曰宥之三故天下畏皋陶執法之堅而樂堯用刑之寬臣等愚昧何敢妄希古賢而皇上其仁如天實與帝堯先後同揆皇上如果俯念輦轂之下總宜肅清閹宦之流不宜寬縱將該太監等仍照臣等原奏照光棍例分別首從辦理臣等無任欽佩儻以爲未免太嚴無妨量從末減亦請於原定罪名上略爲區別或嚴首惡而稍寬從犯總期與初奉諭旨符合不致大相懸絕是在皇上權衡至當斷自宸衷非臣等所敢率行定擬也疏入上以仍係請旨辦理語涉含混著擬定罪名再行具奏允升奏云臣等爲執法之吏不敢擅自從輕皇上施法外之仁原可量爲末減又云初奉諭旨一發而不可收原定罪名一成而不可變從犯或可稍寬首惡斷不可縱是於欽恤之中仍寓嚴明之意皇上慈祥爲念一時不忍駢戮二人請將張受山一名立即處斬李蓑材僅止傷人究未殺斃似尙有一綫可原量減爲斬監候上知其執法不撓卒從其議二十三年五月御史張仲炘奏稱玉田縣紳民賄買御史溥松奏參該縣苛派差徭一案允升姪薛濟爲之包攬賄通允升又爲設法銷弭有旨命大學士徐桐窮治其事按驗不實但以不知避嫌降三級調用十一月

補授宗人府府丞允升歷充揀選官缺大臣考試漢廕生庶吉士散館新貢士覆試各直省舉人覆試拔貢覆試閱卷大臣新貢士殿試讀卷官二十四年三月奏請開缺二十五年陝西巡撫魏光燾奏允升年登八秩重逢鄉舉奉旨賞加二品頂戴重宴鹿鳴二十六年拳匪肇亂兩宮西幸長安允升已歸里卽赴行在請安復召用爲刑部左侍郎十二月補授刑部尙書以老辭不允時陝西旱荒奉命辦理賑務允升通籌大局輓運江浙鄂省米石采買甘肅雜糧挑濬各渠以工代賑清查貧戶賑救饑民一百七十八萬餘口二十七年九月兩宮回鑾隨扈北行十月以疾卒於河南行次諭曰刑部尙書薛允升持躬清介練達老成由部曹簡放知府歷任監司洊躋卿貳補授刑部尙書治獄廉平克稱厥職前因患病賞假方冀調理就痊長承恩眷茲聞溘逝軫惜殊深薛允升著照尙書例賜卹賞銀一千兩治喪由戶部給發任內一切處分悉予開復應得卹典該衙門察例具奏伊孫二品廕生薛承熙著賞給主事一品廕生薛承謨著賞給員外郎均著分部學習行走用示篤念耆臣至意尋賜祭葬著有讀例存疑五十四卷漢律輯存六卷唐明律合編四十卷服制備考四卷其讀例存疑一書由刑部恭呈御覽刊刻行世

子浚舉人內閣侍讀

張百熙

張百熙湖南長沙人同治十三年進士改翰林院庶吉士光緒二年散館授編修五年充山東鄉試副考官七年命提督山東學政九年丁父憂十四年充四川鄉試正考官十五年命直南書房二十年恭逢孝欽顯皇后六旬萬壽正月賞加五品銜並戴花翎二月京察覆帶奉旨交軍機處記名以道府用四月大考翰詹列二等得旨以待講陞用二十一年五月授侍講十二月轉侍讀旋充文淵閣校理是年朝鮮東學黨之亂日本藉端與我開釁百熙以備員禁近親見宵旰焦勞屢陳兵事集師接濟之法固本扞衛之方捐助軍輸之策拘治奸細之律疏先後十餘上多蒙采納及海陸軍連挫於日百熙復上奏謂北洋大臣李鴻章壹意以戰事爲非並不督飭諸軍實力進剿致使倭人逐日布置逐段增兵而我後路絕無准備軍械不足糧餉不繼卽勇敢善戰如左寶貴聶士成等亦頓兵韓境進退失據近聞海軍兵輪俱爲敵人擊敗我軍退保安州之後如再有挫衄則東三省岌岌可危應請飭得力重兵嚴陣以守且必將領得人而後兵可得力因薦宿將前

福建水師提督彭楚漢等又片劾軍機大臣禮親王世鐸以宗支筭樞務數年以來納賄招權無所顧忌亦無所補救倭人肇釁之初了無措置及我皇上命伸天討禮親王等又一切諉之北洋大臣若無與己事貽誤兵機大取挫衄伏願皇上察以日月之聰明斷以雷霆之奮迅天下幸甚時點景工作猶未停百熙因奏言臣恭讀八月上諭欽奉懿旨本年七月慶辰典禮著仍在宮中舉行其頤和園受賀事宜卽行停辦仰見皇太后俯恤外藩預防內患高深之德至仁極明乃承辦諸臣不仰體聖懷仍復於西直門內外張皇其事推諸臣之心不過謂敵人擾及邊陲輦轂近地目前無事耳豈知犬羊之族詭計百出外省及天津等處拏獲薙髮改裝身藏軍火之奸細亦已不少況景物繁盛之會中外四大洲二十三省士民夾道縱觀所有點景設壇大率蒹棚木架地段較廣防範難周脫有不虞變生呼吸一夫竊發奸宄乘之倉猝之際何堪設想皇太后聖明在上必將以紅旗報捷爲樂不以點綴景物爲娛卽我皇上尊親聖孝亦必以宗社安全爲大請飭點景諸臣慎遵懿旨停辦以成皇太后仁明之盛燉傳息謠傳而靖地方疏入稱旨百熙以外患日亟請修復聖武大興邊屯生自然之利輔鐵路兵械所不足又偕

翰林院侍講學士陸寶忠等聯名劾樞臣孫毓汶等朋比誤國十大罪二十一年威海失守旅順戒嚴百熙奏山東防務喫緊宜迅速擇要布置四月日本與我議和百熙奏和議條約傳聞駭聽請飭下王公貝勒大學士六部九卿翰詹科道公同會議又以日本要挾過甚宜維後患急籌戰備以輓危局迨和議已定百熙復請急圖自強以收後效臚陳管見十四條又言通商條約弊混滋多中國利權宜防損失請飭通商全權大臣將日本臣民入口以後商務及中國自有之商務劃斷明晰詳慎訂議所言皆切中時弊旋與侍郎李文田等合詞請旨起用恭親王俾管樞務以爲倭人開釁據我外藩內而軍機大臣外而北洋大臣辦理乖方以致牙山平壤之役無所策應固由李鴻章意不欲戰貽誤事機亦軍機大臣等無有宏識遠略如當日恭親王之綜理樞務者也臣維恭親王懿親重望執政有年平定髮捻苗回諸匪才猷恢豁度越禮親王世鐸等遠甚昔宋哲宗朝宣仁皇后起用司馬光爲相遼夏之主至敕其邊吏毋生事開釁今恭親王之賢不知於司馬光何如而親貴則過之我皇太后之聖明尤非宣仁所及恭親王艱鉅重膺益當感激奮興力圖報稱薄海人心邊疆士氣必因此立加振刷不獨朝廷綱紀足

資整飭卽軍務當有起色外患可冀救平矣未幾遂命恭親王復入軍機二十二年充日講起居注官旋擢國子監祭酒二十三年六月充江西鄉試正考官八月命提督廣東學政十月遷內閣學士兼禮部侍郎銜十一月奉諭張百熙仍留學政任旋特派稽察中書科事務蓋異數也百熙在粵倡設時敏學堂嚴杜闖姓之弊士論翕服二十四年三月重修會典全書過半百熙以曾充總纂奉旨從優議敘六月遵議改變武科章程百熙奏上十二條曰編團籍別軍省開製造頒定式設學堂延教習籌經費嚴限制考輿地習測繪勤操練定考試九月以濫保康有爲等部議革職加恩改爲革職留任十二月開復處分二十六年七月補禮部右侍郎九月擢都察院左都御史命回京供職十二月派充頭等專使大臣百熙馳赴行在二十七年二月覆命得旨仍在南書房行走時亂事初定兩宮下詔求言首抗疏陳大計五大端曰增改官制曰整理財政曰變通科舉曰廣建學堂曰創立報館略謂我朝設官大半沿前明數百年舊制及通商以後事多創辦而官位不增惟設一總理衙門以綜理之遂使商務學務及一切新法悉隸外部各國無此例也任官之法莫善於一事分任諸人莫不善於一人曾任各事如京員尙侍

諸職今日習禮者明日使之知兵外吏藩臬等員此處掌刑者他處責以治賦弊不可勝言也其實中國庶官久任與夫專門分治諸法本極精詳徒以展轉變通致防弊之意太多任人之意轉少今欲因時制宜特加釐定應請以總理各國事務衙門正名外部不分滿漢設尙書侍郎各一人專辦外交各事至內外一切商務宜專設商部以總其成更須參考西書酌體中國商情定爲商律又宜由商部詳立名目分門頒發格式簿令關卡及州縣地方各官隨時填報年終由部彙齊編爲商部歲計總冊用資考覈各省舊有之商務局應改爲商務衙門設實任官使上隸於本部其無商務局者亦照此辦理一切商務利弊申訴等事悉令赴本衙門呈控至學校一門尤關緊要今日禮部所司僅稽覈成案例行文書而已若議京師暨各省廣設學堂則於詳定章程廣籌經費暨編輯教科新書等事均非設立專部不足以事創舉而得真才應請增設學部如商部例所有商部學部設官位數亦擬照外部例設尙書侍郎各一人至農政切於民生亦爲當務之急擬請推廣各省農政局歸戶部總理無庸並設農部以免同時並舉之煩財政則議加進口稅整頓圓法推廣銀行講求礦務通行鈔票由部鼓鑄銀圓變通科舉則

請用張之洞分場考試之法廣建學堂則議創設小學中學大學及資遣遊學生出洋習專門之業創立報館則議開辦官報編定報律分設譯書等局且謂今日國勢如斯欲濟時艱振全局又不僅在條目而在本原區畫既定諸事待行其本尤在上下一心內外一心滿漢一心庶幾無事則一德以圖自強有事則同力以禦外侮又奏修改商約慮失利權宜籌抵制補救之法曰洋關進口稅宜示區別曰無益民生貨物宜議重徵曰進口食物無稅宜限制曰鐵路礦產宜准令中外合辦曰養遊民宜廣興工藝曰機器製造貨物廠宜定詳章曰通商稅我宜有自主之權曰內地商埠宜由我管轄曰我國商貨出洋宜一體優待又以富強之基不外理財教士用人練兵四大綱而積習相仍弊端叢出擬請嚴刑峻法以治之吏治隳壞內患方深擬嚴旨責成疆吏以振之恭引祖宗故事請將輔佐不職遺誤大局之樞臣泄沓偷安罔上行私之疆吏喪師失地之將領病民蠹國之監司牧令明申憲典肆諸市朝以慰天下之望是年四月迴鑾有期特派百熙與桂春景澧陳夔龍修理蹕路六月遷工部尚書兼署都察院左都御史七月調補刑部尚書百熙回京後奏裁向來工程節省陋規計省帑金近百萬又以臺綱久弛分

別舉劾奉上諭張百熙奏稱陞任御史陳璧才識優長明達治體前管理京師街道時論翕然去秋巡視中城嚴緝盜賊地方安堵請嘉獎錄用等語陳璧辦事認真不辭勞怨朝廷業經不次擢用仍著傳旨嘉獎巡視東城掌湖廣道監察御史閻錫齡習於夤緣有虧名節巡視南城掌江西道監察御史鄭炳麟交接非人頗滋物議該尙書所請撤差查看不足蔽辜均著卽行革職另片奏翰林院編修馮恩崐身列詞林不知自愛並有肆意妄爲魚肉平民情事著卽革職馮恩崐見充雲南副考官無論行抵何處卽行撤回該尙書此奏洵能破除情面舉劾一秉大公深堪嘉尙嗣後各衙門堂官皆當隨時考察激濁揚清以肅官常而昭懲勸該衙門知道九月遵議變通翰林院規制奏言一省之士多者萬餘拔其尤者爲舉人會試之士一省數百拔其尤者數十人數人爲貢士貢士之中拔其尤者爲翰林擇之可謂精矣而舉世以不達時務輕之沿江沿海之人日與外人相習其所學乃能爲國家之用夫取之而不用是取非其道也用之非所取是不得已而用之也欲救其弊莫如使取與用出於一欲取與用出於一莫如使今日已取之士盡習有用之學經世之學不過二端曰政曰藝擬請旨將翰林院官制酌量變通

改掌院學士爲尙書以領其事廢詹事府以詹事少詹事爲侍郎陞講讀學士爲三品庶子以下併爲侍讀侍講等官令學士以下各視性之所近分研實學以備時用人才之興必有超出學堂之上者是月有作育人才端在修明學術之諭百熙請將京師大學堂改隸國子監正名大學以一學術而育真才推論前年於國學之外又設大學意見多歧人才不出之弊請旨將國子監定名大學簡放管學大臣由政務處王大臣會同管學大臣並集京外通人酌采中西有用之學妥定劃一章程俾生徒得以時肄習又請改總理衙門附設之同文館隸於大學派員辦理提調事宜十月調吏部尙書十二月派充管學大臣經筵講官命妥訂學堂章程隨時具奏二十八年正月奏陳籌辦大學堂大概豫定通國辦法宗旨先開豫備速成兩科豫科爲入大學正科之豫備速成科則分仕學師範兩館仕學館造就已登仕版者以應目前創辦新政之需師範館則爲中學堂教習之用兼添設講舍附設編譯書局廣購書籍圖器籌撥的款言之甚備又奏設醫學實業館譯書館宗室覺羅學堂吏部書吏歷世盤互舞文巧法爲吏道之蠹百熙奏整頓吏部事務凡六事首裁書吏責成司員用士人繕寫稿件除苛例之不便者數十

條皆奉旨如所請行三月隨扈謁東陵賞穿黃馬褂七月奏進所擬各級學堂章程參酌古今中外之制分級分科限年畢業大旨務歸於實用明詔獎其周備頒行各省令各督撫實力奉行百熙又以教習乏材資遣高等生四十餘人分赴東西洋肄習專門以爲各省倡各省之派官費留學生自此始十月賜紫禁城騎馬二十九年正月上命刑部尙書榮慶會同百熙管理大學堂事宜二月上謁西陵命與慶親王奕劻等分日輪班在內值宿五月以殿試刊刻題紙錯誤交部照例議處七月兼署禮部尙書九月充政務處大臣旋改管學大臣爲學務大臣奏設教習進士館三十年二月充會試副考官八月奏遣新進士出洋遊學三十一年四月改授戶部尙書十一月奏請先設法政科文學科格致科工科以備大學豫科學生及各省高等學生畢業後之陞入並勘廣安門外瓦窯及德勝門外官地各一區均合建造大學堂之用奉旨議行是月詔立學部百熙乃銷學務差十二月兼管順天府府尹事務三十二年四月百熙年六十孝欽顯皇后賜御書匡時耆德扁額德宗景皇帝賜御書平均錫福扁額及諸珍物五月舉劾順天州縣請旨嘉獎降革有差百熙歷充考試漢廕生考試試差考試各省優生各省駐防繙

譯舉人覆試新貢士覆試新貢士朝考閱卷大臣新貢士殿試讀卷大臣先是朝命鎮國公載澤等五大臣出洋考查政治銳意變法至是先後歸百熙以變法宜先統籌全局若支節而爲之則先後均於寡效因上疏論官制及地方自治兩事謂非速定官制則提綱挈領無以集政權於中央非速興地方則至纖極微無以被精神於通國蓋官制者政治之機關而地方者國家之分體誠使內外官制定而地方制度興則諸事易行而萬端可理也因考歷代成法之精密及外國成績之顯效以備採擇七月命與載澤等充編纂官制大臣九月改定官制之詔下特設郵傳部綜轄鐵路航業郵政電報四項百熙調補郵傳部尙書十月賜西苑門內騎馬郵傳創辦伊始經緯萬端百熙及侍郎唐紹怡意見不合十一月均奉旨嚴行申飭十二月因病請假三十三年正月病篤懿旨派內務府大臣增榮看視傳取方案頒賞肉桂於尤諸藥品二月卒遺疏入諭曰郵傳部尙書張百熙公忠清亮學問閎通由翰林入直南書房疊司文柄洊擢正卿均能恪盡厥職辦理學務尤著勤勞上年調任郵傳部尙書創辦伊始正資擘畫旋因患病賞假方冀調理就痊長承倚畀茲聞溘逝悼惜殊深著賞給陀羅經被派員勒載洵帶領侍衛

十名卽日前往奠醊加恩追贈太子少保銜賞銀二千兩治喪由廣儲司發給照
尚書例賜卹任內一切處分悉予開復應得卹典該衙門察例具奏伊于江蘇試
用道張振鏞著以道員卽補張振鋆均著俟及歲時帶領引見其靈柩回
籍時著沿途地方官妥爲照料用示篤念盡臣至意尋賜祭葬予諡文達

壽山

壽山袁氏漢軍正白旗人黑龍江駐防父吉林將軍富明阿光緒三年壽山以二
品廕生在本城學習當差五年辦理中外交涉保加五品頂戴八年富明阿病傷
卒有旨壽山俟百日孝滿後由旗帶領引見九年八月奉旨以員外郎選用兼襲
騎都尉世職供差神機營十一年調入通州防營十二年從醇賢親王巡閱北洋
十三年神機營奏保俟選員外郎後以郎中陞用十四年充頤和園工程處監修
十七年海軍衙門奏保俟選缺後在任仍以六部郎中遇缺卽選二十年恭逢孝
欽顯皇后六旬萬壽正月賞加三品銜八月日本兵犯奉天壽山陳請赴前敵效
力有旨交黑龍江將軍依克唐阿差遣委用旋奉檄招募敵愾兩營派充步隊統
領連與日人接戰攻拔草河奪回草河嶺截拒後路尋克連山關復戰於鳳凰城

我軍不利壽山弟永山陣歿壽山額角亦中槍傷依克唐阿以其敢戰令兼統鎮邊軍全營馬隊二十一年依克唐阿復以壽山謀勇兼優奏請破格錄用奉旨俟克復海城後再行明降諭旨著先行傳旨嘉獎大軍既復海城壽山領七十騎偵敵遼南遇之於湯岡子下馬搏戰槍彈入右腹貫左臀出戰愈猛敵爲之卻回營衣袴透溼血積厚盈指依克唐阿電陳其事諭以壽山與敵接仗身受重傷猶能裹創奮戰實屬勇往可嘉著以知府分省補用並賞戴花翎二十二年盛京將軍依克唐阿吉林將軍長順先後奏薦並請破格錄用奉旨送部引見尋黑龍江將軍恩澤調充鎮邊軍左路統領奏請暫緩赴京遂率中營移駐黑龍江城捐修營壘二十四年八月補授河南開封府遺缺知府未赴時東北邊防益棘用恩澤奏超授黑龍江副都統明年二月入覲垂詢邊事甚悉遂奉幫辦邊防練軍事宜之命並令添募十五營專歸管轄六月抵黑龍江副都統任卽會商恩澤擇其所知長於邊事者奏調十餘人贊畫新軍又奏請自赴上海採辦軍裝遂由長崎海參崴伯利循海歸密覘形勢爲戰守備新軍甫草創而恩澤卒於任十二月遂命壽山署理黑龍江將軍印務受事後剔釐奸弊手訂行陣操法圖繪要隘申明賞罰

頒發在外將領並更番調省授以方略下至末弁亦令該管將領出具切實考語接見時分別籍記以備擢用二十六年夏義和拳匪之亂起聯軍深入戰局遂開壽山連奉趕緊預備嚴密防範並備兵聽候徵調暨京津一帶業與洋人開仗之諭奏派愛琿副都統鳳翔充北路翼長呼倫貝爾副都統依興阿克西路翼長通肯副都統慶祺充東路翼長候補知府程德全爲行營營務處布置粗有端緒心念俄人覬覦東三省久矣但無所藉口未得侵入耳因嚴飭各翼長悉心守禦慎勿孟浪開戰尋卽照會俄伯利總督暨哈爾濱總監工並我駐俄欽使楊儒轉請俄廷江省旣無教堂無庸置議所有闔省鐵路當力任保護如有損失照數賠償約以勿庸進兵而俄兵顧已分道入擾不半月凡吉之琿春三姓江之呼蘭呼倫貝爾愛琿無處不有俄兵闌入一時愛琿江左六十四屯皆請避兵內徙軍民咸憤而大石橋白龍駒接連省界均經開戰風聲日亟拳匪復流入愚民愈惶惑又鐵路土工十餘萬衆因久不得值競倡罷工揚言拆鐵軌劫銀行與俄人重爲難維時俄人之在富拉爾基哈爾濱吉林屬界者衆至萬數羣情洶洶爭欲藉以釋憾壽山乃明以保鐵路護難民藉全睦誼宣示於衆違者重懲不貸因派統領吉

祥約富拉爾基監工蓋爾肖甫入城冀一釋其疑懼而蓋爾肖甫乃以槍斃索值工人乘夜遁去壽山仍派西路統領保全自富拉爾基起西至呼倫貝爾北迄粗魯海圖俄人之由陸路歸國者妥爲護送出境又會商吉林將軍電飭松花江南北凡水路回國俄人概放行勿阻各處所遺房屋糗糧等物及銀行存款均籍錄待事定交還俄兵不爲止六月攻愛琿及黑河屯華民之在海蘭泡及江左六十四屯被驅迫入江死者屍蔽江下旋攻三姓掠呼倫貝爾壽山見寇禍益深迺電致吉林將軍長順轉達俄總監工儻修好罷兵願身赴哈爾濱以全家爲質並電奏請旨責以不應開仗將全眷拏交刑部治罪以謝俄人時道路梗塞未奉寄諭北路官軍之退守北大嶺者已爲俄兵所敗統領崇玉營官德春瑞昌陣亡墨爾根布特哈兩城官弁旗民望風逃潰敗軍退至布特哈屬訥默爾河南岸憑河固守西路官軍之退守雅克嶺者復爲俄軍所蹙初戰獲勝進至呼倫貝爾城外小橋子黑山背一帶困於俄援師統領保全陷陣死全德吉祥與營官傅岐標張毓芳等潰圍出嶺防相繼失陷而西北兩路俄兵逼近黑龍江省城矣未幾朝命授李鴻章爲全權大臣與聯軍約和來電以俄外部頗願停戰告壽山卽飛飭各路

一體遵照立派行營營務處程德全前赴北路俄營告以朝廷已遣使議和彼此應即停戰辨論至再八月初一日議始定壽山守軍覆則死之義於初三日以將軍印信交副都統薩保護理並派程德全佐之以便主持和局手具遺疏謂欲禦外侮必修內政而修內政尤以添設民官力興墾務爲要且謂江省之事非開荒無從下手開荒之舉非招民無從下手以七城之大土地之沃如果得人而理不出十年必能自立閱日具衣冠望闕謝恩臥棺中以槍自擊死先是詔旨責壽山不應妄開邊釁著開缺聽候查辦尋照部議革職三十二年黑龍江巡撫程德全奏陳當日實在情形請開復原官照將軍殉難例議卹予諡建祠尋復偕東三省總督徐世昌合疏上請免其查辦照將軍議卹並附祀其父富明阿專祠得旨允行旋照武職例給卹並恩賞騎都尉兼雲騎尉世職襲次完時以恩騎尉世襲罔替子慶恩襲

陸寶忠

陸寶忠江蘇太倉州人光緒二年進士改翰林院庶吉士三年散館授職編修十一年提督湖南學政十五年八月充順天鄉試同考官十七年九月命在南書房

行走十九年八月復充順天鄉試同考官二十年孝欽顯皇后六旬萬壽正月奉懿旨賞加五品銜並戴花翎二月京察一等覆帶記名以道府用四月大考一等奉旨以侍講學士陞用八月補侍講學士二十一年五月充日講起居注官七月轉侍讀學士二十二年七月授詹事府少詹事十一月遷詹事十二月擢內閣學士兼禮部侍郎銜二十三年充山東鄉試正考官尋命提督浙江學政寶忠以母老固辭允之尋丁母憂二十五年服闋有旨仍在南書房行走二十六年閏八月授兵部右侍郎九月提督順天學政時朝廷方銳意變法寶忠疏請整頓大學堂多設蒙小學堂並宜爲八旗設學以開風氣又請裁撤武科廣設武備學堂事旋施行二十八年順天鄉試借闈河南寶忠以學政充監臨二十九年仍留順天學政任七月復充鄉試監臨三十一年寶忠以學校漸興請設立文部自京師大學堂譯學館以下各省學堂皆屬文部管理由部編纂則例以便遵行因上疏曰學堂獎勵之法原定章程或予以舉人進士或以翰林主事中書知州知縣州同等官分別錄用蓋官職驟難更改而學堂初立宜有激勸開辦之始勢不得不然然其中名實不符諸多窒礙仍與從前科舉所學非所用同一弊端國家廣立學堂

令通國無不學之人原所以濬民智而圖自強勢不能盡納之於官祿之途若照原定章程數十年後天下學人皆授以官而官又不能各盡其用則於實際有何裨益竊以爲凡學堂畢業宜嚴科級予以學士博士名號而毋庸授以官職至內外各衙門員缺應查照各國隨時考選用人之法各據其所習本科由何項卒業卽考選該項官職使天下曉然於朝廷精神所屬所用必於其所學以學茂名高爲美不以能薄官顯爲榮卽不驟改官制而學堂人士亦不貴官位而賤職事此獎勵宜變通者一也興學教員爲重今師範學堂已立然猶緩不濟急各省宜廣設師範傳習所由學政撥派教習分赴各屬傳習師範無論生監皆可自備膳費入所肄業畢業給以文憑俾充蒙小學堂教習如蒙學教科書目及教授規則通行刊發後凡鄉曲嚮學之士能購取自行研習熟諳教法卽未入所傳習亦准其呈明學政考驗合格一體給予文憑充當教習此師資宜廣儲者一也日本學制凡師範生曾經任職十五年或年六十以上並無過誤自願乞退者國家給以全俸或半俸以贍之今宜略倣其意辦理凡曾充當師範十五年並無過誤自願乞退者卽分別授以教授教諭學正訓導等官此項學官卽可派充管理學堂此教

員宜優禮者一也各國學堂皆以國文爲重前次奉定章程小學堂本以國文爲初學基礎自中學堂以上必肄習洋文第小學堂畢業學生中文程度甚淺若入中學堂以後漢文不再深求大學堂雖設有經學文學專科勢必無人及格環球文字以中國爲最難最雅雖質性文采甚高者亦非十餘年不能優十三經周秦諸子史漢說文卽以文論淵雅樸茂實爲國粹近日爭習各國語言文字風氣趨重避難就易數十年後恐文字盡成鄙俚一路現在各省中學堂每偏重洋文漢文遂不復力求進步應責成學政切實查考各學堂教習所注積分表凡國文及洋文不得偏重其課目鐘點應恪遵定例不得任意加減此國文宜兼重者一也東西各國學制學生鮮在學堂寄宿者亦無不繳納學費者至於獎賞津貼尤所未聞現京師各學堂歲費十餘萬金不等而學生不過三四百人如是而欲廣建學堂以待全國求學之人其何能給竊謂中小學堂以上均應酌定學費膳費儘可格外從輕然必照章繳納其功課程度能達最優等合於日本所謂特待生資格者准破格免收學費於體恤之中仍寓鼓勵之意中學堂高等學堂畢業生品學兼優以次陞送高等學堂大學堂因實在無力繳費不能陞學者則由地方官

貸費貸費生畢業之後仍須將所貸之費分期償納中學堂收費稍輕不得援此爲例此學費宜籌議者一也從前科舉之士不辨菽麥遑論實業故倖得一衿而屢試不第則終身廢棄分利之人日益多生利之人日益少上下交受其困今擬於各州縣小學堂以上多設實業學堂如商學農學工學蠶學林業漁業之類務使通國學人於實業占其多數其程度高者自可漸次陞選否則於陞選之外人亦皆能自養中國下等工商或略認之無便營執業或一丁不識而自爲生理此卽工商窳敗游民充斥之由各鄉鎮蒙學堂以上並宜多設尋常實業學堂其平民無力或學生資質魯鈍不能入小學者皆令入此等學堂卒業後卽能自求生計雖無恆產亦不至游手無歸此實業宜注重者一也欲求教育普及官立學堂勢有不逮則莫如獎勵公立凡地方紳富有能獨力捐辦及鳩貲倡辦學堂遵照文部教科書及教法專書辦理著有成效者由地方官稟知學政派員查驗分別奏請獎給虛銜封典學生卒業之後准其一體考選按級陞送其私家學塾或由有力之家各自延師訓其子弟或由各師招集生徒自成私塾今若概令歸入學堂學堂既不勝容而人情亦或不便若能遵照定章改良教法則不妨聽其並

存但各塾教員須得有師範文憑方能充當以期一律蒙學最關緊要凡七歲以上不入學者罪其父兄家長除編入則例外應請並飭修訂法律大臣將此條增入新定法律飭各省切實查辦幼稚園與家庭教育相聯絡各省府廳州縣宜令多爲籌建國民資格實基於此此宜推廣者一也他若地方官辦理學堂之勤惰宜歸學政會同督撫考察三年甄別以設蒙學堂之多寡爲殿最各學堂積分表冊平日宜由學員審注若至學期經主考者試驗不符教員應有處分若至畢業經文部學政考驗不符主考者應有處分以上各節似可備文部編纂遵行若夫教科書籍及教授詳法關係綦要現在各州縣蒙小學堂需用教科書甚急直隸湖北雖各有編輯成書呈學務大臣審定然篇簡無多不敷教授各省坊刻希圖射利所出之書體例多不完善宜飭部臣多選精通學務之員擴充編書辦法先從蒙學下手並通飭海內學人及出洋明達之士分編各科學蠱淺教科書經呈文部鑒定予以版權俾得專利或由國家購回其版權刊發各省廣爲排印各省有現行各種教科書及編勘善本亦可由學政選擇彙送文部審定並應由文部先行刊布各教科書目詳列提要以期傳布迅捷至教授通法在奏定章程太略

尤應迅速繙譯東西各國中小學堂教授法專書參以中國現在情形由文部酌核審定一併通行各省徧發州縣遵辦現在高等及中小學堂並應嚴行甄別以齊學級從前學堂創辦伊始務廣招徠年歲材質不盡合格由高等以及小學堂名稱雖別學生程度無甚差殊查定章蒙小學堂爲普通學至中學堂則漸入專門凡文科理科法律政治以及各種科學皆基於此今府治皆立中學堂邊郡士風僻陋勉強招集但求形似應卽切實考察各中小學堂學生由學政隨時派員查驗如中學堂學生不合格者卽令退入小學堂小學堂不合格者卽令退入初級小學堂其各省高等學堂由學政自行考察有不合格者各按其學級程度所至退入各該籍中小學堂補習現在高等學堂合格之人極少應卽暫改爲初級師範或高等預備科俟各府中學堂學生或高等預備生實在畢業再行舉辦高等學堂以符名實京師大學堂已經奏請暫改習師範及大學預備科應請卽行通飭各省一律遵照辦理不得濫混科級迨三年之後大學堂改建落成分別專科教授各省學堂亦必實有成效然後由學政奏請簡員會同考察咨送應於編訂則例內責成學政隨時認真清理各學堂學級以便陞選庶不致再有參差矣

十二月授都察院左都御史三十二年正月署禮部尙書九月釐定官制改都察院左都御史爲都御史仍以寶忠補授十月賜紫禁城內騎馬三十三年正月充國史館副總裁御史趙啟霖因言事革職寶忠恐言路阻塞疏請留臺上不允而明詔宣示凡有言責諸臣務各殫誠獻替盡言無隱五月又言近日督撫奏調言官與祖制不合應請申明舊章維持綱紀特詔允行六月復請嚴禁黨援廣開言路上疏曰臣綜觀自古以來天下之亂其端皆始於人心之不平不平則相激相激則不和由是門戶紛紜競爭不已而國家受其實禍勢遂無所底止漢唐以來軌迹相尋如出一轍史冊具在讀之最可痛心者也方今時事艱難百倍往昔內憂孔迫外患方長我皇太后皇上宵旰焦勞爲臣子者宜如何滌慮洗心和衷共濟卽各奮其心思才力尙恐補救之無從乃自去年改定官制以來大臣不和之事時有所聞其幾實起於細微其害馴至於傾軋譬諸駕漏舟於巨波之內至舵工篙師猶復互逞意氣以楫相擊刺其不至覆舟者幾希臣誠私心憂之周易上下交則爲泰上下隔則爲否泰之彖傳曰其志同也否之彖傳曰天下無邦也方今治術無序民氣鬱結而不宣亂黨朋興蠢然思動設朝廷之上尙植黨營私互

相攻伐將皇太后皇上成孤立之勢其禍何可勝言又臺諫爲耳目之官現議院未立公論不彰大小臣僚所以稍知忌憚者惟在言官之舉發倘一有彈劾輒互相猜忌將使戇直者寒心庸懦者結舌勢必至隔者愈隔否者愈否泰交之象其何望耶應請嚴誡臣工精白乃心實事求是務化其伎求排擠之念用以盡同寅協恭之誠復激勵言官如有見聞直言無隱庶幾壅蔽盡除忠良日進抑臣更有說者孟子有言進賢如不得已將使卑踰尊疏踰戚可不慎歟當茲舉行新政之時亟宜以鎮定從容爲宗旨至於用人關繫大局尤宜審慎設或輕於更易如舉棊之不定竊恐天下人心益復張皇謠言紛起奸民生心將啟變亂之漸甚非國家之福也九月嚴旨敕京外大小臣工戒除煙毒寶忠請開缺得旨慰留十月疏請改都察院爲國議會以立下議院基礎而符立憲政體得旨交會議政務處議奏尋覆奏都察院係獨立衙門不可輕議更張三十三年九月上以降旨禁烟寶忠積習未除嚴敕迅速戒斷三十四年正月陳明戒煙淨盡奉旨仍照舊供職四月因病疏請開缺詔許之尋卒遺疏入諭曰前任都察院都御史陸寶忠謹慎持躬學問優裕由翰林入直南書房洊陞卿貳疊掌文衡擢任都御史宣力有年克

勤厥職前因患病准予開缺茲聞溘逝軫惜殊深加恩著賞給陀羅經被派員勒載濤帶領侍衛十員卽日前往奠醊照都御史例賜卹任內一切處分悉予開復應得卹典該衙門察例具奏尋賜祭葬予諡文慎子大坊農工商部主事恩賞員外郎

楊昌濬

楊昌濬湖南湘鄉人咸豐二年由附生隨道員羅澤南練鄉勇於長沙四年七月隨攻湖北田家鎮鎮東有半壁山絕險昌濬鼓勇先登克之並復廣濟黃梅積功獎訓導九年以辦理團防出力擢教授十年隨剿粵逆於江西敗賊於楓樹嶺復德興又敗之於高沙復婺源擢知縣並加同知銜賞戴花翎同治元年正月浙江巡撫左宗棠率師入浙昌濬隨營出力詔以同知留浙江補用九月擢衢州府知府二年賊渠劉政宏等踞金華府城分黨據湯溪龍游蘭溪三城爲犄角昌濬攻湯溪誘擒賊酋李尙揚等八名復其城龍游蘭溪及金華府城亦相繼收復捷入詔開缺以道員留於浙江補用九月授浙江糧儲道三年二月復杭州省城及餘杭賞加按察使銜十二月授浙江鹽運使旋陞浙江按察使五年二月陞浙江布

政使八年十二月署浙江巡撫九年八月實授時外患漸殷十年三月昌濬親往寧波鎮海巡視海口籌辦防務奏謂自強之計宜用外人之器師外人之長先就撫標杭協選精兵五百教練洋槍開花礮其餘各營亦次第番練期成勁旅至沿海礮臺舊用磚石恐難適用俟經費稍充當更籌改築上以爲政首在得人各省藩臬兩司有用人理財察吏安民之責關係甚重乃通飭督撫於運司道府中察訪保薦以備簡擢昌濬遵舉浙江督糧道如山等四員而以甘肅文縣知縣陶模附列剡章謂其品學純正心在利濟實爲遠大之器後模洊歷封疆克如所言浙江象山寧海二縣濱海有島曰南田者向係封禁之地而土性沃饒兩縣民多潛往墾種光緒元年昌濬乃爲奏懇弛禁會餘杭縣民葛品連急病身死其母疑品連妻與舉人楊乃武有姦輒以身死不明控縣縣令劉錫彤誤認屍毒鍛鍊成獄給事中王書瑞劾奏命浙江學政侍郎胡瑞瀾提訊仍未得實於是紳士汪樹屏等聯名呈控都察院御史王昕亦劾奏大員瞻徇奉旨提交刑部會鞠檢驗屍身無毒獄白諭曰巡撫楊昌濬據詳具題旣不能據實平反且於奉旨交胡瑞瀾提訊後復以問官並無戾刑偪供等詞曉曉置辨意存迴護尤屬非是楊昌濬著卽

行革職餘著照所議完結人命重案罪名出入攸關全在承審各員盡心研鞠期無枉縱此次葛品連身死一案該巡撫等訊辦不實始終迴護幾至二命慘罹重辟殊出情理之外嗣後各直省督撫於審辦案件務當督率屬員悉心研究期於情真罪當不得稍涉輕率四年命幫辦甘肅新疆善後事宜賞給四品頂戴五年陝甘總督左宗棠請援前任幫辦劉典成案准昌濬專摺奏事奉旨俞允九月賞給二品頂戴署理甘肅布政使六年正月敘籌解西餉功賞加頭品頂戴十一月護理陝甘總督仍會辦新疆善後事宜七年八月授甘肅布政使尋因據甘紳呈請奏爲前陝甘總督琦善建立專祠爲言官所劾奉上諭琦善在甘有罪無功不宜祠祀楊昌濬率行具奏著傳旨申飭九年二月授漕運總督十年法人擾海疆七月命幫辦福建軍務旋授閩浙總督時言官劾翰林院侍講學士張佩綸棄師潛逃命左宗棠暨昌濬查辦覆奏入上責其語多含混依違兩可傳旨申飭十一年六月兼署福建巡撫十月上諭臺灣南北地輿袤延甚遠以形勢而論臺北各海口尤爲緊要原設臺灣道一員遠駐臺南深慮難以兼顧且巡撫常川駐劄一切錢穀刑名事宜必須分員管理各專責成應否於臺灣道之外添設臺北道一

員著楊昌濬劉銘傳悉心會商妥議具奏昌濬奏添設臺北道不如添設藩司上從之十二年三月上諭劉銘傳奏澎湖爲閩臺門戶非特設重鎮不足以資控制楊昌濬與該撫意見相同擬將澎湖副將與海壇鎮對調仍歸總督管轄等語卽著楊昌濬會同籌議具奏閩臺防務關係緊要該督等商辦一切務當和衷共濟不分畛域力顧大局上年諭令該督等會議臺灣改設各事宜並著一併妥議毋稍遲延昌濬等疏言臺灣爲南洋門戶七省藩籬奉旨改設巡撫以資控制實爲保固海疆遠大之謀惟沿海數縣之地其餘番地尙係化外氣局未成孤懸海外與新疆情形不同閩臺本係一省今分爲二尤須脣齒相依以收指臂之助誠應遵旨內外相維不分畛域乃可於事有成茲就省局司道及署臺灣道陳鳴志總理糧臺前貴州藩司沈應奎籌議各條覆加酌核謹繕清單恭呈御覽現在整頓海防百廢待舉加以改設行省經費浩繁如澎湖一島辦防需銀八十萬兩業經臣等先後奏請敕部指撥此外辦防製械設電添官分治招墾撫番均關緊要至建立省城衙署壇廟各項工程雖不妨稍緩旣已分省亦不能不次第舉辦臺地防營除裁撤外尙存三十五營分布沿海一千餘里勢難再減臣等悉心籌畫擬

由閩海關本年照舊協銀二十萬兩經臣銘傳咨請福州將軍古尼音布嗣後由廈關徑撥解臺其閩省各庫局無論如何爲難每年按限協銀二十四萬兩陸續籌解並請旨敕下粵海江海浙海九江漢五關每年協銀三十六萬兩共成八十八萬兩以五年爲度統計閩省及閩海關所協四十四萬合之臺地歲入百萬兩專爲防軍月餉之需其五關每歲各協銀七萬兩尙屬輕而易舉而臺事稍得藉手庶不致盡託空言下部議行十四年二月調補陝甘總督十五年九月以監臨鄉試填榜紅號錯誤自行檢舉得旨交部議處二十年正月諭曰朕欽奉慈禧端佑康頤昭豫莊誠壽恭欽獻皇太后懿旨本年予六旬慶辰在廷臣工業經降旨加恩因念各省文武大臣有久膺重寄卓著勛勞者尤宜同膺懋賞陝甘總督楊昌濬著賞加太子太保銜二十一年七月回匪肇事諭曰楊昌濬在甘有年於回衆情形豈不深悉乃忽剿忽撫迄無定見以致遑中河狄徧地皆賊實屬措置乖方受回愚弄發給槍械轉藉寇兵亦屬庸惰不職楊昌濬著交部議處尋議革職得旨加恩改爲革職留任十月奉旨開缺回籍二十三年卒湖南巡撫陳寶箴奏聞奉旨楊昌濬著開復革職留任處分交部照例議卹尋賜祭葬二十六年陝甘總

督魏光燾復據甘肅紳民呈請懇爲昌濬在甘肅省城建立專祠並將戰功事蹟宣付史館可否予諡以表勳勤出自殊恩奉旨毋庸予諡餘依議

劉秉璋

劉秉璋安徽廬江人咸豐十年進士改翰林院庶吉士同治元年散館授編修時洪逆猶據江寧賊勢張甚秉璋先以舉人從欽差大臣張芾軍於皖南常資贊畫故大學士曾國藩李鴻章皆深器之至是鴻章新被江蘇巡撫之命移軍上海遂具疏奏調得旨發往江蘇酌量委用上海爲通商大埠舊有洋將戈登所練常勝軍頗驕悍淮軍初至糧械缺乏軍服敝陋洋弁或笑侮之秉璋輒誡軍士曰此不足病也顧吾曹能戰否耳與鴻章深謀密議蒐討軍實多崇樸勇洋弁心折卒爲我用二年賊陷福山圍常熟甚急秉璋會同銘鼎諸軍攻福山以救之並約洋弁以大礮轟賊壘賊驚潰常熟圍解旋復會攻太倉躬冒矢石累戰拔之時浙西各郡猶爲寇據與蘇省犬牙相接鴻章令秉璋自募一軍進圖嘉善嘉善東曰楓涇其北曰西塘兩鎮皆水陸衝要賊以悍黨數萬築石爲壘設守甚嚴秉璋率六千人以吳長慶況文榜王占魁等爲將偪賊壘而營賊悉衆來撲敗之乘勢攻拔楓

涇嘉興平湖乍浦各賊來援者數萬秉璋督軍破之悉敗去因拔西塘平堅壘二十餘獲逆首僞王宗廖姓僞羅天安施得柱僞敬天福汪敬之僞登天侯曹盛勇等擒斬數千捷入得旨以侍講遇缺題奏賊雖屢敗仍踞嘉善別以悍黨扼張涇匯以拒官軍張涇匯者當嘉善東濱江衝要地也秉璋策取嘉善當先下張涇匯於是約太湖師船水陸夾攻軍士晁濠直進方相持閒嘉善援賊大至秉璋憑河督戰骸受槍傷不稍卻遂克張涇匯擒斬及溺水死者不可勝計嘉善及平湖乍浦海鹽之賊皆窮蹙乞降秉璋遂進屯新豐規取嘉興僞榮王廖發受悉銳來犯秉璋迎擊大破之三年三月補侍講七月秉璋會總兵程學啟軍攻嘉興盡毀城外賊壘秉璋學啟均肉薄以登學啟中礮陣亡官軍益憤晝夜仰攻擲火焚城中藥庫賊衆潰亂遂克嘉興斬廖發受及僞挺王劉得功得旨賞戴花翎進規湖州攻吳淞南潯連戰皆捷遂會浙軍復湖州浙西肅清奉旨翰林院侍講劉秉璋躬冒矢石治軍嚴整著賞給振勇巴圖魯名號遇有應陞之缺開列在前十月補右春坊右庶子旋轉左庶子四年二月晉侍講學士時擒寇大熾上命曾國藩爲欽差大臣督辦擒匪五年春曾國藩奏調秉璋奉上諭劉秉璋統帶淮軍素稱得力

著迅赴曾國藩軍營襄辦軍務四月授江蘇按察使仍統軍駐徐州捻患流竄無定曾國藩李鴻章皆主驅賊一隅聚而殲之之計衆議其迂秉璋獨深贊之五月賊擾宿遷埠子鎮洋河集徑撲運河秉璋遣其將吳長慶王占魁夜擣賊巢循舊隄追擊至倉家集賊大潰時各路軍皆捷捻酋任柱賴汝光與張總愚相失復折而南渡滄渦兩河入懷遠鳳臺境秉璋率軍追至蒙城會盛軍擊之捻棄輜重西竄八月任賴兩逆復與張逆合於河南石固鎮將犯山東秉璋率軍至禹城寨以馬隊進擊大破賊衆擒斬無算賊棄寨走追敗之灣店又敗之呂橋會銘鼎各軍踵至賊連敗不可復合張逆西竄是爲西捻任賴兩逆東竄是爲東捻曾國藩以西捻委總兵劉松山令秉璋與提督楊鼎勳等軍豫西以圖東捻十二月東捻竄入鄂秉璋追敗之德安六年二月授山西布政使仍未之任時援師大集捻折而入皖英霍太湖間士民大震秉璋日夜疾馳至宿松迎擊敗之賊還走鄂自孝感小河溪竄河口鎮秉璋會勦軍追之勦軍先至遇伏總兵張遵道等皆死賊挾潰卒輜重而下勢不可遏秉璋率軍橫截之吳長慶況文榜等各殊死戰斬其賊目始潰走豫時李鴻章已奉命代曾國藩督師自歸德移駐濟寧始議扼運蹙賊海

隅檄秉璋隨赴濟寧布置運防六月秉璋率所部屯運西合東皖豫三省兵併力蹙賊賊竄地漸狹七月擒敗山東軍於濰河自安邱臨朐南走將由沂莒窺江淮李鴻章慮賊自下流逸出急檄秉璋由臺莊渡河赴桃源會浙軍防清江自八月至十一月提督劉銘傳郭松林等軍疊獲大捷擒酋任柱死賴汝光率殘騎千餘南走清江十二月秉璋與道員李昭慶追及於淮城大破之賴逆竄高寶水鄉遇華字營統將吳毓蘭生俘以獻東捻平東蘇皖豫鄂五省一律肅清得旨賞給白玉翎管等件東捻既平秉璋亟議息兵籌善後七年遂乞假歸八年丁父憂十一年服闋入都詔授江西布政使江西自軍興以來二十餘年庫款糾葛秉璋釐查各屬交代追官逋數百萬光緒元年擢江西巡撫二年入覲賞穆廟御製詩文集及平定粵匪剿平捻匪方略旋以母胡氏年逾八旬乞終養溫詔慰留四年再表陳情得旨俞允五年以母胡氏春秋高稱慶於家賞御書扁額並他珍物六年詔徵之諭曰見在時事艱難該前撫向來辦事實心朝廷正資任使得旨後著卽起行毋稍拘泥秉璋疏辭略曰自維愚直何補時艱儻以寵利爲心藉口宏濟天下安用有是子卽朝廷何貴有此臣是歲新疆南北肅清以秉璋前在江西撫藩任

內籌解甘餉賞頭品頂戴旋丁母憂八年服闋授浙江巡撫時台匪黃金滿嘯聚海濱官兵追捕則竄入重洋兵去復出爲民害秉璋至偵知內地多間諜故兵機悉漏乃檄府縣嚴辦保甲黃金滿窮蹙就撫十年法越事起秉璋躬巡海口沿岸築長牆繇亙數十里置地雷封海口悉所有兵輪五艘輔以紅單師船據險設防十一年二月法艦突入蛟門礮臺守將守備吳杰手發巨礮傷法船二遂退泊金塘山越數日復入虎蹲山北官軍迎轟之中其烟筒再發中後艙法將迷祿中礮死自是不敢再犯招寶山口時放小輪潛窺南岸守將總兵錢玉興選敢死士潛伏清泉嶺下突起擊之法兵紛紛落水死遂遁去事平秉璋復議擴充海防以備不虞時部議籌辦海軍經費及旗兵復餉二事秉璋密疏請併力海防先其所急十二年擢四川總督川省幅幘寥闊外接番夷內多奸盜秉璋先後歷平萬縣崔英河茂州何三木匠川北陳坤山秀山姚復乾大足余蠻子諸盜皆不動大眾旋起卽撲滅之大小涼山拉布浪瞻對各夷叛服無常秉璋行屯田之策夷皆請服十六年稅務司赫德議加抽土釐秉璋以內地種烟無利則洋土益將暢銷今洋藥旣不能加稅但重抽土釐於國計民生兩俱有損累疏持之川土得免加釐二

十年恭逢孝欽顯皇后六旬萬壽正月奉懿旨賞加太子少保銜並御書長壽字
福壽字如意蟒袍等件先是秉璋奏調試用道葉毓榮總兵錢玉興等至蜀頗見
信任爲御史鍾德祥所劾詔湖北巡撫譚繼洵馳往按驗頗有狀覆奏入部議照
濫舉非人例議以革職留任上以秉璋措施失當任用非人致遭物議應照溺職
例辦理及部議革職卒蒙恩詔改爲革職留任十月奉旨開缺來京另候簡用秉
璋疏乞骸骨允之仍命俟新督到任再行交卸逾年而教案起秉璋乃去官先是
秉璋甫至蜀值重慶民教相鬩互有殺傷秉璋至捕亂民石滙等置之法並戮教
紳羅元義以洩民憤至是省城民教構釁各屬繼起旬日間教堂被燬者數十處
奉上諭各國設立教堂疊經諭令各省督撫嚴飭地方官加意保護以期民教相
安本年五月間四川省城匪徒滋事打毀東校場教堂省外各處旋又屢出教案
皆由地方官平日不知勸諭百姓致釀事端迨鬧事後又不趕急懲辦該督劉秉
璋督率無方厥咎甚重據御史吳光奎奏參省城滋事之始劉秉璋堅置不理並
未派兵彈壓無業遊民愈聚愈多以致省外教案層見疊出該督任意廢弛有負
委任著卽革職永不敘用以示懲儆其餘辦理不善之道府等官著鹿傳霖確切

查明分別參辦二十五年詔再徵之以疾不能赴三十一年卒於家兩江總督周馥奏曰故督臣劉秉璋結髮從戎身先士卒考其平生戰蹟與程學啟劉銘傳等相埒而任事勇直持躬廉介則尤過之歷官江浙四川督撫遺愛所留紳民至今稱道程學啟諸臣故後奉旨加銜予諡建祠立傳恩賚有加該故督臣勲績相等四十年來中興將帥凋零殆盡僅存劉秉璋一人今聞病歿遠近軍民同聲感悼應如何加恩賜卹之處伏乞聖明裁酌諭曰前四川總督劉秉璋學問優長老成練達由翰林隨同前大學士曾國藩李鴻章剿平髮捻各匪疊克名城戰功卓著擢任兩司洊陟封圻任事勇直持躬廉介嗣因案革職茲據周馥臚陳戰功事蹟宿將凋零殊深惋惜前四川總督劉秉璋著加恩開復革職處分照總督例賜卹任內一切處分悉予開復應得卹典該衙門察例具奏並將生平功績宣付國史館立傳以示篤念勲臣至意尋賜祭葬明年蘇紳前工部侍郎惲彥彬等以秉璋前在江蘇統兵疊克名城治軍整肅吳民愛戴呈懇建立專祠巡撫陸元鼎以聞奉旨著照所請子體乾江蘇補用道襲二品廕生體仁舉人分省補用知府體信分省補用知府體智度支部郎中體道分部行走郎中

陶模

陶模浙江秀水人同治七年進士改翰林院庶吉士散館授甘肅文縣知縣縣有劇盜屢捕不可得模掩獲其孥以致之令作綫勇自贖盜風頓息十二年夏調補皋蘭縣知縣回酋閔殿臣叛河州被圍省城大震總督左宗棠急徵援兵車馬糧芻一促縣令儲備模朝昏擘畫緩急皆濟光緒元年陝甘初分鄉闈關地建屋以及闈中事宜無鉅細模皆躬自經紀絲粟不以累民是年冬補秦州直隸州知州時各郡大旱饑民流徙秦州者數十萬模爲度棲止設粥廠輸廉倡募遴賢能紳士以經理之全活甚衆又修養濟院增義學田租恤嫠經費州南藉水蓄城基模捐廉築隄三百五十丈浚窪地爲池植芙蓉畜鱗介取其利以資歲修隄旁栽樹十餘萬株州人曰陶公隄五年署甘州府知府新疆初復左宗棠欲得賢牧令以撫輯之奏稱可任迪化州者無若陶模上從之六年翰林院編修廖壽豐以俄爭伊犁議約未定國家當留意邊才奏言陶模器識宏遠聲名久著請諭詢左宗棠量加超擢假之事權用備他日闈寄模到官後撫遺黎來商賈和輯土客漢回軍民遷築烏魯木齊滿城經營兩載百廢俱舉賞加鹽運使銜兵燹之餘漢民無

幾流寓者多秦隴湘楚皖蜀從軍之衆土田荒蕪播種者不及三之一作輟靡常人無固志模準周禮一易再易之制而變通之以二畝作一畝上地畝納糧八升中地五升半下地三升並暫以六成徵收六年後始依定額邊氓始有久居計七年擢寧夏府知府九年署蘭州府知府旋陞蘭州道十年署甘肅按察使十一年擢直隸按察使十二年三月入都陛見隨醇賢親王閱兵津沽五月蒞任十四年三月擢陝西布政使十月護理陝西巡撫十六年復護巡撫旋還本任十二月以籌解新疆餉議敘賞給頭品頂戴十七年二月補授甘肅新疆巡撫蔥嶺之西有帕米爾者西鄰什克東距疏勒州約一千四百里蔥嶺東南有坎巨提者其酋所居城曰棍雜與哪格爾隔水相望在莎車州西南約二千里模至新疆前數月俄兵已侵入帕境英亦侵入哪格爾及坎巨提界十一月攻破哪坎兩部於是議者爭言與俄英開釁模謂能戡土匪之將士未足以禦強敵當此民窮財匱之際尤不可輕言戰惟購置機礮推廣電線飭邊將簡練軍實慎固封守振撫哪坎流民羈留坎酋毋令走俄具贖與俄費爾千巡撫英印度總督據理力爭時時咨商總理衙門爭於俄英二使又請駐俄使臣許景澄駐英使臣薛福成爭於其外部然

俄曰防英英曰防俄語多詭謾莫可究詰十八年春俄兵築壘於讓庫爾及六爾阿烏英官唆使阿富汗國人遣兵至蘇滿波孜納皆帕境也新疆文武咸憤激謂巡撫不肯戰示弱時喀什噶爾提督董福祥頻與俄領事相忤模多方維持謂屬地當爭邊要當守洋操當習兵釁萬不可開有罪則一身當之規畫主客攻守情形不欲勞師糜餉以竭民脂而邊地卒賴以安五月奏請廢黜坎巨提舊酋賽必德艾里汗會英人及克什米爾國人立其弟買賣提艾孜木爲酋諭令鎮撫部民守我藩服惟俄兵在帕忽增忽減用意叵測兩國使臣勘議邊界久未能定模具疏自劾請予罷斥上不允邊營沿湘軍制多用大旗長矛寬袖號衣模招致明德國兵法者教習新操於撫署練幼兵百餘人兼課淺近文字並測算諸法遞推之各營平日見將弁必語以習勞苦愛槍械倉卒有事則窆小溝隱身伏地發槍宿將狃積習多以爲迂初俄人借我巴爾魯克山廣袤數百里有林木水草爲塔城廳西北屏蔽模屢請及早索取又商之將軍長庚往復辯論逾年始如約纏回素不學入官塾者日爲當差模別定義學章程嚴督塾師以教之嘗歎我國財力支絀建築臺壘未能用歐洲新法因言今日當與地爭利派員探求礦質如濟木薩

之鐵喀喇沙爾之鉛達坂城温宿拜城之銅綏來庫爾喀喇烏蘇噶斯山之金迪化之石油凡數十百計終以道遠貨乏工不克舉二十年日本因朝鮮事與我構釁遼瀋各軍失利河湟回族乘隙蠢動二十一年三月撒拉回破積石關圍循化城河州逆回閔伏英馬永琳相繼揭竿陷堡攻狄道河州而西寧大通各逆皆擁衆數萬四出焚掠所在響應九月綏來縣城逆回乘間爲亂迪化莠回亦蓄異志約期舉事模嚴密防範選親信戈什哈授以機宜懸重賞擒逆首楊進裁等六人置之法餘悉不問人心大定模以時事孔亟當培養人才以圖補救疏言海防事起議和議戰衆論紛然臣以爲國之強弱視人才爲轉移人才不足不但和與戰均無可恃卽幸而戰勝亦無益於根本自古用人文武並重文有科目武有營伍立法之初未嘗不善積久弊生仕途日益雜民生日益困人才日益不可恃易曰窮則變變則通天下事所當變通者不止一端而人才其尤亟非懲前毖後破除一切拘牽之習無以作天下之士氣而收實效於將來所陳凡十三條曰國子監宜先整飭也汰考生減中額以慎科名也定小試年限以端蒙養也停捐例以清仕途也各部院堂司官宜練習政事也旗兵宜破除積習以固根本也文武大員

宜勤以率屬也禁食洋煙宜自士大夫始也分設算學藝學科目以裨時務也水軍陸軍急需文武兼通之才宜破格鼓勵也各省操法宜變通也工藝爲富強之基宜加意考求也大小臣工宜力戒自欺也末言當此危疑震撼之時輿論孔多泥古者謹守舊章憂時者競談新法然積習不能不改而變法亦未敢輕言誠能發憤自強合羣策力急起直追何事不可勉爲若仍縛於成例淆於浮議不以全力赴之雖勉行十之八九亦無濟於事臣尤伏願皇上鑒天災之屢警念民困之莫蘇懷內政之宜修知外患之難弭勵精圖治日新又新自朝廷以至百執事毋始勤而終怠毋狃目前而忘遠慮上有臥薪嘗膽之大臣下有斷齏畫粥之志士賢才爭奮庶政修明四境綏安遠人賓服實天下臣民所旦夕仰望者也十月賊陷水泉堡張掖岌岌模復由俄綫電奏永昌被圍標兵挫折請加派大軍進剿兼求新疆急援奉電旨甘州緊急該撫撥營往援實爲力顧大局此後摺報取道蒙古自是正辦惟臺站安設不易是否可行當令科烏等處照案舉辦陶模見署甘督疏通餉道爲第一要義如再帶數營入關沿途剿撫更資得力時模已奉旨署陝甘總督董福祥所部甘軍已渡洮雲南巡撫魏光燾率湘軍將至湟水東兵力

既厚模慮賊西竄或出合黎左右踰北漠直達伊吾蒲類乃議俟迪化鎮西防務周而後啟行俟哈密防務周而後移師入安西玉門而東於是檄飭各將領分道防守凡漠中僻路有水草者皆扼要隘賊游騎數隊橫出驛路之北循邊牆西行掠撫彝北境各堡窺漠北虛實知有備乃引歸十二月模親率馬步八營旗以行過吐魯番城回王瑪木特自魯克沁來會勛以大義俾固結良回以消姦宄至哈密巡視漢回二城繕完守備較閱各營命回王沙木胡索特所練纏回與漢兵合操示無猜疑以固新疆門戶二十二年三月蒞署督任大通縣西北境地曰大通營回族皆獷悍習爲盜渠魁散處十大莊堡模以其屢擾驛道破民堡罪惡尤著令痛剿之西寧回匪悉衆由水峽口西竄青海模度賊黨無謀必不據青海謂宜以見有兵力固守河西四郡拒賊於南山荒磧乃檄候補道潘效蘇偕諸將由北大通退歸山外西馳出塞陳兵於玉門池南諸山徑以待戒無得縱賊出平地青海蒙古諸王貝勒以羽書告急電旨敕魏光燾董福祥分兵追剿模以羌中荒邈必責後路州縣籌糧芻車馱重困小民且賊行速尾追無及今兵單餉絀專顧郡縣完區力已不足若宿兵絕漠內地空虛爲禍更大乃奏請敕罷青海之師

竄回果狂走不少留模急檄玉門之師倍道赴安西州五月大敗賊於牛橋陣凍餓僵踣積中者數萬人逆回劉四伏以千餘騎跳走模令羅布淖爾守將設伏以俟並飭副將金蘭益等星夜蹙賊令無擾敦煌賊窮蹙由色爾騰海向羅布淖爾流沙荒遠餓斃強半七月劉四伏就擒於淖爾東南之和兒昂於是徙降回於塔里木河濱令諸將還兵入甘州南山野牛溝番地搜捕餘匪關內外肅清奉旨褒獎遂實授陝甘總督模以甘省財力奇絀所經營礦務製造學堂諸要政率不獲行其志迺於覆奏中外臣工條陳疏中請朝廷核實用財破格儲才推行宜漸本根宜急又疏陳變通武科謂兵士宜自幼入學校分別水陸各習專門學成後作爲水軍陸軍秀才咨部考試作爲舉人而罷去舊例武科督陝甘三年憂勞成疾累疏乞罷均蒙溫詔慰留二十五年冬任滿述職二十六年二月東行至陝病作奏請賞假留陝就醫閏八月奉旨調補兩廣總督模以才力不勝疏請收回成命時聞兩宮西幸力疾至蒲州迎駕召見時面陳病狀堅求罷職上不許乃扶病南行二十七年正月疏請變通學校科舉略言分設蒙學小學中學大學給以生員舉人等榮名無論由何項出身非有學堂執照者不得授實官其教習皆須品端

學粹擇要試行逐漸推廣勿一時並舉致有名無實俟學校齊備卽將科舉停止俾歸於一途二月復疏言宦官干政之禍史不絕書至其有關君德者其幾甚微而爲害尤烈我朝家法嚴明二百餘年從未有內監預聞政事至治之盛往古所無然除弊當如除莠留其芽蘖終恐發生不若絕其根株永無滋長伏思前代之用宦官蓋由妃嬪衆多之故我皇上後宮減少左右使令本有宮女至內廷各項差使悉可改用士人不必定須內監臣愚以爲宜大加裁汰迴鑿之後請旨敕下王公大臣公同籌議定宮府一體之制永不再選充內監非惟一時之盛事實亦千古之美談尋又奏變通政治宜務本原本原在於朝廷必朝廷實能愛國愛民乃能以愛國愛民責百官必朝廷先無自私自利乃能以不自私不自利望天下轉移之道一曰除壅蔽二曰去畛域三曰務遠大今者環球各國角智競能因循苟且將無以自立於五洲伏願速定國是以奠危基天下幸甚時國威旣損外人恣睢綦甚葡萄牙假地澳門初止半島道咸以來漸肆蠶食然所侵舊界久未定議乃又圖取毗連各鄉並大小橫琴各島遣使白朗毅至京要挾模乃臚列形勢利害咨請外務部堅持駁斥得戢狡謀粵素多盜手定清鄉章程實行緝捕之法

凡練軍營哨分屯在外者許由牧令節制信賞必罰一歲中捕斬著匪二千數百人廉欽各邑及防城之十萬大山曩爲賊藪者皆遣明幹大員督率將弁先後討平之肇羅所屬新興陽春東安各縣山深地險向爲匪徒巢窟模嚴劾緝捕廢弛者并遣員督營緝辦兩月之間殲獲要匪二百餘人又令府縣設勸工廠教養輕罪而於奏報治盜摺內兢兢以寬民力清盜源爲要二十八年五月奏陳開辦大學堂武備學堂因請竟廢科舉以收學堂實效上謹之以病連疏乞假並求解任慰留至再六月奉旨准其開缺甫受代而病革尋卒遺疏言粵東虛有殷富之名實已民窮財盡而迫於時勢仍不能不百計籌款閭閻益困盜賊日繁長此不已後患正多可慮惓惓愚忱竊欲朝廷深加之意至粵西匪事近聞勢尙猖獗而夏潦之後又苦亢晴晚稻若再失收辦理更爲棘手此尤臣夙夜次心而瞑目難忘者也署總督德壽上其疏並言模歷官忠誠制行堅卓久在聖明洞鑒之中中外臣僚亦夙相推服至其生平學行一以宋儒爲宗而又通達時務無拘墟腐舊之見自奉儉約清德爲一時所稱於公家款項尤不肯稍有糜費律已甚嚴而待人則寬恕嫉惡甚峻而愛才若飢渴乃積勞盡瘁賚志以終士庶官紳同聲慟惜臣

等檢閱其奏疏遺稿忠言讜論洞達體要忠愛之忱深遠之識實有名臣遺風尤不能不爲國惜此人也奏聞諭曰兩廣總督陶模秉性樸誠精勤練達由庶吉士起家縣令洊歷封圻在陝甘邊省二十餘年撫綏培養吏畏民懷調任兩廣總督辦事實心不辭勞瘁旋因患病迭次賞假調理旋准開缺方冀醫治就痊長資倚任茲聞溘逝軫惜殊深陶模著加恩追贈太子少保銜照總督例賜卹任內一切處分悉予開復應得卹典該衙門察例具奏靈柩回籍時沿途地方官妥爲照料伊子陶葆廉著賞給員外郎長孫廕生陶善培著賞給主事用示篤念盡臣至意尋賜祭葬予諡勤肅二十九年陝甘總督崧蕃據紳民呈懇奏請於甘肅省建立專祠列入祀典以順輿情而隆報饗三十年新疆巡撫潘效蘇復據紳民呈請於新疆省城捐建專祠並將政蹟宣付史館立傳以彰忠盡詔並從之

饒應祺

饒應祺湖北恩施人咸豐九年由廩生候選訓導倡辦團練出力敘國子監學正銜同治元年中式舉人六年揀選知縣改捐主事欽差大臣陝甘總督左宗棠督師討回逆調應祺辦理營務十年敘克金積堡功奉旨免補主事以直隸州知州

留陝補用十三年論克巴燕戎格暨河州各城功擢知府光緒二年關隴肅清彙案請獎詔俟補缺後以道員用三年署同州府知府時陝西大饑同州尤甚奸民因以煽亂應祺徧諭各屬商民出糶蠲廉爲倡並截留他省糧運全活甚衆亂定復招集流亡興水利樹植四年以陝西籌撥西征軍火出力賞加鹽運使銜六年左宗棠疏薦應祺有旨交軍機處存記十年授甘肅甘州府知府巡撫邊寶泉委查陝西差徭定通行章程四十條分別兵流埽除浮冗歲省銀數十萬兩十一年調甘肅新疆鎮迪道十六年調喀什噶爾道十七年署新疆布政使十九年補授與俄羅斯訂立阿爾泰山界約二十一年署新疆巡撫值漢回構逆蔓延甘涼應祺調提督牛允誠各軍回防玉門安西敦煌分扼阿不旦紅柳峽阿武斯各要隘並於哈密鎮西喀喇沙爾阿克蘇各後路節節設防二十二年逆匪劉四伏撲犯昌馬大破之賊分路逃竄窮追至雅不冷斬劉四伏餘衆盡降庫車寧遠諸回同時解散有詔褒勉旋授新疆巡撫二十五年剿平綏來回亂二十六年疏請設立左右兩翼馬隊略言新疆地多戈壁轉饋萬難步隊不如馬隊之輕便一旦有事分合多少臨時可酌量分布二十七年興設武備學堂及選立常備續備巡警等

軍疏言他事用人皆可嘗試選將則非久經戰陣屢奏成功者萬不可輕用振興戎政非徒襲德操陣法要在將卒一心期有實用惟先就原有將弁擇其樸實勤奮者操習新式槍礮認真訓練以成勁旅上躉之應祺任布政使時以新疆南路羅布淖爾地居偏僻廣袤千餘里詳請開辦屯田及二十二年剿平回匪降衆八千餘人悉安插羅境奏升附近喀喇沙爾廳爲焉耆府而於羅布淖爾設興平縣及卡克里克縣丞隸之兼設蒲昌營屯防遊擊守備千總把總等官二十八年會同陝甘總督崧蕃疏請將疏勒莎車溫宿三直隸州陞爲府改庫車直隸廳爲直隸州瑪納巴什直隸廳爲巴楚州增蒲犁通判一伽師澤普洛浦溫宿輪臺塔羌沙雅孚遠鄯善縣九柯坪呼圖壁縣丞二分地而理庶於新疆吏事邊事均有裨益又疏請增鄉試中額二名會試中額一名暨各府學官學額又以新疆償款太鉅協餉不敷請照內地行省額徵錢糧之例統按一五加耗徵收耗羨先後均得旨允行九月調安徽巡撫十二月行抵哈密卒陝甘總督崧蕃新疆巡撫潘效蘇以聞並陳應祺一生謹慎用人處事誠實不欺而持身務儉爲人所難及新疆界連英俄隨機因應籌理防務尤能處以鎮靜諭曰安徽巡撫饒應祺由舉人投效

軍營保陞知府洊擢封圻在關隴新疆前後三十餘年整頓地方卓著勞勩上年調補安徽巡撫由新疆交卸入關歿於哈密途次殊甚軫惜加恩著照巡撫例賜卹任內一切處分悉予開復生平政績宣付國史館立傳應得卹典該衙門察例具奏靈柩回籍時沿途地方官妥爲照料伊子陝西候補道饒鳳珪著俟服闋後以道員仍留原省卽補尋賜祭葬子鳳珪卽補道鳳璜舉人鳳瑄鳳瑛均附生中書科中書銜鳳瓊附生鳳瓚

譚鍾麟

譚鍾麟湖南茶陵州人咸豐六年進士改翰林院庶吉士九年散館授職編修是年秋大考翰詹列二等賞袍料一匹十年充會試同考官鍾麟甫留館未與考差蓋異數也同治元年充湖北鄉試副考官二年五月記名以御史用十一月補江南道監察御史時天下多事言官率毛舉細故鍾麟以爲御史當效忠補闕深維國家利便令可施行若但訐陰私立朋黨非朝廷重諫官意也乃疏請申明定例非廉明伉直有節操者勿得保送御史違者坐其長官下部議如所請三年截取奉旨記名以繁缺知府用四年春恭親王奕訢被嚴旨罷議政下其事內閣令王

公以下詳議具奏罪且不測鍾麟獨與吏科給事中宗室廣誠等聯名上奏曰三月初九日內閣奉旨交下惇親王及編修蔡壽祺具奏摺件著王公大學士九卿翰詹科道會議又於十四日奉旨發下醇郡王等各摺著一併詳議具奏等因欽此仰見皇太后皇上審慎周諮之至意臣等恭閱惇親王醇郡王等所奏均係爲大局起見恭親王自議政以來夙夜在公尙無遺誤屢荷優詔獎其賢勞在聖恩非私於一人此天下臣民所共信至於召對之時言語不檢誠不得爲無罪一經天威震疊當必愧悔交集補救不遑臣等伏念海內多事之秋全賴上下一心共資康濟而於懿親爲尤甚若廟堂之上先啟猜嫌根本之間未能和協駭中外之觀聽增宵旰之憂勞於大局實有關繫臣等忝居諫職未敢緘默不言至用舍之權操之自上非臣下所敢妄議疏入上奉懿旨以廣誠等摺內各語持論固屬重大於朝廷辦理此事苦心尙未領會因復降旨宣示百僚以毫無猜嫌之意命恭親王仍在內廷行走並仍管理各國事務衙門十二月授杭州府遺缺知府五年到省時浙江當大兵之後百廢待舉巡撫馬新貽重鍾麟名卽奏補杭州府知府下車以恤流亡理獄訟清賦稅爲務六年二月以前在國史館纂辦大臣年表賞

加道銜是冬署杭嘉湖道督海塘工濬長安河皆稱利賴馬新貽密保其才可大用七年擢河南按察使八年三月母憂去官十年服闋入都陝甘總督左宗棠疏請飭赴甘肅既得請未行授陝西布政使十一年正月護理巡撫事鍾麟故嘗遊陝知其民情取所疾苦更易之初漢回積不相能至是值回亂衆禁回民出城窮餓者無以營生計鍾麟弛其禁令漢民不得相讐遇訴訟戒屬吏毋有所袒回衆感泣誓不犯法旋還布政使任時左宗棠方督師甘肅設糧臺於陝西各省協甘軍餉亦皆道陝鍾麟乃設局行鈔徵發立應悉無留誤更以餘暇興學立書局濬鄭白渠教民種桑蠶織大興光緒元年擢陝西巡撫先以籌餉功賞頭品頂戴左宗棠復奏言數年來百姓綏靖糧餉不匱臣得一意軍事無兼顧憂皆鍾麟力奉旨賞戴花翎三年陝西大旱先是鍾麟依社倉法督州縣積穀至數萬石乃盡發以賑選任幹吏不假手胥役頒禁令十條嚴治囤戶及侵漁者富平知縣劉志同高陵知縣陳衍昌辦賑欺飾鍾麟奏革訊治斬胥吏以徇官民震懾時晉豫皆旱饑兩宮爲之吁食發內帑糴沿江粟以賑之猶不能全濟陝獨晏然論者以晉豫陝災同而有司請發獨異疑陝諱災朝廷乃以鍾麟前後奏宣示且有實惠及民

之褻焉五年春因病請開缺奉旨賞假兩月勿庸開缺並勉以時事艱難當力圖報稱未可遽萌退志八月調浙江巡撫加兵部尚書銜浙江自兵燹後田業失主多爲豪強兼并號荒產匿不納租有司按問率不得要領鍾麟遣官按籍稽徵曉以禍福遂各還其初錢塘縣吏何秉仁浮收漕糧計贓盈萬逮斬之知縣陳國香亦坐遣戍盡革墊完透息諸弊民情大歡踴躍輸納增運十餘萬石於鹽則查減曬版召商集貲承運又更定釐稅於貨物首所過局計遠近並征聽其所之不再留難商民稱便築礮臺修海塘重建文瀾閣庋藏高宗所賜四庫書開局延文儒校刊羣籍治聞一時七年八月遷陝甘總督甘省邊遠貧瘠屯軍歲餉數百萬皆仰給他省至不以時鍾麟奏獎諸布政使運解迅速者自是饋餉相屬新疆旣平創設巡撫歲以甘餉三之二濟之時其緩急不令缺乏西域道遠輶傳相望州縣輒斂民車費時失業最爲害鍾麟乃立官車局以供轉運民不知役舊商人承運花馬池鹽貪利昂其直私販因以充斥商困稅紕乃罷舊商定就場徵課法稅增什二鹽直反大減盡罷諸苛細捐及芻豆徵累民者民困以蘇又以久遭兵燹士多失學於蘭州建求古書院甘州建河西精舍選高才生講肄其中十年法越事

起鍾麟奏請自率精兵五千人入衛有詔止之乃以提督雷正綰自代餉械自給不別請部款迄於罷兵十三年河決鄭州工久不就鍾麟籌解六十萬金助塞河及賑災民奉旨優敘督甘九年庫儲至百餘萬兩州縣積穀數百萬石十倍初至時初鍾麟至甘肅卽患日疾前後四請解任均賞假慰留賜珍藥十四年益劇至不能視自陳乞開缺兩奏始奉硃批譚鍾麟向來辦事認真深資倚任前因日疾屢經寬予假期並賞藥餌以期速愈茲據縷陳病勢日劇萬難任事情詞迫切未便拂其所請譚鍾麟著准其開缺回籍安心調理一俟就愈卽行來京陛見家居兩載日復明十七年二月奉詔入都恩賜紫禁城內騎馬四月詔以尙書銜補吏部左侍郎八月兼署戶部左侍郎兼管三庫事務十八年三月署工部尙書五月授閩浙總督二十年恭逢孝欽顯皇后六旬萬壽正月懿旨賞加太子少保銜七月兼署福州將軍十月調四川總督未行二十一年四月調兩廣總督粵素多盜賭風尤甚奸猾之徒懼爲吏所持則公請以博進贏餘助軍餉歲輸三十萬金所謂四成報效者也鍾麟至任以賭爲盜源不禁賭則盜終不可止而官徵賭款尤傷政體乃奏罷賭餉盡封禁諸賭館尤嚴官吏賂請之罰又闡姓商歲輸公家亦

數十萬金闈姓商者鄉會試方入闈時取與試士子姓爲覆聽人射之謂之卜榜花得多者勝贏利鉅萬闈商六年一更易爭欲承充則競納賄自總督以下多寡有差鍾麟惡之將議禁而闈餉所從來尤久關於部款猝未可革鍾麟乃令輸貲百六十萬者充之自總督以下不得更索一錢示定期限逾期不如數以所輸沒入官羣不便者造蜚語百端不爲動久之中外言籌餉者稍稍及賭捐欲弛禁朝廷下總督議鍾麟覆奏曰禁賭以來議者紛紛至謂賭爲粵民生計禁終不止費出於賭取之無傷臣愚竊所不解夫上之於民猶父兄之於子弟爲父兄者必無恃子弟博以自奉之理況國家歲得不過數十萬金而小民傾家蕩產者何止百數十萬民之不利國何利焉臣非不知賭禁雖嚴未必遽絕然上無所利則聚賭之匪人受賄之官吏無可藉口尙不敢肆意橫行一旦弛禁人民旣無忌憚不肖官吏復因而牟利上下交征亂可立待雖有百萬將焉取之至如所言禁賭則生計日窮一省之民恃賭爲生計中外古今安有是理若謂盜風之熾由於禁賭言尤不經聞因賭而窩盜賭輸而爲盜者矣不聞賭可弭盜也無識之徒罔顧利害飾辭聳聽所言萬不可信所請斷不可行奏上上深韙之然言者猶不止鍾麟復

疏爭之事乃寢廣東交涉日繁鍾麟不得行其志乃以病求去疏五上二十五年十一月命來京陛見旋賞假兩月回籍就醫明年萬壽覃恩賞戴雙眼花翎四月入覲復自陳始命開缺留京當差七月乘輿西幸鍾麟以衰疾不能從乃乞歸三十一年卒遺疏入諭曰前任兩廣總督譚鍾麟老成練達學問優長由翰林改官御史簡放外任洊陟疆圻服官四十餘年所有整飭吏治勤恤民依於地方要政尤能力持大體前因患病奏請開缺回籍茲聞溘逝軫惜殊深譚鍾麟著加恩予謚照總督例賜卹任內一切處分悉予開復應得卹典該衙門察例具奏伊子安徽試用道譚寶箴著俟服闋後以道員仍留原省儘先補用伊孫譚輔宸著賞給員外郎用示篤念蓋臣至意尋賜祭葬予謚文勤子寶箴安徽道員延闈翰林院編修孫輔宸員外郎

聶士成

聶士成安徽合肥人由武童投效欽差大臣袁甲三軍營同治元年四月隨大軍克復廬州府城敍功獎外委八月平湖溝澮北捻巢拔把總加五品頂戴二年隨淮軍克復太倉鎮洋崑山新陽吳江震澤擢守備賞戴藍翎三年克蘇州江陰無

錫金匱各城陞都司加遊擊銜賞換花翎四年連克宜興荆溪溧陽嘉興常州論功超遷參將五年追敘淮軍分援浙皖閩三省戰績士成奉旨以副將補用旋從直隸提督劉銘傳躡擊東捻任柱等股屢獲大捷賞力勇巴圖魯名號六年疊敗賊於山東曹縣安邱濰縣及湖北黃安紫坪鋪又追賊江蘇贛榆城南陣斃逆首任柱餘匪平七年五月詔以總兵交軍機處記名簡放並賞給一品封典七月錄平西捻張總愚功以提督記名光緒十年法人襲據基隆士成率軍渡臺援剿每戰輒勝十一年臺防解嚴有旨記名以海疆總兵簡放尋統慶軍駐防旅順口十七年海軍大閱禮成賞加頭品頂戴調統蘆臺淮練諸軍十月剿熱河朝陽各屬教匪生擒逆首楊悅春斬之捷入賞穿黃馬褂十八年三月熱河全境肅清賞換巴圖魯阿巴圖魯名號五月授山西太原鎮總兵仍統蘆臺防軍二十年五月與直隸提督葉志超赴援朝鮮志超軍駐成歡遇伏士成力戰卻之全軍而還七月賞換剛安巴圖魯名號既而平壤軍潰葉志超逮問士成扼守大高嶺屢敗敵衆乘勝規復連山關分水嶺各隘十月補直隸提督十二月日兵乘除夕潛襲我軍士成設伏以待大破之於分水嶺斬日將富剛三造優詔褒勉賞白玉翎管小刀

荷包諸珍物二十一年和議成撤兵回駐蘆臺歸併武毅淮軍三十營以士成總訓練之二十四年詔改士成所部三十營爲武衛前軍二十五年二月大學士榮祿奏北洋武毅軍訓練三年著有成效請將出力員弁擇尤保獎奉上諭北洋自創立武毅軍以來經提督聶士成悉心擘畫綜理精詳見在訓練已屆三年確著成效該提督公忠篤實辦事認真深堪嘉尙聶士成著交部從優議敘十月賜紫禁城內騎馬二十六年拳匪構釁英法諸軍犯津沽士成以十營護鐵路以十營留蘆臺而自率五千人赴津防堵連奪陳家溝武庫跑馬廠八里臺諸處復由八里臺徑攻紫竹林敵來益衆軍士少卻士成冠服立橋上手刃退卒憤謂諸將曰此致命遂志之日也雖及死不得逾此一步未幾徧體鱗傷衣襦盡赤猶奮臂指揮督戰最後飛礮洞胸腸胃潰流遂歿於陣事聞奉上諭統帶武衛前軍直隸提督聶士成從前著有戰功訓練士卒亦尙有方乃此次辦理防剿種種失宜屢被參劾實屬有負委任昨降旨將該提督革職留任以觀後效朝廷曲予矜全望其力圖振作藉贖前愆詎意竟於本月十三日督戰陣亡多年講求洋操原期殺敵致果乃竟不堪一試言之殊堪痛恨姑念該提督親臨前敵爲國捐軀尙非退憊

不前者比著開復處分照提督陣亡例賜卹用示朝廷格外施恩策勵戎行之至意尋賜卹如例賞騎都尉兼一雲騎尉世職襲次完時以恩騎尉世襲罔替二十八年署直隸總督袁世凱奏陳士成生平勲績及死事慘烈情形略言士成自束髮從戎卽有誓死報國之志歷隨故大學士李鴻章征剿髮捻卓著戰績至其援臺援朝力守遼瀋不避艱險尤爲人所難能當癸巳甲午之交邊燧無警而士成獨慨然慮東邊有事親往東三省遊歷凡經過要隘皆用西法繪圖立說山川扼塞形勝瞭如指掌著有東遊紀程一書閱時半載跋涉數千里喘息未定果有中東之役庚子之變寇亂相尋軍務棘手士成以少敵衆身任其難爲羣強所讐服而拳匪獨讎視之蹈瑕抵隙齟齬百端處事勢萬難之中值衆寡懸殊之地毅然不顧甘殉疆場蹟其善戰授命武臣中實惟一人諭曰已故直隸提督聶士成秉性忠貞沈毅果敢歷隨前大學士李鴻章征剿髮捻各寇摧堅陷陣疊著勲勞嗣在北洋整頓海防講求訓練壁壘一新前歲拳匪事起倉猝用兵備多力分衆寡不敵卒以身殉洵屬大義凜然披覽死綏情狀至爲慘烈憫悼彌深聶士成著追贈太子少保照提督陣亡例賜卹加恩予諡該故提督生平戰功事蹟及死事本

未宣付史館立傳並准於立功省分死事地方及原籍建立專祠爲以死勤事者勸該提督子嗣幾人有無官職著袁世凱查明覆奏候旨施恩及袁世凱查覆奏入復諭曰朕欽奉慈禧端佑康頤昭豫莊誠壽恭欽獻崇熙皇太后懿旨已故提督聶士成之母年逾八旬著賞銀一千兩由廣儲司給發伊子分省補用知府聶汝魁著以道員分省補用候選知府聶憲藩著以知府分省遇缺卽補以示錫類推恩有加無已之至意予諡忠節

黃萬鵬

黃萬鵬湖南寧鄉人原籍善化咸豐三年由武童投效前禮部右侍郎曾國藩軍轉戰湖南北六年優貢生曾國荃領軍援江西萬鵬以哨長從擊賊安福復其城再戰於大汾河又破之獎六品頂戴七年移軍天華山以規吉安連蹙賊白鷺洲稜潭灣等處萬鵬力戰槍子洞左股官軍遂克郡城保以外委儘先拔補九年二月從破賊於信豐五月調援景德鎮十一年二月進圍安慶逆首陳玉成來援連營數十重分撲後濠拊官軍之背築月牆濠外以避礮萬鵬率衆逾濠立毀其牆增修新壘以拒之賊不得逞左足被槍裏創血戰自夜達旦軍中皆服其勇八月

朔官軍地道成火發轟城西北隅壞數十丈萬鵬冒煙直前大軍繼之遂克安慶
敘績以千總儘先拔補賞戴藍翎同治元年三月官軍乘勝復巢縣下和州四月
復太平府城克蕪湖烈山各石壘乘勢破周村駐軍江寧板橋五月收復秣陵關
奪大勝關要隘偪雨花臺而軍萬鵬皆有功詔以守備儘先補用並賞換花翎閏
八月僞忠王李秀成分令羣酋自蘇州擾太平寧國而自率十三僞王救江寧衆
號六十萬直薄官軍萬鵬空壁逐之飛丸中左額力戰不顧毀賊壘十二殺賊三
千人十月解圍論功擢都司並加遊擊銜二年四月進攻雨花臺萬鵬率壯士數
十夜半蛇行潛近石城從礮臺下蟻附而升殲守礮者移礮內向以轟之賊驚竄
遂拔臺城並平聚寶門外各石壘七月官軍出印子山壓賊壘而陣悍賊以死拒
萬鵬率騎隊出賊後擊之賊始駭潰追至秣陵關連破十餘卡盡平河西及江東
橋上方門高槍門雙橋門七橋甕各壘江寧之圍始合詔免補遊擊以參將補用
三年六月大軍克江寧萬鵬逐賊純化鎮手擒僞烈王李萬材復追至湖熟鎮盡
斃僞巨王幼西王幼南王定王崇王璋王等捷奏上大喜命以總兵記名簡放並
賞給力勇巴圖魯名號賜獎武銀牌一方五年捻寇犯湖北巡撫曾國荃檄萬鵬

募選鋒馬隊駐防黃花澗時德安隨州棗陽天門應城雲夢各郡縣爲捻所躪七月移軍德安未至三十里賊憑險拒戰萬鵬擊敗之復敗賊於德安應城雲夢皆克之十二月諸軍追賊至白口別營失利賊遂犯安陸萬鵬偕諸軍力卻之槍傷髮際六年二月賊復上竄萬鵬會師新洲夾擊之賊退走追破舊街柳林賊又敗之大崎山碾子河沙河大小二十餘戰皆捷命以提督記名簡放九年欽差大臣陝甘總督左宗棠調赴甘肅行營差遣十年三月檄署漢中鎮總兵十一年七月叛回馬本源等糾陝回及撒拉回衆圍西寧左宗棠檄萬鵬率守備李鳳來等赴討至碾伯與賊遇大破賊於硤口遂解西寧圍十二年正月會湘軍克向陽堡逆巢乘勝復大通縣擒逆酋馬長忠等百餘名駢斬之餘衆就撫遴其精壯立爲旌善馬隊萬鵬自領之並統壽字後旗敘功賞三代一品封典時官軍圍肅州久不下萬鵬以師會之尋克其城關隴肅清奉旨優敘十三年降寇閔殿臣復以河州叛官軍進討平之閔殿臣就撫萬鵬所領馬隊功爲多交部優敘並賞換伯奇巴圖魯勇號光緒二年左宗棠用兵新疆檄萬鵬隨道員劉錦棠出關當是時天山南北皆爲賊擾首逆白彥虎連結安集延及各纏回踞烏魯木齊倚古牧地爲巢

穴六月官軍進襲夜次黃田黎明賊始驚覺角聲四起官軍嚴陣山上萬鵬與總兵余虎恩先率馬隊馳擊賊騎卻之旋復合步賊來攻萬鵬與余虎恩督馬隊張兩翼總兵譚拔萃率步隊居中鈔而進賊大潰乘勝徑薄古牧地敗援賊夷目阿托愛火其巢遂復烏魯木齊迪化州及僞建王城追賊至鹽池墩而還捷上賞穿黃馬褂八月大軍進攻瑪納斯地道轟發城陷二丈餘各軍摧鋒直前賊亦以死抗士卒多傷矢及萬鵬臂拔之更疾戰各軍繼之遂克瑪納斯掘僞清真王安明屍戮之得旨優敘三年三月官軍由烏魯木齊逾嶺而南進攻達坂城師至柴窩鋪夜大霧萬鵬與余虎恩各率所部銜枚疾行近城多水草泥沒馬腹踰淖傳城而陣天明霧收賊始知倉皇不得遁城立拔逆首伏誅餘賊無一脫者進剿托克遜城至小草湖遇賊伏圍萬鵬數日萬鵬率隊盪決所向皆靡會劉錦棠以大軍至內外夾擊賊大敗舉火焚糧藥棄城遁是役也斃賊二千餘人生擒數百名受降二萬有奇論功稱最詔予雲騎尉世職七月大軍駐蘇巴什阿哈布拉劉錦棠自向開都河而檄萬鵬與余虎恩率馬步十四營取道烏沙塔出庫爾勒之背萬鵬敗賊於布告爾馳抵托和柰遇賊復破之復庫車進駐拜城履冰夜行抵銅廠

賊方列陣諸軍直搏之賊駭失措萬鵬麾兵合擊斃賊無算餘賊相率狂奔官軍逐北過查爾齊克臺西遂薄阿克蘇城白逆率死黨棄城走烏什萬鵬踏冰渡胡瑪訥克河行戈壁八十餘里疾追之俘其後隊馬有才等斬之進拔烏什一月中行三千里於是南疆東四城皆下予騎都尉世職白逆之敗於烏什也逾雪山入喀什噶爾助攻漢城劉錦棠檄萬鵬由烏什取道布魯特境與余虎恩期會喀城萬鵬星夜疾馳沿雪山千餘里雪深或至丈餘時以氈貼地濟師十一月抵喀城北麻古木虎恩亦抵城東牌素特相距六十里賊騎瞥見官軍馳呼於城曰大軍至矣纏回皆驚潰安集延酋殺之不能止白逆乃與安酋分道遁而留其黨守城夜三鼓兩軍抵城下城內火光燭霄漢萬鵬自北入虎恩自東入天未明賊啟門走乃留營守城自率兵急追之一日夜馳三百里至爰崴槽與賊後隊相值生擒僞元帥馬元斬其副白彥龍白逆遁入俄羅斯新疆平錄功改授二等輕車都尉世職四年八月凱旋乞假歸省六年仍赴新疆統帶揚威等營十年南北山邊防敕平賞頭品頂戴十二年統帶定邊定遠等營旗十五年新疆巡撫劉錦棠以萬鵬疊著戰功熟悉營伍邊情疏請留新疆補用允之調署喀什回城協副將以城

署各工告竣予優敘十六年新疆巡撫魏光燾疏薦萬鵬馭軍整暇韜略優嫻委署阿克蘇鎮總兵並統東四城各營尋補阿克蘇鎮總兵恭逢德宗景皇帝二旬萬壽恩詔加一級賞萬鵬母楊氏御書扁額暨如意文綺諸珍品十八年錄邊防功優敘二十年署新疆提督並統西四城馬步各軍恭逢孝欽顯皇后六旬萬壽疊拜福壽字如意文綺冠纓之賜又特賞其母楊氏扁額如意金花金杯絲緞等物二十一年調署巴里坤鎮總兵並統東路防剿各軍時甘回劉四伏等率黨由玉門西竄欲道哈密擾南路萬鵬扼要隘賊不敢過改道安西謀犯新疆省城行至戈壁悉爲官軍所殲詔予優敘二十三年因叔黃登和等先後陣亡乏嗣各有雲騎尉世職萬鵬例得兼襲湖南巡撫疏請併爲二等男爵上從之四月命開缺送部引見時萬鵬舊傷舉發聞命力疾就道二十四年九月卒於陝西途次二十六年新疆巡撫饒應祺奏陳萬鵬勳績請照提督軍營立功後積勞病故例從優議卹並附祀大學士左宗棠甘肅新疆兩省專祠三十年湖南巡撫趙爾巽復奏請將戰功事蹟宣付史館立傳原籍省城及立功省分建立專祠皆得旨允行尋賜祭葬子鉞候選道襲爵翼章縣丞孫承憲二品廕生

閃殿魁

閃殿魁順天昌平州人咸豐二年由行伍投效宣化鎮標隨征江南七年壽春鎮總兵總統諸軍鄭魁士檄赴安徽戰頗力給六品頂戴十一年四月從江寧將軍都興阿擊退江皖各逆有功敍六品藍翎同治二年十一月嘉善縣賊酋陳占榜余嘉鰲詣官軍乞降殿魁請於統帶吳毓芬單身入賊營曉諭降衆翌日整隊而入陳占榜等伏迎道左軍士無譁自是從江蘇巡撫李鴻章軍屢克城池皆與有功洊保花翎以遊擊留兩江補用並加參將銜六年充淮軍華字營哨官任揚州防務時捻逆由仙女廟竄揚州灣頭統帶吳毓蘭檄殿魁偵賊情挈數十人往至七閘適大股賊至從者駭顧欲逃殿魁呵止之令多植旗械以疑賊仍飛報大營迎擊賊馳近果懼有伏不敢前已而大隊至合力痛剿獲捻酋賴汝洸於陣捷入奉上諭以副將仍留兩江補用並加總兵銜九年以剿平西捻功賞給勝勇巴圖魯名號十二年借補江南提標遊擊署中軍參將光緒七年兩江總督劉坤一及江南提督李成謀檄辦江南操練輪船營務處十年法越事起長江戒嚴殿魁駐防白茆港李成謀令兵輪泊吳淞口內殿魁慮潮退時礮力不得施亟見成謀力

言之成謀悟立下令駛出口外和議成撤防陞補江蘇撫標參將十二年兩江總督曾國荃奏稱殿魁軍律嚴明兼諳船務防守要地能得兵心有旨以水陸總兵交軍機處存記十三年六月曾國荃續保堪勝提鎮七月江蘇巡撫崧駿復奏保將材皆奉旨交軍機處存記九月授甘肅涼州鎮總兵涼州當甘新出入之衝石路險仄行旅苦之殿魁至任躬出履勘東極莊浪西盡永昌袤延七百餘里伐石開山平治道路閱十八月而工竣官民稱便創訂兵弁賞卹章程永著爲例十七年歷俸三載期滿循例詳請陞見陝甘總督楊昌濬以大閱屆期西路各營方資整頓奏請緩行允之十九年三月奉旨開缺送部引見明年中日失和軍事旁午十月督辦軍務恭親王奕訢幫辦軍務慶親王奕劻檄募馬步十營駐昌平州沙河顧京師北路十一月引見仍以總兵用旋授四川建昌鎮總兵仍留防次二十一年正月移駐樂亭五月和議成撤防赴建昌任至則整飭營務鎮撫番夷開濬寧遠府城外東西兩河下通邛海自後水道疏暢民生賴之二十六年四川總督奎俊奏署松潘鎮總兵剿辦靖遠勒募夷賞頭品頂戴尋署四川提督二十八年舊傷觸發開缺回籍二十九年卒於家子國璋奉天候補知縣國勳孝廉方正國

賢江蘇候補同知國書兩淮候補鹽大使國翰浙江候補巡檢國策國訓均候選
縣丞孫崇仁江蘇候補縣丞崇壽崇義崇和均候選縣丞

清史列傳 卷六十二

已纂未進大臣傳一

蔣凝學

蔣凝學湖南湘鄉人咸豐五年由監生隨浙江寧紹台道羅澤南軍規復武昌迭克崇陽通城蒲圻以從九選用並賞戴藍翎十一月隨攻武昌前後八十餘戰頗有擒斬免選從九以國子監典簿選用六年十一月湖北巡撫胡林翼圍武昌合水陸諸軍進剿凝學率湘左兩營當左路爲策應迭戰皆捷武昌克復以知縣儘先選用加同知銜七年六月皖賊大舉上犯凝學禦諸童司牌敗之時按察使用安慶府知府李續賓攻九江城垂克僞英王陳玉成來援童司牌復爲所踞將軍都興阿被圍續賓檄凝學率四營救之賊衆我寡軍情恇懼凝學謂諸將曰童司牌不克則水師不能安紮龍坪武穴攻剿九江之師亦掣肘無功利鈍在此一舉願與諸君共任其難於是士皆感奮遂大破賊復與多隆阿等前後夾擊縱火焚燒兩日之間踏毀賊壘四十八座斬馘五千保擢同知加知府銜八年四月諸軍

合攻九江續賓潛開地道壞東門十餘丈而賊以火器抵禦不能入續賓復令凝學督軍士穴地道迤東而南遂轟塌城垣一百餘丈我軍踴躍齊進登城掩殺克之捷聞以知府選用並賞換花翎時皖匪竄湖北陷麻城黃安踞城負固以守險築壘爲長技凝學偕道員李續宜馳援審察賊情地勢議進兵計多設伏兵張旗幟續宜自率湘中營以凝學爲伏兵與諸軍互相策應遂生擒僞總制陳天壽等各路賊壘一律平毀旬日之間兩城均復以道員儘先選用十年正月會福州副都統多隆阿等軍擊破援賊陳玉成等遂克太湖賞加鹽運使銜十一年忠逆李秀成等竄踞江西瑞州等郡擾及湖北之興國崇陽通城大冶通山武昌咸寧蒲圻等州縣逼近省城湖廣總督官文調各軍分路剿辦五月凝學會廣東按察使彭玉麟克武昌六月會已革徽寧池太廣道李元度克通城崇陽七月胡林翼檄凝學及彭玉麟會攻黃州黃州城堅凝學與諸將分開地道四面環攻不能克乃以計誘賊出城伏發各路截擊賊遂大敗黃州克復詔以道員記名簡放加布政使銜十二月授甘肅安肅道旋經安徽巡撫李續宜留辦總統湘皖水陸各軍同治元年逆捻張大佩等盤踞六安凝學分路馳剿殲之進克霍邱得旨嘉獎二年

凝學駐兵舒城賊李秀成悉衆圍攻分軍迎剿卻之執僞天將羽天福自春徂夏李秀成疊撲各處城營凝學會合各軍苦守力戰廬江桐城舒城六安先後解圍城營均獲保全六月逆練苗沛霖圍攻壽州兩江總督曾國藩檄凝學偕成大吉等往救凝學以兵單願俟成大吉至併力解圍未及期外委邱維城舉城獻賊以救援不力褫布政使銜壽州既陷皖北豫鄂三省震動凝學奉檄由三河尖移紮潁州以保要郡而衛豫境時悍逆秦宣等踞潁之迎仙店爲皖豫巨患凝學抽隊進剿平之遂收復下蔡正陽潁上各縣三年湖北髮捻由麻城入羅田竄六安凝學進兵金家鋪營甫定而賊至擊敗之賊趨英山復馳援卻之厥後斬水羅田英山之賊麇集環城偪攻糧道文報一時俱絕凝學忍飢誓衆鏖戰歷四十餘晝夜屢獲大勝賊知不逞悉退竄楚疆初僞福王陳得才糾合髮捻各賊擾斬州斬水廣濟孝感雲夢曾國藩檄凝學等分道堵禦凝學扼賊於英山賊敗退入斬水羅田依山據險綿亘二百里時欽差大臣科爾沁親王僧格林沁由商城進駐黃岡之上巴河與官文會剿賊復竄皖境凝學由英山之陶家河鎮口山追剿抵卡嶺庵飭各營趕修牆壘率兵抵禦招降僞天將吳清泰等又偵知捻首倪澂淮張總

愚率衆齊至楊家河凝學自率各營督降衆進剿大敗之次日賊范立川陳漢泰周添順等亦詣營降得才一股素稱剽悍此時被官軍四面兜剿江寧巢穴已失逆衆悉降無黨可糾勢窮計蹙遂服毒死凝學掘其屍送僧格林沁營剖戮之上以凝學身先士卒殄滅巨寇嘉其奮勇賞還布政使銜是年十一月官文以凝學久歷戎行謀勇兼優新疆軍事孔亟奏請馳赴甘肅援剿而僧格林沁因追剿髮捻各軍失利又有飭率所部移紮商城之疏凝學遂由商城取道馳赴商南四年官文復因西路空虛飭赴荆紫關以顧西秦門戶旋陝甘總督楊岳斌奏調赴甘飭令帶兵赴安肅道任五年署蘭州道六年八月回匪犯河洲勢極猖獗凝學督兵進剿大挫兇鋒岳斌疏請以按察使記名遇缺題奏允之八年十月歷署按察使旋授山西按察使十一年選帶精壯親兵弁勇七百馳赴山西辦理河防是年冬履任卽駐軍河干十二年五月人都陞見疊蒙召對六月署布政使仍帶水陸各營兼籌防務光緒元年授陝西布政使三年陝甘總督左宗棠奏請甄敘籌兵轉餉各員奉旨賞給頭品頂戴四年因病懇請開缺回籍營葬得旨俞允六月卒奏入諭照軍營立功後病故例議卹尋賜卹如例

裕祿

裕祿喜塔臘氏滿洲正白旗人咸豐六年由監生報捐筆帖式分刑部七年補授實缺同治元年京察一等記名以理事同知通判用三月擢主事五月補清檔房堂主事二年陞員外郎三年京察一等詔加一級九月遷郎中五年京察覆帶記名以道府用六年京察一等仍記名以道府用旋授直隸熱河兵備道七年四月擢安徽按察使十一月署布政使十一年十月授安徽布政使旋署巡撫十二月以歷年籌辦防餉出力賞戴花翎十三年授安徽巡撫光緒六年因籌濟新疆協餉賞頭品頂戴十一年二月署湖廣總督十月兼署湖北巡撫十三年正月補授湖廣總督五月入覲賞紫禁城內騎馬七月調署兩江總督兼充辦理通商事務大臣九月回湖廣總督任十五年授盛京將軍十七年熱河匪徒滋事焚燒教堂仇殺蒙古人民適大軍會哨至朝陽擊敗之未旬日奉直諸軍徵調四集搗穴擒渠搜殺殆盡自是平泉朝陽建昌赤峯諸州縣及敖罕各王旗一律安謐事聞上以裕祿亦派勁旅同奏膚功交部優敘自署湖廣總督以來蒙恩旨交部議敘者二優敘者五二十年正月賞尙書銜是年中日構釁奉天戒嚴南路安東鳳凰等

城戰敗失守裕祿以籌防未密自請議處命降二級留任嗣是金州寬甸復州海城蓋平熊岳牛莊各城及營口以次失守疊下部議均降二級留任不准抵銷二十一年調福州將軍二十二年正月以薦舉失察部議降二級調用奉旨加恩革職留任六月兼充船政大臣十一月授四川總督二十四年五月命在軍機大臣上行走並署鑲藍旗漢軍都統七月署禮部尚書旋即補授命在總理各國事務衙門上行走八月補授直隸總督兼充辦理通商事務北洋大臣是歲山東冠臨一帶拳民聚衆仇教蔓延直南威曲等縣裕祿檄盛練各軍防堵會同東省營印併力彈壓擒首犯姚洛奇匪黨四散二十五年七月刀匪入開州滋擾教堂搶毀教民多家旋獲匪首劉廣韶等五人正法餘匪瓦解直境稍靖而山東巡撫毓賢縱民戕教詞多粉飾匪勢復張刀拳各匪混合醜類蠡起由德州而北散入直隸河間深冀各屬擄掠焚殺鴟張無忌保定居民亦復蠢動裕祿迭檄各鎮派兵鎮懾惟始終以解散爲主此拳彼竄故卒無成效十一月工部侍郎袁世凱電商以奏請明降諭旨懲辦拳匪爲言而裕祿覆稱拳匪無大伎倆但能捕獲首要脅從自易解散若奏請明降諭旨所慮民教結怨甚深有所挾持妄攀誣指多生枝節

轉非所宜十二月世凱任山東巡撫電稱東省拳匪焚掠教民教堂當懲辦匪首以清禍源請將實在情形詳細上聞以杜浮議裕祿以已達總署卻之二十六年正月以察典奉旨交部議敘三月奏請裁併大沽協標六營改爲練軍步隊三營以資防守從之是年正月寄諭各屬義和拳會以仇教爲名到處滋擾恐無知愚民被其煽惑著直隸山東各督撫剴切出示曉諭嚴行禁止倘仍執迷不悟卽行從嚴懲辦勿稍寬縱於是山東拳匪經巡撫袁世凱實力剿辦漸次肅清而直隸滋蔓益甚裕祿迭飭營印以禽渠解從爲上策然旋撲旋燎四月涑水大亂抗拒官長戕害軍官定興安肅新城落堡諸匪相繼蠢動奏奉上諭裕祿電稱查拳首要解脅從辦法均是此事各處情形不同遷就適足養奸操切亦恐滋變該督務當嚴飭文武相機操縱勿稍大意亡何匪踞涿州毀鐵路折電桿勢益猖獗五月拳匪闕京師持械尋仇殺人焚市上以此等亂民顯係奸匪疊諭步軍統領順天府五城御史暨直隸總督嚴拏懲辦然橫擾如故未幾戕德使攻交民巷各使館情勢危急各國兵艦麇集海口洋兵絡繹登岸以保護爲名無阻之者十九日天津河東拳匪礮擊紫竹林租界各國兵官亦於次日夜強索大沽礮臺提督羅榮

光不允尋開戰我軍不利遂失守先是裕祿以大沽礮臺情形急迫疏請飭派董福祥統帶所部來津接應至是奏稱大沽開礮兵端已開津防萬分吃重分飭駐紮天津之武衛軍並本處練軍嚴加準備以防不測並因天津義和團民近已聚集不下三萬人日以焚教堂殺洋人爲事當將該團頭目傳入示以收撫之意該頭目等均稱情願報效朝廷義形於色現在事已決裂似難輕易輓回擬卽一鼓作氣使洋兵巢穴盡覆以壯我軍之威而奪彼族之氣然後併力大沽現已將軍糧城一帶鐵路拆毀並啟陳家溝鐵閘洩水以杜洋人續行進兵之路又探聞各國前次進京兵隊千餘人因前後鐵路全毀爲拳民困於楊村一帶欲由水路竄回天津亦經分隊往禦疏入上深嘉之六月裕祿又疏陳我軍與洋兵接戰及攻紫竹林情形並俟幫辦北洋軍務四川提督宋慶抵津當會同該提督與馬玉崑聶士成熟察機宜督飭將士以期迅掃敵氛十五日詔授李鴻章爲直隸總督兼充北洋大臣未到任以前仍責成裕祿會同宋慶妥籌辦理是日我軍與敵兵大戰於車站提督聶士成死之我軍退守北倉十八日天津陷拳匪遁裕祿自劾二十一日奉旨著革職留任七月初十日北倉陷我軍退守楊村十三日裕祿見勢

不支遂自殺於楊村師退蔡村聯軍陷通州遂入京師二十七年三月諭曰上年拳匪肇亂京畿一帶多被擾害以致各省人心煽動焚毀教堂傷害教士教民之案層見迭出朝廷屢降諭旨敕令妥爲保護乃地方官奉行不力致釀事端直隸總督裕祿著追奪官職

毓賢

毓賢內務府正黃旗漢軍監生由選用同知報捐知府指分山西光緒五年改指山東八年以堵築山東桃園河口出力奏保歸候補班補用十五年委署曹州府事巡撫張曜臚陳政績傳旨嘉獎十七年張曜疏陳毓賢講求吏治整頓捕務署任兩年民懷吏畏得補曹州府知府二十一年陞授山東兗沂曹濟道二十二年補山東按察使九月來京陛見十月巡撫李秉衡以節交霜降黃河各工俱慶安瀾追陳毓賢在兗沂曹濟道任內出力得旨交部優敘二十四年巡撫張汝梅以毓賢志趣正大果毅性成奏署山東布政使八月調湖南布政使十一月署江寧將軍先是江寧駐防八旗原有八卦洲辦公地租銀萬餘兩久被歷任將軍侵沒毓賢力加整頓裁革一切供給上嘉之旋授山東巡撫毓賢官山東久河工尤爲

熟手時戶部按照大學士李鴻章查勘黃河工程辦法次第分次籌措覆陳上以毓賢巡撫山東兼管河工責無旁貸卽著悉心經理六月毓賢督同道員尙其亨出省先赴上游巡視兩岸壩埝順流下駛赴利津海口一帶周覽形勢因疏陳培隄經費及修築疏濬與遷民購地各事宜上諭令詳細履勘據實奏報是年江北漕糧仍由河運毓賢挑濬運河淤淺工段並修築陶城埠口門壩各工以故江北漕船於七月內得全數輓入東境又以黃河中游工段吃緊奏設碓口鎮分局以資辦公十一月來京陛見二十六年二月調補山西巡撫抵任後清理財政依限籌撥英德借款內務府經費奏裁山西儲材館以節糜費六月恭遇萬壽慶典毓賢母方氏年逾八十蒙恩賞福壽字暨紬緞如意等件時拳匪肇亂京師戒嚴山西派隊赴京調用毓賢乃添募步隊以厚省城兵力旋以拳匪之故中外失和戰局已開毓賢籌解京餉護送過境餉鞘採買江南米石解京以濟兵食截留鐵路經費銀兩購買雜糧以備山西旱賑一面筭調練軍步隊駐紮固關以固邊圉分往太原榆次介休等縣拏辦土匪以靖地方毓賢嫉惡甚嚴果於殺戮捕務是其所長惟不知大局巡撫山東時容縱拳匪釀成巨禍至山西任又殺教士多名貽

人口實事聞褫職發往極邊充當苦差永不釋回十二月和局既成上追論誤國諸臣諭曰毓賢前在山東巡撫任內妄信拳匪邪術至京爲之揄揚以致諸王大臣受其煽惑及在山西巡撫任復戕害教士教民多命尤屬昏謬凶殘著傳旨卽行正法尋伏法

恩銘

恩銘于庫里氏滿洲鑲白旗人盛京錦州駐防同治十二年舉人光緒四年報捐以知縣銓選九年丁父憂山東河決巡撫陳士杰調辦河工十二年以勞績保免選本班以同知不論雙單月選用尋遵例捐指山東試用辦理皖省宿州督銷事務時州境私販及土產硝鹽侵銷頗多恩銘示地方官以欲禁私鹽先辦官鹽之法其弊遂絕十六年張村等處漫口合龍敘績免補本班以知府儘先補用十七年又以河工搶險出力保加三品銜十八年報捐花翎署兗州府知府白茅墳漫口合龍巡撫張曜上其功奉旨免補本班以道員遇缺題奏並加二品頂戴山東黃河下游所恃以不溢者一綫單隄爲之保障隄身狹處寬不及丈治河者但加高培厚歲糜鉅帑任其事者又往往侵蝕致富恩銘辦理河防賑務事必核實款

無虛發撫臣廉其能遂以明白河務留心地方政治堪備任使之選入告十九年十二月奉旨諭交軍機處存記恩銘在東久患溼疾因於二十一年改官山西二十六年夏拳匪肇亂由直隸蔓延山西時恩銘方署山西按察使勸撫臣飭屬護送教士解散教民以遏亂萌弗聽七月聯軍入京兩宮西幸巡撫毓賢率師守固關恩銘兼攝撫藩兩篆籌邊餉備供具昕夕不遑迨乘輿至大原而恩銘已以憂勞感發舊疾疾愈召見始知兩宮艱險狀奏對聲淚俱下十一月補授歸綏道先是口外七廳殺教士四十餘人教民二千餘口二十七年正月恩銘抵任教民尙二萬餘口待撫復值年饑賑事尤亟乃請發帑金十萬兩檄發七廳倉穀爲勞來安集之計會洋兵至大同百姓望風皆逃恩銘令教士馳往諭阻並持先所搜獲逃軍與蒙古約燬教堂之檄示之洋將信其無他變遂收隊去歸綏一隅始得無患五月有主教閔清者自甘肅阿拉善蒙境三道河教堂奔至言其處蒙民約期仇殺教民禍將不測恩銘乃檄包頭鎮馬隊馳赴三道河果見蒙衆蠢動大兵至皆歛械而散教士感其義陳於法使以恩銘保護教堂不分畛域求外務部請獎恩銘聞之亟請撫臣岑春煊咨部力辯冀杜外人干預內政之漸二十八年三月

調口北道口北十三廳自拳匪變後民生凋敝而教民兇燄日張時圖報復恩銘日以調和民教爲務宣化縣天主堂華教士率衆攜洋槍逼人入教恩銘延郡城洋教士至署與反復辯論定議不許勒逼入教擅伐平民樹木於是前之被逼者皆得出教其附教作惡者亦交洋教士管束自此口北民教皆得相安七月巡撫岑春煊以恩銘前辦賑務奏請從優議敘允之口北保甲久裁然每年仍收費千金練勇冒領馬羣生息銀九萬餘兩積弊已久恩銘皆蠲除之十二月擢浙江鹽運使二十九年五月奉上諭補授兩淮鹽運使十一月擢江蘇按察使然朝廷以兩淮鹽務有關軍國恩銘老於鹺政仍命久署以盡其才恩銘乃先之以緝私使私販越卡者咸皆斂迹又以爲透私皆由煎丁禁於出場之後不若防於未出之先爲之加桶價恤煎丁而透私之弊亦絕兩淮引鹽行銷遂暢歲增國課至三十萬兩庚子亂後朝廷銳意變法或請於商部欲改營場爲公司舉煎鹽運銷各法剗爲煤煎輪運有旨下鹽運使議恩銘疏言自通商以來各項貿易多有公司之日其中華洋雜處莫可究詰鹽務爲中國僅存之專利外人雖覬覦久無從而入若以公司爲名其始不必有洋商倘他日效尤蜂起恐將因西法爲干預鹽法之

漸不可不慎之於始淮南煎鹽以草更取其灰以淋滷草取之於本境煤則仰給於外來煎鹽以煤則草無所用蓄草之地漸墾爲田異時煤不足用或價過昂將復求草而不得無草卽無鹽國家千百萬常年大利將焉取之輪運轉輸最捷然夾帶灑賣百弊叢生查緝無從且江濱近海者必居先而速處腹地者必落後而遲亦非所以示持平也一再抗論其事遂寢又有議開墾者謂招民領種繳價納賦可集鉅款恩銘具言開墾利雖厚方之產鹽歲入千百萬者得失懸絕旣力陳開墾之不可行復議於淤灘中擇其滷氣濃厚者招商增置埭竈取餘蕩之草供新埭之煎歲可增十萬引並令納地價交埭租寓籌款於增竈之中而商竈亦均受其益保甲之法久存具文恩銘遵新法改設巡警沿江圩洲及諸湖久爲盜窟時遣驍將率健兒捕擒之盜風以息三十一年七月兩江總督周馥奏稱恩銘才長心細用人理財綜核精密於杜絕竈私清理場垣及催運籌銷諸事不避勞怨實力整理銷數漸暢請旨從優議敘八月授江寧布政使十月陝甘總督升允以山西協餉出力請獎奉上諭賞給頭品頂戴三十二年二月補授安徽巡撫時皖北洪水爲災奏聞發帑金十萬兩蠲緩丁漕錢糧又請開七項常捐請撥奉天溢

捐銀二十萬兩慮官賑之不逮也復籌勸募延義紳放義賑先後共得數百萬金設法賑恤必期民無流亡而後已省城之東有廣濟圩綿亙數十里爲安徽產穀之區恩銘初抵任時桃汛方生加以暴雨江潮迭至圩不沒者幾不盈尺乃派員晝夜巡視設法搶護並勸集民夫協力防守以故圩得無壞水既退復爲籌款歲修俾無或替四月紅蓮會匪倡亂自江西鄱陽竄入皖南之建德毀法教堂數處恩銘發兵馳赴救護別調隊分防祁門婺源匪遂遁入時山又檄兵越境追剿殲其渠魁所獲餘匪分別監禁皖南匪踪遂絕朝廷預備立憲警察一事尤所注意恩銘以皖省舊設警務學堂規模簡陋乃推本求源詳定條章一以教巡官巡弁一以教巡長巡士籌畫咸得事宜湖北民有寄居霍山縣者與法教堂啟釁查辦各員多袒教而壓民以致民怨未平五月聚衆燬堂匪黨亦乘之而起恩銘調兵防剿擊散麻城羅田諸匪緝其首惡解放脅從舉劾地方官之釀禍者數人事遂平六月考察各屬學堂擇其不能實力任事者劾之自新政日增財用日絀恩銘乃循舊例清丈各州縣沿江洲地分等繳價按年收科皖江一帶河洲盡成糧地又爲之務墾牧謀樹藝利源闢而時政因之咸舉十二月奏請蠲緩各屬錢糧漕

糧皆奉旨如所請行朝廷重念刑事參考東西各國法律簡派法律大臣立刑事民事訴訟法令下各省將軍督撫都統等體察情形悉心研究其中有無扞格之處卽行縷析條分據實具奏恩銘以皖北民情强悍賴有舊法嚴以繩之行新法適足滋桀驁者之譁張因擇其不便施行者六條奏陳之三十三年五月革命黨密運軍火由江浙皖南等處潛入恩銘偵知之密加搜捕其黨試用道徐錫麟適充巡警處會辦六月值巡警學堂畢業恩銘率司道親往考驗徐錫麟卽於學生整齊行列之際與同黨數人皆手執雙槍相向環擊恩銘受傷多處並傷斃巡捕知縣試用府經歷陸永頤收支委員府經歷顧松等卽回署飭營隊嚴防仍諭令鎮靜以安民心部署畢始延醫啟視除左手右腿腹部三傷外左右胯骨及下部復有槍傷四五處皆前後洞穿惟腹部槍子未出漸上行政心自知傷重不起因詳具始末口授其子繕摺奏上尋卒事聞兩宮震悼諭靈柩回旗時沿途地方官妥爲照料子山西候補道咸麟以道員卽用尋賜祭葬予諡忠愍

啟秀

啟秀庫雅拉氏滿洲正白旗人同治四年進士改翰林院庶吉士七年散館以主

事用分刑部八年補官盛京十年充中江稅務監督十一年補盛京戶部員外郎十二年恭逢穆宗毅皇帝親政恩詔加一級光緒元年題銷試俸是歲恭值德宗景皇帝登極暨崇上穆宗尊諡疊奉恩詔加一級二年五月授詹事府右庶子七月轉左庶子九月充日講起居注官三年三月擢翰林院侍講學士六月充咸安宮總裁十二月轉侍讀學士四年二月扎薩克圖罕車林端多布病故上命啟秀前往致祭七月補詹事府少詹事九月晉詹事十月詔授內閣學士兼禮部侍郎銜十二月充文淵閣直閣事五年正月擢工部右侍郎兼管錢法堂事務二月調補刑部右侍郎旋因穆宗毅皇帝孝哲毅皇后永安惠陵隨扈御營加一級四月充會試覆試閱卷大臣六月調補盛京刑部侍郎六年十月因事議處部議降三級調用恩予留任十二月協同管理宗室覺羅學事務七年秋父憂回京服闋授盛京戶部侍郎旋命查辦吉林事件六月管理威遠堡等六關口事務八月命協同管理內務府並移居宗室事務九年四月以盛京工部侍郎興恩賞假接署工部印鑰是時言者力攻秀謂前查銘安參案任意草率且與隨帶各員有受贓巨萬情事上命盛京將軍崇綺確查具奏嗣以受贓鬻法均無左證其辦理亦無

不合詔予免議十二年以文溯閣共存物件被竊下兵部議鐫級留任奉旨准其抵銷九月復署理盛京工部印鑰十三年恭逢德宗景皇帝親政恩詔加一級十四年因病賞假一月尋籲請開缺允之十七年病愈銷假奉旨補授禮部左侍郎十八年正月命知貢舉三月調授正紅旗漢軍副都統四月充殿試讀卷大臣五月充朝考閱卷大臣八月復調補盛京兵部侍郎十九年詔管理牛馬稅務二十年正月朔恭逢孝欽顯皇后六旬萬壽奉懿旨交部議敘四月命考試宗室覺羅學生八月復奉恩詔加一級擢理藩院尙書十月命管理咸安宮本學事務十一月充崇文門副監督並補授鑲黃旗蒙古都統尋充專操大臣十二月充經筵講官署稽察壇廟大臣二十一年二月署鑲白旗漢軍都統充鄉試覆試閱卷大臣三月充會試副考官續充朝考閱卷大臣旋以校閱諸臣是非倒置爲御史熙麟所劾上諭掌院學士將戴錫之等七卷固封呈覽卓孝復一卷寫作俱妥詔改列等第原閱之尙書啟秀著交部察議尋遵例以罰俸議覆得旨寬免銷紀錄一次閏月充武英殿總裁復補授總管內務府大臣六月署正紅旗滿洲都統命充會典館副總裁十二月充管理三庫大臣是歲內務府奏派紫禁城值年及犧牲所

值年皆以啟秀充之二十二年三月充幼官學管學大臣五月管理圓明園八旗包衣事務十月賜紫禁城騎馬十一月以內務府盜物案舉部議降三級調用加恩改爲留任尋派充查城大臣二十三年正月署正黃旗蒙古都統四月充抖晾實錄大臣七月上奉懿旨醇賢親王廟工程著派啟秀承修八月署鑲黃旗漢軍都統九月命查勘燕郊等處行宮工程擇要修理二十四年春復命查勘惠陵工程旋署正藍旗蒙古都統充國史館副總裁八月調補禮部尙書充武舉覆試大臣十一月奉懿旨賞西苑門內騎馬並乘坐船隻拖牀旋命開去總管內務府大臣在軍機大臣上行走十二月開復降三級留任處分二十五年二月以禮庫遺失銀兩堂司各員失於覺察命銷去紀錄一次四月署兵部尙書二十六年正月恭逢德宗景皇帝三旬萬壽賞戴花翎復奉旨優敘二月調補鑲白旗滿洲都統五月命在總理各國事務衙門大臣上行走六月萬壽慶典屆期賜啟秀母楊佳氏匾額福壽字及如意文綺諸珍品是時拳匪構亂外侮日亟列邦烽火震驚畿甸而朝野上下翫泄如故嗣兵部侍郎許景澄太常寺卿袁昶疏參首禍諸王大臣並劾啟秀膠執已見愚而自用均請立賞重典以遏亂源疏入爲讒者所構下

景澄袒於獄殺之七月聯軍入京師乘輿西幸啟秀以母憂被拘於日本軍十二月朝旨革職命奕劻李鴻章查明所犯確據卽行奏明從嚴懲辦二十七年正月奉行在旨啟秀徐承煜各國指稱力庇拳匪專與洋人爲難昨已革職著奕劻李鴻章照會各國交回卽行正法派刑部堂官監視旋由拘所逮入刑部越日棄市

剛毅

剛毅滿洲鑲藍旗人同治五年由筆帖式議敘主事八年保員外郎光緒五年轉補郎中京察一等引見奉旨交軍機處記名以道府用六年除廣東惠潮嘉道七年擢江西按察使八年調直隸按察使旋授廣東布政使十年調雲南布政使十一年擢山西巡撫疏陳籌議套外躔金等處屯田事宜曰躔金卽台吉地屬河北外套係伊克昭盟所屬之達拉特杭錦兩旗牧界河坐落西北斜向東南袤長五百餘里平川廣漠一望無垠正北狼山池西紅山卽黃河舊道由南北行折而池南迤東之處則東大余太什拉干烏拉前山後山峰巒湊接氣勢迴合續而不斷由西而東漸就收縮此躔金一帶山勢地向之大略也套外地勢西南高而東北低溯查康熙以前河行北道並無水利自改行南道蒙古始令素與交易之商租

種分佃卽就黃水衝刷低窪處所因利乘便修成渠道西則躡金計共五渠東則土人名爲後套計共三渠中間支渠曲折蜿蜒不可枚數而餘水仍可退至河之舊道由東北折向西南繞過烏拉前山之西山嘴歸入南河土本膏腴渠又順利麥穀梁秫種無不宜以故山陝直隸無業之民從前承佃到此均能自立生業此套外一帶水利土宜之大略也達拉旗牧界內台吉波羅搭拉地方道光八年曾奉諭旨准其租給商種五年抵還債項嗣後奉部文而承種者有之由台吉而私放者有之由各廟喇嘛公放者有之開墾甚多至同治初年甘回逼擾寧夏躡金附近各商分立仁義禮智信五社辦理團練以資安輯迨後防剿各軍駐紮防堵或設臺轉輸各商分辦運糧致荒本業渠道旋壞不復疏濬止存一二巨商不忍棄業力耕自給而土人所稱後套地方商人其時尙復不少迨光緒二年馬賊蹂躪不特躡金之僻東西陲者牛壩商號不過數家卽後套左右亦不過二百餘家該處土本紅壩利於澆灌現在紅柳及織機草枸杞樹等茂然成林聞咸豐年間達旗歲收租銀不下十萬近歲所收租錢不及三千串文此拉特旗套外地界今昔衰旺懸殊之大略也今若於該處議設屯政則險要藉以扼地利藉以復蒙旗

藉以贍誠如原奏所云於時局不無裨益等情臣伏念躡金一帶誠能及時籌議屯政無事則固吾邊圉免爲逋逃淵藪有事則防敵伺隙便於控制事機策誠至善第該旗牧地歷經奉旨准其租種抵債以及養育閑散備辦公費等項與他處蒙古無著閑田不同臣閱伍至薩拉齊之包頭伊克昭正盟長固山貝子札那吉爾迪來見據稱該盟達拉特等旗聞有是議率皆懽忻鼓舞冀開屯後上可急公下可沾利惟是目前議屯先務其要約有三端一曰分段套外西則躡金和永牛場上下東則後套沙忽廟左右均屬適中之地於此分爲三段撥兵一千躡金正紫三百二道壩渠以西分紫二百湖爾廟正紫三百西山嘴南哈木爾臺少北分紫二百且耕且練西可以聯絡甘涼隴秦之聲氣東可以聯絡余太之馬營每兵一名給田五十畝計需田五百頃並給牛種先就易開之渠督兵挑修通暢以後兵農兩便兵則耕種自食由營官經理其餘地畝悉由蒙古商人按照向規辦理以仍其舊惟兵屯地段如西山嘴哈木爾臺少北等須就近借撥烏拉特地其餘各就近借撥杭錦達拉特地以資分撥一曰修渠套外渠道達拉特杭錦二旗爲最多此外則烏拉特中旗界內余太昭有山水一道向來引水澆地寬窄不過

二十里兩旗界內西山嘴南有珊瑚灣河道無庸另開大渠止須於灣之東北建築一壩多開支渠則烏拉前山之前全歸澆灌西口界內有烏拉河渠一道係藉黃河北流舊道之口引水澆地曩係商人自開各旗領租若開商屯應將躉金後套各渠官爲修濬通利其各處舊商界內支渠仍責成各商修理務臻一律順暢以利引澆如此則商旣易於招徠蒙又多獲租價將來或再於尋常租價外酌加商入二成交官名曰地糧以資公費其租多寡仍由蒙商自行定價不准抑勒一曰設官套外地方連烏拉特三旗牧界合算東西袤延七八百里南北斜寬二百里至三百六七十里不等蒙地界址商民不能深悉向年租種者往往此招彼逐致啟爭端今旣議開屯墾該處距薩廳甚遠勢難兼顧擬另設文武官各一員駐紮躉金專理兵屯商屯事務其設官經費卽取給於地糧二成免耗公帑遇有屯兵滋事卽會同營員辦理如商欠租暨蒙人逐佃官爲分別訊理免致構釁以上三端不過撮其大綱至屯墾詳細事宜必俟奉准開辦時再行條議具奏但事屬創始需用浩繁庫乏積儲經費無出則籌款難開辦必自兵屯始口外地方遼闊現練軍駐紮要隘無可抽調則撥兵難該處係達拉特杭錦烏拉特等旗牧地必

須籌商畫一方可通融屯墾則借地難計惟有裁撤樹軍另行挑練屯軍樹軍歲需餉銀八萬四千餘兩臣現咨照大同鎮總兵張樹屏查照遣撤湘軍章程厚給資糧分起護送回籍計歲省銀八萬四千餘兩擬仿練章於大同鎮屬額兵內挑兵千名作爲屯軍歲需薪糧及加練軍餉乾銀二萬八千餘兩尙餘銀五萬六千餘兩卽作屯費尙可無庸別籌如將來屯務得手屯餉等項均有所出卽將節省樹軍全餉報部備撥若夫應借蒙部地段及招商納租辦法應請旨飭下伊克昭正盟長並烏蘭察布盟長轉行達拉特杭錦二旗暨烏拉特等三旗遵照妥議或先試辦三年如有明效卽行相地審宜斟酌損益著爲定章無失寓兵於農之意疏入得旨下部議行十二年五月巡閱大同鎮屬營伍六月霖雨爲災省城傍西汾河潰溢衝灌城垣疏陳設法堵救賑撫情形得旨覽奏均悉卽著分屬確切查勘妥爲撫恤以拯災黎一面趕緊堵截新溜挑濬舊河務使水歸故道毋任再行漫溢十四年調江蘇巡撫時江蘇各屬迭遭水患疏言蘇州松江太倉等州縣居浙下流古稱澤國偶值霖潦便不免泛瀾爲災故治三吳者不患旱而患水考古之三江皆在今江蘇境內吳淞一江獨當婁江東江之中經崑山嘉定青浦上海

四縣入海爲浙江之尾閭倘得疏通則水勢暢銷偶有偏災自不爲患惟此江袤延三百餘里節經前撫臣擇要挑浚苦於需費不貲未畢全功俾蘇州松江太倉及浙江之杭州嘉興湖州六府州民普沾利益現值春賑方亟積困未甦擬俟將來冬令水涸之時由臣察看情形再圖大加挑挖俾東南之民共享水利不被水害臣查得寶山縣境內蘊藻河一道俗又稱蘊草濱間於劉河吳淞江之中分洩上游之水以入海僅就寶山縣一邑水利言之則蘊藻濱爲該邑之幹河就通省全局水利言之則蘊藻濱仍爲吳淞之支河自吳淞海口直達嘉定蜿蜒三十餘里向係商賈往來孔道農田宣洩要區年久失修深者僅通舟楫其淤塞尤甚之處不啻漸成平陸並經嘉定商民於該河池西唐家橋地方建築大隄名爲攔截渾潮實則壅遏水脈此蘊草濱日就淤淺之實在情形也臣稽諸志書詢諸耆老僉謂河身卽形淺涸易於程功河道不甚寬廣亦易於籌款此處挑挖深通然後由支泝幹吳淞江卽可逐漸疏濬當此水潦告災之後民間待食方殷擬用以工代賑之法招集民夫趁東作未興趕緊開濬並函商督臣調撥狼山鎮總兵唐德慶所部駐紮吳淞防營各勇丁一面抽撥臣標防營前往通力合作以冀安速竣

事其中一切挑浚之法非臣親往指授恐難悉協臣擬乘坐小舟前赴該處督率營縣詳加查辦飭令興工得旨下部議行十七年八月疏言江蘇鎮江等屬各教案分別辦理議結得旨仍著嚴拏逸匪務獲究辦十一月以應解甘肅新餉埽數批解奉上諭著賞加頭品頂戴十八年調廣東巡撫奏臚舉人材籲懇簡用查有知府周蓮惠榮知縣諸可寶沈佺四員雖無奇才異能均屬言行如一肫篤不渝堪期遠大之用得旨如所請行二十年正月特旨召來京祝嘏十月補授軍機大臣署禮部右侍郎賞紫禁城內騎馬十一月補禮部右侍郎十二月轉補禮部左侍郎充方略館總裁二十一年調戶部右侍郎兼管錢法堂事務充滿洲繙譯副考官二十二年四月擢工部尚書七月充崇文門監督九月充會典館正總裁二十三年調刑部尚書二十四年補正紅旗蒙古都統調兵部尚書協辦大學士賞西苑門騎馬充經筵講官充繙譯閱卷官是年三月疏請裁汰冗員薪水暨各員雜支以重款項奉上諭各省設立辦公局所多立名目任意開銷迭經諭令認真裁汰迄無一省核實遵辦實屬積習相仍不知振作著各督撫責成藩臬兩司將各局逕行裁撤應辦各事歸併藩臬兩司辦理以節糜費毋得濫派濫支又以積

穀爲備荒要政各省常平社倉民間義倉必應勸辦疏陳每處每年積數千石三年數逾萬石詳細辦法奉旨飭各直省如所議行又疏請飭各省舉行保甲嚴裁空糧奉旨各省保甲原爲弭盜而設特奉行日久不免虛應故事至勇營空糧實爲近來惡習既據該尙書歷陳弊竇更應實力稽察嚴行整頓著各督撫一面飭屬嚴辦保甲聯絡漁團一面將各營勇數認真整頓不得視爲具文閏三月以神機火器等營操演各項陣法技藝嫻熟步伐整齊特旨賞加一級二十五年二月補內大臣四月欽差赴江南查辦事件七月回京條陳籌餉事宜及整頓釐金關稅鹽務裁併局所各辦法大要在剔除中飽杜絕虛糜並請酌提各海關盈餘嚴核各省釐金比較以及疏通壓綱籌增引數以維鹺政又奏查辦江蘇清賦事宜一疏均奉旨如所議行但聞此次所到各省多有收受陋規之事二十六年五月命統帶義和拳民縱庇拳匪以致京城失陷兩宮西幸西安緣剛毅不學無術實啟此釁旋卽病故九月奉上諭前協辦大學士剛毅派往查辦拳匪回京覆奏語多縱庇本應從重嚴懲現已病故免其置議

馬如龍

馬如龍雲南建水人武生咸豐十一年二月初一日雲南巡撫徐之銘奏言回匪馬現卽馬如龍前與徐元吉假名求撫暗襲省垣飭兵剿擊獲勝省城危而復安並將徐元吉殲斃馬現等乘隙逃竄同治元年三月三十日徐之銘奏激昆回夷馬起等由晉寧呈貢進逼省城知府岑毓英親帶兵練赴省援應途遇各回就便勸導該回等棄戈投地哭訴回漢構釁實因前官辦理不善所致岑毓英允爲到省代陳回夷等欣然自散適武生馬如龍馳赴省城約林自清出城面訴林自清單騎出城相見馬如龍自稱係從前殉難九江鎮總兵馬濟美之姪世受皇恩情願解散招撫回夷各安生業馬如龍等旋即傳知所踞之昆陽新興晉寧嵩明呈貢各州縣盡行撤退已令其署理臨元鎮總兵留省襄辦安撫事宜上命議政王軍機大臣傳諭潘鐸張亮基曰滇省軍務應剿應撫久無定見徐之銘前奏回匪攻撲省城勢甚猖獗茲復奏稱因林自清攻克碧雞關等處馬如龍等遂願投誠撫議之成難保非回衆業已闖入省城徐之銘爲所挾制輒爲懇請獎勵以圖見好惟事勢至此亦不能不姑予羈縻惟馬如龍甫經就撫而徐之銘已令其代辦臨元鎮總兵印務並據奏稱文武員缺有越級委署者有回教無職之人而委以

任事者是該撫於文武官員委署重務任意紊亂且鎮將重任輒令甫經投誠未
有官職之回人署理勢將不可復制潘鐸張亮基現在行抵何處接奉此旨後著
卽迅速前進於行抵滇省後將徐之銘撤任聽候查辦其馬如龍等代辦各缺自
應分別撤任惟不可操之太急遂致召變上又諭內閣曰上年十一月雲南省城
被圍總兵林自清縋城而出與回人武生馬如龍相見開誠曉諭回衆就撫撤兵
城圍立解馬如龍已加恩以總兵用著遇有雲南總兵缺出請旨簡放六月初八
日上又命議政王軍機大臣傳諭駱秉章曰本日已據張亮基將探明雲南實在
情形及在川省籌助兵餉各節馳奏至駱秉章所稱馬如龍等包藏禍心勢必中
變若張亮基帶兵數千籌餉數月身入險地轉致墮其術中莫如置之不問仗徐
之銘暫且羈縻回衆俟蜀事大轉再移得勝之師令潘鐸張亮基統帥入滇已諭
令潘鐸張亮基前赴滇蜀交界處所暫時駐紮俟蜀中漸次肅清再行移師大舉
入滇七月十三日徐之銘奏言大理府一帶尙未收復其地以杜汝秀爲總事現
經面商掌教馬德新並總兵馬如龍等寄信前往如須用兵亦當委馬如龍分別
剿撫至所保回教各員因事在安撫希冀名器仍望聖恩允准以衛地方奏入報

聞二十九日上命議政王軍機大臣傳諭潘鐸張亮基曰滇省撫局據徐之銘奏稱全賴馬如龍等辦理安撫事宜現在回漢相安激江河陽各府州縣均經派員到任惟池西大理一帶主事者杜汝秀尙須設法開導如其抗拒馬如龍情願帶兵剿辦等語馬如龍如果誠心就撫何以韓超等探得該總兵出示仍用大元帥字樣且欲阻潘鐸張亮基入滇並有如立意赴滇須撤兵衆隨帶百餘人解餉而來之語狂悖情形實堪痛恨韓超等摺著鈔給閱看馬如龍欲阻潘鐸張亮基入滇以民情疑懼爲詞稟請撤去兵衆隨帶百人是欲令該署督等減從入滇遂伊等脅制之計潘鐸張亮基仍須詳細斟酌不可墮其術中閏八月初八日上命議政王軍機大臣傳諭駱秉章潘鐸張亮基曰雲南軍務前據張亮基奏有刻不容緩之勢當諭令該前督等剋日赴滇相機剿辦現據岑毓英稟詞擬請潘鐸早日赴滇監督該代理藩司及馬如龍辦理任其興革並稱張亮基如帶兵赴滇恐漢回概行激變卽有意外之虞是徐之銘岑毓英等於地方諸事任令回衆把持且欲互相固結藉以自全其狂悖叵測情形顯而易見潘鐸張亮基自當仍遵疊次寄諭迅速起程並於沿途地方先行張貼告示俾知此來並非專事剿回旣以釋

回衆之疑兼以孤徐之銘等三人之勢十四日上從徐之銘之請授如龍爲鶴麗鎮總兵二年二月初六日潘鐸奏言前奉諭旨據韓超田興恕奏馬如龍未能誠心就撫等因臣查馬如龍自同治元年二月就撫之後迄今已逾十月省城附近以及池東一帶漢回相安如常馬如龍蒙恩簡放鶴麗鎮總兵益加感奮臣到任已逾兩月察看馬如龍此次求撫實出誠心其與岑毓英會稟請臣與前督臣張亮基撤去兵練查因張亮基發示來滇內有剿辦之語不及大理似其意專指省城又聞林自清有回滇之信誠恐因此又生枝節是以稟請撤兵練迨至張亮基續出告示有不用兵練之語衆心始覺釋然八月二十三日上命議政王軍機大臣傳諭勞崇光賈洪詔曰勞崇光奏查明前署督臣潘鐸死事緣由與前日駱秉章所奏大略相同現在杜汝秀仍盤踞大理叛逆已成馬榮踞尋甸馬聯陞踞霑益皆受杜汝秀僞職時至附近各處滋擾馬如龍心術隱微固不可知既據該督奏稱外貌頗襲取忠義之名不肯自居叛黨具稟該督詞尙恭順卽著勞崇光賈洪詔乘機誘掖或尙有可用之處卽照該督所擬設法暫與羈縻但須隨時防範不可墮其詭謀十一月二十四日上命議政王軍機大臣傳諭駱秉章勞崇光賈

洪詔曰本日據御史張溇卿奏訪聞總兵馬如龍於回衆之中實屬稍知大義現有大舉規復池西之議請飭川省選派勁旅交勞崇光督率相機進取以壯聲援等語馬如龍與杜逆構釁是否激於義憤抑係專欲遂其吞併之謀殊屬未可深恃著駱秉章勞崇光賈洪詔確切查明如馬如龍誠心效順其才尙可驅策或可用爲前驅之處惟該督撫等妥商會辦三年八月二十六日上諭前據勞崇光奏馬如龍彈壓省垣籌濟糧餉軍火岑毓英帶兵出省數月之中克堅城十數處復據尙書趙光奏滇省現在情形並將該省紳耆士庶公啓呈覽內稱馬如龍岑毓英均屬勉圖上進不憚以回攻回爲同教所忌亟宜優加獎敘著勞崇光等仍遵前旨趕緊查明據實保奏以示鼓勵九月如龍肅清馬龍州進規尋甸會同楊盛宗分路圍攻克之遂將逆首馬榮馬興才擒獲解省正法十月乘勝直逼曲靖回日馬文升等開門迎降如龍整隊入城斬馬聯陞於軍前四年二月奉上諭勞崇光奏雲南官軍剿辦曲尋逆回生擒首逆分別正法池東一律肅清雲南鶴麗鎮總兵馬如龍籌調兵練力挫賊鋒收復城池殲擒巨憝勇敢過人深堪嘉尙馬如龍著賞加提督銜並賞給效勇巴圖魯名號又諭議政王軍機大臣將林鴻年咨

文並昭通臨安官紳稟詞呈覽臨安官紳堅不附回爲國家保此疆土其誠悃甚屬可嘉惟近因馬如龍率衆數萬圍攻江川雖經恩榮梁士美等援救獲勝而賊衆兵單餉糈告竭岌岌可危著林鴻年迅速籌措銀數萬兩源源接濟以維繫該紳民向義之心馬如龍旣稱歸誠向化何以於林鴻年處從未見稟且舍杜汝秀不討而日與臨安士民爲仇其居心殊不可問林鴻年與勞崇光等務當隨時訪察妥籌辦理又諭曰滇省池東現已肅清卽當檄飭諸軍進規大理以目前時勢而論亟須督撫大吏前赴滇中督辦指授機宜使各軍有所稟承事權旣歸畫一始可迅蕝全功如但委之岑毓英馬如龍等非但諸軍無所統一且恐成尾大不掉之勢勞崇光身任雲貴總督責無旁貸且於馬如龍等均深言其可恃自必熟籌駕馭之方馬如龍圍攻江川之說是否實有其事有無別故仍著勞崇光等隨時察看諭以大義飭令馬如龍蠲除私忿約束回衆毋許再啟釁端並可札飭梁士美等告以馬如龍現旣力圖自效卽當與之同心協力進規池西一意以殲除杜逆爲事馬如龍等此次已加優獎倘遷延疑貳有始無終仍著勞崇光據實參辦勞崇光等如不能妥爲駕馭致馬如龍等或生反側貽誤事機亦必治以應得

之罪愆之愆之閏五月勞崇光奏明滇省臨安漢回互鬪緣由上以臨安漢練梁士美等懷挾私忿與省回構釁雖經勞崇光檄令止鬪息爭尙未能聯爲一氣馬如龍有志向上力尙能箝制諸回而回民賦性梗頑仍多首鼠兩端游移莫定馬如龍勢處孤危誠恐遲久生變亟須大吏馳赴滇垣妥籌鈴束馬如龍有所稟承自必倍加奮勉不特所部回衆易於懾服卽臨安漢練見馬如龍奉令維謹效順出於至誠亦不致再生異議卽著勞崇光剋期赴滇嚴飭梁士美馬如龍等蠲除私忿聯絡進取一以剿除杜逆爲事又諭勞崇光林鴻年傳知馬如龍岑毓英等令其慎守疆土共濟時艱毋得懷挾私忿致有貽誤至林鴻年前奏岑毓英馬如龍意見不合未能浹洽恐係奸匪從中構煽各等語著仍於羈縻之中寓防範之意是爲至要林鴻年奏稱探聞滇省回練或襲通海或擾廣南省回馬起龍等亦有帶兵占住宜良縣署之事並分攻古城小倉口各營寨其分擾通海宜良廣南之回是否卽馬如龍部伍何以肆行構變並著林鴻年傳知馬如龍岑毓英妥籌鎮撫毋任別滋事端五年如龍署雲南提督勞崇光疏請以如龍專辦西路六年如龍征杜汝秀屢失利勞崇光病故杜汝秀傾巢下竄衆數十萬連陷二十餘城

省城戒嚴七年三月如龍與巡撫岑毓英總兵李維述馬忠等各率所部分地防禦七月岑毓英親督何秀林等攻呈貢如龍派副將曹星柏等助剿克之十月官軍進攻澂江逆賊馬自新糾黨來援如龍派馬興勤馳往斬之十二月新降回目馬祥麟所守果馬里古城營堡失陷副將賀聯璧總兵金祖凱相繼潰敗附省逆匪偵知消息出撲東門外各營攻陷營碉五座岑毓英約如龍援剿時賊鋒甚銳力戰三晝夜如龍身先士卒遂將失陷營壘收復八年三月克復武定等州縣上以如龍殲除內患疊挫賊鋒功過尙足相抵開復降級留任處分並賞換法什尙阿巴圖魯名號以示優異五月補授雲南提督如龍督戰受傷又出城攻克羊神廟賊壘乘勝進攻江右館身中礮傷甚重上嘉其異常奮勇由內府發去如意拔毒散四料交岑毓英轉給該提督祇領以資調理八月省城圍解河西縣屬之大東溝小東溝地方久爲賊匪占踞十年如龍督隊進剿斬馘甚多官軍乘勝進攻立將小東溝賊巢攻克並擒斬逆首哈喇治等進攻大東溝如龍身受槍傷回營上命劉嶽昭岑毓英傳知如龍加意調養並賞給白玉翎管白玉搬指火鏢大小荷包等物獎其勞勩十二年全滇底定賞穿黃馬褂十三年九月到京旋調補湖

南提督十月給事中春慶等奏拏獲多年在逃逆犯請交審辦嗣奉上諭已革署參將張兆綬係因通匪奉旨正法之員膽敢逃匿提督馬如龍門下改名張瑞臣潛行來京實屬不法已極現經拏獲供認不諱著卽交刑部嚴行審訊按律懲辦湖南提督馬如龍先行解任聽候傳質十一月兵部奏遵議提督失察在逃逸犯處分上諭馬如龍著照部議革職留任光緒四年八月如龍以傷疾舉發懇請開缺調理十七年病卒王文韶奏聞諭曰前任湖南提督馬如龍世篤忠貞深知大義咸豐同治年間雲南漢回釁起該提督創和漢安回之議開導回衆其時回黨馬榮回酋杜汝秀兩次竄擾省城馬如龍帶兵援剿殲滅悍賊擒斬叛黨先後殺賊萬餘城圍遂解身繫滇省安危厥功甚偉嗣經擢授雲南提督調任湖南因病開缺茲以傷發身故殊堪憫惻馬如龍著照提督軍營立功後病故例議卹於雲南省城建立專祠生平戰績宣付國史館立傳以彰忠藎該提督之子已革四川道員馬廣惠著加恩開復革職處分仍歸原省補用並免繳捐復銀兩十月雲南京官編修陳思霖等臚列如龍功不掩罪各款呈都察院代奏請收回成命奉上諭馬如龍前在雲南曾著戰功嗣以傷發身故朝廷賞功宥過恩卹有加惟建祠

一節必須輿論咸孚方稱褒揚鉅典今既毀譽參半所有建立專祠之處著卽撤銷

歐陽利見

歐陽利見湖南永州府祁陽縣人咸豐四年由俊秀投效湖南禮部侍郎曾國藩水師軍營隨同克復岳州打仗出力賞給六品功牌五年以燿岳州賊船功拔補外委並賞戴藍翎賊陷廣信府羅澤南會師攻剿屢戰克之歐陽利見敍勞擢千總七年官軍克臨江府錄功賞加守備銜九年曾國荃進攻景德鎮擊退浮梁援賊三戰皆捷歐陽利見等由右路湖湘街進斬馘追奔十五日辰刻抵浮梁縣鏖戰久之從南門外鈔入斷後悍賊殄殲殆盡十月奉旨以都司儘先補用並賞換花翎十年官軍會攻安慶省城逆酋陳玉成率黨回援留四壘於關外之赤岡嶺以梗我師官軍奮力圍攻夷其壘長髮老賊無不就戮命歐陽利見搜剿集賢關以東時嶺賊入犯陷黟縣提督江長貴總兵朱品隆開歸道張運蘭副將婁雲慶唐義訓等商定兩面夾攻而歐陽利見等亦列隊西武嶺上分途前進一面圍攻賊壘一面剿擊各村踞賊始猶拚命抗拒我軍猛進賊不能支棄壘而遁諸將乘

勝追殺直至城下立將附城二壘擊破賊驚棄城遁遂復縣城各軍跟追掃蕩羊棧樟嶺等處賊壘一律肅清援賊聞風膽落分路遁去八月官軍用地雷轟開安慶北門城垣踰濠登城賊抵死拒敵諸將奮勇殺入立將安慶省城克復利見預有功奏入得旨以游擊留於兩江督標儘先補用先是僞護王陳坤書等擁衆四五萬突入太平府之張公橋圖犯金柱關同治元年閏八月各營會合外江水師及陸師數營禦賊於花津護駕墩五戰卻之退踞薛鎮賊節節延竄潛約賊船銜尾而西環泊花津上駟渡之下楊岳斌聞警自帶歐陽利見等五營力疾赴援金柱關得此水陸依護賊乃不敢逼九月賊糾衆至龍山橋先以排礮拒我師船潛結筏偷渡我軍斜刺而入截賊數段縱橫掩殺賊又倚河築壘形若貫珠以冀乘間再逞初六日賊進逼金柱關水軍排礮轟擊逆衆稍退十八日官軍水陸大舉分道進逼歐陽利見亦率水師由星子橋決隄駛入攻賊之後天甫向曙遇賊於花山血戰數時賊不少挫諸軍益鼓勇衝壓分兩路鈔擊賊乃向上駟渡紛紛竄遁棄尸駢積河水不流然密頭護駕墩大小花津等處尙爲賊踞歐陽利見等乃於二十日進次馬音街會水師李朝斌等十營於二十一日侵曉出隊先用礮船

渡陸師過三汶河毀平窰頭數壘水師徑取護駕墩登陸焚橋率隊直進賊乃竄聚花津我軍緊躡賊後搏鬪移時周萬倬困入重圍適王可陞梁美材等由圩聯騎衝至歐陽利見等率礮隊排擊水次周萬倬立刃數賊突圍躍出兩面夾攻立破花津兩岸堅巢獲賊划七十焚賊糧數萬石各營還駐馬音街二十五日攻洞陽象山之賊歐陽利見率水營自太平府東循隄而進甫至小橋望見賊旗掩映林谷周萬倬洪得勝縱轡衝入往來盪擊賊盡披靡俄聞鼓角一聲伏賊突出火機觸發槍子羣飛周萬倬洪得勝均受創會救至合陣掩襲旣焚象山賊館並將采石磯援賊悉驅出薛鎮小丹陽一路二十八日歐陽利見等聞賊船出石臼湖聚泊小丹陽之背以護新市鎮四壘乃於二十九日留曾泗美右營守塘溝親帶兩營進湖雕剿破壘殪賊得船十二號喻俊明亦得二十八艘自是賊舟之由東壩來者存留無幾蕪湖金柱關六十里內無一賊矣錄功彙奏命以參將儘先補用並賞副將銜二年四月率水師營會攻桐城聞賊巢并南北兩街各壘破之遂進師巢湖繞湖而陣旋從曾泗美喻俊明同攻東門石壘並約陸師彭毓橘移逼城根二更後水師環隄猛擊悉焚湖中賊划毀其浮橋劉連捷亦自河南飛騎馳

至共破窰廟沿河六石壘賊遁入城歐陽利見卽躡蹤東門入克復巢縣會鮑超克含山遂襲利州與水師環壘急攻賊大怖乞降盡釋脅從而斬其酋以徇於是各整部伍入城獲遺穀甚多四日之內疊下三城得旨著賞給強勇巴圖魯名號五月調赴江蘇一帶攻剿曾國藩奏請以歐陽利見補狼山鎮標右營游擊允之旋克復嘉定縣城並北新涇四江口兩次血戰解圍得旨狼山鎮游擊歐陽利見著以副將仍留兩江補用又攻克崑山新陽兩縣命以總兵記名簡放蘇州踞賊以吳江震澤當江浙之衝爲嘉湖援賊必由之路賊黨麇集花涇港同里等歐陽利見進攻花涇港賊壘燬賊船二十餘分路並進盡破湖口賊營生擒五百餘名潰賊鳧水遁官軍以槍礮排擊斃賊數千官軍進逼城根合力攻打賊懼開門出降吳江震澤縣城均收復得旨歐陽利見遇有總兵缺出儘先題奏並賞給二品封典蘇州省城被匪占踞四年之久李鴻章督師圍剿歐陽利見會師進攻連克婁齊葑盤四門外賊壘城內賊膽已寒乞爲內應十月二十日逆酋李秀成見官軍攻逼日緊城賊散亂率死黨萬餘宵遁以城交賊首譚紹洸固守二十三四等日水陸諸軍分由各門進攻晝夜開礮轟擊二十五日譚紹洸上城抵拒僞王郅

雲官等商令僞天將汪有爲將譚逆乘隙刺死並斃該逆死黨千餘開門迎降歐陽利見帶隊入城誅悍賊數千名立將蘇州省城克復上其功命交軍機處記名遇有提督缺出請旨簡放三年二月官軍進攻浙江嘉興府城轟塌城垣百餘丈歐陽利見豎梯登城以炸礮擊入城中賊衆駭亂乘勢拔樁過濠由東南兩門攻入逆酋廖發受率悍賊數千人巷戰斃賊無數餘賊將由西門出遁分投截殺悉就擒誅獲僞榮王廖受發戮之遂復嘉興府城三月奏捷命遇有提督缺出儘先題奏四月江蘇常州踞逆陳坤書等擁衆死守歐陽利見乘雨搭造浮橋四面環擊初六日將南門城垣轟倒屋瓦皆飛各軍奮勇登城衝入賊隊生擒僞護王陳坤書僞佐王黃和錦餘衆奔潰棄械投降者六七萬人悍賊截殺淨盡復常州府城是月十四日得旨歐陽利見著交部從優議敘十九日簡授江南淮揚鎮總兵七月初二日敘江寧克復功加一級四年九月以克復宜荆溧陽嘉常等城及調援江陰常熟無錫力戰解圍截剿金壇竄賊賞給正一品封典七年正月清淮軍務大定三月賞穿黃馬褂七月十一日以擒逆削平在事出力加一級九年三月敘平西擒並後路籌餉轉運功賞給奇車伯巴圖魯名號十一年七月歐陽利見

會同沂州兵拏獲幅匪首朱方茂於宿遷正法得旨交部從優議敘五年五月軍需報效銀二萬兩恩准廣原籍祁陽縣文武學額二名光緒二年以禮去官四年九月服闋仍署淮揚鎮總兵六年七月奉旨補授江南福山鎮總兵七年六月搜捕海匪獲匪首朱振剛交部從優議敘十一月擢任浙江提督十年防守鎮海礮臺疊被法兵輪攻撲部將接仗獲勝得旨浙江提督歐陽利見親駐前敵督率有方著賞給頭品頂戴十五年十一月因病開缺二十一年三月劉坤一調辦海防中途病故奏入諭曰前任浙江提督歐陽利見上年劉坤一調辦海防行至中途患病身故殊堪憫惻著照軍營立功後病故例從優議卹並將戰功事蹟宣付史館立傳以彰忠藎卒年七十一歲子鴻江西候補道

康國器

康國器廣東南海人由吏員投效軍營保以從九品選用道光二十七年除江西贛縣巡檢咸豐二年調樂安縣巡檢四年因吉安等屬堵剿出力巡撫陳啟邁保獎以府經歷縣丞卽補六年保薦卓異旋因克復饒州豐城等處彙獎晉知縣並賞六品翎頂七年隨濬沙河以達臨江賊屢阻撓國器督礮船擊之工旣竣我軍

得據兩河之險迭獲勝捷賊欲偷渡新淦河來援亦爲國器水師堵截斬擒頗多
敘功以同知陞用八年因克復臨江府城賞換花翎九年因攻安仁逆匪出力奉
旨候補同知後以知府陞用先換頂戴十一年廣東巡撫耆齡以陽山縣附近之
一帶逆匪鷓鴣張檄國器偕總兵勒福會剿國器等先攻嶺背田賊破其沿路礮臺
匪退回巢我軍薄壘環攻奪路而上蹋平嶺頭嶺背各老巢獲首逆梁柱陳才潘
亦方等耆齡疏請免補同知以知府仍留江西遇缺卽補並賞加道銜允之七月
進剿赫巖賊國器飭軍功朱向善營山後斷其接濟撥戰船大礮飭都司吳光亮
轟村前礮臺制其要害而自督隊三路進逼殲匪無算乘勝攻豬豚螃腳各逆巢
逆首周裕梁星保梁神通等先後就擒藍山一律肅清同治元年正月捷入得旨
嘉獎旣而耆齡遷閩浙總督檄國器率粵勇三營援浙歸浙江巡撫左宗棠節度
九月隨藩司蔣益澧合圍湯溪國器壁南門斷賊汲道賊連夜來襲皆擊卻之十
月燬賊新築三壘陣斬僞級天義李占魁殺賊二百十一月二十二日迎剿僞首
王范汝增僞梯王練業坤於白龍橋行至後北地方賊漫亙十餘里各營衝擊大
勝國器軍斃賊千俘百餘城賊突出千餘參將吳光亮等復縱擊敗之二十六日

分擊酤坊援賊遇之蔣塘國器飭吳光亮等直衝賊隊參將古捷芳與百長廖勝領擡槍手大旗手四十餘人爭先陷陣立斃悍賊多名全軍繼進賊敗卻陣斬數百捷芳回軍國器復飭援上威營盤擊退僞首王賊黨十二月會剿開化村援賊殲數百二年正月踞逆僞朝將彭禹蘭密通款初十夜誑僞忠裨天將李尙揚等出皆就擒遂疾啟西門納官軍城賊倉皇竄出國器遮之南門擊斬四千同復湯溪縣城越二日總兵劉培元等克龍游潰賊圖竄金華過湯溪蔣益澧與國器截擊又斃數千左宗棠耆齡先後敘其功晉道員仍歸江西儘先補用三月兼統南康勇營閩浙總督左宗棠檄赴富陽與蔣益澧合剿八月由富陽直趨餘杭攻東路一路賊隘十八日拔寶塔山斃悍賊甚夥因據其壘二十日擊敗杭州援賊追抵倉前其夕會道員魏喻義攻餘杭城入其舊郭嗣是兩日賊仍由倉前渡河結壘西葛村設礮臺於外官軍乘其初築破之國器移營北岸架浮橋以斷水道二十六日破長沙堰堅卡復逼攻南門賊壘直薄濠邊僞歸王鄧光明率黨來援我軍分起迎擊殪先鋒賊十餘並破小耿廟賊卡九月自率親兵進薄文昌閣鏖戰三時許賊敗將遁吳光亮游擊林珠從樹林突出古捷芳同知康熊飛亦疾涉至

合力夾攻立拔石壘逆黨盡殲城賊悉銳出復擊敗之十一月初五初七等日剿東門埭賊營迭有斬獲十七日左宗棠督諸軍進擊獲勝國器陳東門掣賊勢擊殺亦夥二十四日復合擊大捷國器一軍吳光亮及參將丁應龍等亦攻破柯埭賊卡連擊下牛畝太平橋賊壘分兵敗倉前援賊斬馘甚多十二月初四日攻克姚家埭王家廟閔竺堰賊壘四殲賊數百乘勢復攻牛畝賊壘逆首汪海洋喉黨來援吳光亮古捷芳康熊飛截擊敗之斃賊六七百奪獲賊械數百件二十五日黎明國器乘賊未覺急麾兵進連破東路四壘擊敗大股援賊復從楊家橋鈔我後路康熊飛游擊林本匹馬陷陣手刃數賊各營繼之立燬楊家橋賊卡明日與道員楊昌濬分路齊進搗林清堰汪逆老巢國器斃賊數十三年二月十六十八等夜國器攻倉前李家塘等處斃賊近千二十夜左宗棠督攻城壘賊驚亂翼日國器勒兵出賊數千逆戰吳光亮林本衝擊斃悍賊數十後隊賊蜂擁至康熊飛古捷芳急進殄賊無算乘勢克蔣元壩偽裕王劉逆復以悍黨來援吳光亮古捷芳等併力痛擊立轟斃之並斬黃衣賊日多名賊敗走時倉前援賊由橫渡橋鈔出游擊蔡盛恩戰歿古捷芳馳援賊愈裹愈厚亦力戰陣亡林珠麾隊突圍入康

熊飛吳光亮林本決圍出併力衝殺殲數百賊始潰二十四日汪逆海洋開東門向瓶窰遁其未及逃窰者國器悉殲之遂克餘杭縣城奉諭康國器著遇有福建道員缺出請旨簡放並賞加按察使銜尋以賊股竄入福建國器疊奉寄諭入閩兜剿六月補授福建延建邵道七月由浦城崇安馳抵邵武頃之僞侍王李世賢僞康王汪海洋竄踞漳州及龍巖永定上杭縱橫數百里一片賊氛十一月左宗棠檄國器分剿龍巖州踞逆國器遂飭知府康熊飛等率昭武彰武飛虎揭陽諸營前進游擊陳允彩守備熊應烈分扼朝天嶺十二月初二日康熊飛等進紮龍巖城外鐵石洋賊乘營壘未就突出大股來犯力戰卻之初五日出隊距城三里斃賊多名燬城外賊巢越二日康熊飛等薄東門賊固匿至午突出悍黨二千官軍奮戰賊卻大隊賊復從南門北門出冀鈔後路游擊林本林福喜分投馳擊槍斃無算忽悍賊千餘又從北門潛出徑撲鐵石洋營壘彰武營竭力堵禦康熊飛等急回援鏖戰兩時又敗之共斃賊日十餘悍賊數百是夜我軍潛攻城外賊壘破之殲賊數百十一日各路援賊分撲飛虎揭陽兩營康熊飛分兵扼蔣武小路自以一營往援奮擊敗之嗣兩日城賊迭出萬餘猛撲十餘次均擊卻共殄賊千

餘十六日賊大股突出東門另股由焉巖嶺趨下老圖兩路夾攻時國器已抵雁石密伏兵山谷間而虛張旗幟於雁石隘口賊望見恐截其歸路卽退去當康熊飛之攻龍巖也逆首丁太陽由永平出漳平漳平永福里土匪爲之導朝天嶺守將陳允彩未築營賊至輒潰熊應烈退保漳平縣城賊遂逼攻之游擊賴長與熊應烈臥旗鼓伏壯士城外賊意城無備突過浮橋城上槍礮驟發賊驚卻伏兵起左右蹙之賊潰復開城出擊大敗之賊走洪橋我軍乘夜燔其館四年正月二十三日龍巖城賊分五路撲鐵石洋國器麾隊力戰敗之追至城下偵知古田逆萬餘來援明日雨後遂擊斃賊二千有奇乘夜攻州城東北火箭噴筒齊發賊敗南門走追殺至前林還復龍巖州城二月幫辦軍務劉典剿賊上杭之白沙國器飭營官羅洪標助之奮威衝殺賊遂大奔時汪逆竄龍巖南靖永定間左宗棠檄國器與總兵關鎮國嚴防永定湖雷撫溪一帶三月二十日國器偵知苦竹賊分踞茅畚明日親督所部進剿飭都司關鎮邦堅守龍潭防梅林賊鈔襲軍至東安遇賊迎擊敗之茅畚踞逆傾巢出我軍更番疊戰賊不退副將吳光亮參將詹惠繞小徑攻破山腰賊砦賊駭欲遁康熊飛等乘勢急進立燬賊壘三座二十七日國

器進剿苦竹抵礮下攻賊壘火之三路躡追適苦竹大股以來援吳光亮等衝殺賊敗退入山頂壘中我軍遂破山腰礮臺山後小壘康熊飛等出大坪見楊校梅林賊翻山至飭詹惠游擊羅洪標分路伏自率輕騎挑之入伏中兩路突起賊潰正追剿而後股援賊麇至康熊飛鼓衆陷陣大敗之共殲賊千餘生擒百餘四月初十日國器軍敗賊於巖前十一日奎洋賊分擾大溪次日黎明乘霧銜枚進賊誤謂其黨就之官軍譟而前賊駭卻後股至康熊飛等奮擊敗之吳光亮別由東安薄苦竹飭參將林福喜游擊林檣柔騰上破山前營卡游擊陳觀光等亦破賊卡一區十三日林福喜林檣各率健男百攜火具夜往大隊繼之燒山前賊營八各軍縱橫痛擊苦竹附近之賊壘賊館悉蹋毀汪逆以悍黨來援官軍遇之東坑鏖戰數時愈接愈厲哨弁陳羅陳魁繞山後奪踞嶺巔衆軍一鼓上賊譁潰明日追剿至湖坑大溪埽其壘直抵廣東大埔境始收隊俘斬二千有奇二十三日國器進駐湖雷次日毀羅灘浮橋斃賊百餘二十五日汪逆嗾僞佑王黃逆等七路來撲國器督吳光亮等迎剿而令康熊飛關鎮邦分左右路鈔截獲勝賊別襲吳光亮營我軍併力擊敗之明日賊復來犯至輒敗汪逆親刃數賊拚死回鬪國器

麾軍奮擊賊大潰並擊敗閣坑伏賊山邊屯逆兩戰殄賊五千生擒六百嗣仍督隊進蹋平劍灘賊壘斃賊數百復合劉典軍沿途追殺又截賊劍灘擊散殆盡五月初二日國器至塔下揮衆奪浮橋分擊山上山下賊其未濟者扼橋堅拒林檎林福喜陳羅間道攻賊背賊驚潰大軍急進擒斬二千追逼溺死者六七千山上下賊同時潰復擊殺二千俘千有餘收降萬餘明日追剿又降餘黨三千是役淹斃僞天將潘起亮僞朝將劉貴幅陣斬賊帥曾洋貴陸連幅鄧云貴等捷奏入賞加布政使銜於是閩疆肅清賊徒竄廣東境左宗棠檄各軍越境追剿國器進駐嘉應之松源擬會提督高連陞規鎮平時僞利王朱興隆僞稽王吳玉堂約降國器令密圖汪逆已而歧誤內間未成閏五月十五日遂由三溪口進抵藍坊與賊遇直前奮擊大潰進薄賊卡破之忽汪逆分黨攻陷石峯徑之保字營白渡之升字營擾及連塘崗江南竹新鋪墟一帶嘉應州城岌岌國器改赴龍牙二十二日賊數千攻嵩山民寨都司湯彪以哨隊擊之圍立解明日國器駐嵩山隊千餘抵瓦窰飭總兵吳光亮迎擊湯彪繞擊賊後賊駭走官軍躡蹤追剿緣途斬擒二百乘銳平白渡新鋪墟一帶壘卡六月國器調賊築卡棠海亭乘夜疾進出不意縱

擊之俘斬百餘賊遁回鎮平七月初六日督所部分路進攻康熊飛吳光亮先破石坑排賊壘三復會林本關鎮邦擊敗藍坊賊隳其壘追至拱橋時羅洪標熊應烈湯彪逼攻南坑頭賊壘賊將何明亮忽率數千賊來援康熊飛等從山中橫出夾擊壘破賊敗走斃一千數百擒數十初八日逆首胡瞎子率悍黨三萬陣南坑頭山岡國器令以槍礮仰攻賊堅抗至午適約降之李積曾務等率四千爲內應焚營衝出後隊賊驚潰我軍乘之胡逆被創墜馬賊大敗俘斬二千數百國器因進壁鎮平東南高思塘分營扼程官埠十三日康逆汪海洋直撲程官埠營官林本等更番猛戰賊稍卻國器飭康熊飛袁岳雲橫出夾攻吳光亮關鎮邦分路鈔截賊敗生獲僞神將祝雲等陣斬僞神將朱三元等殄賊八百明日汪逆復選標旗手來犯國器料賊必虛攻程官埠待高思軍出圖襲後路因部勒以待辰刻果先撲程官埠營壘林本等屹不動俟賊近排槍轟擊汪逆知官軍難撼乃留黨牽綴自以悍賊撲高思康熊飛佯退誘賊入伏吳光亮從兩山突出伏兵盡起僞王宗汪大力中槍死僞奉王黃十四傷體遁官軍四圍縱擊賊紛紛潰汪逆勒諸賊回鬪我軍猛進哨弁康達本裹創血戰康熊飛復調線槍隊指擊洞汪逆左腕賊

隊大亂吳光亮關鎮邦又兩路鈔至縱橫盪決賊大敗程官埠營亦擊敗逆黨胡瞎子何明亮是役斃悍賊二千有奇墮巖落澗死者不可稽計三十日擊賊石古排敗之又收降僞天將張祥順等千餘人八月初八日國器督隊分攻石古排對門營白果山賊砦康熊飛甫出長旗嶺逆首胡瞎子挑洋槍騎賊逆戰我軍奮擊殲賊數十林本關鎮邦左右夾擊殲數百賊潰走吳光亮等追抵賊濠順民龔長春等拔樁進遇大雨收隊霽復攻是夜胡逆乞降國器料知其詐飭各營疾進守備李如先登中槍死之康熊飛麾軍破柵入立赭石古排賊壘各砦亦同時潰乘勝攻城汪逆開西門走遂克鎮平縣時初十日味爽也躡追至河邊賊據橋力堵康熊飛與高連陞等督隊奮殺陣斬悍賊千餘逼溺約二三千十一日國器督所部追至竹子澳賊方設伏康熊飛飭龔長春佯入誘之賊起康熊飛從山前殺出林本等鈔其旁吳光亮截其後斃賊千餘毀賊館二十餘所十二日進抵茅樓坪遇別股賊截擊敗之追剿至平遠大柘墟十三日高連陞抵石正適國器先至楓葉坑正與賊戰合軍奮擊追殺十餘里斬馘四五千名十四日合追興寧黃陂墟進及高坳擊敗大股賊殲七八千明日高連陞由羅岡先進康熊飛繼之高連陞

行二十里遇賊數千突從兩山出磨軍迎敵康熊飛等從後殺入汪逆復率悍賊層層逼裏都司關鎮邦匹馬取汪逆胸受矛傷裹創力戰槍彈復貫胸親兵欲負之走鎮邦叱之日眦盡裂磨令殺賊手刃悍逆數名賊矛叢刺其喉殞命營官馮南斌疾馳往救亦重創親兵死者五十餘人各軍益憤併力衝殺賊漸不支詎白水寨一帶土堡伏賊盡起直鈔官軍後康熊飛高連陞以後隊作前鋒前隊作後殿排開槍礮四面轟擊圍始解越日復窮追抵樟樹坪乃還駐興寧縣賊遂闌入江西長寧定南境尋復回竄十月陷嘉應州十一月國器營州城北烏泥坪十二月十二日列陣葵嶺會高連陞軍擊賊雙板橋敗之追至黃竹洋是役首逆汪海洋中槍伏誅二十二日同克嘉應州城明日國器向黃砂嶂追剿直抵豐順北白水寨俘斬無算生擒僞金王鍾英僞幼陪王譚標僞朝將黃松等多名鐘英賊渠洪秀全壻也五年正月左宗棠錄功入告賞給三代二品封典軍務歲請假省墓九月陞按察使七年五月遷廣西布政使十年四月護理廣西巡撫時剿辦邊境土匪克復越南木馬省城與提督馮子材籌議剿撫機宜合詞入奏諭云馮子材等擬俟各軍到防後約會該國先將邊界各匪分別剿撫卽分兵扼要駐紮隨時

相機應援所籌甚是至慶泗等府屬境屢有黔苗竄擾尤當加意嚴防著馮子材康國器迅飭副將孔憲隆等越境進兵協同黔軍埽除獨山荔波各匪進規古州擣其巢穴免致侵軼爲患密邇省城該處有匪徒搶掠富川恭城等處亦有華匪股竄入雖均經兵勇痛剿擒獲多名尙恐外來匪徒勾通內匪滋事著康國器飭令會協均迅將敗匪就地殄除毋任逃匿旣逆首李高腳一股由黔竄粵經我軍擊敗仍遁回丹江都勻交界小五戎地方越南匪首鄧建新周仲汝等竄踞安世縣香洧社六月總兵劉玉成進剿覆其巢並克廊猛硝廠各處東潮賊目王大等亦悉數就殲七月國器疏言此次出關援剿未及旬日卽能擣穴擒渠兼爲越南疏通餉道固由士卒用命將帥和衷亦資勞允才等協力圖功用收速效應分別酌獎當飭勞允才更名勞樹勳賞給五品軍功頂戴梁志新王成宗等均更名賞給六品軍功頂戴降衆酌挑精銳編立兩營卽派勞樹勳等管帶其老弱男婦三百餘名情願入關安插俱酌給川資飭太平府查明可墾荒地撥給耕種把總楊瑞山招降立功酌以千總記獎如所請八月省城秀峯宣城榕湖三書院落成請頒發匾額允之九月廣西職員覃成典以外委庾應榮受賄通賊呈訴經都察院

奏入國器馮子材奉諭茲覽所控各情亟應迅速剿滅以靖地方外委庾應榮有無通賊情事著從嚴懲辦時太平府知府徐延旭統六營勇丁缺額國器劾奏命劉長佑一併確查又劾署西隆州黃其華剿辦苗匪擅自設局抽釐復收已革陋規致鄉民陸有順等藉端滋事請革職以肅官方從之十一月上以國器能否勝任著廣西巡撫劉長佑確查覆奏十一年八月奉旨著來京另候簡用光緒十年越南軍興國器在籍籌辦捐輸病卒十一年二月大學士左宗棠疏云康國器起家小吏洊擢藩司護理巡撫咸豐初年髮逆圍南昌國器以桂源巡檢毀家募勇卒解城圍復從大軍連克饒州臨江諸城臣之督師入浙也國器率所部由贛入衢與蔣益澧合克湯溪自是遂隸臣軍浙西既定復追賊入閩克復龍巖等處迭著戰功賊遂竄粵國器故粵人也諳習形勢其子熊飛又勇敢素著用能以寡勝衆挫賊於鎮平殲賊於嘉應高思之捷殺賊萬計臣嘗許爲入粵戰功第一綜其平生大小百戰克復堅城十餘處歷任江浙閩粵廉正樸誠無所緣附尋以傷發假歸養疴上年正月以王德榜一軍赴援越南奏請國器在籍勸捐接濟得旨允國器奉命之下力疾從事時勢牽阻鬱憤增劇舊傷迸發遂致不起懇恩照軍

營積勞病故例議卹並將事蹟宣付史館立傳詔下所司十二年九月閩浙總督楊昌濬據提督賴長等臚敘國器事蹟覆奏略言前甘肅按察使劉于濬在籍病故前浙江按察使劉盛藻在任病故悉由該督撫奏請議卹經吏部照章奏駁嗣復續陳請卹均蒙特旨允准今國器在籍病故核與劉于濬等情事相同相應援案懇恩仍准議卹並將戰功事蹟宣付史館立傳奉旨著照所請尋賜卹如例

席寶田

席寶田湖南東安人縣學廩生成豐二年粵匪出湘鄂順流東下據金陵爲僞都故大學士曾國藩奉命治團練寶田上書條陳兵事利害國藩奇之旋率鄉團從官軍復東安六年劉長佑督兵援江西奉檄襄辦軍務進攻袁州克之移軍攻臨江敗其援賊復克之歷保訓導教諭知縣卽選八年敘復撫州功以知縣留江西補用加同知銜是年官軍敗石達開於水田鋪賊紛潰夜竄劉長佑飭寶田直搗廬洪復追至白芽市生擒嬰逆二名斃悍賊二百數十名九年以前剿賊南豐出力保以同知直隸州留江西遇缺卽補並賞戴藍翎石逆復犯郴桂圍攻永州分股撲寶慶寶田與劉長佑計壁一軍祁陽兼顧衡永遮賊東下倍道疾援永州破

賊於府城西隨掩擊於武岡新寧等處進逼寶慶城東連戰皆捷圍解保以知府留江西儘先補用尋越境追剿石逆至廣西會象潯股匪逼攻柳州寶田督軍回援城圍立解保以本班歸江西候補班儘先卽補並賞換花翎旋以病假歸石逆餘黨回竄湖南之宜章結砦栗源堡道永江臨藍桂各州縣戒嚴巡撫翟誥檄寶田募勇防剿號精毅營連敗賊於道州桂陽等處軍抵宜章寶田令部將夜逼栗源堡自督隊繼進乘霧急攻賊疑官軍大至遂降十一年春石逆分股回竄歷興安全州灌陽界直抵文村進窺道州之蔣家嶺寶田伏兵嶺側賊竄至高明鋪寶田率所部分路進剿賊列隊抗拒伏起賊敗竄寶田料賊必從江永取道四眼橋兼程扼其要隘及賊趨白芒營追敗之賊遂竄至河西署貴州巡撫江忠義從河西夾擊賊敗窮追至東塘賊復敗遂向勾挂嶺而逸保免補知府以道員留江西補用同治元年石逆糾合潯匪繞入楚境寶田敗之於會同復邀擊於黔陽之中方雙溪烟溪等處黔圍解遂督軍克來鳳餘匪竄咸豐忠堡一帶其馬隊賊二千餘繞過黑洞卡直撲利川圖竄夔州有旨飭寶田馳赴利川兜剿寶田分路截殺石逆敗竄入蜀卒就殄滅邊境肅清奉旨以道員記名簡放並加按察使銜是年

冬皖南踞匪進窺江西湖南巡撫毛鴻賓奏請派寶田募兵進剿兩江總督曾國藩駐軍安徽亦以江西事急檄寶田往援二年春師抵饒州賊壁桃溪渡我軍壁袁家墩薄暮與諸將議兵所向會飄風掣營幙寶田遽起立曰賊至矣亟飭諸將嚴守備預遣驍卒伏道旁繞出賊後入夜賊果大至我軍內外夾擊大破之乘勝追擊百餘里遂平桃溪渡奉旨賞業鏗額巴圖魯名號堵逆黃文金等由皖入江分擾鄱陽浮梁祁門都昌境內爲寶田與劉典軍扼不得逞乃竄趨湖口寶田破之於洋塘再破之於石門七月復掩擊於青山橋遂悉平青山橋上下彭等處賊壘奉旨賞加布政使銜賊敗而東趨略池州圍青陽勢殆甚寶田由池州入援堵逆選精銳數千逼我軍而營寶田猝由石嶺襲破賊卡賊驚潰堵逆手刃數賊轉鬪而前寶田遣別軍鈔入卡後賊大敗堵逆從亂軍中逃逸尋於八月二十七日我軍水陸大舉合力痛擊賊遂敗入石埭青陽圍解賞寶田兩代二品封典三年正月沈葆楨奏調寶田移防婺源賊之窺婺源者訶知其有備將由白沙關犯德興寶田率隊馳擊賊分三隊前隊據規橋寶田奪隘直入賊遂據大濟關泥嶺關不動寶田誘使奔逸我軍沿溪鈔殺賊尸填溢水中餘賊竄伏山谷待援復經我

軍搜殺遂從歇嶺竄德興侍逆復勾結黃文金由績溪竄犯江境寶田截擊其尾隊於玉山其闌入金谿者寶田復由安仁率兵馳剿立將縣城克復沈葆楨奏言席寶田謀勇兼資軍民愛戴規橋一戰威聲遠震茲復疾馳數百里冒雨力戰克復專城大局保全厥功甚偉得旨交軍機處記名遇有按察使缺出題奏賊尋窺建昌寶田等督軍剿殺乃竄擾新城南豐各鄉沈葆楨據賊供以賊不得逞於撫建思由寧都以窺贛州入奏有旨飭寶田跟蹤進剿賊破南豐據之寶田率所統精毅營回紮百花亭與韓進春奮力夾擊賊潰寶田聞賊南渡仍拔回建昌南豐經久未復六月奉諭席寶田圍攻南豐日久未下本有應得之咎惟該員因建昌有警移軍回顧致兵分見單尙非攻剿不力可比沈葆楨請將席寶田暫行革職之處著加恩寬免時侍逆力攻撫建不得志盤踞崇仁宜黃與南豐賊聯爲一氣以窺撫建西路康聽兩逆蔓延金谿東鄉以窺撫建東路而僞王宗李元茂復糾合南豐逆賊下竄踞鐵子嶺一帶爲崇賊聲援且以大股圍犯席營寶田擊敗之越日寶田師出鐵子嶺左賊據嶺而陳寶田擊敗之乘勝下撲賊館賊驚潰遂火其館鐵子嶺巢穴平乃進攻崇仁血戰城下斬悍賊萬計精銳略盡敗賊遁往宜

黃崇仁官民兩城同時收復八月官軍克宜黃金谿南豐亦先後並復賊竄廣昌
寧都復逼南贛諭飭寶田跟蹤追剿是年八月補授雲南按察使侍逆既受創於
崇仁仍糾宜黃敗匪竄撲寧都並陷雩都復繞由廣東南雄州邊境乘隙撲南安
而康逆汪海洋復竄據瑞金有旨飛飭寶田與王文瑞兩軍兼程前進督辦皖南
江西軍務大臣楊岳斌時屯寧都趣寶田會師寶田以破崇仁未赴乃奏劾寶田
遷延奉旨降補知府並撤銷布政使銜勇號仍責令率勇剿賊以觀後效會幼逆
洪福瑱於江寧克復後經官軍追剿竄由湖州分支入江西一支爲幼逆洪福瑱
干逆洪仁珩祐逆李繼遠率死黨自瀘溪出一支爲昭逆黃文英率死黨自光澤
出九月初四日同會於新城共擁幼逆向橫村而遁次日寶田馳抵新城使謝蘭
階率六營前驅自統六營繼進賊晝夜不停趾我軍亦晝夜緊追初九日及之於
廣昌之塘坊賊敗走又及之於白水嶺我軍踰嶺鈔之賊復敗俄寶田至今諸將
曰不擒幼逆毋收隊疾馳三十餘里及之於楊家牌賊方蟻聚爲炊我軍掩其不
備賊驚遁悍黨數千擁幼逆進踞古嶺憑險堅拒是夜夏基鴻廖生達斬關入力
戰死之各勇仍奮進不已賊遂棄嶺狂奔人馬擁擠不前我軍乘之急賊殊死戰

我軍卻寶田斬退者以徇弁勇爭奮賊敗遁至嶺下寶田率隊逼之乃四散而逸使我軍莫知所追寶田飭分隊搜剿自率輕騎疾進生擒洪仁珩黃文英洪仁政惟幼逆洪福瓚未獲尋部將周家良於石城荒谷中搜得之並俘其宗親黨羽捷聞寶田開復降補知府處分仍以按察使記名簡放並賞還布政使銜勇號同日奉上諭席寶田帶兵追賊迭獲勝仗並將首逆捕滅奮勇可嘉加恩賞雲騎尉世職並黃馬褂尋授貴州按察使四年三月康逆由南靖竄永定旋踞南靖之圭陽寶田以賊若回竄汀贛非直犯永定必走上杭駐軍石城覘賊所向以遏回竄之路會霆營叛勇攻撲袁州敗由萍鄉竄逸脅從至萬人諭飭寶田將叛勇撲滅回紮瑞金以資扼守寶田截擊於湖南叛勇乃由湖南竄入廣東思與逆黨會而康逆在鎮平亦與叛卒互相援應既而屢經官軍剿敗急思覓路逃竄遣黨擾掠白水坳一帶思由閩邊入犯江西寶田軍由平遠進扼東石賊三路來犯敗之斬馘及招降甚衆會花旗股匪以窮蹙降康逆自知黨與日孤遂由他道竄走我軍疾馳遏之於信豐至鐵石口立壘未就康逆由龍南之東坑墟羅吉墟連營三十里達信豐之小江墟寶田率兵進剿與賊遇於蓮塘坳賊陣分布五六里堅而且厚

寶田以爲僅從前面逆擊驟難得手分路包鈔可覆而取乃遣諸將率銳襲之自督軍嚴陣以待賊遽以大隊來撲寶田覩賊勢逼近策馬督戰將士奮鬪相持正急部將謝蘭階等從嶺左突出夾擊賊驚潰我軍乘勢掩殺遂大敗康逆奔回小江墟依壘結陣死力抗拒榮維善周家良復從墟後襲破賊壘康逆不知所措奪路大奔計殲悍賊萬餘人生擒千餘名逆黨驍健殆盡康逆身負重創率殘卒輾轉遁入嘉應尋殪髮逆蕩平劉坤一以捷聞並言寶田關心大局誓殄餘氛智勇無雙戰功第一應如何獎敘之處恭候欽定奉旨著以布政使遇缺題奏六年二月以父老丁單呈請開缺終養湖南巡撫據情代奏奉旨俞允三月諭以寶田屢立戰功賞給三代一品封典時東南底定惟貴州苗匪虔劉通省殆遍湖南沅晃靖會黔麻等處皆通貴州日常告警巡撫李瀚章奏起寶田接辦黔事寶田以終養辭嗣劉峴撫湖南知寶田有文武才略奏起益力是年冬奉命招集舊部入黔並總統援黔各軍師次沅州定議先剪教匪後戡回疆教匪者石阡思州銅仁各屬亂民倚苗爲輿援負兵阻險苗每出擾藉爲先導而以石阡之荆竹園爲其淵藪地勢削立惟北面一徑可通出入其巔平行四十里皆田陌井泉廬舍櫛比約

二萬戶中築十八壘相聯絡號令一秉悍賊資糧饒足官軍圍攻十餘年無能至其壘下者是年冬寶田進軍石阡除夕前二日分壁荆竹園勒馬率諸將環視一周見北壘地勢平夷可掩而入七年正月元日下令進攻飭諸將勒軍悉趨北壘軍甫進賊瞥見鼓角齊鳴礮石雨下部將黃元果踰壘上賊攢矛下刺手握其鋒跋壁先登諸將士肉薄壘根卓矛於地躍而入賊列陣鏖戰移時而羅家巖援賊大至欲橫截我軍於中窪將士奮力直衝賊且退且戰遁入壘中日晡我軍逼攻火箭射著賊廬燄發賊不支冒死竄逸陣斬蕭桂盛何瑞堂賊自相蹂踐多墜崖落井死因更選卒猛攻以次踏平十八壘遂克荆竹園復乘勝冒雪行崇山邃谷中環攻大小驕頂山諸匪老巢破其三十六砦教匪平苗遂失其外蔽巡撫劉崑以捷聞賞寶田白玉翎管一枝搬指一箇大小荷包各一對是夏軍由功水進圖寨頭寨頭者苗疆門戶也諸悍苗及帑賄悉萃於此資糧饒蓄圖以死守西有馬鞍猴子兩屯東有螺螄屯皆蔽寨頭之險要以相控扼寶田督軍進戰拔其東西三屯陣斬逆酋桂金保遂攻頗洞上德明下德明諸隘皆破平之於是四十八寨悍苗聚保寨頭羣苗亦合衆來援寶田督軍力戰復出奇兵合擊賊大敗遂踏平

高坡臺綱教場壩諸賊巢聚守臺笠寨寶田進攻克之而丁耙塘一寨獨蔽寨頭前爲閔旋督軍進攻丁耙塘別分軍從間道直取寨頭又以一軍越出丁耙塘之背賊於山口築卡列礮諸將士從彈丸中鼓勇而前短兵接賊以死扼會攻寨頭軍已逼近礮聲大震丁耙塘賊駭亂我軍斬關而過合兵攻之賊奮力死鬪各路援賊全集呼聲動山谷寶田因派五百人從高下擊火箭射著賊廬烟燄沖霄諸軍乘勢攻入斃賊大半餘賊奔逸我軍自是將逆苗之門戶隳矣三路追斬鮮得脫者寶田仍壁軍寨頭以次剿平附近苗屯俄丁繼母憂湖南巡撫奏乞奪情留營貴州巡撫曾璧光亦以全黔安危實係該員去就請旨飭下湖南撫臣轉飭寶田暫緩回籍守制仍行留營督辦軍務於是有仍留貴東之諭初寶田之軍發寨頭也苗出擾楚邊寶田率軍一殲之麻陽再殲之芷江三殲之龍駐界自是不敢復來犯洎攻克寨頭壁軍之日而張臭迷包大肚九大白報南燒陳大六各苗逆合十二酋長於五月初一日昧爽率黨數萬來援旣見寨頭已下直犯官軍營壘我軍閉壁門臥旗鼓寂然無聲日過午分軍設左右伏開壁縱兵出戰伏起三路合擊追殺十餘里乘勝並剿拔抱金岑松石隴梁上諸大寨並撫定松柏洞景

洞五岔巴冶諸向化苗又遣龔繼昌攻克天柱及江口屯俘苗酋陳大六斬之是時軍已深入寶田念仰而攻堅徒損精銳乃爲鷓鴣法以重賞募死士乘暮夜陰雨聲東擊西或銜枚蛇行窮極幽邃馳軍於人迹不到之處出奇縋險攻賊不備已乃親率大隊鼓噪從之所當輒破其後竟以此成功十月議進規台拱寶田以台拱苗最强右清江而左鎮遠與爲掎角台拱下而後苗事可言不取兩城無以制台拱不悉平寨頭前路苗寨斷寇援東道無以取兩城於是先徇清江路詔諸將曰清江南北百餘里苗寨不可勝數北岸尤悍皆倚澗壑絕險徑仄不容足益以木石斷塞沿寨而索戰曠日月傷校卒非計也今揚言進兵而以輕兵縋萬山襲其後傳鋒而襲之砦可盡破然絕危難失勢敗且不救榮維善者驍捷冠一軍奮請行因裹糧約束夜率所部疾趨山谷間懸軍五日迴繞數百里至柳樹街南岸則清江廳也時天寒大雪苗望見旗幟疑他寨苗會師俄而大戰蹙苗赴江水尸蔽江下知官軍已至懼欲遁維善止不渡迺反攻柳羅烏包之屬稿雍諸名寨已前下復撫降所過數十寨清江北岸寨悉定移軍略南岸以規鎮遠十一月破抱金入撫松柏洞唐本有屯之九大白潘老冒糾萬人圍攻之本有歛兵守榮維

善從他道張兩翼遮苗苗反在圍中本有復出合擊大破之因收南岸十九寨又破拔黃牯屯九大白遁走八年正月克稿繞克平塘坡烏溝旁取數十寨寨頭達鎮遠百里苗寨蕩平先是寶田以所定苗地宜處處爲防請益師南北並進使苗無能兼顧於是黃潤昌鄧子垣將萬人從北入攻而寶田專南路黃軍抵思州遂會師攻鎮遠克之復拔施秉巡撫劉崐上其功部議給與軍功加一級奉旨依議二月渡沅水進攻董敖屯清江大寨二曰公鵝曰董敖董敖轟萬山中孤峰削立絕壁間一徑仄不容足寶田麾軍攀崖上賊從峯巔轉石下擊聲隆隆震山谷當者輒碎我軍死傷相積榮維善猱升及山腹賊擬維善墮巨石維善急抱樹後二人拊其背石激躍樹過三人者皆無恙遂踐其巔謝蘭階蘇元春亦悉師從登遂拔董敖斬楊逆昌彩還攻公鵝破之以次掃平百七十八寨並克清江奉旨賞給四喜搬指一箇白玉翎管一枝大小荷包各一對尋遣榮維善率六千人往會黃潤昌鄧子垣軍疏通驛路至黃飄山遇伏黃鄧敗歿維善被禽死黃軍旣敗湖南大震三月張秀眉復乘虛攻巴冶寶田憤甚親馳至破之賊走保稿米因念稿米羣寇所窟破稿米則寇勢益落間行五十里襲之賊殊死戰裨將徐啟瑞戰不

力斬以徇將士奮死陷陳賊大敗棄稿米遁六月克膠洞冰洞寶田又募死士潛繞間道縱火焚格東苗江等巨寨而陽令龔繼昌蘇元春帶隊進剿逆酋張臭迷潘老冒姜老拉各糾悍苗二三千人散列死拒正格鬪間苗見各寨火光燭天遂驚潰我軍分投掩殺斬首二千餘級焚賊舍四千餘間燒糧十萬石有奇十月龔繼昌克抱巖九寨復遣蘇元春拒寇於天柱破之逆苗糧少地蹙勢漸頓寶田督軍規取施洞口以圖台拱乃壁軍金鐘山以偪施洞口施洞口者苗之堂奧上游爲九股河與清水交會地險人衆逆苗張朝珍九大白報南燒等據之築壘列礮以死守九年四月寶田分軍三道從上下游渡河將士旣履絕地無不一當百陣斬逆酋張報九楊老輝楊之榮等九大白報南燒等氣奪潰走我軍蹙之於河斬首八九千級俘數百人遂拔施洞口老巢有旨賞寶田白玉翎管一枝白玉搬指一箇大小荷包各一對苗逆聚據新城寶田旣破施洞口分路進攻先將涼傘屯各寨平毀乘勝直搗新城各軍奮勇齊攻逆酋奔潰遂克新城次第剗平甕版班鳩各匪巢又克花灘四星臺朗洞臺水亮工排生白洗巖門司等城寨賊殄殲無遺而北岸遺苗殆盡矣寶田周覽台拱形勢西南北堅寨尙百計而革夷三丙長

灘黃泡貴栽養垢等寨賊之吭也高大山茅草坪白耶黑寨冷溪凱棠凱哨賊之左右翼也而附近密邇之寨復不可勝計因使周家良壁長灘以扼賊吭而令唐本有襲黃泡鄧第武攻三丙彭芝亮攻革夷蘇元春襲貴栽養垢鄧善燮攻高大山使苗不得相救我軍盡銳晝夜力攻皆破平之縱火燔諸寨略盡磔死苗酋楊酌洋於是諸路皆捷乘勝遂克台拱廳城奉旨賞給頭品頂戴台拱既克苗匪悉聚丹江凱里等城地爲九股河上游極深邃所毗連諸寨如番招蓮花屯高坡雞擺尾甕谷隴皆深林密箐峭壁撐天路險而隘寶田以爲非節節埽盪不能遽達丹凱迺分兵各出間道所至皆捷諸苗有薙髮投誠者因撫定之三旬之間埽蕩三百餘里平寨二百餘苗大震恐逐北至連城再戰苗望風而潰遂定丹江乘勝進攻凱里寶田策馬督戰蘇元春等斫門而入各將士附城蹂升遂拔凱里有旨交部優敘丹凱定後潰苗六七萬逃入雷公山地絕險要旁如黃茅嶺雷公坪九眼塘燕子窩諸大寨羣苗麇集是夏寶田率將士冒大雨出軍賊於山徑紆曲險要處皆掘斷以木石爲壘將士騰躍而過腹背夾攻賊倉遽舉火自焚其巢竄入雷公山我軍合擊以一軍鈔出賊後張臭迷率悍苗馳至各鬪勢甚剽銳時炎熱

蘊隆大雨如注山溪水溢寶田親執桴鼓督戰植立雨中激揚將士各軍踴躍用命賊勢不支斬首三萬餘級燔其廬舍輜重雷公山周圍崎嶇險要剿洗一空寶田息軍施洞口與諸將議兵事忽仰面撲地惛然不省人事者旬日醫治少瘥強起行軍攻螃蟹老巢克之九月病增劇湖南巡撫劉岷奏請給假調養允之以部將龔繼昌蘇元春唐本有謝蘭階分統其軍而用兵方略進止機宜一秉寶田十一年四月諸將定苗疆俘送張秀眉金大五諸酋於長沙磔之巡撫王文韶以捷聞賞寶田騎都尉世職黔苗之亂諸將率兵征討歷年無效寶田一戰破之荆竹園後遂創鵬剿之法鵬剿者懸軍深入飢因敵糧夜宿敵壘行不持營帳居不依城砦軍不時出出不時反昔岳鍾琪張廣泗嘗以此法制苗寶田尤窮殫其能犯瘴癘踐冰雪縋幽穿岨攀度箐壑尋逐於猿鳥俱絕之境出萬死以猝攻不備往往破滅或分軍夜取城砦銜枚闇趨手捫而前指與指相錯軍士咳則伏地以指掘土令聲入地中其艱如此用兵五年而苗平寶田之撫降苗責令其先行薙髮嘗言苗之叛服無常非獨其野性然也風俗之不一政教之不及相激相盪因而生心雍正間苗已大定矣然薙髮者十之二三益以言語不通嗜慾不同漢民

既日爲異類苗亦自居於別種苗疆所由多故也欲苗不爲亂必令言語嗜好同於編氓而要自責令薙髮始蓋形貌既同言語嗜欲卽漸更化數十百年之間民苗大馴混同教俗無所疑阻則叛盜息矣於是降苗無不薙髮著於令甲十二年以前在石城生擒逆首洪福瑱有旨令繪圖由兩江總督曾國荃呈進十四年春寶田疾亟六月十一日卒年六十一歲湖南巡撫王文韶疏陳寶田先後在軍十六年積勞成疾以致原疾舉發身故請照軍營立功後積勞病故例從優議卹戰功事蹟宣付史館立傳並於本籍及江西貴州立功省分建立專祠得旨允行加贈太子少保銜給卹如例子啟驥殤曜衡廩生鏞分部主事匯湘附生啟驊啟騮

宋慶

宋慶山東蓬萊人入伍隸登州鎮咸豐三年赴防安徽時亳州不靖署知州宮國勳用慶策收撫捻首孫之友等編爲奇勝營遂爲督辦安徽剿匪事宜左副都御史袁甲三所知檄帶得勝營五年大股捻匪犯亳州慶擊走之敍保藍翎千總六年率所部三百人敗捻首張落刑宮瞎子之衆於宿州卅縣集七年擊退黑旗大股捻匪奪回亳東兩河口民寨是兩役皆以少擊衆疊收奇捷河南巡撫瑛棨調

往河南助剿屢戰有功洊至花翎參將十年欽差大臣漕運總督袁甲三檄赴臨淮軍髮逆僞英王陳玉成糾合張落刑宮瞎子之衆十餘萬圍攻鳳陽府縣兩城慶偕處州鎮總兵陳國瑞各選精銳夜襲賊營大軍繼之城圍立解十一年苗沛霖叛淮北響應慶督隊疏通徐泗後路連奪草圩黑劉圩湖溝賊圩數十處臨淮大營得完袁甲三上其功先後保以總兵記名簡放並賞毅勇巴圖魯名號同治二年苗沛霖復叛圍蒙城縣塹而守之閱時十月城中糧盡勢危甚慶分統毅字三營由臨淮往援至則先築卡河口斷賊運道會科爾沁忠親王僧格林沁亦督師至合軍猛戰賊夜潰苗沛霖死亂軍中僧格林沁檄慶收撫苗逆餘黨慶一日夜馳二百里自苗老寨以至下蔡誅其桀驁而撫其脅從分軍克復潁上正陽壽州捕獲逆酋李萬春朱萬隆逆姪苗憬開置之法臨淮平捻首張總愚等糾合髮逆盤踞河南嵩縣山中衆不下數十萬慶再入豫偕總兵張曜痛剿於陶灣馬山口等處賊竄走湖北又會陳國瑞擊破僞福王陳得才之衆於英山擒斬無算陳得才縊死餘黨悉降四年授南陽鎮總兵僧格林沁檄慶駐軍豫境以杜捻匪回竄會遣僧格林沁曹州之變賊勢愈熾東豫皖楚各境悉爲蹂躪慶疊敗之中牟

考城夏邑上蔡南陽新野羅山桐柏等地其最著者爲榮澤一役賊決河隄爲北竄計慶會水師防堵據隄痛擊賊四散遁又嘗以孤軍遇賊於鄧州之刁河店被圍數重會糧盡勢且不敵因令部將馬玉崑夜率三百人潛出集隊立營以通糧道軍氣復振賊不敢逼而去六年率毅軍進駐山東是時捻已分東西二股慶會合諸軍扼守黃河蹙東捻任柱賴汝洸於東境以次盪滅論功賞穿黃馬褂並賞換格洪額巴圖魯名號西捻張總愚旋由陝竄晉命西行剿賊師未至晉七年正月張總愚自吉州踰冰北渡竄擾畿輔嚴旨令兼程入直兜剿慶聞警星馳繞出賊前攔擊屢挫其鋒以赴援迅速嘉之二月破賊於深澤縣南三月及賊於饒陽賊踞縣東北元城夜襲之陣斬悍日張五黑並將賊首邱懷才一股剿洗殆盡張總愚遁追至滑縣平原德州慶雲寧津東光夏津鹽山濱州等地連破之六月驅賊於齊東之玉林鎮死黨皆盡遂會諸軍殲之張總愚赴水死慶先擢湖南提督捷上上嘉其不辭勞瘁賞二等輕車都尉世職尋以陝甘叛回日熾命慶馳赴神木一帶相機堵剿八年老湘營潰於綏德州慶嚴扼米脂亟分軍定其亂時逆回竄擾鄂爾多斯額魯特各部而廣東提督劉松山戰歿於金積堡賊四出紛擾前

敵大營餉道阻隔慶分遣部將蔣東才馬玉崑疊破蒙境之賊陣斃逆酋穆壽馬老馬玉芝等復檄部將劉廷馳援前敵各軍收復河西三縣攻克王家疇納家關洪岡各賊寨於是自河套以至寧夏以次肅清十一年調赴肅州助剿十二年四月抵肅檄蔣東才搜捕南山竄匪踏毀轉腳湖賊巢肅州城大而堅不易卒拔慶約諸軍會攻附城東關閏七月克東關城賊出死黨來爭慶及諸軍奮擊卻之進薄城下晝夜圍攻賊援絕乞降擒馬文祿等九逆數其反覆之罪磔之關內悉平賞戴雙眼花翎奉旨命會辦哈密剿匪事宜慶以舊部多傷亡宜加整理且關外糧少乃分兵往營屯田以濟軍食而自移軍涼州爲後勁十三年九月調四川提督十一月河狄撫回閔殿臣復叛楚軍失利慶自涼州捲甲疾趨三日馳五百餘里抵沙泥站回衆不虞其驟至大驚縛閔殿臣以獻斬之光緒元年回駐潼關平奸民胡豹子之亂六年會辦奉天防務八年移屯旅順十二年會醇賢親王校閱北洋水陸各軍以慶督練有方下部優敘十六年上二旬萬壽賞加太子少保銜入都召見賜紫禁城騎馬二十年孝欽顯皇后萬壽懿旨賞加尙書銜慶之自關隴旋師也以裁節兵餉惟留馬步隊九營朝鮮與日本構難來乞師馬玉崑先率

以往日本內犯慶奉命幫辦北洋軍務並添募三十營維時留防毅軍僅馬步三營及宋得勝新募二營以事機迫不及待遂挈之行敵騎已瞥過義州直撲九連城慶率所部首渡愛河猝與敵遇鏖戰數時慶孤軍無繼衆殊死鬪殺傷相當尋命南援金州旅順未至已陷會新軍成數營復收集殘卒連戰於感王寨太平山田莊臺慶立馬督戰馬中礮斃三易馬不稍卻嗣以敵鋒方銳退守遼陽州蓋平營口田莊臺相繼失陷自請從重治罪命革職留任二十一年和議成日本交還金旅命率軍駐守二十四年移防山海關九月因病予假調理賞人濩活絡丹廷議於舊有淮毅諸勁旅改設武衛五軍慶總統毅軍三十營賜名武衛左軍十一月入覲懿旨開復處分賜西苑門內騎馬乘坐船隻拖牀二十五年六月復因病請假調理賞人濩十一月疏請開總統差上溫諭慰留予假兩月慶八十生辰孝欽顯皇后賜御書耆年偉略匾額御筆畫屏四幅福壽字諸珍物上賜御書樹績維祺匾額福壽字諸珍物二十六年上三旬萬壽恩賞御書鸞珮集瑞匾額蟒袍料五月義和團事起聯軍集天津命幫辦北洋軍務慶自以年力已衰奏以馬玉崑接統所部而自總其成疊於老龍頭興隆街鹽坨阻遏敵氛戰屢捷敵死者甚

衆我軍亦多損失卒因衆寡不敵天津淪陷聯軍進犯都城馬玉崑率兵扈蹕西幸二十七年和議成九月車駕自陝還京師慶赴河南迎鑾扈從抵京尋駐軍通州二十八年正月卒遺疏入諭曰朕欽奉慈禧端佑康頤昭豫莊誠壽恭欽獻崇熙皇太后懿旨四川提督宋慶忠勇篤誠治軍嚴整咸豐年間創立毅軍轉戰直隸河南山東江南湖北陝西甘肅各省統率所部剿平捻回巨寇與中興諸將同建殊勳洵膺專閫嗣在北洋一帶駐紮操防前後垂二十年威惠著聞軍民悅服中外推爲宿將朝廷倚若長城豐予恩施特晉太子少保加尙書銜賞給二等輕車都尉世職該提督年逾八旬此次隨扈回京中途召對見其精神矍鑠志慮周詳方冀永享遐齡長資倚畀茲聞溘逝軫悼殊深宋慶著晉封三等男爵照尙書例賜卹加恩予諡並入祀賢良祠其原籍地方及立功省分建立專祠生平戰功事蹟宣付國史館立傳靈柩回籍時沿途地方官妥爲照料伊子試用道宋天傑著以五品京堂候補伊孫直隸試用直隸州知州宋裕繼著以知府補用任內一切處分悉予開復應得卹典該衙門察例具奏用示篤念盡臣有加無已之至意尋賜祭葬予諡忠勤子天傑候補五品京堂襲爵

徐用儀

徐用儀浙江海鹽人由副貢生捐主事籤掣刑部咸豐九年順天鄉試舉人同治元年充軍機章京二年在總理各國事務衙門行走三年補主事五年總理衙門請獎加四品銜七年四月補員外郎總理衙門奏保加三品銜七月因捻匪蕩平軍機大臣奏保賞戴花翎八年補郎中充方略館纂修旋保送御史奉旨記名以御史用九年充方略館收掌兼纂修官十年命開缺以五品京堂候補十一年因剿平粵匪方略告成奉旨俟補五品京堂後以四品京堂候補十二年補鴻臚寺少卿旋丁父憂十二年又丁母憂光緒二年以校勘方略出力保獎奉旨俟服闋後免補原缺以四品京堂候補五月服闋仍充軍機章京三年補太僕寺少卿五年轉大理寺少卿嗣遷太常寺少卿七年署都察院左副都御史是年因校勘列聖御製詩文集出力賞二品頂戴八年三月轉大理寺卿仍在軍機章京上行走十二月署工部右侍郎兼管錢法堂事務九年六月調署左侍郎時雲南報銷舞弊案發司員書吏收受津貼銀兩失於覺察部議降級留任奉旨准其抵銷十月調署兵部右侍郎十年擢工部右侍郎兼署兵部右侍郎奉旨在總理各國事務

衙門行走十一年兼署兵部左侍郎十三年因病奏請開缺賞假兩月署刑部左侍郎十四年調署刑部右侍郎十五年調補兵部右侍郎尋轉左侍郎仍兼署刑部右侍郎賜紫禁城騎馬十六年調補戶部右侍郎十八年六月調補吏部右侍郎八月轉左侍郎十九年命在軍機大臣上行走二十年皇太后六旬萬壽奉懿旨賞太子少保銜賜御書蹈規履矩四大字並賞穿帶膝貂褂命充軍機大臣是年以保護朝鮮之役日本與我失和廷臣多主戰者用儀以爲未可輕敵言官交章劾樞臣孫毓汶徐用儀等朋比誤國用儀於是退出軍機及總理各國事務衙門二十三年兼署戶部左侍郎尋兼署戶部右侍郎兼管錢法堂事務二十四年八月孝欽顯皇后再行訓政復命在總理各國事務衙門行走充會典館副總裁二十五年五月遷都察院左都御史六月署吏部尙書十一月擢兵部尙書十二月孝欽顯皇后以明年爲德宗景皇帝三旬萬壽凡一品官七十以上賜蟒服用儀與焉二十六年近畿妖民倡設義和團以仇教爲名王公大臣方以爲忠義也多方招撫之用儀獨謂義和團皆匪徒縱之不利且啟外釁以是與王大臣不能五月二十六日召集羣臣決疑定計端郡王等力主用兵用儀與立山等均言

我兵不足恃衆強不可敵拳民不受槍礮之說不足信宗社爲重宜乎持重四次召見所陳益力孝欽顯皇后命用儀與立山等至各國駐京使館令勿進兵美國駐使康格許爲調停當事者益銜之指爲奸邪私通洋人奏請殺之以謝天下七月十七日奉上諭兵部尙書徐用儀屢次被人參奏聲名惡劣辦理洋務貽患甚深內閣學士聯元召見時任意妄奏語涉離間與許景澄等厥罪惟均已革戶部尙書立山平日語多曖昧動輒離間該大臣受恩深重尤爲喪盡天良若不嚴行懲辦何以整飭朝綱徐用儀聯元立山均著卽行正法以昭炯戒是日遂棄市及乘輿西狩懲治首禍王大臣十二月詔曰本年五月間拳匪倡亂勢日鴟張朝廷以剿撫兩難迭次召見臣工以期折衷一是乃兵部尙書徐用儀經朕一再垂詢詞意均涉兩可首禍諸臣遂乘機誣陷交章參劾以致身罹重辟惟念徐用儀宣力有年平日辦理交涉事件亦能和衷尙著勞勩應卽加恩徐用儀立山許景澄聯元袁昶均著開復原官二十七年又詔錄用子嗣當用儀歸櫬南下時時人以其與吏部侍郎許景澄太常寺卿袁昶皆浙人稱爲三忠浙人奏建三忠祠於西湖列入祀典用儀居官廉儉承其先志做范氏贍族遺法捐田一千五百餘畝立

爲義莊事聞賜御書推恩睦族匾額其爲太常寺少卿時上整頓園法疏略云泉貨之流通關繫閭閻之用當十大錢但行京城已屬權宜之計比來匪徒盜銷官錢改鑄私錢形質薄小市肆謂之沙板近者疊奉諭旨嚴拏私鑄人犯官司果能實力奉行此風自可漸戢沙板私錢市肆亦已不行故銀價頓然平減而物價則昂貴如故揆厥所由蓋市井之徒竊計私錢終難禁絕不久仍將行用銀價貴賤尙難定局是以不肯落價耳恭查乾隆三十四年六月間欽奉上諭前因浙江等省攙用儂薄小錢傳諭各督撫實力查禁在小民彼此交易錢文原難一一加之搜剔其錢行鋪戶乃錢所滙集之處理應設法查辦若將所有小錢竟行勒令交官致伊等資本有虧轉恐利計錐刀之徒巧於藏匿如照小錢分量折衷定價按數收買其法最爲兩便嗣後凡給價交官之錢在省城現有鑄局者莫若卽令交到之時立即令其入爐鎔化等因欽此嗣經兩江總督高晉奏稱收買小錢改鑄制錢卽抵收買價值又因支發收買錢價一時鼓鑄不及以應發銅本銀兩發給易錢以爲收買錢本並稱廢錢質薄渣多以正卯銅鉛點錫均勻配鑄除去折耗較之專用洋銅及兼辦滇銅但有節省等語今市肆私錢既不行使鋪戶存積又

不敢私燬且恐留之民間逐漸又復攙用莫若官爲收買鼓鑄查咸豐同治年間戶工兩局需用銅本係就地採辦此時收買私錢可照廢銅斤兩酌中定價曉諭商民無論多少准其運送到局按斤給價嚴禁書吏抑勒卽以官局現存鑄就之錢作爲收買價值不足則由戶部發銀易錢以爲收買之本仍於各省應撥銅本項下提還部庫所收銅斤卽行加卯鼓鑄官錢以資周轉較之採買滇銅運費既省而民間得獲銅價亦不致大虧資本私錢卽經鎔銷錢法可期整頓物價亦必自平應請敕下戶部及錢法堂通盤籌計妥議章程辦理奉旨議行光緒十年詔中外大僚保薦人才用儀時官工部侍郎薦舉浙江候補知府陳璠直隸候補知府陳慶滋順天涿州知州查光泰奉旨俱著送部引見宣統元年三月奉上諭朕恭讀光緒二十六年二十七年迭奉諭旨特將誣陷被罪之前戶部尙書立山兵部尙書徐用儀吏部左侍郎許景澄內閣學士聯元太常寺卿袁昶開復原官並錄用子嗣仰見我德宗景皇帝秉承我孝欽顯皇后慈恩垂訓一秉至公念該故員等心存君國忠蹇可矜允宜再沛恩施嘉名特錫立山徐用儀許景澄聯元袁昶均著加恩予諡用示朕推廣慈仁之至意尋賜諡忠愍八月又准於海鹽本籍

建立專祠

邊寶泉

邊寶泉漢軍鑲紅旗人同治二年進士改翰林院庶吉士四年散館授職編修五年大考四等六年充順天鄉試同考官七年十一月命記名御史十年三月充會試同考官十一年二月授浙江道監察御史七月上禁言祥瑞奏云竊惟貢諛獻媚端必有所由開而杜漸防微機貴嚴於先見祥瑞之說盛世不言卽豐年爲瑞一語亦謂年穀順成民安其業以是爲瑞焉耳未聞有水旱頻仍民生凋敝之餘而猶復陳嘉祥談瑞應者也自漢迄唐臣下競言祥瑞其始倡之者一二人其弊至於一草一木爭獻無已侈逸上心愚惑天下莫此爲甚臣恭閱邸鈔大學士直隸總督李鴻章奏清苑縣暨廣平府等屬呈報麥秀兩歧並進呈麥樣以爲靈異中外傳述物議紛紛考之宋太祖乾德四年澶州濮陽縣麥秀兩歧者四十畝徽宗政和二年蔡州麥一莖兩歧至七八歧近約十餘畝遠或連野一代如此他代更不可枚舉臣少居鄉里每見麥非甚歉雙歧往往有之推原其故或地力有餘或得氣偏厚皆足以致之物理之常何異之有卽以瑞應言之漢章帝時大臣以

嘉穀芝草諸瑞改元章和當時何做據經義而折宋由袁安由安懼不敢答至元馬端臨纂文獻通考乃舉歷代祥瑞統謂之物異夫祥且謂之異今以恆有無異之物而以爲祥可乎上年直隸水災之大爲數十年所未有畿輔東南幾成澤國至不獲已而集捐外省發粟京倉議賑議蠲勤勞宸慮迄今田廬沒於水中者所在多有就令今年二麥豐收猶不足補上年之歉況收成多者不過五六分近聞永定河甫經歲工北岸又行潰決順天南路州縣暨保定天津各屬各河亦多漫溢秋稼並傷間有被蝗之處雙歧之祥抑又何取大抵逢迎諛詔乃庸劣州縣之故習遇事揣摩希圖見好上官而紳衿之無行者因而藉端貢媚撫拾微物妄事揄揚弊實由此現值邊省軍務未竣民困未蘇該督臣身膺重寄名望素隆當敬體皇太后皇上宵旰之憂勤效何做之公忠懲宋由袁安之導媚如果地方收成豐稔屆時奏報卽所以仰慰宸廑而於此等庸劣官紳宜明曉以物理之常不足爲異以絕其迎合之私豈可侈爲嘉祥據以入告原摺亦稱豈矜瑞應明知之而故蹈之抑又何與至於漁陽舊事乃其時民殷物阜百姓樂張堪之爲政而歌之直隸災患頻仍小民流離可憫乃竟飾爲瑞應上瀆宸聽而又援據古人以爲比

例陽爲歸美於朝廷陰實自譽其政績竊恐此端一開地方官相率效尤務爲粉飾流弊有不可勝言者查同治元年殿廷考試翰林院庶吉士嚴辰曲意頌揚當奉旨嚴飭中外同欽夫嚴辰草茅一新進耳且明降諭旨以戒將來況督撫大吏倡言祥瑞於治道人心關繫尤鉅相應請旨訓飭庶各省有所儆惕不致長浮夸而荒實政天下幸甚是時李鴻章又有永定河合龍請獎工員勞績之奏奏上而河復決寶泉奏言永定河甫經葺工旋即潰決被災處所又復不少若仍優予獎敘恐不足以服衆論且無以示勸將來可否請旨飭查並將該督臣此次保案撤銷之處出自聖裁諭曰國家愛養黎元惟期年穀順成從不侈言符瑞李鴻章前以麥秀兩歧入奏雖不至意存粉飾第恐各該地方官藉此導諛貢媚殊於吏治民風大有關係嗣後各該督撫務當勤恤民隱於水旱情形隨時察查力求補救不得率以瑞應嘉祥鋪張入告用副朝廷痼瘵在抱之意近聞永定河北岸隄工潰決順天南路及保定天津所屬州縣均有水患兼有被蝗之處著李鴻章迅速查明永定河決口及各州縣被災情形究竟若何據實具奏前據李鴻章奏保永定河合龍出力人員摺內聲稱全河兩岸隄埝均已培補堅厚何以復又潰決在

工各員所司何事著李鴻章查明參奏並著該部將此次保案卽行撤銷十月奉旨記名以繁缺知府用十二月擢戶科給事中十二年八月充順天鄉試同考官十三年正月疏劾江西巡撫劉坤一先是左都御史胡家玉疏陳江西丁漕諸弊下坤一查覆坤一因奏言胡家玉有欠糧未完私致信函事寶泉奏言劉坤一久任江西漕糧情弊本所悉知於胡家玉累次未完之款豈竟漫無覺察何以事歷多年概置不問直至互相抵牾始行糾參至謂該撫自抵任後接胡家玉干預原籍諸事之信不一而足又何以不立時奏陳是劉坤一之用心專務營私利己此次參劾胡家玉全爲藉端報復箝制人口並非爲國家正供朝廷法紀起見向使胡家玉無加耗浮收之奏卽有罪甚於此者該撫亦必隱忍不言可知且劉坤一果能廉潔率屬自能仰邀聖明洞鑒今乃妄自誇耀於君父之前竊恐此端一開相率效尤更啟天下輕量朝廷之漸相應請旨懲劉坤一以欺罔攻訐之罪以肅紀綱而戒將來疏入得旨責坤一下部議處光緒元年浙江餘杭縣民婦葛畢氏殺其夫誣指舉人楊乃武因奸同謀定讞論死欽派浙江學政胡瑞瀾覆訊與原讞同十月寶泉奏言此案傳聞異辭已非一日外間議論僉謂胡瑞瀾與撫臣楊

昌濬平日相好其辦理此案外示嚴厲中存偏袒於案中緊要關鍵並未虛公研訊勢必仍照原定罪名擬結今胡瑞瀾所奏果與前次傳聞無異是物議必非無因近來外省已經辦成之案雖經京控而發交原省查辦平反者百不得一久已相習成風且胡瑞瀾以學政辦理同省重案所派承審之人不過府州縣官與欽派大臣隨帶司員者不同外吏之升沈操之督撫仰承意旨視爲故常一旦特發公論以疑難大案引爲己責而致親臨上司干失入之重咎雖愚者不肯爲此而胡瑞瀾素本文臣從未辦理刑名事件其受人牽制不能平反本在意計之中伏思朝廷慎重人命凡關罪名出入不憚再四研求可否特降諭旨將全案人證卷宗提交刑部詳細研訊如胡瑞瀾所奏果是不過稽遲楊乃武數月之死而既經刑部覆審自足以伸國法而破羣疑倘有不實不盡之處立與平反庶嗣後各省承辦重案不敢再蹈瞻徇迴護之習於吏治民生均有裨益後二年竟如寶泉議案由刑部提訊得實出楊乃武於死楊昌濬胡瑞瀾皆得罪二年六月充江南鄉試副考官三年二月俸滿截取記名以繁缺道員用三月充會試內簾監試官六月授陝西督糧道五年閏三月擢陝西按察使七月署布政使六年正月補江西

布政使是時俄爭我伊犁議約未定東三省將設防翰林院編修壽豐奏言寶泉樸誠諳練可任吉林等省將軍以資鎮撫九年十月陞陝西巡撫十年正月陞見四月到官陝西糧故以本色收放戶部尙書閻敬銘議改收折色寶泉奏陳不可略言收放本色久矣誠不能無弊然止宜除其積弊不得因噎廢食且穀數有定而穀價無定今改折色所收必議減民始樂從所放必加多兵始足用入不敷出一時強爲彌補久之將何所取償且丁丑大饑終賴道倉多所全活是其已事今並此而無之恐饑饉洊臻益無可恃上韙其議命依舊例行焉十月以籌解西征協餉賞頭品頂戴十二年二月調河南巡撫十三年因病請開缺不許五月疏再上允之十月以前在任時洛陽縣知縣王道隆濫刑斃命未卽行參奏下部察議二十年十月起授閩浙總督二十一年三月莅任閩鹽欠課積至七八十萬歷任報部皆資挪掩寶泉盡發其覆有停釐補課之奏八月兼署福州將軍船政舊設大臣後以總督兼轄寶泉特疏請復故且條上造船購料延教習籌經費四事御史陳璧奏劾山東布政使張國正任福建按察使時事寶泉被命確查十一月覆奏言事皆不實報聞二十三年又遵旨查布政使黃毓恩參案六月覆奏言毓恩

馭下太寬於門丁婪索毫無鈐束請下部議處從之二十四年三月奏言閩省制錢缺乏試鑄銀圓發商行用遵照部咨鑿用福建省造字樣並嚴禁私鑄以維圓法所有本銀及匠工局用由承辦局員在籍浙江候補知府孫葆璋自行籌給報聞福建參將廉凱爲給事中張仲炘所劾下寶泉查辦六月覆奏言廉凱任聽家丁革兵需索科派又剋扣伙夫餉銀撥作別用雖未入己究屬任性妄爲應請革職從之寶泉又自請議處上加恩寬免焉九月卒遺疏入諭曰閩浙總督邊寶泉清正持躬老成練達由編修御史洊擢封圻自簡授閩浙總督以來正躬率屬勤政愛民任事實心克盡厥職前因患病奏請開缺迭經賞假調理方冀醫治就痊長資倚畀茲聞溘逝軫惜殊深邊寶泉著加恩追贈太子少保銜照總督例賜卹任內一切處分悉予開復應得卹典該衙門察例具奏靈柩回旗時沿途地方官妥爲照料伊子怡棠怡桐均著俟及歲時由該旗帶領引見用示篤念盡臣至意尋賜祭葬予諡□□子怡棠怡桐

余聯沅

余聯沅湖北孝感人同治七年由內閣中書充軍機章京光緒二年校勘方略陞

侍讀三年以一甲第二名進士授編修充國史館協修七年前在軍機處校勘列聖聖訓敘績賞五品銜十年充功臣館纂修十四年補河南道監察御史充順天鄉試同考官十五年正月恭遇皇太后歸政特恩奉懿旨賞隨帶一級二月充會典館協修六月稽察南新倉事務聯沅奏陳宗人府起居注主事升途沈滯請飭部設法變通得旨下部議行嗣復疏陳各部堂官日久玩生有不常川進署者或數月而一至或一年而數至於公事必多隔閡職守未免叢脞殊非慎重部務之道請旨申明舊章嚴切訓飭另片陳科場槍冒舞弊請旨敕下部臣於科場年分申明舊例嚴定章程或於入場時實力稽察毋許冒混或於歸號時卽行封鎖毋使撓越並令監臨試官認真防範毋博寬厚之名而存姑息之見務期除積弊而拔真才疏入上均從之時湖北大水聯沅復奏請飭開倉發賑得旨如所請聯沅又以錢糧蠲緩州縣積弊相沿請飭各督撫認真稽查剴切曉諭允之十六年充會試同考官六月御史歷俸期滿詔記名以繁缺知府用七月直隸河決聯沅以近畿災重辦賑銀米不敷亟請再撥庫款並發給粳秈米石變通賑捐章程購辦南米運京奉諭下部議行九月轉掌四川道監察御史兼巡視東城事務十二月

京察一等十八年充會典館纂修巡視北城時俄羅斯侵占新疆西境帕米爾聯
沅疏請嚴固東三省邊防略謂俄人經營西伯利亞海參崴鐵路知其發難必在
東三省不獨陵寢重地且屏蔽京師爲全國存亡所繫籌餉增兵保東三省卽以
存中國屢疏力爭嗣又劾山西巡撫阿克達春在安徽布政使任內劣蹟昭著列
款糾參十九年三月擢禮科給事中七月俸滿截取有旨記名以繁缺道員用十
二月京察一等二十年五月轉吏科給事中劾署寶坻縣知縣張肇鏞性情狡猾
玩視民瘼並稱寶坻被災甚重請飭妥籌春賑設法宣洩涵洞上從之時中日失
和聯沅密陳請以南洋海軍襲日本之不備九月署山西道事務二十一年充會
試磨勘官九月巡視北城十月補福建鹽法道二十四年署福建按察使二十五
年四月署福建布政使閩江上游有灘曰關刀嘴湍駛漩險商船患之土人惑於
風水不敢治聯沅委員督工鑿碎之川平陸夷行旅稱便日本議闢租界於廈門
民情不靖聯沅極力調劑卒弭隱患五月調江蘇蘇松太兵備道七月以淮徐海
賑捐案獎敘賞戴花翎十二月以福建辦理洋務出力賞二品頂戴時北方義和
拳變起上海兵艦麤集華洋商民震動亂氓乘間思逞聯沅捐廉募勇嚴密巡防

復隨同兩江總督劉坤一與各國領事議約互保爰成保障東南各省轉危爲安
二十六年八月遷江西按察使九月擢湖南布政使聯沅輸鉅款助賑陝西有旨
嘉獎賞給頭品頂戴十二月命署理浙江巡撫適浙省教案糾纏索償巨萬意大
利兵船復乘和局未定游弋三門灣象山港等處意存窺伺聯沅力主鎮靜卒平
大患辦理衢州教案廉得良民被誣情實多從省釋二十七年四月詔回湖南布
政使任八月以疾亟奏請開缺上如所請十一月卒兩江總督劉坤一以聞疏言
據蘇浙紳士三品銜候補四品京堂龐元濟等二十六員聯名稟稱該前署撫余
聯沅歷署福建按察使布政使皆有政聲迨調蘇松太道善政尤多其最著者光
緒二十六年夏間北方拳匪肇釁全局震驚上海爲通商總埠各國戰艦洋兵雲
集謠誣紛起防務戒嚴寓滬紳商日謀避地惶懼萬分兼之外來游匪勾結土棍
時思乘亂起事內奸外侮勢將一發燎原安危之機間不容髮該前署撫多方戒
備嚴密巡防復奉委與各國領事定議互保東南各省得以安全關繫大局實非
淺鮮一面捐廉募勇晝夜分巡外保教堂內靖游匪迨至皖鄂票匪逋逃上海租
界出沒靡常則又多方設法擒治巨魁無稍枉縱卒使上海安堵如常從容接濟

西北方事之殷該前署撫日則奔走於炎風烈日之中夜則自治官書每接警電輒憂憤涕泣或數夕不寢或一夕數興自夏徂秋迄無寧晷旋署理浙江巡撫先將全省教案議結各領事主教鑒其公忠故償卹銀兩視各省爲少並於衢州教案內省釋無辜株累者數十人嚴飭各屬整飭緝務拏獲台州巨匪吳王葵訊明懲辦浙東盜風藉以稍息其在道任捐廉銀八千兩爲龍門書院經費嘉惠士林在浙創辦各屬義塚先後捐秦晉賑爲數巨萬又捐印度賑救濟會皆勿稍吝惜生平儉以自處而勇於爲善大致如此至該前署撫爲御史時首劾康祖詒卽康有爲非聖無法心術不正尤爲獨有先見善於辨奸紳等惑循遺愛未忍沒其勞勩公懇奏卹准予上海地方捐建專祠生平政績宣付史館立傳以彰忠蓋等情稟請具奏前來臣查該前署撫臣余聯沅沈毅明決忠愛性成旣據該紳等臚陳政績合詞籲請奏卹未敢壅於上聞疏入得旨著照巡撫例賜卹並准其捐建專祠旋賜卹如例

孫毓汶

孫毓汶山東濟寧直隸州人父瑞珍官戶部尙書毓汶由舉人考取內閣中書咸

豐六年登一甲二名進士授翰林院編修六月充實錄館協修官恭修宣宗成皇帝實錄全書告成議敘以應陞之缺開列八年丁父憂推恩賞侍讀銜十年以在籍辦團被劾奉旨革職遣戍同治元年開復原官二年五月充實錄館纂修官旋充幫總纂官三年充順天鄉試同考官文宗顯皇帝實錄全書過半奉旨遇缺題奏四年二月充辦事翰林官十月擢詹事府司經局洗馬十二月充文淵閣校理五年四月大考翰詹毓汶列名第一以翰林院侍講學士陞用旋補侍講學士八月充日講起居注官十二月恭修文宗顯皇帝實錄全書告成復得旨遇缺題奏並賞加三品銜六年充四川正考官八年充武英殿纂修官九年十一月提督福建學政十二月轉侍讀學士光緒元年丁母憂三年二月服闋充實錄館總校官九月以恭修穆宗毅皇帝實錄全書過半有旨著俟陞任後以應陞之缺開列在前四年補侍讀學士五年三月擢詹事府詹事四月稽察右翼宗學提督安徽學政八月擢內閣學士兼禮部侍郎銜七年授工部右侍郎兼管錢法堂事務八年署倉場侍郎充經筵講官九年轉左侍郎十年正月兼署刑部左侍郎湖北鄖縣廩生余瓊與縣吏鬪毆致死案久懸不決上命毓汶往廉之毓汶與侍郎烏拉布

輾轉推求卒成信讞三月命在軍機大臣上學習行走十一年六月充總理各國事務大臣旋補軍機大臣十月賜紫禁城騎馬十二月賞穿帶素貂褂十二年三月賞穿黃馬褂充會試副考官十四年五月賞戴花翎七月調吏部右侍郎十二月充方略館總裁十五年正月擢刑部尙書恭遇上大婚禮成暨皇太后歸政賞御書經德秉哲匾額並下部優敘懿旨特賞加太子少保銜八月兼署戶部尙書十六年三月充會試正考官十一月充管理八旗官學大臣十七年八月兼署兵部尙書十一月賜西苑門內騎馬充會典館副總裁十九年正月命恭辦皇太后六旬萬壽慶典八月充順天鄉試副考官十二月調兵部尙書二十年懿旨賞戴雙眼花翎並賞用紫纒八月兼署都察院左都御史迭次京察優敘二十一年閏五月以病乞開缺溫旨慰留六月再申前請許之二十五年卒遺疏入諭曰前兵部尙書孫毓汶恭勤恪慎練達老成由咸豐年間翰林屢掌文衡洊陞卿貳朕御極後命在軍機大臣上行走並總理各國事務補授兵部尙書加太子少保銜夙夜靖共克盡厥職前因患病准其開缺茲聞溘逝軫惜殊深著賞給陀羅經被派鎮國公載澤帶領侍衛十員前往奠醊照尙書例賜卹任內一切處分悉予開復

應得卹典該衙門察例具奏伊子戶部員外郎孫樅著俟服闋後以本部郎中遇缺卽補伊孫一品廕生孫肇煌著賞給員外郎俟及歲時分部學習行走其靈柩回籍時著沿途地方官妥爲照料用示篤念蓋臣至意尋賜祭葬予諡文恪

馮子材

馮子材廣東欽州直隸州人初聚徒於博白縣嗣歸順由歸善勇目從提督向榮征賊咸豐元年補高州鎮標外委嗣以征剿有功先後奏保至守備賞戴藍翎賞換花翎補都司又以攻克縣城賞給色爾固榜巴圖魯名號時賊據江北勢方張子材屢攻克縣城積功保至總兵加提督銜同治元年正月授廣西提督自是歲時拜賜先後得賞御書福字荷包諸物十一次先是咸豐十年閏三月江南大營潰賊以全力陷蘇常官軍僅保上海一隅江蘇全省淪沒金陵無圍師二年子材以三千人堅守鎮江賊來攻輒開城出戰軍士無不一當百卒能保全孤城三年四月金陵圍合蘇軍又克常州子材攻克丹陽以應之朝廷以守鎮江功又聞克復丹陽之捷賞穿黃馬褂六月賞給騎都尉世職旋因江南軍務大定請假三箇月回籍修墓諭以假滿卽赴新任蓋子材自咸豐初年從向榮剿賊補授諸職均

未一履其地也四年假滿赴粵督辦東江軍務尋改辦羅定信宜軍務一月之內平加益排埠賊巢生擒賊首王狂七獨角牛李如孃等正法信羅肅清交部優敘六年黔苗不靖請親往調度攻克全茗感墟等處七年南太鎮安三郡平九年攻克安邊河陽剿滅梁匪餘黨夷境一律平定凱撤入關廣西巡撫以蕩平吳逆越南各省肅清奏聞奉旨交部從優議敘尋奉旨再賞一雲騎尉世職十二年進剿南丹土豪莫雲義股匪光緒元年正月賞御書福字及大小荷包銀錢銀鏢食物嗣是歲時拜德宗賞御書福字荷包諸物十八次御書福字荷包諸物一次以修本生母墓賞假一月十一月至貴州提督任二年十一月賞剿平粵匪方略捻匪方略各一部三年任滿奉旨暫緩交卸俟馬平善後事竣再行來京陸見四年因剿辦越南土匪命帶兵出關相機督剿旋以越南餘匪由該國自己剿辦遂詔班師五年正月陸見奉旨與廣西巡撫會辦邊防事宜十月以關外官軍搜擒首逆出力員弁准予獎勵交部從優議敘給予軍功加三級七年回廣西提督本任八年因病請假嗣請開缺溫詔慰留三請始准開缺十年十月廣西關外事急命馮子材王孝祺分統出關助剿十一年正月命幫辦廣西關外軍務先是法人爭越

南與中國肇釁廣西巡撫徐延旭調兵防邊敗於越南潘鼎新代之又挫於諒山至是子材暨總兵王孝祺軍來援先後抵龍州孝祺軍甫出關而諒山防兵已潰子材親率一營先至南關廣西巡撫令統十營回駐關外東路及聞警復西援法兵已入鎮南關統將楊玉科戰歿總兵董履高受重傷諸軍多潰法兵焚關進翌日子材至南關建議於關內十里之關前隘跨東西兩嶺間督所部築長牆三里餘外掘深塹爲扼守計營於半嶺令王孝祺軍屯於後半里爲掎角當是時蘇元春陳嘉軍屯幕府在關前隘後五里蔣宗漢方友掎軍屯憑祥在幕府後三十里潘鼎新軍屯海村在幕府後六十里魏綱軍屯艾瓦防芄封在關西百里王德榜軍屯油隘防入關旁路在關東三十里獨子材一軍當中路前敵得越南人密報法兵將出扣波襲芄封攻牧馬繞出南關以北欲斷唐景崧馬盛治兩軍歸路子材遣五營扼扣波以待法兵至突出奮擊獲其馱軍火大象一擒匪黨二法兵敗退復來爭再擊卻之乃率王孝祺軍出關襲破其二壘法兵多死敗走法人旣敗悉起諒山之衆并力入關直撲關前隘長橋子材告諸將曰法兵再入關有何面目見粵民諸將皆憤甚誓與俱死法軍以開花礮隊循東西兩嶺進以槍隊撲中

路又以越南人皆馮軍內應自以眞法兵居前黑兵次之越南散匪又次之礮聲遠聞七八十里山谷皆鳴槍彈積陳前厚者至寸許我軍死戰傷亡殊多王孝祺自率小隊攻東嶺敵稍卻蘇元春援軍至合力拒戰諸軍傳餐夜未收隊王德榜自油隘出軍夾擊法糧械盡奪之法兵來益衆礮益密子材拒中路蘇元春助之王孝祺當右陳嘉蔣宗漢當左左路卽東嶺法軍礮最猛子材與諸統領約有退者立誅之復於各路設卡截殺逃者子材與王孝祺各刃退卒數十人敵勢狂悍致死已薄長牆或已越牆而入子材年近七十矣短衣草履持矛大呼躍出長牆率二子相榮相華搏戰諸軍見子材如此無不感奮關外遊勇客民千餘聞子材親出陣皆來助戰王孝祺部將潘瀛率壯士袒臂入敵陣蔣宗漢陳嘉爭東嶺嘉受傷不退王孝祺奪西嶺鈔敵後與陳嘉等合擊而王德榜擊法援兵於甫谷亦自關外夾擊東嶺於是法兵鏖戰兩日彈礮已盡後隊軍火又被截惶懼無措遂大奔我軍陣斬三畫二畫一畫數十級一畫二畫者各隊之頭目也乘勝追殺法兵翻巖越澗而竄有王子在兵隊中習戰亦逃死旬日後樵人入山見深谷中餓死法人數十是役殺眞法兵千餘法酋數十客匪教匪數百追至關外二十餘里

而還子材以法被大創遂益兵攻諒山城及對河之驅鹽墟墟有王德榜所築壘甚固諸軍攻之王德榜王孝祺攻尤力士卒多傷孝祺部將潘瀛先登衆從之遂奪其壘子材督軍進乘勝克復諒山賊悉衆遁分軍追之山谷中搜獲法兵甚多皆斬之陳嘉王德榜追賊至谷松復有斬獲擒三畫一子材前軍麥鳳標追賊至觀音橋並復長慶府生擒五畫一斬一畫一進軍拉木以攻郎甲王孝祺進軍貴門關子材定議偕孝祺軍進規北寧越南義民間風響應越南官黃廷經糾北寧等處義民立忠義五大團建馮軍旗號自願具漿飯作響導隨軍助剿或分道進攻李楊材之弟在北寧城內與子材約俟郎甲破卽內應子材遣人招河內客匪教民許以官賞皆受命將親率全軍攻郎甲分兵襲北寧而法人請和停戰撤兵之旨到乃止子材三次出關討平越亂恩威並著越南軍民聞子材至若得慈父母凡關外越人受法匪遊勇之害者關內民人受各軍騷擾之害者咸來赴訴子材亦視若子弟惻然矜憫爲之撫卹示禁告戒諸軍越官越民爭爲耳目敵人舉動悉來報知近自北寧遠至西貢皆通消息馮軍出關後扶老攜幼來相犒問願助官軍剿除法入長爲天朝赤子子材亦毅然自任致書兩廣總督張

之洞督辦廣東軍務彭玉麟請奏謂若假以事權期一年肅清全越西人自入中國以來未有如此次法人之大敗者和議成以敍克復諒山功賞白玉翎管班指荷包諸物且有馮子材老於兵事夙著勳勤之諭三月諸軍先後入關子材還龍州軍民拜迎者三十里四月奉旨督辦欽廉一帶防務並會辦廣西邊防屢獲大勝賞給太子少保銜並由騎都尉世職改爲三等輕車都尉世職十二年在欽州防次擒斬王清黃清諸匪首五月補授雲南提督以積受瘴溼未能遠赴奏請收回成命奉旨仍著暫留廣東督辦欽廉防務毋庸開缺十六年德宗二旬萬壽交部從優議敘二十年孝欽顯皇后六旬萬壽賞加尙書銜是年日本以朝鮮之故與我構兵奉旨現在倭人構釁北路防務緊要馮子材夙著戰功現在駐防欽州能否帶隊北上著李瀚章與該提督妥商覆奏尋奉旨毋庸北上恭逢加上皇太后徽號照現任品級加一級蔭一子入監讀書屢乞骸骨不許尋赴雲南提督任二十五年命統領雲南全省各防營二十六年正月德宗三旬萬壽賞給御書匾額蟒袍諸物六月拳匪肇釁奉命著統帶數營迅速來京以備調遣二十七年調補貴州提督乞假回籍修墓尋允開缺二十九年廣西土匪勢熾命爲會辦廣西

軍務大臣甫募練成軍將率以進七月卒兩廣總督岑春煊奏聞奉旨照提督軍營病故例從優議卹加恩予諡原籍及立功省分准其建立專祠尋賜祭葬予諡勇毅長孫一品廕生馮承祥以郎中分部補用

吳育仁

吳育仁安徽合肥人同治元年投效華字營帶隊隨克常熟昭文以千總拔補二年移防吳江敗賊同里八拆等處進克浙江平望賊營復嘉善奉旨以都司儘先補用並賞戴藍翎三年二月官軍克嘉興先登被創隨守溧陽擊破南渡竄賊又隨守長興迭克觀音橋午山橋林城橋沿途賊卡破泗安鎮賊營殲湖州竄逆得旨以遊擊儘先補用四年六月江蘇巡撫李鴻章檄育仁赴廬州募華字後營卽留防府城旋以前克嘉興功得旨以參將留於兩江補用並賞加副將銜再以克泗安鎮敘績得旨以副將留於兩江儘先補用並賞換花翎六年捻首賴汝洸爲官軍敗於壽光南竄蘇境由清淮走高郵寶應至揚州東北灣頭瓦窰一帶育仁出隊迎擊破之槐子灣其叔道員吳毓蘭禽汝洸餘匪殲焉詔以總兵記名請旨簡放尋調赴天津光緒元年充通永鎮練軍翼長籌辦海防事宜二年兼署北塘

營遊擊四年兼帶練軍右軍六年接統義勝營九年署通永鎮總兵兼統防軍各營十年授通永鎮總兵十五年抵任接統淮練馬步等營十六年上謁東陵育仁迎駕烟郊奉旨加一級兩濬寶坻縣青龍灣減河分洩盛漲保衛農田歷保加級紀錄十七年熱河土匪滋事育仁會師剿辦平之詔以提督記名簡放並賞施勇巴圖魯名號二十一年調正定鎮總兵正定多盜育仁派隊偵緝先後獲盜百餘名境內肅清二十四年卒大學士直隸總督榮祿疏言育仁早歲從戎轉戰數省攻克城壘甚多揚州灣頭等處之戰截賊南竄保全裏下河一帶數百里完善之區厥功尤偉在通永正定各鎮任內先後十有餘年號令嚴明操防整肅兵民懷畏隱然有古名將風遽以積勞觸發舊傷一病不起殊堪痛惜仰懇天恩准將吳育仁照軍營立功後積勞病故例從優議卹並將生前戰功事蹟宣付國史館立傳以昭蓋績詔如所請尋賜卹如例

羅榮光

羅榮光湖南乾州廳人咸豐初年由武童投效侍郎曾國藩軍營駐安徽宿松十年髮賊犯小池驛榮光由新倉助剿勝之十一年正月賊由羊棧嶺竄夥縣榮光

會老湘營擊之立復縣城敘功授把總賞戴藍翎同治元年四月榮光隨副將華爾攻克嘉定進攻青浦踞逆榮光擁矛先登華爾督勇繼入克之進攻奉賢南漚交界之南橋鎮賊壘及柘林賊壘所至蹋破南漚踞賊僞什天安吳建瀛等薙髮乞降遂復其城明日僞將吉慶元率金山川沙賊黨來犯榮光率隊出城奮擊賊敗走遂復川沙廳城乘勢將僞忠王李秀成養子所踞之金山衛城克復上其功補江寧城守左營守備換戴花翎二年正月賊圍常昭榮光同洋將戈登率常勝軍攻福山賊壘圍常昭賊分股來援降將駱國忠出城夾擊大破之遂解常昭城圍乘勝毀太倉南門賊卡越濠擁入遂復太倉州城進攻崑山新陽克之尋克楊金汛城時江陰界之顧山及無錫城外賊營甚多我軍三路進剿攻破南漚麥市橋等處賊卡百餘座榮光與戰三日一夜幾瀕於危卒能成功江蘇巡撫李鴻章率水陸十三營進攻同里鎮花涇港夾埔賊巢榮光槍礮攢擊斃賊甚多吳江震澤二縣踞賊出降因復其城先以克復嘉定解北新涇圍擊四江口賊功擢都司加遊擊銜至是擢參將三年四月李鴻章督總兵劉銘傳楊鼎勳提督劉士奇郭松林各軍攻常州府城踞匪榮光奮勇登陴手刃悍賊數人大軍併力殺入生擒

偽護王陳坤書立將府城克復敘功陞副將賞給果勇巴圖魯名號授江南狼山鎮標右營遊擊李鴻章命督帶開花礮隊嗣於蘇軍分援浙皖閩三省疊克湖州長興廣德漳州漳浦各府州縣城及晟舍四安等鎮五年八月奉上諭羅榮光著以總兵記名簡放六年東捻之竄運東者命榮光與東豫各軍分兵截擊合力兜剿所在有功而分竄海沅邳宿諸境各賊均爲榮光所敗賊因竄集贛榆李鴻章命榮光協擊賴逆汝洸爲杭州副都統善慶槍斃餘黨窮奔就滅東股捻匪之得肅清者榮光之力居多七年西股捻匪張總愚逆氛甚熾分路北竄被剿回向滑濬東北疾駛勢殊死鬪榮光力戰幾不免李鴻章移駐臨清籌困賊於黃北運東調各軍臨河而壘榮光之營正當賊衝相持凡三閱月賊困不得出乃降會大雨東光南皮濟陽武定各境黃運交溢賊陷泥淖死者甚衆餘衆圖犯西南防運各軍擊之賊復竄東北榮光率隊躡剿賊勢大蹙張總愚自沈於河西捻亦一律肅清捷聞八月奉上諭羅榮光以提督交軍機處記名遇有缺出請旨簡散九年四月賞給頭品頂戴嗣回防金陵八年三月調防武昌九年三月改防西安七月移駐直隸天津十一月署大沽協副將十二月奉上諭直隸大沽協副將著羅榮光

補授十一年正月丁母憂李鴻章奏留署任服闋仍准實授光緒七年李鴻章命榮光在大沽口創設水雷營選各營弁兵學習兼教化電測量諸學嗣北塘山海關相繼仿設均於沽營取員教課十二月總理海軍事務醇親王校閱北洋水陸諸軍以羅榮光操練得力請加一級紀錄二次十四年十一月授天津鎮總兵二十一年春賜御書福字暨小卷巴絲緞二件二十六年三月陞授甘肅新疆喀什噶爾提督尙未赴任拳匪亂起聯軍入大沽榮光與戰二十餘晝夜城孤援絕焦勞憂憤六月卒於軍榮光歿甫三日而天津陷於聯軍矣時年六十七歲子二廷玉江蘇候補道廷璋補用都司孫勝暉縣丞嗣兄之子勝昶度支部員外郎

許景澄

許景澄浙江嘉興人同治七年進士改翰林院庶吉士十年散館授編修光緒元年大考三等八月充順天鄉試同考官三年記名以御史用五年充四川鄉試副考官六年詔以侍講陞用並加二品頂戴充出使日本國大臣旋丁父艱九年服闋補侍講越南事起景澄疏陳法人謀窺北圻三省戰事將成非嚴防不足以阻敵謀非持久不足以收戰效日前籌備事宜一重臺灣之防拒敵所必爭一策越

師進攻越南分界一節爲肇釁之波瀾亦終爲歸束之樞紐一慎購洋槍專選軍鋒演習以成勁旅一選派弁勇赴德國習鐵艦駕駛一審戰例以安各國免激他變一籌預借洋款決裂以後各國守局外之約借款卽有不便一緩練廣東水師注重陸軍省出餘款備撥關外各營月餼疏入上嘉納焉旋充文淵閣校理十年充出使法國德國並義和奧五國大臣十一年兼充出使比利時國大臣時國家創興海軍前使者於德國訂購鐵甲船穹甲快船皆未就景澄接管勘驗事宜鈎稽船制利弊謂增購一艦勝於舊制者十五遂輯外國師船表呈進上疏略言大沽口宜設鐵甲礮船膠州灣宜爲海軍屯埠十三年轉侍講旋丁母憂十六年服闋充出使俄國德國奧國和國大臣十七年擢太僕寺少卿轉通政司副使十八年授光祿寺卿十九年補內閣學士兼禮部侍郎銜先是俄兵遊獵每涉我國所屬帕米爾之界景澄爭之俄外部始已又議定界堅執舊議以烏什別里山爲界從此而南屬中國從此而西南屬俄國俄人則欲以薩雷闊勒爲界相持三載俄外部乃爲調停之說帕米耳界未定以前兩國各不得進兵以保和好二十一年授工部右侍郎先是我與日本開戰及事定而俄德法三國出而與謀使日人歸

遼東於我景澄疏言俄懷自便之心德挾責報之意交涉日繁勢難兼顧似宜分派兩使得旨允行二十二年充出使德國大臣未赴德以前俄國西伯里亞鐵路欲與海參威接軌取道黑龍江吉林朝議拒之因改爲商辦設立公司而使中國亦入股銀五百萬乃命總辦黑龍江吉林鐵路公司景澄僅能阻其路南侵訂約稽查運料之船勿使漏稅而已二十三年至德國甫數月而俄人租我旅順口大連灣命充頭等專使赴俄與駐俄使臣楊儒議訂條約事竣回國二十四年命在總理各國事務衙門行走兼署禮部右侍郎調補吏部右侍郎轉左侍郎派充大學堂總教習管學大臣督辦關內外等鐵路時意大利索我浙江之三門灣甚力景澄建言駁之事乃寢二十六年義和拳倡亂景澄之意主剿首禍諸臣遂乘機誣陷交章彈劾七月初三日奉上諭吏部左侍郎許景澄太常寺卿袁昶屢次被人奏參聲名惡劣平日辦理洋務各存私心每遇召見時任意妄奏莠言亂政且語多離間有不忍言者實屬大不敬若不嚴行懲辦何以整肅羣僚許景澄袁昶均著卽行正法以昭炯戒遂棄市事平上知其冤與徐用儀等均開復原官錄用子嗣宣統元年予諡文肅浙人奏建三忠祠於原籍列入祀典官爲祭祀

李興銳

李興銳湖南瀏陽人咸豐二年粵寇圖陷長沙瀏陽土匪乘機肆擾聚黨逾萬羣情震恐興銳時爲諸生倡團防以固衆志會浙江候補道江忠源督勇至興銳以團練助之匪衆悉平粵寇已陷江西撫州謀道上高萬載出瀏陽以犯長沙興銳遏擊之分界嶺賊不能逞湖南在籍侍郎曾國藩率湘軍東征聞興銳名招入戎幕令築糧臺於祁門時徽寧賊氛熾甚祁門當孔道賊所必爭興銳運輸皆赴期會逆酋古隆賢雪夜來襲興銳偵知先匿其輜重賊無所獲而去難民就食糧臺勞來撫輯全活萬計帳下卒奪難民金立斬之九年克復南安敘功以知縣選用十一年克復徽州及休寧黟縣保以直隸州知州留於安徽補用並賞給五品封典同治元年徽州解圍賞戴花翎三年克復江寧以知府仍留安徽補用四年徽州防軍因索餉譁潰興銳單騎入其營反復曉譬許欠餉三日取償衆皆願受約束尋廉得爲首二人上兩江總督曾國藩置之法江寧既復糧臺積存平餘銀四十餘萬悉繳諸官嘗以事至荷葉洲解囊金拾埋露骸二萬具七年捻匪任柱賴汝洸肅清保准補知府後以道員用八年曾國藩移督直隸奏調興銳同行允之

畿南告災興銳奉檄察賑徧歷災區親詢飢民所得錢米有司之廉惠者舉之貪
侵者劾之四閱月始竣九年補大名府知府引見奉旨以道員用旋以乞假省親
部議令開缺會曾國藩復督兩江檄辦兩江營務興銳規畫長江水師事宜並周
歷江陰狼山吳淞崇明諸隘倡擇要建臺之議厥後江防多沿用之光緒元年總
辦上海機器製造局維時規模草創興銳擴而充之增築船廠礮廠又時寓書出
使大臣曾紀澤博采各國新式以資倣效江南製造遂冠各省九年丁母憂十一
年特召來京終制北上命隨勘中越界務十二年命充出使日本大臣以足疾辭
十五年直隸總督李鴻章奏留直隸尋署津海關道二十一年三月授天津道七
月調山東登萊青道在任八月溢解常關額徵及二倍二十二年遷長蘆鹽運使
未履任先奏署直隸按察使二十三年擢福建按察使抵閩後兩署布政使二十
四年擢福建布政使二十五年入覲調廣西布政使二十六年授江西巡撫是時
值義和拳之亂江西燬教堂劫教民積案至二千餘起興銳抵任請限三月議結
事後卹款八十餘萬奏開籌餉捐輸提給嚴飭郡縣不得苛派於民又裁汰新募
防勇歲節餉數十萬及和議既定卽移充償款不足則清剔釐金土藥兩捐益之

終興銳任江西無苛細雜捐二十七年江西大水被災者數十縣興銳奏濬鄱陽湖導水入江上游河道亦擇要疏治詔從之又奏修湖口礮臺整頓釐捐裁減制兵創設農工商局礦務公司工藝院課吏館凡諸要政皆得旨允行二十八年調署廣東巡撫廣東前請辦隨糧捐原議按糧額三成徵取興銳奏請祇計正額不及耗餘其貧瘠之區及瓊州一府悉爲豁免會夏秋水旱爲災米價騰貴興銳復與督臣德壽會奏籌款平糶詔如所請二十九年署閩浙總督奏請於福州廈門各設商務局又以振興商務開礦爲最要之圖請招商集股自立公司皆得旨下部議行福建舊設善後濟用賑捐及省會稅釐南臺稅釐各局事權不一弊端滋甚興銳奏請裁併改爲全省財政局以藩臬兩司暨糧道鹽道經理之局內分設稅課籌捐度支報銷四所以候補州廳州縣之廉能者分任其事釐定常備軍制尤以裁汰冗濫節省浮費爲先三十年五月颶風損稼興銳巡視農田遂得寒疾未愈八月調署兩江總督有詔敦迫起程抵任後日以設巡警興學堂部勒營伍改定操法爲務值日俄構兵南洋爲交涉總匯興銳維持中立恆徹夜不寐病益加劇九月卒事聞諭曰署兩江總督江西巡撫李興銳持躬廉正練達老成由諸

生從事戎幕擢陞知府洊陟封圻歷任江西廣東閩浙等省均能整躬率屬勤政愛民朝廷深資倚畀本年調署兩江總督到任未及兩月遽聞溘逝軫惜殊深李興銳著加恩照總督例賜卹任內一切處分悉予開復應得卹典該衙門察例具奏賞銀一千兩治喪由江寧藩庫給發靈柩回籍時沿途地方官妥爲照料該署督子孫幾人著端方查明具奏候旨施恩用示篤念盡臣至意嗣署兩江總督端方奏陳興銳歷任政績復諭曰李興銳平日居官卓著政績著准其宣付國史館立傳以彰忠盡伊嫡曾孫李謨光著俟及歲時交吏部帶領引見次孫安徽試用知府李鴻扶著以道員分省補用尋賜祭葬予諡勤恪

余虎恩

余虎恩湖南平江人少貧喜讀兵家書會髮逆擾湖湘咸豐四年以武童投兵部侍郎曾國藩營中駐防岳州旋剿賊鄂省轉戰武昌漢陽黃州之交靡役不從十一月進駐小池口官軍渡江方半濟賊乘間來撲無梁可渡虎恩取浴盤泛江上急登岸殲賊前鋒官軍遂濟時增募平江勇四千人調赴弋陽五年三月弋陽克復所向有功七月調赴南康八月改隸平江營駐蘇官渡十一月賊從北岸來襲

官軍從馬影橋勞家渡略而前賊潰走旋克湖口縣城虎恩以軍功賞六品六年三月調赴饒州進軍撫州九月追賊於崇仁虎恩被矛刺傷右股負創渡河復縣城奪賊糧萬餘石調還撫州撫州尋陷移駐崇仁又移貴溪十二月賊擾上清擊卻之七年三月賊陷鷹潭旋即克復敘功以外委拔補八年湖北巡撫胡林翼改調李元度營隨同赴浙援剿五月進駐玉山縣時閩賊回竄廣豐官軍由玉山往援立解城圍仍回玉山與賊戰殄賊無算玉山平以把總儘先拔補八月出平江營隸記名布政使張運蘭老湘營十一月由建昌進規景德鎮十二月敗賊老鴉灘時下李村上李村賊麕至官軍小卻復戰大敗之九年正月整隊進攻燒賊望樓賊於栗樹後斷官軍歸路虎恩單刃突圍出右肩矛傷者二三月軍抵景德鎮五月江西平六月調援湖南寶慶取道樂平旋改道衡州趨廣東連州赴援十月賊從山中迎擊官軍分道鏖戰虎恩被伏賊矛刺右乳下揮刃砍矛已入骨中從者拔去之血湧如注征衣盡赤仍裹創上馬血戰斬賊無算湖南巡撫駱秉章上其功以千總儘先拔補加守備銜並賞戴藍翎馳驅湘桂贛皖諸省赴援幾無虛日十年十月僞忠王李秀成率賊二萬餘趨羊棧嶺陷黟縣官軍大集擊破之遂

復縣城賊遁廬村一帶越日與賊大戰於廬村及柏莊嶺斃賊四千餘人李逆負傷逃遁兩江總督曾國藩奏保以都司遇缺補用十一年二月攻克休寧縣城五月率隊馳抵徽州收復郡城屯軍扼守同治元年正月賊復犯城外各營官軍夾擊破之夜縋城而下焚賊所踞房屋毀賊壘五賊大恚率悍賊二萬餘人直逼街口虎恩爭先陷陣肩臂受矛傷者三右膝中礮子裹創血戰各軍奮勇繼進燬賊壘以十數徽圍遂解保以游擊儘先補用九月調駐寧國府城時張運蘭乞病歸以所轄屬皖南鎮劉松山壽春鎮易開俊分領之十一月賊陷祁門虎恩追至祁門賊棄城走績溪復追及績溪兩城皆克二年正月破賊於涇縣四月又破之於章家渡數月之間大小數十戰皆捷八月丁內艱喪葬禮成奉遺命墨經從戎十二月調取回營三年正月與賊戰於績溪縣之羊谿橋大破之經曾國藩保奏以參將補用並賞換花翎八月剿賊於歙縣南境自板橋進軍山陽坑殺賊三千有奇餘竄六甲嶺僞孝王胡逆督大股續至老竹嶺官軍從叢箐中出擊直搗六甲嶺賊逾嶺遁追至畢家園乘勝剿平胡須嶺賊壘僞孝王胡逆斃於陣收降逾兩萬皖南肅清虎恩以副將留兩江卽補四年曾國藩調剿捻匪戰於亳州大勝之

五月易開俊赴援皖北所部各營歸劉松山統轄六月委虎恩幫帶二旗九月駐紮徐州十月有騎賊薄營虎恩立刺七賊墜馬餘賊鼠竄尋擊賊於柳家莊張谷山盡毀其壘五年四月剿匪於睢寧克之復至徐州之源滙寨大破擒匪又解曹縣圍五月擒酋張總愚牛落紅一股竄徐州追至王家林連戰皆捷六月張牛兩逆分竄西華上蔡官軍往剿會周家口阻水緣沙河而西與賊遇於萬金寨擊敗之追至永平寨及上蔡雙廟斃賊千餘復繞雙廟後之義合寨洪河等處刃傷者礮斃者溺者數千人脅從解散張逆由沙河西竄郟城追至召陵賊潰走捷聞有旨余虎恩著免補副將以總兵交軍機處存記遇有缺出請旨簡放並賞給精勇巴圖魯名號七月赴援刁河至南陽賊已竄瓦店遂渡白河至瀝灘賊踞南陽尹家寨攻破之追至新野屬之上仙岡賊大隊來迎官軍奮擊賊敗走九月拔隊赴西路防剿十一月進兵協保黃河十二月奉調援秦擊張逆分竄股匪敗之六年正月張逆統賊十數萬撲陷敬字和字兩營虎恩率所部百人策馬猛進賊衆披靡自相蹂踐追殺千餘乘夜復攻銀渠金谷各壘拔之進軍郟縣三月破沿河賊壘四月進剿岐山武功興平咸陽等處竄賊追及灞橋俘斬無數五月敗賊於乾

州醴泉六月又敗賊於同州朝邑經西安將軍庫克吉泰陝西巡撫喬松年會奏奉旨余虎恩著以提督記名簡放是月委管帶壽字馬隊七月剿蒲城逸賊襲張家堡張家廟兩賊巢斃擒三千人旋追賊至三原臨涇等處擒斬五百餘人又追賊至渭南之倉頭東屯村悍賊二老坎中礮死十月抵洛川大賢村與回接戰互有傷亡虎恩單騎出刃賊數人部勇齊奮賊驚竄十一月至延川收復縣城並攻克綏德州城追至石家灣斃賊三千有奇擊竄匪於城西苗家坪旋攻破羊獻坪劉管村各回巢追至張家灘又追賊宜川南溝哨遇於龍王辿敗之進規吉州馳搗河津賊棄城走又解稷山之圍窮追至絳州城西龍泉鎮賊勢益蹙十二月由絳州赴平陽遇賊於喬李鎮銜枚疾走由山西洪洞繞出賊前攻原店賊巢迭破新莊柏家莊賊窟旋追賊洪洞縣轉曲沃聞喜翼城各縣均有斬獲時陝甘總督左宗棠方持節入晉以虎恩每戰身先不辭勞瘁奏保奉旨著賞換奇車博巴圖魯名號七年正月由南和小陵村繞鉅鹿直搗賊巢賊突圍出追至河間殫賊千餘轉至獲鹿適淮軍楊鼎勳郭松林被圍勢岌岌虎恩率隊赴援賊見余字旗卽狂奔遏殺甚衆圍遂解繞道窮追賊蹤飄忽遇戰輒敗走擒獲不可數計三月追

至滑縣莫村適賊與淮軍相持虎恩突前往援轉敗爲勝賊由河南竄山東又竄直隸虎恩率軍尾擊之六月黃河陡漲賊竄商河阻水官軍折回寧津破趙家莊尙家莊賊巢圍殺殆盡賊目張松茂張五孩率衆來降復剿賊於德州汴梁鎮賊殊死戰我騎兵傷三十餘人虎恩受矛傷十七處裹創督諸軍力戰斃悍賊百餘人翌日追至德平周家莊扼守寧津抵樂陵賊北遁追至鹽山縣張家村夜襲保和寨賊花旗賊目周帶祿率衆二百來降仍整隊西馳殺張村陳古村各賊俱盡駐軍山東高唐州左宗棠以虎恩勤勞奏聞有旨交部從優議敘七月赴慶雲鹽山各路搜捕已無賊蹤拔隊回連鎮準備西征左宗棠復奏虎恩在劉松山所部營官中最爲出色且帶隊最久驍勇素著懇恩破格優獎有旨賞給頭品頂戴八月由連鎮拔隊行十二月官軍進攻綏德懷遠延安賊巢百餘處一律蹋平進屯安定節節進剿立破邱家坪里牛川馬營灣各老巢抵鎮靖堡董世有及其子董福祥率衆來降總統劉松山受之虎恩率馬隊前行剿除馬家溝高小灣逸賊俱盡八年八月抵甜水河殲賊二百餘追至靈州城西進逼郭家橋平賊巢二十餘座屍如山積追至下橋渠西又斃賊千餘還駐永寧洞連日甘回挑戰我軍夜襲

之率步軍蛇行從礮密處直進馬軍伺隙衝殺焚燬各賊巢斃賊八百有奇吳忠堡逆回憤甚傾巢出堡北騎賊數千助戰勢甚洶湧虎恩被矛戳穿左膀仍上馬力戰旋追至吳忠堡時金積堡賊與吳忠堡賊合角聲四起官軍以逸待之旋分五路出擊賊大潰越日金積堡與黑城子半箇城各悍賊復結隊猛撲官軍擊走之賊由吳忠堡余家湖排隊刈稻虎恩設伏兜擊礮傷右背彈陷入骨負痛前驅殺賊聚而殲旃九月克靈州左宗棠以捷聞有旨於陝北肅清案內交部從優議敘克復靈州案內照頭等軍功例交部從優議敘十一月圍攻金積堡賊殊死鬪數月相持不下九年正月廣東陸路提督劉松山中礮陣亡所部各軍改歸劉錦棠兼統仍攻金積堡與踞逆大小百數十戰各村寨悍黨誅戮有差十月朔礮子飛入賊寨傷逆首張化澂左耳寨中大震始窮蹙乞降令繳馬械毀堡牆降衆分別遷徙逆首伏誅金積堡平奉旨賞給三代正二品封典十年四月乞假回籍展募十一年二月敕募步軍四旗赴甘肅五月抵平涼屯兵訓練六月赴安定謁左宗棠飭隨總統劉錦棠進搗西寧由礮伯會師裹糧前進八月抵西寧屢戰皆捷高家堡爲逆首白彥虎行巢官軍移隊攻之火其巢劉錦棠督軍至馬營灣修壘

騎賊屬至馬隊設伏以待虎恩率步軍夾擊敗之白彥虎率騎賊數千撲李雙良營虎恩赴援殲悍逆馬得彥於陣賊旋撲西寧營卡分隊出彥才溝虎恩設伏誘賊出溝伏軍四起賊狂竄追至駱駝堡拔賊卡十餘座是夜就賊壘駐宿九月綏定營被圍虎恩整旅赴援抵觀音溝十里許有賊堡列馬隊抗禦虎恩率兩旗衝殺賊棄堡遁遂焚其巢綏定營移至小峽口修壘馬桂源等夜糾回逆數萬來襲虎恩驚起出視賊已逼壘趨整隊銃礮齊發並以筒實火藥擲之賊踏屍乘垣力鬪虎恩出壘夾擊殺聲震天賊乃遁天明檢賊屍遺七千餘具虎恩以孤軍數百獲殊勝賊自是望余字旗膽益落劉錦棠至平戎驛修橋甫成騎賊來犯官軍以馬隊接仗忽南山大股賊至虎恩聞警渡湟而南猛擊之賊竄去虎恩在湟南岸築壘劉錦棠在湟北岸築壘未成馬營灣賊數萬來撲虎恩先燃巨礮轟擊復督馬隊長驅直進賊見余字旗俱辟易十月獲賊諜知陝回往川北掠食虎恩率隊捲旗疾趨抵高寨賊衆三千出拒隔河而陣我軍以開花礮向賊營彈如雨落賊駭潰因約日會剿小峽之賊虎恩排隊登山麓連破三壘須臾賊萬餘人由山巔直下官軍接擊逾時殺賊三四千人餘多墮溝死乃增修一壘扼之官軍復乘夜

潛襲南北山卡壘弁兵憑肩爲梯累而上立破三壘拔堅卡斃守賊千餘仍分軍扼之賊大股來犯官軍殲其前鋒賊潰遂修廢壘兼治運道時西寧郡城圍急虎恩由北岸護巨礮直上山巔賊分三路猛撲官軍亦分三路迎擊發礮轟賊壘牆垣立場乘機攻入賊棄山麓各壘狂奔峽內逆巢埽除略盡賊竄南山之南躡追之又平山上卡壘十餘座乃越山會隊分扼兩岸駐軍各營時時結陣衝殺馬本源馬桂源及各回目向東川宵遁黎明附城各莊寨四路火起官軍馳抵東關截剿殿後竄賊西寧圍解奉旨提督余虎恩著遇有陝甘提督缺出儘先題奏並賞穿黃馬褂十二月大通都司馬壽糾黨謀叛降人崔偉等願剿賊自效十二年正月賊撲崔偉等營虎恩率隊馳擊磔馬壽之姪馬良才於陣進搗向陽堡克之移攻第二堡忽被脅良民乞緩攻願縛賊目以獻旋獻出馬壽馬進祿韓起壽等及河西匪四十餘人降人馬福壽並指攻馬桂源黨三十餘人悉數駢誅惟留馬壽縛往大通合城皆降斬馬壽於市二月馬桂源馬本源馬楨元於巴燕戎格城外東山就擒斬之左宗棠復以肅清邊境安輯回番奏聞奉上諭提督余虎恩著賞給三代正一品封典七月奉宗棠飭令所部四旗隨劉錦棠往肅州助剿九月抵

肅州駐軍南門令崔偉馬福壽等馳馬城下大呼馬四及諸酋曰死期將至善自爲謀連日激戰適炸彈中賊軍賊益洶懼馬四泥首乞命繳馬械以窮寇不可赦誅之肅州平左宗棠偕烏里雅蘇臺將軍金順會保有旨交部從優議敘十三年四月乞假回籍是年十月奉上諭陝西陝安鎮員缺著余虎恩補授旋經左宗棠調赴甘肅光緒元年三月抵蘭州敕赴西寧劉錦棠行營差遣八月接統壽字恪靖馬隊各營九月赴涼州屯兵訓練二年二月移駐肅州整隊出關四月謁左宗棠諭以地阻戈壁轉運維艱虎恩曰進兵古城當力戰克之運糧不足慮也五月抵哈密運糧踰天山至巴里坤古城儲蓄既備六月乘夜襲黃田旣明逼近賊卡賊馬步紛出虎恩率馬隊張兩翼包鈔之各隊復由中路衝擊賊大潰追至古牧地擊斃千餘人遂駐黃田會諸軍齊進古牧地環城結壘不數月夷日托克愛糾騎賊數千由紅廟來撲虎恩率馬隊嚴陣以待並繞道出山後斷賊歸路各營斬關直入援賊死戰虎恩揮驍騎截之大破賊於卡子溝遂克古牧地堅巢輯懷城圍亦合隨轟塌南城牆堞各軍齊進斬斃賊六千餘生逃者以馬隊遮擊之進搗烏垣至城北見賊南竄虎恩率馬隊窮追賊回旗死鬪部將陶鼎金負傷虎恩益

憤督隊殺賊過半追至鹽池墩賊屍駢列血漬馬足遂將烏魯木齊迪化州及僞建王城同時克復左宗棠奏請破格優獎奉旨余虎恩著賞給雲騎尉世職七月駐軍搜剿餘匪八月派隊馳往瑪納斯會攻南城掘僞清真王安明屍戮之九月攻克瑪納斯城廣運軍糧進規南路三年二月由烏魯木齊踰嶺而南遂抵柴窩鋪夜趨達坂斬賊謀十餘騎凌晨諸軍畢集依山爲陣賊見官軍至大駭礮聲不絕我軍屹立如山並築壘以斷援賊壘成昇巨礮三尊晝夜轟之城內礮臺傾圮飛彈墮賊火藥房人馬炸裂賊奪門竄走虎恩督馬軍遮截大小夷回頭目無漏網者遂克達坂城十二月抵白陽河分隊赴吐魯番會剿虎恩率馬隊由小草湖直搗托克遜鼓角齊鳴賊自焚糧藥棄城西竄本地纏回及被脅各回膜拜請降劉錦棠受之遂下托克遜三城旋回攻吐魯番滿漢兩城皆克左宗棠奏虎恩迅赴戎機忠勇奮發奉旨余虎恩加恩賞給騎都尉世職八月進規南八城繞道阿哈布拉桑樹園庫木什榆樹溝星星子烏沙塔拉又抵曲惠傍博斯騰淖爾西行見賊零騎追剿之九月抵庫爾勒闐無人烟駐軍回城適劉錦棠收復喀喇沙爾越開都河哈爾哈阿滿搜剿至此食盡虎恩督弁勇掘獲窖糧數萬石分濟各軍

士卒皆感奮旋分隊由庫爾楚洋薩爾策達雅爾布告爾阿爾巴臺托和柰轉戰而前遂克庫車進剿和色爾拜城察爾齊克臺哈拉裕勒札木臺等處疊有斬獲進薄阿克蘇城克之復踏冰前進渡胡瑪納克河虜白逆眷屬遂攻克烏什城奉旨遇有提督缺出儘先簡放十月屯軍阿克蘇左宗棠偕伊犁將軍金順會奏關外老湘西征定遠董字旌善馬隊各軍悉聽余虎恩節制以一事權十一月兩路進兵直搗喀什噶爾時有以孤軍深入爲忌建緩進急戰之議者虎恩曰師行緩急妙在用心網未張而機先露是教彼預防豈兵家勝算昔人謂兵貴神速當出其不意攻其無備乃可殲渠埽穴迅奏膚功遂親率馬隊三營由巴爾楚克瑪納爾巴什晝夜兼程馳抵喀屬之東牌素特時賊攻漢城甚急虎恩赴援一夕行六十餘里薄城下黃萬鵬亦率隊馳至遙見城內火光燭天城外賊騎徧布我軍踰牆而進賊棄壘走步軍前剿馬兵張兩翼鈔之殲僞副元帥王元林等於陣守賊懼開西城出走喀什噶爾回漢兩城同時克復派張俊守喀城虎恩自率隊與黃萬鵬分道窮追陣擒于小虎又追至爰岌槽擒僞元帥馬元並斬其副元帥白彥龍行抵俄界傳令班師新疆平左宗棠金順等以捷聞諭曰該領兵大臣櫛風沐

雨艱苦備嘗允宜特沛殊恩用酬勞勩提督余虎恩前經賞給騎都尉世職著改爲一等輕車都尉世職十二月屯軍喀城四年移紮葉爾羌築河隄防水患五年赴和闐閱部伍六年修城垣十月左宗棠入都陛見關外軍務委劉錦棠接統七年二月以虎恩久歷戎行轉戰十數行省身受重傷二十七處實屬艱險備嘗請免騎射有旨報可四年由葉爾羌拔隊換防六月交卸營伍入關劉錦棠奏稱虎恩在湘軍二十餘年身經數百戰屢挫大敵疊克名城其由阿克蘇進攻喀什噶爾以千五百人破二十餘萬衆出奇制勝神速異常請飭赴本任有詔許之八月抵陝安鎮任巡閱各營汛十年土民聚衆滋事討平之十一年十月因舊傷舉發奏准開缺回籍十七年奏統湖南振字全軍駐紮岳州時巴陵臨湘交界之大雲山有匪徒嘯聚派隊捕之十八年春華容縣禹甸垸王立科等違禁私築與護城八垸械鬪遣兵解散是年六月大雲山逸匪汪殿臣復聚於臨湘之藥姑山一鼓平之汪匪伏誅醴陵縣會匪劫獄倡亂截剿於萍鄉縣之湘東市搜獲匪首謝兼山等防地粗平十九年華容縣鋸子口等處會匪蠢動捕誅匪首劉先祥餘匪解散二十年武岡州會匪滋事立即撲滅至湘鄉拳匪首朱聰八趙十七斬之旋回

岳州原防先後經湖廣總督張之洞湖南巡撫張煦奏保交部從優議敘並交軍機處存記遇有提督總兵缺出開列在前請旨儘先簡放是年七月入都陛見八月補授廣東高州鎮總兵召見三次垂詢兵事甚詳旋奉旨添募老湘虎字十營赴山海關防堵移紮河西務二十一年七月入都陛見召見一次二十二年請假修墓二十三年呈請奏咨兼襲併爲二等男爵有旨從之二十四年修墓未竣呈請代奏奉上諭准其開缺二十六年入都召見一次有旨余虎恩著交榮祿差遣委用旋奉旨招募老湘虎字七營並統勁威等營六月補授新疆喀什噶爾提督召見一次旋因勁威等營未到新募各營裁撤隨赴西安行在有旨開缺三十年十月恭逢皇太后七旬大慶入京祝嘏召見二次旋回籍三十年十二月在籍傷發病卒湖南巡撫龐鴻書奏稱已故開缺新疆喀什噶爾提督二等男余虎恩於咸豐年間投入軍營先後隨同前大學士曾國藩左宗棠前廣東陸路提督劉松山轉戰湖南湖北江西福建廣東廣西安徽江南河南山東山西直隸陝西等省剿除髮捻並在行間其後廓清關隴平定回疆厥功尤著卒以身受多傷槍子未出傷發病故實堪憫惻仰懇天恩照軍營立功後積勞病故例從優議卹戰功事

蹟宣付史館立傳該員爲曾國藩左宗棠劉松山所賞拔而隨同左宗棠劉松山最久出力較多並請准其附祀各專祠詔如所請尋賜祭葬

楊岐珍

楊岐珍安徽壽州人咸豐三年由武童隨其父守恩佐理本州東鄉團練事宜巡防州境四年隨父募壽勇投營效力留防六合縣城池五年攻克九洑州賊壘六年髮逆犯六合圍其城自率所部隨總統張國樑剿之大敗賊於葛塘集并克浦口復江浦縣獎八品軍功八年三月隨攻烏江賊巢九月充百總十年七月隨剿叛逆薛城良并克復僧道橋菱塘等處賞六品軍功尋赴江南寶山縣防次攻羅甸賊卡獎五品軍功十一年六月賊圍攻寶山甚急岐珍奉檄堵擊血戰破賊縣賴以完事上賞戴花翎同治元年四月僞忠逆再犯寶山勢張甚岐珍嚴陣禦敵戰守兼施閱七晝夜擊退之並援諸翟華漕等處立解重圍敘功以守備儘先補用自是從克蘇浙名城數年之間洊保都司擢游擊加參將銜至副將留兩江儘先補用是時浙閩皖三省兵事方棘各路官軍羽檄交馳岐珍協力分援並攻湖州長興廣德漳州等城迭聞克捷五年八月兩江總督李鴻章上其功得旨交軍

機處記名遇有總兵缺出儘先簡放十一月欽命襄辦軍務劉秉璋檄帶親兵新右營馬隊頻擊西捻於鄂豫蘇皖諸省間六年冬捻渠賴汝洸等竄撲寶應高郵一帶力蹙之逐北至揚州與揚防水陸師連合兜擊擒賴逆於陣一軍盡殲以總兵遇缺題奏並賞斐凌阿巴圖魯名號七年二月檄赴直東從大軍追擊張總愚捻股馳至內黃南樂間與匪接戰斬獲頗多六月從逐竄賊於德州臨邑間所向皆捷是役也張酋勢窮力蹙自沈於河積年悍逆剷洗淨盡直東一律肅清論功以提督記名簡放先是岐珍父六品頂戴守恩於咸豐八年以防守江蘇六合縣城歿於陣至是議卹十一年得旨給雲騎尉襲次完時給予恩騎尉世襲罔替並准其捐建專祠岐珍爲守恩嫡長子例得兼襲世職光緒元年李鴻章在直督任檄岐珍親軍馬隊三營分防保定河間及深冀諸境數年以來緝捕劇匪地方清謐九年劉秉璋爲浙江巡撫奏赴杭州委令統領親兵及溫台各營時台州賊首黃金滿投誠因馳往相機安撫並帥隊搜捕餘匪悉平之十年移統所屬各營分駐鎮海部署海防十一年正月法國兵輪兩犯鎮口禦之於招寶山躬冒矢石擊傷敵船二日夕嚴巡無少懈數月敵不敢侵事聞得旨交軍機處存記遇提督總

兵缺出開列在前請旨簡放五月檄回台州剿辦會匪土匪緝捕不遺餘力賞頭品頂戴十月補江南狼山鎮總兵岐珍在浙江頗著威望十二年巡撫劉秉璋衛榮光先後奏留請令暫緩赴任十三年正月遂調補浙江定海鎮總兵三月衛榮光會同閩浙總督楊昌濬提督歐陽利見合疏稱其在台有年軍民悅服不逞之徒皆畏威戴德爲目前必不可少之員請與海門鎮總兵互相調署詔如所請行十六年十一月閩浙總督卞寶第奏稱岐珍自履署任督率師船緝盜最力水陸賊蹤剋期偵獲其著名匪首以次就擒措置極有餘裕請將海門鎮總兵員缺准其調補詔從之十八年七月擢福建水師提督十九年三月抵廈門視事二十年恭逢慈禧端佑康頤昭豫莊誠壽恭欽獻皇太后六旬萬壽正月奉懿旨賞加尙書銜是歲中日失和海疆事棘六月奉上諭日人要挾無理恐難就範臺灣重地亟須預籌戰備福建水師提督楊岐珍著譚鍾麟傳知該員酌帶兵勇迅速渡臺會商邵友濂妥籌布置遵於七月渡臺旋奉旨駐紮臺北總統基滬諸軍岐珍力籌防務區畫周詳并激勵將卒預爲戰守地已而和議成五月有旨回本任閩省洋面南接粵東北連浙境港汊歧出海綫延長稍涉疏虞盜蹤往往乘間竊發岐

珍患之既之任其明年春卽駕兵輪率戰哨各船赴南北轄洋巡緝凡遠近島嶼亦皆躬履稽查遇中外遭風船舶立飭舟師救護仍於時順道回廈督練兵勇操防自後歲以爲常二十九年因巡洋感疾回省就醫十月卒年六十有七事聞賜卹如例子銘爵主事職銜於光緒二十年隨其父渡臺襄辦軍務在營積勞病故銘勳一品廕生戶部員外郎銘鑾試用鹽經歷銘傳試用同知銘樞試用通判銘福銘貴孫祖賢承襲雲騎尉世職

鄭崇義

鄭崇義安徽合肥人同治元年由武童投效劉銘傳軍從征上海獎六品軍功旋因奉賢南橋之捷以把總儘先拔補並戴藍翎克復嘉定陞守備二年八月從擊賊於江陰之板橋馳突衝鋒斬逆目二人獲僞印身受矛傷三處十一月隨攻常州礮傷左股身幾殘廢尋克復常昭崇義功皆居上級江蘇巡撫李鴻章上其事得旨以都司補用三年克江蘇援浙江均有功擢敘遊擊賞換花翎宜荆之役崇義血戰後復調援江陰四年陞參將光緒元年李鴻章督直隸爲欽差大臣調崇義隨營差遣六年委充督標行營中軍兼隨辦海防事務是時河決東明崇義于

役其間與在事諸人力籌修塞缺口復完督臣奏保於是崇義以副將歸本標儘先補用九年奉直督符統親兵水師中營駐防天津十二年朝議連設小輪往來昆明湖間以備天庾轉輸之利崇義監船工事竣敘績洊加總兵銜復以堵合永定河工議敘加一級十七年接統直字前後兩營駐大沽口北岸礮臺時崇義已因襄辦海軍獲獎陞總兵加提督銜矣十八年朝陽教匪煽亂經大兵掃蕩全境肅清崇義振厲戎行功最著奉旨賞給直勇巴圖魯名號並著以提督總兵交軍機處記名簡放二十三年閩浙總督邊寶泉檄調赴閩委辦安靖長金各營臺營務處二十四年二月管帶長門礮臺尋代統安靖長金各營礮臺防務九月因感受溼疾請假就醫二十五年李鴻章督兩廣復檄至粵二十六年署南澳鎮總兵鎮濱海瘴溽蒸鬱觸發軍營舊傷崇義乞假回粵養疴遂卒於粵三十年部臣請卹尋奉旨賜卹如例

清史列傳 卷六十三

已纂未進大臣傳二

游智開

游智開湖南新化人咸豐元年舉人同治元年以揀選知縣爲安徽巡撫李續宜所檄調初權三河尖及河南固始等處釐金以廉平稱總辦道員曾廣翼以其賢聞於兩江總督曾國藩因附入肅清皖江北岸案内奏保以知州留於安徽補用四年署利州知州州無城郭每逮夜必躬自巡邏曉坐堂皇決事有愬訟者輒反覆諭誠之旋爲兩造判其曲直各得其平不期年訟獄大減朔望率同官及紳耆宣講聖諭以次而及鄉閭課士子親校文藝爲第其高下四仲之月則俾在城塾師率生徒入署相與剖析經旨尤諄諄然教以孝弟之道廉讓之節存問高年矜崇節孝柯貞婦者生謀其養歿謁其墓欲藉以風示薄俗云州舊由胥役墊完錢糧最爲民病智開蒞任後請於上官禁絕之又其地瀕臨大江素多水患適長江提督彭玉麟駐師濡須爲請款修築隄防以資保衛智開躬親履勘發款尤核實

已纂未進大臣傳二

卷六十三

一

二

絕不假手胥吏故工堅而費轉省尋補無爲州知州署泗州事其爲治一如在和時惟其地民氣強悍劫掠時聞智開則爲整頓捕務盜風以息曾國藩移督直隸以智開治行爲江南第一奏調入直差遣八年補灤州知州署深州採訪節孝整頓義學裁免加徵陋規民大悅服十年赴灤州本任向例徵兵過境卽按村派車轉送民苦擾累智開爲剔除積弊別籌核實辦法民困遂蘇州民健訟多由奸人構成智開因痛懲之其風少熄十一年簡授永平府知府智開一車一蓋巡行屬境博採民情兼及山川險要故往往郡境有事牧令未及稟報而已得其要領嘗一日侵晨馳至屬縣遷安點查縣獄有一犯係私押因拘差役至縣署廳事重笞之令始驚起郡有敬勝書院頽廢久矣智開亟謀修復購經史籌膏獎擢士之秀異者講業其中由是永平民益嚮於學山海關之澄海樓列聖宸翰恭嵌其上歷歲爲風雨所剝蝕因補刊以昭敬謹他如續修郡志補葺城垣創立牛痘局皆悉心經畫事舉而款不虛糜郡屬煮海爲鹽數百年窮民食其利部檄飭禁私販行官引智開上言民間少一私販卽地方多一馬賊鹽本宜行官引惟永平則由舊爲便當事聽其議事遂寢有富紳簪纓巨族推爲郡望以析產訟縣不已控於府

智開立提訊至則不加研詰手諭以治郡無狀摺紳且不能感化矧在愚氓痛自責訟者均流涕省悟願得一言以罷因召戚族調停其閒案遂結直隸總督李鴻章嘗稱智開清勤端嚴足勵末俗會考察屬吏乃以智開所治永平政績密疏上聞光緒三年大計遂膺上考五年派充惠陵奉安大差隨員六年陞授永定河道河性慄悍夙稱難治智開力主疏濬以殺水勢每當搶護險工輒植立河干指揮兵役暇則周巡兩岸率以爲常故在事員弁終歲無敢擅離工次者而又綜理微密不一錢浪擲河工積習爲之一空時大學士左宗棠建議請將永定河南岸改北岸以紓水患醇賢親王奉旨察視勢在必行智開以上下游數百里城垣官廨及民間田園廬墓均須遷徙窒礙難行而小民安土重遷且恐激生事變力爭而止固安爲入都孔道渡河者每苦舟子需索爰創建官橋官渡按車輛大小明定章程不准額外多索行旅便之七年以三汛安瀾賞加按察使銜次年復以三汛安瀾賞加二品銜十一年陞授四川按察使陞見後假歸省墓遂由本籍攜一僕乘篋入蜀沿途詢訪閭閻疾苦吏治得失四川訟牘多至紛不可理智開帥屬逐爲清釐並悉心研鞠或不交發審局自行訊結以省訟累兩權布政使十二年護

總督重慶教案事適起智開奏言是獄當以根究起釁之由贖回險要及預定款口爲關鍵不贖回險要無以服渝民之心非嚴誅首犯無以制洋人之口非議賠銀兩無以爲結案之具諭知教首羅元義激成衆怒勢洶洶幾釀大變爰飛檄拘之入省民團始散又以元義身雖入教仍是中國子民自應治以中國法律奏請敕總理衙門據理與爭勿許公使干預時中外惴惴恐以肇釁端智開持之益力卒置元義於法薄給賠償而案結十四年陞廣東布政使署理巡撫參劾無所迴避貪墨歛迹廣東向藉閩姓賭款充餉招商承辦時方議更替撫署例得三十萬金承充者初欲照舊餽送卒憚其丰裁不敢進嚴禁番攤及婦女燒香城隍廟僧寺匿匪廢之改建義塾十六年以老乞休允之二十一年電召至都授廣西布政使莅任後痛除官場積習僚屬化之爲政務持大體事有不可行力持不少變靈川鬧糧禍由糧書及現排激成論者以爲民咎主發兵剿辦智開則以辦理不善責歸縣令民獲保全粵西患火警月或一見或數見被災者恤以官帑外復出私財救濟此類之事無不盡力爲之又念粵西戶鮮蓋藏倡捐廉俸銀三千兩購運穀石儲之省垣并通飭各州縣一律籌辦妥訂章程用備荒歉值迭次諭旨敕直

省勸辦積穀廣西籌備獨先巡撫黃槐森嘉之特據以上聞經史時務諸書購之至數千卷捐置體用學堂以供士人博覽凡廉俸所入悉以之籌辦公益無自私者二十四年因病罷歸二十六年卒於家三十二年直隸安徽四川廣東廣西等省京官臚陳政績呈請都察院代奏遂奉俞旨宣付史館立傳並附祀五省名宦祠

郝長慶

郝長慶湖南長沙人咸豐六年投效霆軍隨剿髮逆勇敢善戰獎六品軍功十一年圍攻赤崗嶺大捷肅清江西全省兩案經兩江總督曾國藩奏保以外委儘先拔補並賞戴藍翎隨同克復青陽石埭涇縣各城奏保免補外委把總以千總遇缺儘先卽補同治三年克復東壩句容金壇各城隘奏保以守備補用加都司銜四年克復廣東嘉應州長慶徧體鱗傷血流被甲猶裹創力戰經閩浙總督左宗棠奏保免補都司以遊擊儘先補用加參將銜七年奉檄馳剿回匪十年蕩平金積堡賊巢殺賊無算奏保換戴花翎尋進攻太子寺等處回逆長慶身先士卒轉戰五晝夜竟獲全勝奉上諭以參將儘先補用並加副將銜十二年陝甘總督左

宗棠檄委幫統楚軍左路馬步全軍兼帶後營是年保奏克復巴燕戎格及河州各地方肅清案内奉上諭郝長慶著免補參將以副將遇缺儘先補用賞給趙勇巴圖魯名號光緒二年奏保關隴肅清奉上諭郝長慶著以總兵補用六年奉調北上先是於五次剿平邊寇肅清案内經督辦新疆軍務劉錦棠奏保奉旨郝長慶著以總兵交軍機處記名遇有總兵缺出請旨簡放是年興修涿州河工出力議敘加一級八年兩江總督左宗棠奏留兩江遇有總兵缺出請旨簡放旋因前在安慶太湖等處打仗受傷奏免騎射九年督帶恪靖親軍先鋒營十年奏調援閩閩浙總督楊昌濬檄委分統金牌獺石各礮隊兼凱字後營并奏請仍以總兵歸閩浙補用二十年總督譚鍾麟檄委統領划緱山上下及射馬各礮隊兼凱字營二十八年觸發舊傷卒於途湖南巡撫龐鴻書奏請照提督軍營立功後積勞病故例從優議卹附祀左宗棠專祠並懇將生平戰功事蹟宣付史館立傳允之

楊儒

楊儒正紅旗漢軍人咸豐十一年由監生遵籌餉例捐員外郎簽分兵部行走同治三年期滿奏留四年以辦理軍務出力加四品銜六年中式舉人是年十一月

文宗顯皇帝本紀告成命以無論題選遇缺卽補并加三品銜八年兵部覈對處辦理軍務出力奏保俟補缺後以郎中遇缺卽補并免試俸詔如所請行光緒元年因恭修普陀峪萬年吉地工程處出力保以道員分省遇缺儘先題補并賞戴花翎三年九月丁父憂五年服滿起復六年二月普陀峪吉地告成命加二品銜九月以道員指省江蘇十四年授江蘇常鎮通海道十五年正月丁母憂十七年服滿十一月授浙江溫處道旋調安徽寧池太廣道十二月奉旨開缺以四品京堂候補充出使美國祕國大臣十九年授太常寺少卿二十年轉通政使司副使二十一年六月擢太僕寺卿十月晉太常寺卿十一月調宗人府府丞二十二年六月授都察院左副都御史十月調充出使俄國奧國和國大臣二十四年陞工部右侍郎二十五年轉左侍郎二十八年正月卒於使任諭曰戶部左侍郎楊儒才識宏通由道員派充出使美國大臣調充出使俄國大臣辦理交涉事務不避艱難力顧大局一切悉臻妥協茲聞溘逝軫惜殊深楊儒著照侍郎例賜卹任內一切處分悉予開復應得卹典該衙門察例具奏該侍郎現有子嗣幾人有無官職并著查明覆奏候旨施恩尋賜祭葬

夏辛酉

夏辛酉山東鄆城人同治初年以勇丁隨忠親王僧格林沁軍剿捻匪事平復隨陝甘總督左宗棠西剿土回屢克堅巢九年以陝境肅清彙保千總加守備銜賞戴藍翎十年甘回尙熾辛酉提偏師進剿解城固之圍克固原迭平禹王堡及黑城子半角城等處擒僞元帥楊文治時匪首馬化隆以金積堡爲巢穴城小而固自楊文治伏誅羣回震懼馬化隆累爲劉松山所敗乃囑甘回乞撫仍首鼠兩端撫議久不決我軍乃先翦其羽翼東自吳忠至靈州堡寨四百五十餘西自洪樂至峽口堡寨一百二十餘皆次第盪平外援已絕遂合師圍攻辛酉裏創血戰尤力拔之馬化隆伏誅回匪勢遂瓦解十月奉旨擢守備十一年隨師度隴逆酋白彥虎方踞肅州環境數百里皆爲賊堡我軍周視地形以取肅州必先攻塔爾灣諸堅巢五月馬隊及團丁分兩路趨塔爾灣戰數日拔之并平黃草壩及城西卡壘數十處辛酉皆與有功捷入擢都司並賞換花翎旋以關隴肅清洊擢遊擊加參將銜十三年率隊出關其時奇臺捕役馬福等分據綏來昌吉各城而呼圖壁烏魯木齊皆爲賊壘左宗棠議由北路烏垣等處進兵而後及南路辛酉同湘楚

嵩武皖南各軍次第據阜康襲黃田破古牧平各賊壘烏垣賊宵遁新疆北路略定進規南路光緒二年安酋帕夏略托克遜築三城自衛北守達板以拒劉錦棠烏垣之軍南守吐魯番以拒張曜哈密之軍而烏垣敗黨麕集於達板白彥虎于小虎併入托克遜皆悉銳拒守衆莫敢與鬪獨辛酋率遊騎屢撻其鋒十月大雪官軍不能踰嶺帕夏與白彥虎乘間移達板新城兩山間以大通哈守之吐魯番故有滿漢兩城帕夏次子海古拉又造僞王府帕夏令白彥虎馬人得守吐魯番海古拉守托克遜自居喀喇沙爾爲中權策應三年三月冰解劉錦棠遣嵩武軍孫金彪徐占彪趨吐魯番自踰嶺攻達板己未抵柴窩距達板二十里夜初鼓令軍士銜枚走五鼓集城下大通哈引水自衛城外泥深及馬腹辛酉同余虎恩等率馬隊掠過深淖列城左山岡譚上達等亦率步隊列城後山阿羣回方臥未覺也天明霧收城回始驚見發西洋槍礮下擊自卯至午我軍小有傷亡屹立如故乃築壘掘濠困之并傍城東築礮臺海古拉遣賊赴援陶生林截之隘口皆返奔壬戌以開花礮攻其城城圯中火藥房大風驟起燒開花彈城中人馬碎裂羣回奪門走官軍遮不得出遂克達板禽其酋愛伊德爾呼里卽大通哈也并獲胖色

提玉子巴什各六人時嵩武軍已下奇克騰木進攻關展盡破魯克沁等處城壘距湘軍僅兩日程羅長祐率五營赴之己巳徐占彪孫金彪至吐魯番白彥虎先一日遁守賊殊死戰乃磨馬軍兩旁鈔襲賊陣亂羅長祐領湘軍合攻之馬人得降遂克吐魯番滿漢兩城時海古拉亦遁並收托克遜三城辛酉以功擢副將並賞振勇巴圖魯名號南路既復吐魯番全境惟白彥虎偷息開都河八月辛酉隨劉錦棠大軍西進趨開都河白彥虎壅河水遏我軍我軍繞淖行鹹地少遼緩及至河東白彥虎已遁庫車我軍追躡敗之遂復庫車又敗之銅廠度戈壁百四十里至哈拉裕勒遂復阿克蘇城時安夷竄葉爾羌白彥虎竄烏什冀分我兵力我軍專力討白逆黃萬鵬張俊趨烏什辛酉同譚盛典自西會之渡胡馬納克河行戈壁八十里敗回於烏什城東遂復烏什奉旨以總兵補用賞換霍伽春巴圖魯名號十一月官軍分三路進兵以取喀什噶爾甲子克之白彥虎伯克胡里及阿里達什均遁俄羅斯我軍連收葉爾羌英吉沙爾和闐等城南疆西四城皆下辛酉與有力焉四年二月賞穿黃馬褂是年秋賊目賽屹塔等滋擾三臺辛酉率馬隊同張宗本設伏於沖壳罕山前後另以纏回六十騎誘之賊甫過山伏發裹賊

中央合短兵鏖戰斬賽屹塔及黑振江十月阿里達什寇邊劉錦棠進軍玉里巴什辛酉以二百騎衝鋒陷陣斬執毛旗賊目奪其旗賊大潰追斬三百餘名陣擒三十餘名五年正月賊竄畢勒套格依辛酉率三百騎同張宗本追及之搜斬逃匪殆盡是年秋逸酋阿布都勒哈瑪與愛克木條勒糾衆入寇劉錦棠令辛酉駐軍烏泊爾扼其南竄之路賊改西南竄色勒庫爾辛酉敗之木吉追至卡拉阿拉而還獲全勝西域由是底定十月奉上諭交軍機處記名簡放提鎮並賞三代正一品封典十年以劉錦棠奏保賞頭品頂戴十三年乞假歸養二十年日人來侵山東巡撫李秉衡奏辦登州防務統領東字福字嵩武各營旋丁繼祖母承重憂以軍事急仍留統各營時劉公島旅順威海衛相繼失登州勢尤岌岌敵以巨礮晝夜環攻城內廬舍多燬傷人心惶恐辛酉持以鎮靜卒保危城七月補廣西右江鎮總兵以服未滿改署任仍留辦登防服闋改實任留防如故二十四年調補山東登州鎮總兵二十六年袁世凱奏派武衛軍先鋒左翼長六月北上應援召見後仍回山東接鎮篆日俄構釁練兵王大臣調駐保定三十年正月簡放雲南提督未赴任三十一年奉旨剿曹兗匪亂駐師鉅野事平仍辦清鄉事三十三年

命籌辦長江防務入都陛見十月賜紫禁城騎馬旋回鉅野清理交代三十四年正月卒於防所直隸總督楊士驥山東巡撫吳廷斌奏入奉旨照提督軍營病故例從優議卹加恩予諡原籍及立功省分准其建立專祠戰功事蹟宣付國史館立傳長子候補知州繼泉以知府卽用次子繼葵賞給主事

馬玉崑

馬玉崑安徽蒙城人同治元年由武童在本籍辦理團練三年投臨勝營效力四年調赴河南隨同總統毅軍宋慶攻剿捻逆積功以千總補用並戴藍翎五年管帶毅字親兵營以剿匪出力擢守備七年敍在直隸饒陽等處剿賊功命以都司卽補並賞給振勇巴圖魯名號捻逆任柱賴汝洸合全力困宋慶於登州玉崑奮身往救立解重圍由是驍健之名大著任逆旋中彈死張總愚從子武亥潛以衆遁復追斬之而戰於濟陣斬無算捻勢益衰旋卽蕩平積歷次功由都司超擢副將賞換花翎以總兵記名簡放是時秦隴回亂孔亟奉調西征自榆林草地鹽海子葛徵店等處轉戰而前迭獲大勝賞從一品封典遇有總兵缺出儘先題奏並加提督銜十年克復洪岡等處奉旨賞換博奇巴圖魯名號十三年以攻克肅州

功賞頭品頂戴嗣同伊犁將軍金順出嘉峪關剿辦竄回時關外徧地皆匪而白彥虎黑瞎子小虎諸悍酋悉力抗拒玉崑疾趨勇鬪連克烏魯木齊昌吉瑪納斯各城黑瞎子既擒白彥虎亦遠遁諸逆回聞風奔潰天山南北以次蕩平光緒二年八月奉諭賞穿黃馬褂十一月賞雲騎尉世職玉崑在西域前後十六年收復名城以十數剿撫之餘倡率屯墾以興地利新疆既定經直隸總督李鴻章奏調赴直隸辦理營務十八年李鴻章奏保將才以玉崑才力驍健歷練最深將來可爲四川提督宋慶替人得旨交軍機處存記二十年補授山西太原鎮總兵會日人因朝鮮內亂與我構釁玉崑親莅前敵約束嚴明轉戰於田莊臺太平山感立寨之間以千數百人抗敵兵數萬奮力撐拄屹然自全二十五年擢浙江提督二十六年正月命會辦武衛左軍營務七月調補直隸提督是時拳匪肇亂各國聯軍集於天津玉崑奉詔入衛旋命總統武衛左軍馳往津沽督戰玉崑激勵將士獨支危局初戰於天津繼戰於北倉相持月餘時值盛夏積潦躬率所部奮身泥淖酣鬪晝夜無少休息嗣以軍無後援全師而退扈蹕西巡二十七年回鑾賞功加太子少保銜賜紫禁城內騎馬二十八年七月入覲再奉恩旨賞西苑門內騎

馬九月潮陽匪徒鄧萊峯結黨起事玉崑率所部兼程往剿未及三旬攻克逆卡生擒首要餘一律收平三十一年以捐助本籍學堂之經費一萬兩賞其孫馬朝樑以郎中用三十四年八月卒遺疏入諭曰朕親奉慈禧端佑康頤昭豫莊誠壽恭欽獻崇熙皇太后懿旨總統武衛左軍直隸提督馬玉崑忠勇性成膽略兼備初隸宋慶麾下轉戰皖豫齊魯秦晉間邊平髮捻所向有功關隴回亂率師西征屢奏奇捷嗣隨金順出關迭克名城在西域前後十餘年剿撫之餘倡辦屯墾民咸賴之迨新疆大定經李鴻章調回北洋辦理營務紀律嚴明駐軍遼瀋獨力堵挂特授浙江提督調補直隸提督旋派總統武衛左軍隨扈西巡留晉辦防旋直剿匪均資得力歷經賞給頭品頂戴黃馬褂雲騎尉世職博奇巴圖魯勇號太子少保銜朝廷倚若長城方冀永享遐齡長承恩眷茲聞溘逝軫惜殊深馬玉崑著追贈太子太保賞加二等輕車都尉世職照提督例賜卹加恩予諡其原籍地方及立功省分建立專祠生平戰功事蹟宣付國史館立傳靈柩回籍時沿途地方官妥爲照料伊子補用遊擊馬廉溥著加恩以總兵記名郎中馬廉德以道員分省補用伊孫一品廕生馬朝棟以郎中分部補用分部郎中馬朝樑以知府分省

補用任內一切處分悉予開復應得卹典該衙門察例具奏並賞銀三千兩治喪由直隸藩庫發給用示篤念盡臣有加無已之至意尋予諡忠武

邵友濂

邵友濂初名維埏浙江餘姚人嗣父燦原任漕運總督友濂由監生報捐員外郎籤分工部同治元年燦卒加恩以本部員外郎儘先補用四年中乙丑補行辛酉壬戌兩科鄉試舉人八年捐戴花翎十年十二月補工部虞衡司員外郎十三年以御史記名八月補總理各國事務衙門漢章京充普陀峪萬年吉地工程監督光緒元年二月工竣奏保在任以知府不論雙單月遇缺前即選先換頂戴四年總署以友濂供差五年期滿並辦理交涉及出使各事宜悉臻妥協奏請撤銷御史仍留工部員外郎本缺在衙門當差未幾復奏請俟補知府後以道員歸候補班前即補並請歸道班後賞加二品銜十一月俄國出使大臣吏部侍郎崇厚以友濂年壯才明通達治體奏請開去員外郎缺以道員充頭等參贊俟差竣後仍留總署章京上行走先後均奉俞旨五年九月署理俄國欽差大臣六年八月奉寄諭留俄國襄辦通商要件七年三月出使俄國大臣曾紀澤奏派友濂齎

送改訂俄約章程地圖等件到京總署王大臣奏准仍留總理衙門當差八年二月補授江蘇蘇松太道九年法越戰事起法人以越南爲我藩屬遣兵船進窺臺灣以牽我師友濂襄辦臺防偵敵蹤備軍械籌餉需悉心經畫會法人以和款我朝廷顧念邦交諭友濂隨同全權大臣兩江總督曾國荃辦理和約以議不合長江戒嚴有旨著章台才留上海會同友濂鎮撫兵民加意彈壓並保護各國商民旋經江督曾國荃以體用兼資堪膺重寄奏保十一月奉會辦援臺各事宜之命十一年中法和議成友濂敘功賞給一品封典十二年正月派往香港會商開辦洋藥稅釐二月由海道入京與總理衙門商議一切六月補授河南按察使十三年四月遷臺灣布政使十四年以舉辦清丈地畝出力賞加頭品頂戴十五年以感受溼熱疾發請假內渡就醫六月補授湖南巡撫十一月兼署湖南提督十二月丁本生母憂十七年四月服闋補授福建臺灣巡撫自陞授按察使至巡撫臺灣凡三入覲十九年以捐立義莊贍族經禮部奏請賞御書匾額一方二十年恭逢孝欽顯皇后六旬萬壽慶典交部從優議敘九月調補湖南巡撫內渡抵滬疾作乞假就醫二十一年四月以假期已滿病仍未痊奏請開缺二十七年卒於家

浙江巡撫聶緝槩以聞諭曰前任臺灣巡撫調署湖南巡撫邵友濂由部曹外任監司洊膺疆寄宣力有年克勤厥職茲聞溘逝軫惜殊深著照巡撫例賜卹所有任內一切處分悉予開復應得卹典該衙門查例具奏尋賜祭葬

王孝祺

王孝祺原名得勝安徽合肥人咸豐八年粵匪陷廬州在籍襄辦團練旋投效安徽軍營隨剿有功賞六品頂戴同治元年江蘇巡撫李鴻章募淮勇六千五百人赴援上海得勝隸焉遂從克復石林奉賢等城擊退虹橋大股逆匪保以把總儘先拔補並賞戴藍翎二年克復嘉定縣城並北新涇四江口等處保免補千總以守備儘先補用是時淮軍增兵數萬人張樹聲別立一軍號樹軍得勝分領樹字正營以收復常昭並克太倉鎮洋各州縣及會剿江陰無錫諸股逆匪有功保免補都司以游擊儘先補用三年官軍規取江蘇得勝領樹字左營隨同進剿遂復其城隨解浙江平湖之圍保免補參將以副將儘先補用並賞換花翎先後均奉旨允准四年克復宜荆溧嘉常等城奉諭以總兵記名簡放並賞壯勇巴圖魯名號五年於淮軍分援浙皖閩三省並迭克湖州長興等城案內得保賞加提督銜

並給從一品封典尋以失樹軍統領張樹珊降職先是忠親王僧格林沁戰歿曹州捻大橫朝命曾國藩督師進剿賊馳突楚豫間五年十二月竄至湖北德安巡撫曾國荃檄樹珊與周盛波由應城折向德安二十一日樹珊行抵德安之王家灣任賴牛李大股賊至比抵新家牯見賊屯駐楊家河東岸遂率隊過河猛擊賊大潰樹珊督隊直追賊分路回鈔我軍樹珊戰歿六年正月事聞朝旨罪其部卒降得勝參將責令帶隊以觀後效李鴻章既代曾國藩督師於時牛老洪戰死張總愚竄陝西任柱等踞山東旋由山東撲奔江境得勝迎擊生擒其渠有旨復原官八年正月以得勝名同祖諱鴻章爲請於朝更今名其年張總愚就擒捻匪平中原肅清孝祺奉旨以提督記名儘先簡放並賞換博奇巴圖魯名號九年檄赴山西防河因搜剿馬賊於包頭池西中值山西大饑孝祺捐金濟之多所全活土人德孝祺輒偵賊蹤所在以告故孝祺捕剿比有功迭經奏保有旨交部優敘光緒三年賞頭品頂戴六年張樹聲督粵奏調留粵差遣歷署廣西右江廣東碣石潮州各鎮總兵九年有旨補授廣西右江鎮總兵十年法以越南故與我開戰釁官軍挫於諒山敵薄鎮南關時張之洞督粵檄孝祺統所部勤軍四千人赴前敵

孝祺自龍州兼程進與馮子材會軍就關前隘築長城更番憑守十一年二月七日敵狙進薄城下時馮子材營於左孝祺營於右戰一日夜未息翌日敵猛撲右營勢將跨城入孝祺手刃退卒揮軍直躍城下以短兵敗敵遂乘勝克復文淵洲諒山長慶府各城得旨優獎先賞給白玉翎管搬指大小荷包各一對五月奉諭以鎮南關一役孝祺戰功卓著賞雲騎尉世職並交部優敘會中法和議成撤兵回粵八月調署廣東高州鎮總兵仍統勤軍兩營駐防北海十二年調補北海鎮總兵十三年署廣東水師提督十四年七月以總兵入覲陛辭回署任十二月卸水師提督篆改署潮州鎮總兵十六年回北海鎮本任十七年六月復署廣東水師提督十月仍改署潮州鎮總兵二十年恭逢孝欽顯皇后六旬萬壽慶典懿旨賞雙眼花翎賜壽字一方暨江紬袍褂帽緯等件予一子二品廕生未幾嘉應安流土匪竊發檄往捕剿生擒匪首餘黨亦皆撲滅奉旨交部優敘二十一年病請開缺得旨報可二十五年終於家安徽巡撫聶緝槩以孝祺整軍戢暴兵畏民懷諒山一役忠勇奮發厥功尤偉奏請交部從優議卹以彰忠藎旨如所請尋賜卹如例

徐桐

徐桐正藍旗漢軍人父澤醇禮部尙書桐道光三十年進士改翰林院庶吉士咸豐二年授編修三年十一月充武英殿纂修八年七月充文淵閣校理八月充順天鄉試同考官旋丁父憂九年因磨勘中卷有修改可疑處部議革職十年二月丁母憂十一月奉旨賞檢討充實錄館協修同治元年五月充實錄館纂修七月命在尙書房行走十一月充功臣館纂修二年正月充實錄館漢總纂命授鍾郡王讀三年五月懿旨命桐與瑞常寶璽載齡李棠階單懋謙每日一人輪班進講治平寶鑑八月文宗顯皇帝實錄纂修過半甄敘以應補之缺開列在前四年二月奉懿旨弘德殿行走三月陞翰林院侍講充日講起居注官戶部右侍郎李鴻藻丁母憂穆宗毅皇帝典學方殷懿旨令李鴻藻守孝百日後卽赴弘德殿授讀仍在軍機處行走凡遇朝會不必與列桐與倭仁翁同龢合奏請准鴻藻終制以維禮教而示矜全五年實錄告成賞四品銜遇缺題奏六年陞侍講學士穆宗每日黎明御弘德殿講讀不踰二時膳後滿漢功課一時可畢桐與倭仁等奏以爲一日之中晷刻方長宜兼習政事現在召對內外諸臣皇上御殿入座嗣後擬

於召對軍之機時並請皇上入座從之桐以宋臣真德秀所著大學衍義一書可備隨時進講因詳加釐定爲十六卷名大學衍義體要七年八月旋轉侍讀學士八年六月二十日夜武英殿災書籍版片焚燬殆盡桐與倭仁等奏伏思武英殿爲收藏欽定諸書之所列朝聖訓於此刊刻深嚴重地規制崇闕一旦煨燼實爲異常災變謹按魏青龍中崇華殿災高堂隆對以爲人君苟飾宮室不知百姓空竭故火從高殿起宋天聖中玉清昭應宮災蘇舜欽上疏亦以此爲言蓋自古占驗之書凡遇宮禁火災皆以臺榭宮室爲誠今者隴西未靖民困未蘇黃河甫經合龍北河又復漫決八旗生計日蹙部庫帑項不支此民窮財盡之時也比年以來土木之工未盡止息宮廷之內屢有興作災變之來未必不由於此臣等以爲自今以後皇上正宜刻勵修省躬行節儉凡一切大小工程概行停止傳辦諸物並予罷除並請敕諭廷臣直言政事得失庶災變可弭四方蒙福九年六月擢太常寺卿八月署都察院左副都御史十年七月陞內閣學士九月補禮部右侍郎十一年九月穆宗大婚禮成賞頭品頂戴十二年正月穆宗親政懿旨命照常入直弘德殿是時髮捻旣平中原底定桐獨念洋人久居腹地十餘年來百計羈縻

以無事爲福而和局終不可恃願專意修攘爲自強計上簡才能結民心裕度支修邊備四策八月署戶部左侍郎兼管三庫事務十二月署工部左侍郎十三年十二月穆宗升遐開去弘德殿差使光緒元年充實錄館副總裁專司勘辦八月充順天恩科鄉試副考官九月隨扈穆宗梓宮奉移山陵桐以恭辦喪禮賞加二級二年四月轉吏部右侍郎八月署戶部左侍郎兼管三庫三年二月署禮部左侍郎九月補都察院左都御史十月賞紫禁城騎馬四年五月補禮部尙書十一月兼署吏部尙書五年二月管理三庫事務三月署都察院左都御史吏部主事吳可讀以死建言請豫定大統之歸懿旨飭廷臣會議桐與翁同龢潘祖蔭合疏言宜申明列聖不建儲之彜訓將來治膺大寶之元良卽爲穆宗毅皇帝之聖子揆諸前諭則合準諸家法則符使溥海內外咸曉然於聖意之所在則詒謀久遠億萬世無疆之業實基於此十一月穆宗實錄告成以桐辦理稿本始終其事安慎周詳命加太子少保銜孫培芝賞給舉人准一體會試十二月與議崇厚所訂俄約章程摘其不可許者曰伊喀各城定界曰新疆內外蒙古通商曰運貨直至漢口曰行船直至伯都訥凡四條六年迭充閱卷大臣教習庶吉士時朝議徇俄

人之請寬減崇厚罪名桐奏揆度機要責在樞廷折衝俎豆責在總署講信修睦責在使臣儻崇厚之赦立見轉圜一切就我範圍是爲有益於國則寬其既往足示法外之仁若釁端仍不能弭是徒失刑政之大權則崇厚之罪更無可道仍當推原禍始立置典刑又俄人陰狡變態萬端以和爲戰是其長技兵船已來海外而我師逍遙河上何以禦之近年南北洋養兵製器費帑實多練軍之效非於無事時侈虛聲正以有事時覘實用應請嚴敕南北洋大臣加意防維設有疏虞惟該大臣是問又惟用人之道先辨忠奸欲辨忠奸必嚴心迹苟無忠愛之忱必不能收幹濟之效奸臣狡詐往往自託於孤忠其才智又足以紊亂是非搖惑觀聽辨之不早將受其欺貽患將來後悔何及比年中外所稱練習洋務者曰崇厚曰丁日昌今崇厚誤國矣丁日昌傾險小人其藉洋務以自固與崇厚同而才足濟奸智足飾詐尤逾崇厚十倍折衝禦侮皆非所宜前兩江總督李宗羲山西巡撫曾國荃皆素膺簡畀大臣其於中外交涉必能慎持大體決不肯以鹵莽債事總之今日人才以秉忠持正智深勇沈者爲上其居心樸實才堪器使者次之若僅以機權靈警之輩祇能通曉各國語言文字者許爲邊才而責其艱難重大之事

未有不負委任者又陳西北邊才左宗棠屹若長城但其年已衰儻接替不得其人所關非細楊昌濬堪坐鎮而不足以決戎機劉錦棠可爲偏裨而不足以膺統帥得旨報聞七月承修慧安和碩公主園寢工程十月同禮親王等恭送穆宗毅皇帝聖容實錄聖訓並冊寶玉牒赴盛京供奉尊藏交部議敘是月奏臣此次于役瀋陽大典慶成循途遄返於經行山川阨塞地方民生情形留心諮訪竊以奉天一省雄據東方形如龍首論大義則爲我朝之根本論形勝則與京國爲輔車土地肥饒物產充物俄日兩國垂涎已久易啟戎心即使大局粗安亦不能不慮久遠奉省海口沒溝沿以外其口岸水深洋船可泊者如寧遠釣魚臺錦縣崔家屯蓋平連雲島復州長興島寧海羊頭窪旅順口金州青泥窪等處不一而足將軍岐元廉潔自守鎮靜有餘於軍旅素未嫻習瀋陽防守空虛惟宋慶一軍略資保障羊頭窪旅順口雖有防兵亦不足恃可否敕李鴻章會同岐元通盤籌畫所有奉省海防統歸該督及將軍節制調遣略收實效至瀋陽省城附近陵寢應挑選西丹三四千人酌加口分以曾經戰陣之副都統參領爲統率隨時訓練專顧省防以免海口防軍有跋前疐後之慮各州縣地方遼闊沿邊一帶當慎選守令

勸辦鄉團整飭屯戍蒙民雜處地方務期聯絡自衛田廬以輔兵力不逮語皆切實先是在奉天時差務未竣赴將軍岐元公讌經盛京副都統富陞奏參奉旨議處尋部議上加恩改爲降三級留任八年二月充翰林院學士五月會議吉林新巡吉伯阿道缺裁撤刑司部員從之八月充順天鄉試正考官旋管理八旗官學時官學廢弛久桐釐定章程多所裨益九年正月充國史館正總裁三月充會試正考官法越兵事起廷議和戰久不決桐陳管見一摺意在主戰時論躋之十年正月赴奉天查辦事件三月調補吏部尙書五月回京審明奉天命盜各案並請嚴懲革員佛寶允之是月兼署兵部尙書九月奉旨充上書房總師傅十一年十一月因吏部註冊錯誤又齋戒期內呈遞刑名處分摺件察議罰俸四箇月奉旨准其抵銷十二年編修林壬擅離職守桐覆查請旨嚴懲從之十四年充武鄉試正考官十五年正月以吏部尙書協辦大學士充會典館正總裁德宗大婚禮成奉懿旨加太子太保銜因議覆御史屠仁守處分明白回奏徇庇欺朦交都察院議處應革職加恩改爲革職留任三月署工部尙書五月承修正陽門石路工程七月署戶部尙書八月充順天鄉試正考官十六年二月德宗謁陵命留京辦事

十月承修各倉工程十七年賞勸善要言一部十九年三月山西飢募捐米二萬石賑之九月奉旨覆查科場舞弊事據實具奏得旨允行編修丁惟禔充陝西考官以營賄事經御史林紹年奏參桐覆查得實革惟禔職二十年正月孝欽顯皇后六旬慶辰大典奉懿旨賞戴雙眼花翎三月兼署禮部尙書御史恩溥奏參右副都御史奕年把持專擅各款桐奉旨查明覆奏下奕年部議二十一年三月充會試正考官五月署兵部尙書奏外省鹽務釐局關務閒員甚多內地腹省並無軍務藉口彈壓多招營勇安置私人請痛加裁汰奉旨允行六月審明御史鍾德祥受賕事擬發軍臺效力詔如所議行普陀峪萬年吉地明樓方城等工椽望有脫卸輒石有酥裂派往恭勘數次皆敬謹從事無所遷就二十二年十月充玉牒館副總裁是月授大學士兼管理吏部事務十一月奉旨授體仁閣大學士二十四年三月戶部司員陳昌圻因會典館獎敘不優劾法賄求奏參革職從之十月賞西苑門內乘坐二人肩輿二十五年上諭各省關稅鹽釐等項積弊太深令諸臣各抒所見或酌加推廣桐奏輪船招商電報礦務局近年獲利不資而贏餘利息如何酌提歸公未經議及有收回利權之名無裨益公家之實應責成大理寺

少卿盛宣懷督飭在事人等將收支數目限期分晰開單酌定餘利章程專案請旨定奪並著北洋大臣裕祿將開平礦務一體辦理皆如所議施行七月奉懿旨大學士徐桐年逾八旬遇有召見出入加恩准太監扶掖以示優眷十二月上諭大阿哥當典學之年嗣後大內在弘德殿讀書駐蹕西苑在萬善殿讀書派徐桐常川照料二十六年義和拳匪構亂兩宮西巡命留京辦事七月各國聯軍入京自經死年八十二和議成奉旨革職撤銷卹典

任道鎔

任道鎔江蘇宜興人道光二十九年拔貢三十年朝考二等以教職用咸豐四年選補奉賢縣訓導以辦團出力獎知縣九年二月選湖北當陽縣知縣六月報捐知府同治元年調補江夏縣知縣二年擢直隸順德府知府時捻氛北竄順德適當其衝道鎔督勇駐守沙河揮衆突擊破悍賊獲其酋朱學孟賊遁去以防剿功陞道員加鹽運使銜賞戴花翎方軍興時客兵過境絡繹道鎔擇適中地備糧轉運使無缺乏而民亦不擾順德舊有洛河年久淤塞道鎔疏濬之得民田萬頃經總督曾國藩李鴻章先後疏陳政績得旨嘉獎十年調補保定府十一年擢河南

開歸陳許道道鎔稔知河工積習銳意革除查驗工料事事核實節帑以百萬計十二年以河汛安瀾命加布政使銜光緒元年補授河南按察使四年擢浙江布政使五年調直隸布政使以籌協西餉功賞頭品頂戴七年授山東巡撫道鎔以山東營務廢弛奏裁冗兵以綠營額餉改練新軍又以郡縣多盜嚴檄防營分汛緝捕一時盜賊屏息泰山沂山之間爲南北通衢道路艱險道鎔籌款開通行旅稱便八年因河工合龍案內奏保已革知府潘駿羣部議降一級調用有旨改爲革職留任十二月開缺來京九年因在浙江失察編修林國柱呈報起復日期部議革任旋奉旨以道員選用二十二年署河道總督時部議以河南河工歸河南巡撫兼辦而以河督移駐濟寧專治山東河務道鎔疏言河防關係重大以河督總其成二百餘年未嘗變易今以河督專治山東之河而以東河屬之河南巡撫則官吏不相屬號令不能行河督幾同虛設若仿照東河另設廳汛則應給額款應辦額料皆須另行籌備鉅款旣恐難籌河事亦終無補不如暫仍其舊爲便奏上如道鎔議二十七年調補浙江巡撫寧波大嵐山爲梟匪游勇盤踞之區結黨數千人肆行劫掠爲地方巨患道鎔會商署提督余洪亮兵入山搜剿擒斬首要

解散餘黨時值中外和議初定道鎔於籌備償款興辦學堂整飭武備賑恤災區皆盡力爲之二十八年因病請開缺允之三十二年正月卒於家

譚碧理

譚碧理湖南湘潭人咸豐六年由武童投效湘軍隨營剿賊出力獎六品軍功是時粵匪分陷皖贛自湘軍出援江西瑞臨撫建以次收復惟吉安未下八年碧理隨兩江總督曾國荃攻吉安克之贛境漸就肅清以外委遇缺儘先拔補九年復以隨克景德鎮及浮梁縣城擢把總十年楚軍圍皖攻太湖與賊相持於小池驛碧理奮呼陷陣傷左指仍裹創力戰斬其悍酋餘賊驚潰遂克復太湖擢千總並賞戴藍翎十一年安慶合圍集賢關以外已無賊蹤而關內菱湖兩岸賊壘密布城賊恃以爲固猝不得下曾國荃築長濠困之賊悉衆撲營碧理奮勇當先槍傷左臂而戰不少卻徑登賊壘餘壘亦次第掃平八月克安慶省城敘績免補守備以都司儘先補用同治元年隨大軍克復沿江城隘保遊擊復進參將二年留辦金陵軍務幫帶訓字營復以戰功賞加副將銜三年克復江寧省城計勞列保奉上諭以總兵記名簡放並賞換花翎四年大學士兩江總督曾國藩奉旨剿捻

匪檄碧理率豫字營爲遊擊之師隨同北征碧理躡蹤追剿上蔡之役統領朱式雲猛進遇伏幾爲所乘碧理踞守一隅以巨礮轟斃二渠魁遂轉敗爲勝斬獲無算錄功奉旨以提督記名並賞給正一品封典七年統帶星字左右兩營駐守江寧光緒元年兩江總督劉坤一檄委署理督標中軍副將旋奏請借補允之二年以前在軍營身受重傷加恩免騎射又經兩江總督沈葆楨列保以碧理心地篤厚堪勝提鎮七年督臣劉坤一復於密保副參等第一疏列入一等命送部引見八年大學士左宗棠總督兩江奏稱碧理廉樸勤慎素得軍心請存記遇缺卽補從之十二年署理江南提督十三年正月兼統留防太湖水師全軍太湖爲江南巨浸梟匪窟穴其間出沒靡常碧理嚴密巡防多方搜捕梟匪斂迹三月補授江南提督是歲恭逢德宗景皇帝御極恩詔加一級十五年恭逢孝欽顯皇后歸政崇上徽號十六年德宗景皇帝二旬萬壽均奉恩詔加一級二十年孝欽顯皇后六旬萬壽恩賞太子少保銜賜壽字及大緞帽緯各件中曰構釁旅順失利南洋亦復戒警碧理募勇十營駐紮金山衛與統領朱洪章妥商防堵之策江介恃以無恐二十四年以積勞病卒碧理任提督垂十二年每歲親率舟師巡緝海洋暇

則謹斥埃繕樓櫓濬水道地方安謐軍民思之三十四年兩江總督端方列敘戰績疏請於江南江西安徽立功省分附祀曾國荃專祠並將生平戰功事蹟宣付國史館立傳以彰蓋績詔從其請子從炳江西候補通判

徐壽朋

徐壽朋直隸清苑縣人捐納主事加捐郎中又加捐道員嗣因辦理晉賑出力保加按察使銜光緒七年出使美日祕國大臣鄭藻如奏調出洋兩屆三年期滿保獎賞加二品頂戴三代二品封典仍以道員遇缺卽選隨帶加二級直隸總督李鴻章奏調北洋差遣十九年保稱篤實精詳器識閎毅於一切洋務情形歷練最久地方吏治亦能留心考究實爲有用之才送部引見二十年詔以道員發往江蘇補用仍交軍機處存記二十四年四月補授安徽寧池太廣道五月陞補安徽按察使六月奉旨以三品京堂候補派充朝鮮國欽差大臣九月補授太僕寺卿二十六年隨同全權大臣李鴻章商議和約二十七年六月奉命補外務部左侍郎九月卒奉上諭外務部左侍郎徐壽朋由道員洊陞今職辦理交涉事務諸臻妥協茲聞溘逝軫惜殊深徐壽朋照侍郎例賜卹尋賜卹如例

徐承煜

徐承煜漢軍正藍旗人父桐大學士自有傳承煜咸豐十一年拔貢生同治元年朝考以七品小京官用分戶部四年補官七年陞主事光緒元年惠陵工程處奏咨隨同辦事三年保以本部主事無論題選咨留遇缺卽補並加四品銜四年補主事五年奉懿旨賞戴花翎六年補員外郎七年擢郎中八年京察一等覆帶引見詔以道府記名十年丁母憂去官十二年服闋十三年仍補郎中除鴻臚寺少卿是年秋轉光祿寺少卿十六年授通政使司參議十八年二月轉內閣侍讀學士十月進太常寺少卿二十年署太常寺卿是歲近畿一帶澤潦成災上命添設粥廠在永定門外之大紅門大興通州交界處所賞京倉米三千石並派承煜與鴻臚寺卿桂斌分往該處稽查彈壓妥爲監放二十一年十一月授太僕寺卿十二月署大理寺卿二十二年補太常寺卿二十三年八月授宗人府府丞九月派充繙譯鄉試提調轉都察院左副都御史二十四年八月署禮部左侍郎十月擢刑部左侍郎二十六年正月奉旨刑部左侍郎徐承煜前得降一級處分加恩開復七月兼署禮部左侍郎是時拳匪內訌列邦釁起京師失守兩宮西幸上諭大

學士徐桐父子留京辦事桐聞變縊於邸第承煜旋爲日本軍所拘怒其袒匪也
羈之館中數月上聞褫承煜職命奕劻李鴻章查明所犯確據卽行奏明從嚴懲
辦二十七年正月行在傳旨徐承煜各國指稱力庇拳匪專與洋人爲難昨已革
職著奕劻李鴻章照會各國交回卽行正法派刑部堂官監視詔至與啟秀俱戮
於市時桐亦革職坐法論斬上念桐已死詔予免議

劉永慶

劉永慶河南項城人光緒十一年以文童隨總理朝鮮交涉通商事宜候補道袁
世凱前赴朝鮮派充漢城商務總署書識兼收支事務十二年納贖入監十三年
報捐縣丞十四年調充駐紮朝鮮商務總署隨辦交涉商務委員以供差期滿保
陞知縣並加同知銜十五年襄辦朝鮮龍山交涉通商事務十七年袁世凱創設
漢城商務巡捕檄永慶司之仍兼襄辦龍山事務十八年期滿保以同知直隸州
用並加四品銜尋充韓語學堂監督十九年辦理仁川交涉通商事宜二十年以
軍興內渡二十一年創練新建陸軍督練袁世凱檄調來營派充總理軍米局兼
督練處隨辦營務二十二年總理駐津轉運製造局兼理糧餉二十四年十月充

本軍後路營務處仍兼轉運製造暨糧餉事宜十一月報捐花翎二十五年大學士榮祿以武衛右軍訓練三年著有成效奏保永慶加一級二十六年五月全軍移紮山東檄充總理武衛右軍糧餉局二十七年捐陞知府四月充武衛右軍稽察全軍參謀營務處旋以赴直剿匪出力直隸總督李鴻章奏請以道員選用許之十月充留東各營務處仍兼參謀營務處暨總理糧餉各差嗣山東巡撫袁世凱以武衛右軍迭次剿匪著有勞勩彙案請獎詔仍以道員交軍機處記名簡放並加二品銜二十八年直隸總督袁世凱奏調永慶留直差委補用尋充軍政司兵備處總辦二十九年充練兵處軍政司正使並賞副都統銜三十年詔授鑲白旗漢軍副都統三十一年特賞兵部侍郎銜命署理江北提督永慶莅任後調練防營步隊更召募衛隊專練新操三十二年舉辦清江警察另募學兵派員教練三月奏改江北高等學堂爲初級師範學堂復於清江警察局附立警察速成學堂招考候補文武員弁六十名入堂肄業卽以教兵之員爲之師按照課程分期傳習以爲江北州縣警員之用又以江北銅元短絀奏請暫免限制鑄數尋將清江之善後總釐灘地蕩務四局奏懇裁汰併爲收支總局一所皆次第舉行是秋

七月卒遺疏入命照提督積勞病故例從優賜卹尋賜祭葬

趙舒翹

趙舒翹陝西長安人同治十三年進士以主事用分刑部光緒六年補漢提牢著
提牢備考二卷七年補直隸司主事八年陞員外郎時河南王樹汶冤獄疆吏多
迴護詔交刑部審訊舒翹反覆詰駁卒盡得其情案獲平反脫王樹汶於死巡撫
李鶴年河道總督梅啟照及初審官鎮平令馬翥覆審官開封守王兆蘭知府馬
永修等皆得罪九年補湖廣司郎中舒翹官刑部久博學習舊事凡釐訂例案解
析疑難多由其撰擬如議定宗室婦女犯罪所坐夫男應照例折罰錢糧凡調姦
圖姦拒捕殺傷親屬應照強姦拒捕例減等議廣西土官犯罪家口不應遷徙別
省議共謀爲盜臨時不行分贓罪罰不宜照前加重又誘脅上盜不能照情有可
原例概從輕減議定婦女犯軍流徒罪實發爲奴者二十二條實發而不爲奴者
九條爲奴而不實發者一條議復永遠枷號舊章變通軍流章程及新疆流犯屯
田辦法之類皆見施行其引經史以斷獄則於議命案婦女離異及議服制圖二
篇尤所致意議命案婦女離異篇略曰潘汰之父被杜氏之父毆死則杜氏乃仇

人之女潘廣祿之死杜氏雖不知情實由杜氏而起則杜氏亦潘汰之仇以仇人之女爲妻不可以仇爲妻更不可春秋公羊傳曰仇讐不交婚姻穀梁傳曰仇讐之人非所以接婚姻也夫魯忘仇爲齊主婚春秋猶非之而況自爲妻乎文姜孫齊春秋削其姜氏左氏曰絕不爲親禮也母尙可絕又何有於其妻乎漢時梁人有後妻殺夫其子又殺之孔季彥議以非司冠而擅殺夫因父仇殺母尙以擅論又何有於離異其妻乎唐律戶婚篇云諸凡義絕者離之長孫無忌等疏義謂若夫妻祖父母父母外祖父母伯叔父母姑姊妹自相殺皆爲義絕唐律集秦漢以來法書大成斟酌最爲盡善明言應離更屬可則又考之隋史煬帝女南陽公主適宇文士及士及之兄化及行逆公主爲尼士及請見不許公主曰我與君仇家今所以不手刃君者謀逆之日察君不與知耳呵令速去夫女子有從夫之義尙可以仇而絕夫而謂夫不可以絕妻其義安在宋元豐中壽州民殺妻之父母兄弟數口州司以不道緣坐其妻刑曹駁之曰毆妻父母卽是義絕況是謀殺不當坐其妻又莆田民楊訟其子婦不孝官爲逮問則婦之父爲人毆死楊亦與焉坐獄未竟遇赦免婦仍在家攝守陳振孫謂兩下相殺義絕之大初問楊罪時合勒

其婦休離不離卽是違法縱有相犯並同凡人此婦不合收坐斯二案皆義絕之事明邱濬載入大學衍義補其按語謂生身之恩重於伉儷之義女子受命於父而後有夫因夫而有舅姑異姓所以相合者義也義既絕矣恩從而亡名儒之論足爲世教正可與此對觀然猶異代事也國朝道光十一年山東兩令約爲婚姻尙未迎娶後因事壻父戕女父死女不忍事仇自經死詔旌其孝當時議者咸謂女卽不死其義已絕後有此比宜請斷離由是推之則潘汰之不應以杜氏爲妻也明甚議服制圖篇略曰查服制悉根於禮經儀禮於爲人後者爲其本宗之服惟載父母昆弟姊妹餘皆不見元儒敖繼公謂本服降一等止於此親耳所以然者以與己爲一體也自此之外凡小宗正親旁親皆以所後者之親屬爲服不在此數欽定儀禮義疏不主其說而謂賈疏本生餘親悉降一等足以補禮經之所未備律是以有爲人後者於本生親屬服皆降一等之語至爲人後者之子孫爲本宗親屬如何持服不特禮經並無明文卽歷代典章亦俱未議及惟我朝徐乾學纂輯讀禮通考引唐杜佑通典內數條始有應爲服制之說然亦第指本生祖父母而言其餘旁親並不在內查所引各條賀循則云初出情重故不奪其親而

與其降承出之後義漸輕疏而絕其恩崔凱則云經文爲人後者爲其父母周爲其兄姊降一等此指爲後者身也不及其子則當以父所後之家還計其親疏爲服紀耳劉智則云禮爲人後者當惟出子一身還本親孔正陽亦云爲人後者服所後之親若子爲其本親降一等不言代降一等者以爲至其子以義斷不復還本親故也是爲後者宜降一等而爲後者之子不得隨父而降一等晉宋以來已有此議例內所云祇論所後親屬服制等語並非無所依據迨乾隆二十四年又定有爲人後者於本生伯叔兄姊以下有犯均依律服圖降一等科罪之例道光四年又以禮部則例及刑律內所載爲人後者本生親屬服制闕略不全經大學士九卿奏明凡會典未載入悉照降一等之文逐條增補俱極詳備而於爲人後者之子孫應否爲本生親屬持服亦均無一語敘及豈真見不及此耶竊以爲古人立後多取親支此情理之常也故所後之服與其父所降之服尙不致互相參差後世立後兼取遠族此情理之變也故所後之服與其父所降之服或致大相懸絕至最親者莫如祖父母爲人後者有本生父故稱情推及於所生爲人後之子孫並無所謂本生父故據禮難同於上殺祖父母且然況降於祖父母者乎古

人不立此等服制而所以後宗支爲斷其以此歟昔唐王元感欲增三年之服爲三十六月韋縉又欲加外祖父母大功舅妻小功堂姨舅降一等意亦可云從厚而張柬之裴耀卿等均具疏力爭其議遂寢至今論者不以張柬之等爲非而以王元感等爲是可知先王制禮無太過也無不及也亦惟酌乎人情天理之中而已若受人之重已間世矣復欲厚服其私親則嫌於貳祖矣議禮者所不敢出此也十一年以俸滿截取繁缺知府十二年授安徽鳳陽府知府時值皖北水災捐廉銀二千兩助賑奏入賞戴花翎河決鄭州上命諸臣集議舒翹上議略曰黃河濁悍自古難治在大禹亦不過分九河以殺其勢多以地與水而已今則輓回故道之說已不能行所恃者僅繕隄堵合增卑培薄與悍流爭地之一法第河自孟津以下經萬里折回而怒放挾百川灌注而奔騰無高山之障無大澤之蓄區區大清河一線安能容其衝溢震蕩而不潰決四出也哉將欲治之亦惟循水漸北之勢分流以殺多以水與地而已九河故道雖不可尋而徒駭馬頰鉤盤尙有舊迹如能得熟地形而善治水者相地開引俾勢分力減庶望安流不然則當徐觀其勢俟下流路暢因其自然而施以利導加以隄防亦行所無事之一道也十五

年大計保薦卓異擢浙江溫處道十九年授浙江按察使尋遷布政使二十年授江蘇巡撫先是海防戒嚴前撫臣欲爲防外靖內計招募湘軍四營又招集私販鹽梟爲海靖三營然真正梟匪實未應募徒集游怠莠民虛糜餉項而已舒翹察知無益卽時撤遣只留湘軍二營分駐要地以防緝梟匪蘇省地濱太湖爲梟匪淵藪營弁多其黨羽互爲勾結援引統領營官亦受其賄遺恫挾遂勢成養癰吳江震澤港汊紛歧匪艇便於出沒盜匪尤夥舒翹遣飛划營管帶許國祥等嚴密剿捕獲匪首葉萬春等就戮之羣盜震懾匪燄漸息舒翹乃爲籌善後之法建議謂松郡沿海數縣窮民以板曬鹽爲生每年產鹽不下七八千萬勦商收僅三分之一如不礙官引之零星小販必寬之其不畏官法之大幫梟匪必剿之不用通梟之統帶亦不招梟匪爲營弁無事則飭勇梭巡不懈弛其氣有事卽立時拏捕不張大其詞由是兵與匪涇渭旣分而蘇省鹽捕積弊逐漸祛除矣二十一年與日人改訂新約諭令舒翹先事圖維舒翹以近來各關常遷就於條約之外爲周旋彌縫之妙訣遂使洋務日益棘手因先致函總理各國事務王大臣略謂留民生計係固本先務保全釐金尤屬目前要圖釐金能保必生意尙在華商保民之

計卽寓乎其中然上海開局各商皆係與洋人通熟初多賠折近始稍有利益要必自行經理常與洋商通融方能獲利若動公款以爲本成敗利鈍責諸紳商其公正者既不肯任事其任事者往往假公爲私明華暗洋種種弊竇防不勝防故欲設機器局惟有因民所利而利之一法廣爲招徠令民股自辦凡縑絲紗及一切製造洋人所能者我商民悉准仿行官但爲之維持保護斯可矣至新約允日人在內地購買貨件及在通商口岸任便從事既未能以力爭亦何能以智勝惟有與之平情商訂細約庶可保全釐金貨物由行交易給照出運仍查照舊章由關給單鄭重而出則奸商串通詭託之弊少矣至於輪船駛入各口裝運貨物應令照華商小輪新章一律完捐如有奸商挂洋旗請單購貨須赴產地一時旣難卒集加以關道鄭重給單奸商自當知難而止得此範圍纂入行船章程其所以保全釐金者實多總之定章雖貴嚴密尤賴奉行之不稍出入也又謂與洋人定議過於高堅則必至決裂貽朝廷憂若塞責求其速了則必至失體招彼族侮故必與之剛柔相參方可集事時朝廷矜慎庶獄以舒翹久歷西曹精法律二十三年召入爲刑部左侍郎旋兼署禮部左侍郎二十四年八月命會同王文韶督辦

礦務鐵路總局旋擢刑部尙書二十五年八月命在總理各國事務衙門行走十月賜紫禁城騎馬十一月命在軍機大臣上學習行走免其稽查保甲事務旋兼管順天府府尹事務二十六年德宗景皇帝三旬萬壽賞穿帶膝貂褂是年拳匪肇亂方事初起良涿等處糾集數千人五月奉命查辦舒翹至悉解散之七月聯軍入京師扈蹕幸長安旋因議和外人欲重罪諸臣閏八月初二日奉旨此次中外開釁變出非常推其致禍之由實非朝廷本意皆因諸王大臣等縱庇拳匪啟釁友邦以致貽憂宗社乘輿播遷朕固不能不引咎自責而諸王大臣等無端肇禍亦亟應分別重輕加以懲處刑部尙書趙舒翹著交都察院吏部議處以示懲儆朕受祖宗付託之重總期保全大局不能兼顧其他諸王大臣等謀國不臧咎由自取當亦天下臣民所共諒也吏議舒翹應革職留任然外人究未知舒翹之不袒拳匪猶以爲懲處尙輕也十二月二十五日復有旨京師自五月以來拳匪倡亂開釁友邦現經奕劻李鴻章與各國使臣議和大綱草約業已畫押追思肇禍之始實由諸王大臣等信邪縱匪上危宗社下禍黎元自問當得何罪前者兩降諭旨尙覺法輕情重不足蔽辜應再分別等差加以懲處革職留任刑部尙書

趙舒翹平日尙無忌疾外交之意其查辦拳匪亦無庇縱之詞惟究屬草率貽誤著加恩革職定爲監斬候罪名先在陝西省監禁朕懲辦禍首諸人並無輕縱卽天下臣民亦曉然於此案關係重大也尋賜自盡

葉祖珪

葉祖珪福建侯官人同治五年入福建船政學堂肄業通英國語言文字及天文地理測算駕駛諸學畢業後入建威琛航等船練習考察南北洋海道險要船政大臣沈葆楨奏保以把總留閩儘先補用尋入揚武練船實驗駕駛操演諸術周歷朝鮮日本及南洋羣島光緒元年船政大臣吳贊誠以祖珪才具優異選派出洋留學二年入英國倫敦格林尼次官學旋入索來克珀林兵船又上英芬昔索耳兵船與英皇子同班練習凡歷地中海大西洋美利堅阿非利加印度各洋於戰守之法均得要領六年畢業回國船政大臣黎兆棠北洋大臣李鴻章等奏保免補本班以守備留閩補用七年管帶鎮邊兵輪悉以所學教部下或陳述聖諭及忠烈各傳以相勸勉所部肅然時鎮邊兵輪隸北洋其水師總教習爲英人琅威理閱祖珪練兵稱爲全軍之冠八年朝鮮金玉均等構亂舉國鼎沸乞援於朝

祖珪隨天津鎮總兵丁汝昌往援駐防四年數定其亂師還直隸總督李鴻章上其功詔以都司仍留原省補用並賞戴花翎先是鴻章創立北洋海軍由英德兩國購造快船至是船成命祖珪往英接帶涉重洋二萬餘里駕駛嫻熟如期返國鴻章奏請以遊擊留原省補用並加捷勇巴圖魯勇號未幾臺灣生番變起巡撫劉銘傳告警北洋請以兵船協剿祖珪奉檄往援既至臺察番衆負固山巒籐樹蒙密兵不易入乃率士卒盡斧之竭十餘晝夜之力始得以測遠鏡窺其巢於是以火器環攻而虛其一面生番窮蹙皆遁去祖珪令熟番能通番漢語者諭以朝廷威德生番卒就撫事聞詔以參將儘先補用並加副將銜十五年北洋海軍新設中軍右營副將以祖珪陞署並帶靖遠兵輪尋以歷年籌辦海軍得力奏請俟補副將後以總兵陞用並換清字勇號得旨賞換訥欽巴圖魯勇號自是祖珪專隸北洋巡弋海上北至朝鮮之斧山仁川俄羅斯之海參威東至日本之長崎神戶南至暹羅大小呂宋新家坡及荷屬各島周而復始歲以爲常二十年中日以朝鮮之亂故有違言祖珪知日本叵測請先發制之上書千餘言痛陳利害當軸沮之已而濟遠高陞兩船果被狙擊祖珪憤甚大東溝之役思有以報之獨駕靖

遠苦戰敵艦被擊有沈者日人始稍引去然自是奉令守威海不得踰越一步矣及威海被襲水陸軍皆潰靖遠猶力戰十五晝夜至力盡援絕軍覆於劉公島然後待罪天津奉旨褫職二十五年大學士榮祿以祖珪才可用密言於上請棄瑕錄用上召見垂詢甚悉開復原官加提督銜統領北洋海軍時海軍戰敗未久艦械不備祖珪既視事以海軍驟難恢復當先整頓各處礮臺乃銜命南下與沿江沿海各省大吏相度礮臺形勢使與海軍聯爲一氣籌畫詳盡著旗燈通語二書並繪要隘地理圖說一卷令所在各部講習自是軍防稍備二十六年拳匪亂作戕德國駐京公使及日本使館書記各國聯軍北來祖珪檄所部軍艦分駐煙臺廟島而自鎮大沽聯軍既合聲言南下祖珪恐大局糜爛獨往見其諸將力言啟釁非朝廷意反覆辨論請以身爲質各國察其情詞懇摯心許之而未肯宣言會各省大吏與諸國立保護約南下之議始寢二十七年和議成各國返侵地及鐵路船廠局所軍械等事交涉繁劇直隸總督袁世凱奏請以祖珪參謀北洋海防水陸軍務襄辦交涉事竣命以提督記名簡放尋補浙江温州鎮總兵仍留北洋襄辦交涉三十年擢授廣東水師提督時日俄方有戰事我國守局外中立時慮

其因事藉口祖珪於陛見時奏對交涉情形及日俄戰事勝負皆稱旨詔賞御書福字一方仍留北洋差遣已而署兩江總督周馥與世凱會奏請以祖珪總理南北洋海軍事務允之祖珪於是移駐上海上海爲南北洋要衝俄艦敗於日由北洋竄入黃浦祖珪執中立公法與俄爭卒羈其艦使盡去軍械及日俄和議成始令引去初粵匪亂後兩江總督曾國藩奏請設船塢於上海隸南洋製造軍械局以道員監之積弊相仍歲費金二十餘萬祖珪請改爲商辦凡南北洋軍艦及招商開平各船下至差遣小輪均歸修理由是積弊一空歲省二十餘萬外且有贏餘焉時南北洋海軍已由周馥奏請歸併合南北各艦實不足一軍管駕者又多不諳方略祖珪既規畫船塢卽議定水師學堂章程及餉械支應一切事宜條理井然規模宏整故論南北兩軍聯絡之功率以祖珪爲最三十一年夏以察看沿江礮臺及水雷各營觸暑致疾遂卒於上海袁世凱周馥合詞請於朝詔以軍營立功後積勞病故例從優賜卹子六人璉恩堃恩可松可鉦可植可熙璉恩堃恩俱官通判

李鶴年

李鶴年奉天義州人道光二十五年進士改庶吉士授職編修咸豐四年保送御史五年八月充順天鄉試同考官九月補福建道監察御史六年轉掌雲南道監察御史七年二月巡視南城五月授兵科給事中八月俸滿截取奉旨以繁缺道員用九年正月轉刑科掌印給事中三月巡視北城十一月丁父憂服闋奉旨赴河南軍營襄辦軍務同治元年七月補授江蘇常鎮通海道九月署河南按察使二年三月補授河南按察使五月調補直隸按察使十月兼署布政使三年補授直隸布政使四年十月督辦畿南防務十一月補授湖北巡撫五年調河南巡撫疏陳豫省吏治軍務情形奉旨著認真整頓時捻匪由東省南竄命鶴年確探賊情嚴飭各軍實力截剿毋令闖入豫境鶴年提師露處親督防剿明賞罰裁冗疲審察賊情以爲十餘年來賊之荼毒於歸陳南汝之間已成熟徑卽去而之他而皖楚齊秦亦必假道於豫賊不速滅則豫民受害日深乃添募兩大軍各萬餘人一日毅軍宋慶統之一日嵩武軍張曜統之更以馬隊屬善慶與兩軍爲犄角自是豫省始有敢戰之師四月張總愚由山東竄河南鶴年飭令地方官督飭紳團嚴密堵禦宋慶等軍追至睢州與賊戰破之又敗之於王家橋生擒捻首劉勤學

等及長髮老賊五十餘名賊復竄至唯考一帶鶴年檄各將馳赴蘭儀相機前進兼顧省城又親赴陳留杞縣督戰以勵將士張總愚等屢經敗潰而任賴各逆又乘虛肆擾於北賊蹤無定河防尤急鶴年飛檄水師礮船晝夜巡防並飭將沿河渡船提歸北岸以杜竄越九月鶴年赴周口與曾國藩會商軍事適賊回擾豫疆派提督馬德昭擊之賊南奔將由中牟撲犯河干嗣以河防有備無隙可乘乃於汴省之西決隄引水南流擾犯長垣一帶鶴年以黃河爲南北大局所關慮其逞志河北也急派隊北行並飛催礮船趕至黑岡水陸各軍沿隄剿堵晝夜血戰賊敗而西走十二月任賴各逆竄擾湖北之麻城黃岡黃陂天門鶴年奉旨飭宋慶一軍越境會剿與湖北各軍三面兜圍殲除無算六年二月奉旨李鶴年仍當懍遵嚴飭宋慶等相機進剿與淮鄂各軍互相聯絡以遏賊氛四月豫中麥秋漸屆恐將熟之禾遭其蹂躪卽飭宋慶回師兜剿鶴年自駐許州秣馬厲兵相機策應兼顧省防五月賊竄裕州派宋慶馳擊敗之十一月賊環繞安邱樟榆等處派善慶與直隸提督劉銘傳分路進兵任柱被戕斃命逆衆驚潰旋以首惡殄除賞加頭品頂戴七年正月鶴年奉命督師出境馳抵磁州後因防堵不力以致捻匪北

擾諭曰李鶴年未能迅速出省會剿逆氛以致捻匪竄入直境且及近畿所調張曜宋慶等軍又不分途前進貽誤戎機著革去頭品頂戴並摘去花翎四月賊由滑濬等處沿河東趨鶴年又未嚴飭各軍出境兜擊奉旨交部嚴加議處七月豫軍獲勝開復革留處分並賞還頭品頂戴八月因會剿張逆全股蕩平奉旨賞還花翎並交部照一等軍功議敘十月奉上諭宋慶一軍已於本月初九日北渡著李鶴年飛催該提督兼程前進迅赴榆林與全順聯絡防剿以固秦晉北路嚴催宋慶趕將舊部招集星速由豫入晉駐紮汾州以重防務該軍應需等項著李鶴年先爲製備時有謂張總愚被水淹斃者然尙無確據上以餘衆雖平而首逆至今尙無實在下落恐含糊了事日後潛出嘯聚再煩兵力著李鶴年實力搜查辦理九年宜陽刁匪盤踞嶽山雲蓋寺憑高恃險嘯聚日多鶴年派河北總兵楊長春副將裴政等環攻平之十年擢授浙閩總督十一年四月至京陛見賜紫禁城騎馬八月署福州將軍十三年四月兼署福建巡撫七月鶴年上言閩省海疆北起浙江交界之福寧府南至粵東交界之南澳鎮大小海口百餘廈門金門海壇湄州皆孤懸海中其餘港道寬者十餘里狹者數十丈設防之法以水雷拒其入

以礮臺擊其來以沈船輔水雷之不足以陸勇輔礮臺之不足更以鄉團助陸勇之聲勢大要不外此數端奏聞奉硃批覽著李鶴年出省後仍將海防事宜與文煜等隨時悉心會商妥籌辦理十一月鶴年奉上諭總理各國事務衙門奏海防急宜切籌將緊要應辦事宜撮敘數條請飭詳議一摺該王大臣所陳練兵簡器造船籌餉用人持久各條均繫緊要事宜著詳細籌議將逐條切實辦法限於一月內覆奏此外別有要件亦卽一併奏陳不得以空言塞責鶴年奏防海之策莫重於練兵籌餉製器用人四者之中仍以用人爲急務而尤在專其責成今海防緊要沿海疆臣均屬責無旁貸第無統帥大員專任此事講求實際仍恐意見紛歧臨事毫無把握上韙其議光緒元年八月補河東河道總督九月賞加兵部尙書銜三年九月奉旨稽查河南賑務十一月兼署河南巡撫四年四月裕州葉縣西平遂平等縣各匪聚衆滋亂鶴年迭派兵剿平七年八月補授河南巡撫九月仍兼署河東河道總督十月賞加都察院右都御史銜九年因審辦盜犯胡體安一案奉旨革職入京隨班祝嘏蒙恩酌降二等賞給職銜十三年署河道總督鶴年上言黃河分流自宋時河決澶州分爲二派歷金元而堵決相承明築黃陵岡

始合爲一南北分流原非創舉山東撫臣張曜建議於前侍郎游百川陳請於後皆欲收南流以紓山東之急查黃河之性上漫則下淤現在兩路皆淤急宜疏導支河實力舉辦以豫籌宣洩之方奏聞奉旨李鶴年速籌開工進占毋稍延緩十四年鄭工決口發往軍臺效力贖罪十五年加恩釋回並賞三品銜翎十六年三月卒於京宣統元年三月東三省總督徐世昌奏請開復原官並將其生平戰功政績宣付史館立傳允之鶴年偉幹豐頤目光炯炯照人治官書十行並下少年迴翔侍從能以有用之學相砥礪後爲給事中奏起曾國藩於家謂任以兵事必能辦賊治豫最久善政具興而戰功尤爲卓著湘淮會剿諸軍遇有大計咸資取決其文武兼資知人善任誠不後於中興諸將相由閩督陞見時曾蒙恩賞御製詩文全集欽定剿平粵匪方略欽定剿平捻匪方略諸書迨調任河督受事之始黑岡潰隄不絕如縷鶴年於隄身險要之處端坐不撓爲民請命沐雨炙日親督工二十餘晝夜數省民命卒賴保全子四光瑜同治癸酉科拔貢花翎二品銜江蘇補用道光琳光緒元年一品廕生三品銜前河南懷慶府知府花翎降補通判葆恂花翎二品頂戴直隸補用道應經濟特科奉旨交軍機處存記璋花翎三品

銜道員用山東補用知府

牛允誠

牛允誠安徽宿州人年十七以武童投效安徽巡撫英翰果敏軍以功賞六品頂戴拔充營官同治七年正月委帶親軍新四起馬隊擊賊於豫境之回龍集勝之保千總賞戴藍翎五月委統先鋒營馬隊隨剿逆捻徽境肅清授守備賞換花翎十月安徽壽春鎮總兵郭寶昌調允誠統帶西征皖軍右軍馬隊隨赴陝西剿賊克復鄜洛等城陝境肅清授都司賞加游擊銜進剿甘肅回逆連破劉家灣馬家灣賊寨數十處九年會楚湘諸軍剿平金積堡逆巢陝甘總督左宗棠奏保擢參將十年分領卓勝軍追剿烏拉特旗竄匪有功晉副將賞給利勇巴圖魯名號旋回紮秦晉邊地防剿三年光緒初隨總統卓勝軍前烏魯木齊提督金運昌帶兵出關駐軍烏魯木齊地方綏靖遺匪辦理屯田積功甚多六年左宗棠奏報新疆南北兩路蕩平保以總兵補用伊犁將軍金運昌又保以總兵記名簡放加提督銜十年甘肅新疆巡撫劉錦棠敘六載邊防功保准允誠以提督交軍機處記名請旨簡放十三年八月委帶定邊七旗馬隊十四年留甘肅新疆補用十七年二

月署精河營守備該處當新疆北路之衝兵力單薄俄國哈薩克部時繞塔城入境肆掠允誠督兵晝夜巡緝地方安堵十九年九月巡撫陶模保奏加一級二十年八月管帶定邊四旗馬隊二十一年八月統領定邊左右兩旗馬隊兼帶中旗馬隊駐紮玉門關堵防竄回二十二年湟回復亂明年春逆首劉四伏由水峽竄至青海柴達木擾及王子營率悍黨數萬直撲玉門允誠所部僅定邊三旗馬隊督隊迎頭痛擊斃賊數百陣斬賊目馬英效賊退奔鹽池灣旋糾大股賊衆禦我軍於扁溝允誠飭統東防馬步全軍分途進剿連斃悍賊千餘名槍斃賊目馬朵三鮑槍手等賊退竄西安壩野馬泉一帶允誠奮不顧身拔隊而前將士無不一以當百三戰三捷遂陣斬著名賊目馬玉春等降三千餘人逆首劉四伏僅以死黨數百人狂走山穹將由羅布淖爾竄入俄境之哈喇湖與白彥虎餘黨相合允誠乘勝窮追忍飢力戰生擒首逆劉四伏正法是役也允誠以孤軍當逆回數萬衆不數月巨憇授首大難救平地方肅清皆允誠騎勇耐戰誠不愧皖中驍將之稱安敦玉各州縣人感其功立石於昌馬以旌之陝甘總督陶模等奏保奉旨牛允誠仍以提督交軍機處存記遇有提督總兵缺出開列在前並賞給頭品頂戴

仍交部從優議敘是月巡撫饒應祺奏請補允誠塔爾巴哈臺副將疏入上特旨授允誠巴里坤鎮總兵以旌其功到任後整躬率屬營務一新搜剿關外零匪地方清謐敘功賞換額騰依巴圖魯名號二十六年調署伊犁鎮總兵以德宗景皇帝萬壽覃恩加一級莅事之初京津拳匪事起伊犁一日數驚俄領事博果牙楞欲調兵自衛允誠鎮撫地方保衛商教卒能消患於無形三十一年日俄戰起允誠密籌防禦外固邦交恩信素符隱弭巨患在鎮八年渠梁道路及一切應辦之事莫不盡心爲之旋以防戍成功保三代一品封典孝欽顯皇后七旬萬壽恩詔加一級三十三年冬巡閱標營途次感犯風雪觸發舊傷三十四年正月初九日卒於位時年五十九歲宣統元年八月陝甘總督長庚以聞奉旨牛允誠准其附祀提督金運昌省城專祠生平戰功事蹟宣付國史館立傳並敕部優卹如例子二長文釗候選知縣次文亮二品廕生

蕭慶衍

蕭慶衍湖南湘鄉人咸豐三年由武童投效湘軍右營隨同剿賊出力賞六品軍功五年三月克復江西弋陽縣廣信府二城以把總補用并戴藍翎七月克復江

西義寧州城擢千總九年隨援湖北通城崇陽蒲圻三城旋進攻武昌省城并三次剿辦援賊慶衍奮勇當先大小百餘戰無不克捷經累擢以守備都司補用六年克復武昌省城追剿獲勝連克武昌縣黃州府二城以游擊儘先補用是年掃蕩圻黃賊巢攻拔小池口全楚肅清暨連克江皖之彭澤望江東流銅陵等縣并六月童司牌大捷慶衍無役不從敍功擢參將并換花翎八年管帶湘勇貞中營旋率所部克復江西九江府城湖廣總督官文上其功詔以副將儘先補用是時湖南寶慶府城被賊圍攻甚急慶衍聞調入援力解重圍命加總兵銜十年正月隨大軍再征皖省大破援賊時太湖潛山二城久爲賊據慶衍屢戰得捷二城次第克復奉旨賞給巴圖魯名號以總兵記名簡放旋帶元左亨中強右毅右等營是時逆匪竄據德安府城屢攻不下慶衍會同副都統舒保併力圍攻於西北兩路分隊扼守七月賊衆數千由西北兩門竄出馬步官軍左右鈔擊賊衆潰亂官軍緣梯登城連斬守城悍賊共斃老賊三千餘名敍功賞加提督銜同治元年捻粵各匪合股圍攻潁州郡城勢甚岌岌慶衍渡淮來援進紮大橋集等處賊復號召巨股數萬圍攻慶衍軍爲以多勝少之計慶衍會同總兵成大吉等合力縱擊

奮勇抵禦無不以一當百逆衆驚潰潁州之圍以解命以提督遇缺題奏旋因會克巢縣含山和州三城賞頭品頂戴三年六月隨同浙江巡撫曾國荃督攻金陵用地雷轟開城垣二十餘丈慶衍與各統領身先士卒直衝倒口而入左路城頭之賊以火藥燒我士卒死者甚衆大隊稍卻慶衍手刃數人由是弁勇無一退者遂分途奪取朝陽洪武二門城上守陴城門守樓之賊及附近一帶賊隊悉被殲戮是役也慶衍功爲最多捷入賞穿黃馬褂并給雲騎尉世職是年十月因親老乞養回籍光緒十六年以舊傷觸發卒於家

袁昶

袁昶浙江桐廬人光緒二年進士以主事用分戶部先以舉人捐內閣中書歷充方略館國史館校對官九年考充總理各國事務衙門漢章京十一年春隨同吏部尙書錫珍鴻臚寺少卿鄧承修馳赴天津議法越和約十二年以總署期滿保獎俟補主事後以本部員外郎無論題選咨留遇缺卽補十三年充會典館纂修十四年三月又以總署期滿保獎免補主事仍以本部員外郎無論題選咨留遇缺卽補加四品銜六月補員外郎十五年記名以御史用十六年又以總署保獎

記名以海關道員用俟得道員後加一級十八年三月充會試同考官是年又以總署保獎以本部郎中遇缺卽補並俟得道員後加二品銜十二年授安徽徽寧池太廣道昶莅任嚴約僚屬痛抑胥吏詳詢民俗疾苦商旅利弊多所興革頒蠶桑之法於所屬州縣捐廉俸四千餘兩廣中江書院齋舍延聘院長甄取秀士分課經史義理掌故時務格致創建尊經閣購書數萬卷二十年中日失和長江戒警各國兵艦游弋皖江上下盜匪間起出沒不常昶力籌防警月捐百金爲倡募勇一營保衛教堂商埠並介稅務司商英領事令英艦碇泊江中犒以羊酒款以溫語輪艦兵弁悉就約束是年報效軍需八千餘兩賞戴花翎二十一年清釐關稅案內裁汰常關外銷公費等款歲萬八千餘兩悉數報部新關出口以穀米爲大宗方中日構釁時米禁甚厲事平英商輓英公使據約請開禁昶乃條陳大吏謂如遵約卽開因民利而利之足補江寧釐稅特定專條責成商董於商船運米出口時兼完全金陵釐捐每石銀一錢可完餉需公家歲羨米釐當數十萬兩輪船運米納釐實始此稅司領事頗有違言昶反覆開諭謂本關自取商民以裕餉源與彼此販運通商者迥異且恃此補助公益不者難議弛禁卒如議行蕪湖西南

圩隄濱江巨障也歲有衝決昶捐貲五千餘兩委吏督修自關亭至魯港延袤十二里塞決培圯隄防以固更穿築新縷隄三百七十丈砥以石橋翼以砌埽兩岸築斜坡以殺水勢中設陡門涵洞復拆修尙塘埤犁頭埤各處陡門以備水潦啟閉先後凡用夫六萬七千五百餘費木石萬計他料物稱是逾年始竣自是內湖外江圩垸所周田廬數萬頃蓄洩有資旱潦得無患二十四年四月擢陝西按察使五月擢江寧布政使先是朝廷以外侮日亟特諭各疆臣通飭地方官籌議練兵整餉諸方法核擬具奏昶修列時政二萬餘言由安徽巡撫奏上之略謂今日時局百孔千瘡外侮交乘內憂方大聖主宵旰焦勞於上大臣困心衡慮於下中外情形固已無微不至矣試先以外交情形言之諸國乘中夏之弊有覬覦神州互肆蠶食之志然揣其大勢俄與我自西北至東北壤地相錯其禍紆而大德聯日耳曼諸小邦其幅員不過中國兩省通國盡人爲兵皆陸隊其水艦不敷遠調自大將毛奇死謀臣畢士麻克退用事者貪利無遠識其重兵扼法境不遑其他餉力亦斷斷不繼今雖突據膠灣其禍急而小議者動言英倚印度爲外府其實不然印督駐噶理噶達兩年一換防權太重也印度部侍郎司員輒十年不易以

資熟手俾稔民情也養兵費計二千餘萬入不敷出北結阿富汗克什彌爾爲外屏資以軍火使北扞強俄俄撒馬兒罕總督駸駸有占帕米爾踰阿母河南牧痕都路之志英之立國形勢散漫鞭長不便控制三島孤懸於西人稠地狹新金山雪梨三省隔於南漠印度僅據孟加臘錫蘭二處餘皆羈縻而已而籌餉之源全仰經營中國商埔爲外府江海二十四關之商務英居十之六七各國與中國僅各居十之二英兵藉水師最多然餉重而兵驕久無戰事氣老而鋒鈍英人以中國之商埔爲命脈初志在保中國以保商務中日之役英覘日勢驟強而聯日亦以保商務故也今聞英有願借貸中國洋債一百兆鎊之說中朝似可乘機與之密訂聯盟立緩急互相保護之約借債以固邦交現卽欲通滇緬瀘州鐵路其意祇在通商決無逆取人國之大志而俄地人民壯佼將弁堅忍人人欲去寒就暖南下牧馬有囊括并吞之勢故兩大利病之機不可不審而締交之銜響應卽與之爲張弛此外交之綱要也日言甘而寡信然與爲同文之國近迫層輔亦不得不屈己忍耐示以大信法志在拓越南滇桂商務而止於腹省大局當無礙美雖與我訂有互援之約而兢兢自守養兵太少去我又遠緩急未可恃也獨俄人扼

我三陲布置漸密席卷勢成最爲鉅患造船咸鏡道之鹿屯島西水羅城我瑯春八旗久無出海漁採之口買呼蘭之糧以實海蘭之泡挖金粗魯海以斷額爾古訥河之口彼雖未造吉江兩省鐵路而我固已坐困矣俄又聯結車臣土謝圖二汗部買地建房種植稞麥淘挖肯特山克魯倫河一帶金礦竊嘗細詢總稅司赫德中國金沙出洋之數歲約值銀三千萬而蒙部北境及東西悉畢爾所出礦金居十之八九俄官給票坐收其稅出入蒙境蒙部反仰其餘潤以爲衣食俄運漢口磚茶年九百萬箱由天津張家口入草地賒賣與內六盟外四盟而取其畜產牛馬轉販於包頭巴里坤一帶蒙人貪餌爲其所愚弄俄又信用黃教以誘服之晉甘茶商在恰克圖張家口綏遠城等處者盡皆閉歇伊塔烏科一帶所有晉商甘商引地均被俄茶倒灌浸銷以致折閱大困所有載土貨只準一直回國不准沿途售賣之條約久成廢棄烏科庫倫之將軍參贊束手坐視莫可誰何然則我列聖所撫綏臣屬蟬延婚媾不侵不畔之蒙喀四十八部將折入異域而爲朝鮮坎巨提之續金源因失北部南遷汴梁而遂亡其國可爲殷鑒故曰俄之禍紓而大也蓋合羣國於通商之區其患小而一國獨通商之區其害大形勢然也同治

末督臣曾國藩李鴻章等咸議畫嘉峪關爲守英人且爲安集延逆酋帕夏代乞朝貢爲通商附庸之國故大學士文祥諍之曰今之邊防與明九邊大異國家恃蒙古喀爾喀部爲外屏無新疆則蒙古攜貳是無外屏也故新疆不可以不力爭疆臣左宗棠奏畫進取之策意見相同廟算既定膚功遂奏故知立國形勢惡可不深維至計哉今俄人誘脅哈薩克布魯特回部以擾我天山之北土爾扈特厄魯特諸黃教之部落又準行回黃兩教以爲之餌西北噬臍之患非一日矣然以目前論海戰之患促陸戰之患紆俄大國也守其先比達王之教無驟起釁端之理又感我聖祖兵拔雅克薩响育不殺之舊恩列朝開庫倫尼布楚市場之大惠目前尙可情曉理論粗得相安宜及此時請敕四省大吏烏科伊塔將軍大臣經營晉陝隍隴次及安西南北路天山南北路而建陪都於關中備西巡狩行在所預練蒙古烏梁海厄魯特土爾扈特及駐防之錫百索倫馬步隊以樹控制蒙哈鞏固外屏之形勢則立國之本百倍於遼庶不至爲亡金之續矣又請敕東三省將軍練鄂倫春達呼爾黑斤諸部兵痛改奉吉奢華風氣大布之衣大帛之冠務爲儉約返國初真樸之俗乃能作勇敢之氣則海口雖割於俄我尙可以守險

自立據松花嫩尼鴨綠三江林木蕃茂濩貂部落之地國險而民固猶不失如汴宋之畫鄭州兩淮而限戎馬之足可保百年粗安無事也目前物力兵力不能議戰要不可不議守玉帛接於境外通好聘問覘國之行人妙選通才是爲示暇之閒著講求邊防就地練兵以屏衛圻疆無事如有事時隄防有事如無事時鎮靜是爲示整之要著此外交之大略也若夫海防之事自銘盛兩軍喪師而海軍燔自丁汝昌林泰曾劉步蟾辱國而海軍全沒今祇有南洋之開濟南琛南瑞寰泰保民等六艘不足以守一隅遑議戰乎中國徒恃名法爲治漢至唐用名法尙有實際故夷狄尙不得乘虛入踞中國宋至明專用名法空論多而實際少故金元崛起之勢皇朝節制之師得乘其敝而屋其社我朝八旗初制文武不分途京外不分途人皆兵官皆將故人才盛而國勢強以之勝前明重文輕武重京輕外積習自弱之國而有餘然承平日久文墨吏用事大小相牽制中外相維繫習爲謹蒞雷同相依文法繁密朱出墨入百吏救過不暇吏胥又因緣爲奸議者謂治民之官少而治官之官太多防弊之意多而同心協謀以致富強之臣轉少用文吏則銓部覈其資勞拔將弁則兵部司其准駁理財用則度支扼其吭喉舉天下文

武豪傑之精神才力盡消磨於文法之中於是相率爲鄉愿啍啍蹈規矩謹守三尺法曰吾循資坐得陞擢不求有功第求無過而天下之人才靡矣求將才邊才日稀矣金田洪楊之亂其始一小民耳猶窮天下之力僅而克之況歐美俄日諸國本與我爲敵彼用簡而直之法以善馭其民上下一心我用繁而曲之法上下之氣隔閡人人渙散以彼鯨吞蠶食之心十五使館翕集京師伺肘腋之地揣摩稔熟有不乘敝而攻吾之短者哉故日遼之戰海軍全燬國勢驟削從此藩籬全抉沿海之禍不僅膠州一役而止此挈餅之士皆知者也尋厥顛危之由蓋繇宋金元明以迄我朝革命不革政率以用文法太密而弱歐美俄日因利乘便皆以用文法疏闊而強且我太宗文皇帝營遼瀋服蒙古察漠之日八旗五大臣十大臣議事之制何嘗不以疏節闊目取天下乎俄人占帕米爾之役我使許景澄諍之外部外部云此事我邊將撤拉納福主之不能遙制俄之專任闕外不拘文法可知若我之邊將如此則久以跋扈不臣朝詰而夕斥之矣試易地觀之成敗之數可知也嘉道之間文法愈密養兵愈多而國益不競其時實由諸臣習爲忌諱京外雷同是非相蔽羣邪朋比於下大君孤立於上而致庚子至癸丑間禍遂起

於兩粵蔓延流毒垂四十年咸同之際擢用忠清鯁直者分任中外大臣捐棄文法事從權制芟夷大難遂致廓清其效可觀已卽以外交之機宜論聖祖諭圖理琛以使邊召見俄商以通市擢用降將林興珠面試以滾牌滾被之術雅克薩之役用林爲前鋒世宗召見俄使於太和殿度時勢以爲銜轡方略具在何嘗如後來之因循文法坐失事機乎伊籐博文於光緒十一年立兩國均不派兵駐朝鮮如派兵必互相知照之約三條而北洋總督遣葉志超時未及理會前約日人遂以背約責言借端尋釁然牙山之衄日僅索兵費三百萬尙易隱忍歲事平壤之衄驟漲至千萬其時猶可議媾我軍黔驢之技敵人猶未盡見其破綻也而二三新進躁妄之徒爭獻景延廣橫磨之策大臣從容雅步惑於蝸蟻之論無一人爲廟堂陳蜂蠆之有毒淮軍之積弊萬不可恃者嗟乎中國非亡於外夷乃亡於名法耳夫敵國外患爲殷憂啟聖之資苟百官六職疆場之吏惟賢才是任毋拘以文法旣得其人籌餉練兵之政邊備海防之要自可次第就理然則外患乃皮膜之病耳固以自治爲之根本爲之樞紐哉竊謂朝廷旣圖發憤自強國恥足以興物恥足以振宜因時立業據勢爲資進固上規周宣漢光之中興次亦俯視章武

建炎之事業不當拘守常格坐困繩墨以爲當議改制之事六官人之事九理財之事十四練兵之事四交鄰之事六其餘次第節目當損益舊章因時制宜庶可日起有功作海內更新之氣所謂改制之事六一訓練八旗人才一裁汰冗員一地方官參用紳士一督撫委署道州縣吏部權宜勿定限制一取才官人宜隨器授任毋求全備一捐納宜速停官人之事九一大臣宜畀敷歷中外之任週知事變以贊機宜一疆臣宜假以節制專斷之權廣樹形勢以資拱衛一求吏治筦權之才以釐內政一求邊才將才以扞牧圉一求堪任風憲之才以樹朝廷耳目一求專使絕域之才以通知四國之情一以書院學堂培養人才一以課吏局考察庶僚一申明賞罰隨方舉劾理財之事十四一詳考國初以財用奇絀而興近日以財用多入而弱故國本之盛衰繫乎政之奢儉不關財之盈絀一權理財之名實取之農不若取之商一清理屯田一折南漕一開官銀行一嚴查官輪兵輪稽稅杜漏一加重川鹽課一禁金銀制錢流出外洋一議官設公司行內河小火輪一議官運場竈鹽仍予子店商銷亦如公司法一電綫局納稅一密鈔著名貪贖之吏一行印花稅一借洋債練兵之事四一將才在平日教養始成兼須糜以恩

信一兵陣宜變法一劣弁舊勇不可用一槍械宜各營一律交鄰之事六一出使大臣當重其選一西才中可用一覲見各使之外或予隨時召見一西國有大典禮不妨遴派親郡王貝勒往聘以昭鄭重一自開口岸無甚流弊一潤色教典以招徠之得旨著軍機大臣會同各國事務大臣議奏尋復奏袁昶條陳內請籌八旗生計出使日記申明定章請權理財之名實清理屯田嚴查官輪兵輪稽稅杜漏加重川鹽課禁金銀制錢流出外洋各節均諭飭京外各大臣議行八月調補直隸布政使旋賞給三品京堂在總理各國事務衙門行走二十五年二月補光祿寺卿六月轉太常寺卿會詔下六部九卿會議籌餉理財之法昶條陳整頓釐金六事曰請敕慎用賢員以祛積弊曰綜核比較以重權課曰各省物產衰旺不同當隨地制宜考察整頓曰外銷公費款項不妨臚列報部仍請敕部臣勿掣疆吏之肘常關弊習尤深亦可照此辦理曰酌復坐賈落地捐以抵制洋票漏卮並應量百貨輕重定簡章擇正紳巨商辦理一律懲勸酌減行釐以示招徠曰定劣員司巡侵漁之罰宜寬商去苛省官益糈並敘次歷年比較大數上之而極言釐金爲用兵以來萬不得已之舉明病商暗病民又片舉廉能之員可主關權者程

儀洛王秉忠朱采樊增祥湯壽潛勞乃宣朱之榛童祥熊文梯凡九員謂使權道府兼治稅釐必有可觀二十六年五月拳匪事起兩宮嘗召見王貝勒大學士六部九卿昶皆與焉草疏略謂義和團不可信公使館不可攻會欲上而爲首禍諸臣所陷七月初三日與許景澄同棄市是年十二月奉旨開復原官二十七年詔錄用子嗣宣統元年三月賜諡忠節是年浙江巡撫請建徐用儀許景澄袁昶三忠祠於本籍祠成又請列入祀典二年兩江總督奏已故太常寺卿前安徽徽寧池太廣道袁昶功德在民請於蕪湖建立專祠均從之子允櫛陸軍部主事榮奕學部員外郎

蘇元春

蘇元春廣西永安州人父保德廩膳生成豐元年賊陷永安保德率鄉團禦賊被害州人立祠祀之元春矢志復讎同治二年由武童投效湘軍從統領席寶田剿賊於江西以功獎六品尋克陶家渡賊壘殲都湖踞逆固守彭澤縣城論功以千總儘先拔補並賞戴藍翎是年管帶中軍解青陽縣圍十月奉旨免補千總以守備儘先補用四年官軍收復崇仁東鄉宜黃南豐鄱都各城元春皆從與有功奉

旨免補守備以都司儘先補用並加遊擊銜賞換花翎旋以翦除湖逆功奉旨免補遊擊以參將儘先補用五年赴廣東會剿克復嘉應州城粵賊蕩平凱撤回籍六年貴州按察使席寶田以苗疆不靖黔軍不能制調湘軍討之檄元春領中軍破教匪於荆竹園捷入賞給健勇巴圖魯名號進剿苗匪連破頗洞德明臺網臺笠及寨頭老巢奉旨免補參將以副將用並加總兵銜賞換銳勇巴圖魯名號八年二月分統右路各營連破苗巢並克復鎮遠府衛兩城奉旨免補副將以總兵記名請旨簡放復以攻破白神坳內寨大營反號董敖白所公鵝各堅屯克復清江廳城並掃蕩鎮遠各寨襲破施秉縣城奉旨遇有總兵缺出儘先題奏並加提督銜三月提督榮惟善等在黃飄陣亡元春以援救不力奉旨革職九月進攻勝秉元春率前路四營與提督龔繼昌魏光彩等包鈔夾擊賊敗走遂克勝秉城並燬城外巫信貴籠涼風坳各屯匪首糾悍苗數千人來犯元春率兩營伏於左右各營且戰且退賊長驅驟進兩路伏兵突出龔繼昌等回旗奮擊賊翻山狂竄陣斬僞將軍徐報槩等五人乘勝遂將平塘坡平扒巫門各賊卡次第掃蕩捷聞復元春原官並賞還花翎勇號九年三月攻克施洞口老巢乘勝進攻九股河賊壘

並燬榮山廣福各屯奉旨賞換法什尙阿巴圖魯名號十月破羊條各寨連拔革夷三丙賊巢克復台拱廳城進攻箕頗敗逆首金大五於斬麻乜賊竄銅仁我軍追及之於掛口場夜三鼓賊方爲炊元春派部將陳嘉鈔場後截其去路自率唐占宙等由場前衝入賊驚棄械走陳嘉等自場後蹙之伏尸塞路我軍乘月窮追陣斬逆首報槍往江養巫生等誠七百餘級奉旨交軍機處記名遇有提督缺出請旨簡放十年以克復丹江凱里各城功賞穿黃馬褂是年冬總辦全軍營務處埽除黃飄白堡苗巢疏通驛道諭部優敘十一年三月湖南巡撫王文韶檄統毅新水陸各營四月破烏牙坡老巢生擒僞大元帥張臭迷僞平陽王楊大六及賊目姜老拉潘老冒陣斬九大白巖大五等酋苗疆肅清奉旨賞給雲騎尉世職尋率所部分駐貴州之鎮遠凱里施洞口火燒寨及湖南之沅晃等處攻拔興義府及新城各城肅清上游削平各路堅巢並剿滅下江古州丹江等處逆匪全黔底定光緒元年正月論功賞給頭品頂戴因傷免騎射二月破四腳牛逆巢殲除六洞竄匪奉旨賞給應得封典是年改鎮河水師爲陸隊分駐黔防四年五月移駐辰州八月駐晃州五年駐羅子山六年剿辦江華縣滋事猺匪擒獲首犯趙才貴

等並捐貲購米撫恤事聞賞白玉搬指小刀火鏢大小荷包等物七年駐永州三月丁繼母憂奉旨賞假百日仍回湘統帶南路防營十年法人擾越南廣西巡撫潘鼎新調元春赴粵中途剿辦思恩縣土匪莫夢弼等事平諭部優敘五月署廣西提督七月督率毅新鎮南各營進駐越南之堅老谷松八月乙卯與法人戰於陸岸縣擊毀法船一艘賊在北岸者斬殺殆盡並夷其南岸礮臺己未法船駛至船頭水路兼進元春與陳嘉分兵禦之鏖戰數時斃敵甚衆各營亦日有斬獲詔以元春力戰屢捷奮勇可嘉命幫辦潘鼎新軍務尋以元春勇略冠羣予騎都尉世職並賞給白玉翎管搬指等物十月進攻紙作社時法人沿江爲壘我軍設伏誘之夜四鼓元春率毅新六營伏左旁深林內總兵黃雲高率淮軍四營伏右旁僻澗中距敵壘各里許提督陳嘉自堅老直出平內挑戰法傾壘出禦戰方酣元春率伏兵齊出短兵相接斬法酋四名法兵一百八十餘名馘首十一級受傷者無算時有五畫法酋爲我軍擊傷墜馬法黨掖之而遁咸相顧奪氣十二月法酋復率兵萬餘糾合教匪麻邪等衆由船頭進堅老猛攻陳嘉軍嘉裹創力戰法終不退旋以大股進犯谷松元春戰不利退駐威坡法復進逼之元春血戰六晝夜

士卒損傷甚多遂焚諒山城退駐巴坪文淵州一帶十一年正月法人犯巴坪我軍擊走之進攻文淵總兵楊玉科中礮陣亡法乘勢入南關元春等退駐幕府巡撫潘鼎新與元春謀乘夜挑小隊繞關掩襲法人一夕數驚明日元春與提督馮子材布政使王德榜合軍進攻法人棄關走我軍復得南關二月馮子材出關襲文淵法人分兩路包擊元春率隊援之法不敢深入我軍始收隊入關戊寅法人分三枝攻關前隘馮所築礮臺四座法奪踞其三居高臨下然礮對擊馮軍幾不支元春督隊登山衝入第四座礮臺與法人鏖戰竟日殺傷相當是日有旨以諒山失守革潘鼎新王德榜職命元春督辦廣西軍務己卯法復分三枝來犯我軍亦分三路應之令陳嘉等當左路王孝祺等當右路元春與馮子材居中憑牆扼守分布甫定法人已結陣而前以開花炸礮向中路長壕轟擊自己至申礮子不絕如雨各軍靜伏壕內法軍見卡內寂若無人疑我軍皆已潰退偪至壕前我軍齊放排槍前敵礮仆皇駭遁走元春與馮子材懸重賞乘敵人慌亂突開卡門大呼擁出各軍內外夾擊陣斬法酋十餘名法兵百餘名教匪千餘名其攻左右路者亦爲陳嘉等所敗奪回礮臺三座法人奔還文淵我軍乘勝進攻法望風敗退

馮子材王孝祺等遂入文淵元春繼至探知法人仍踞驅騾墟堅築營牆爲持久計乃乘其喘息未定奮力驅逐約於甲申日各軍進巴坪會剿至期法酋復率黨萬人犯巴坪別以二千餘人乘霧往襲王德榜板坭之營我軍分三路迎擊法亦分三路接仗中路之賊直抵界排勢甚凶猛相持兩時久兩路伏兵齊出元春與馮子材躍馬入陣將士蜂擁而前法隊奔潰退入驅騾墟中襲板坭之賊亦爲王德榜擊敗攻奪先鋒壘兩座直偪驅騾北街次日我軍分隊進攻法列隊相待炸礮逼碼密若飛蝗陳嘉於礮子叢中飛身突陣蔣宗漢方有升左右夾攻法黨棄壘狂竄我軍追入驅騾墟中法黨仍回身死鬪將弁陣亡者數人各軍奮勇窮追法黨斃水而逃中槍落水死者無數城賊畏勢不敢出援惟拆毀浮橋以阻我去路我軍涉淺爭渡追至城下法黨開北門竄去遂復諒山省城追至三臺渡截殺逃賊甚衆連日搜索逋寇時有俘獻尋攻屯梅觀音橋谷松克之滇師亦奏捷會津門議和元春等撤兵入關三月命督辦廣西邊防五月實授廣西提督詔以元春屢獲大勝調度有方由騎都尉世職改爲三等輕車都尉世職並再賞給額爾德蒙額巴圖魯名號由是疊蒙賞賜福壽字及珍玩物十六年正月恭遇德宗景

皇帝萬壽慶典賞加太子少保銜二十年正月孝欽顯皇后六旬萬壽加恩改爲
二等輕車都尉二十一年七月兩廣總督譚鍾麟調元春辦理遊匪措置得宜傳
旨嘉獎二十二年四月法國贈給三等榮光寶星有旨准其收受佩帶二十五年
四月入京陛見賜紫禁城騎馬旋奉命往廣東廣州灣勘辦界務事竣回防部署
將率隊馳赴江南尋以廣西邊防緊要伏莽未淨命馳回廣西經理防務二十七
年調補湖北提督二十八年仍署廣西提督九月實授二十九年署兩廣總督岑
春煊奏稱廣西匪勢蔓延元春養癰成患貽誤地方閏五月奉旨革職旋又劾元
春縱兵殃民缺額扣餉六月奉旨拏交刑部治罪三十年正月奉恩詔查辦官犯
由刑部奏請減等改發新疆效力贖罪照例追贓復由刑部查明被參侵吞之款
皆係因公挪移且有應領之款可以割抵奏請免其勒追卽行發往新疆三十一
年十月抵戍所時甘肅新疆巡撫聯魁以元春老於軍事令督練所司道與之研
究訓練元春無間寒暑時單騎追隨出入軍隊與弁兵口講指畫臨機應變如當
大敵遇有討論陣法者必舉從前身經戰事言之三十四年兩廣總督張人駿奏
請保全元春末路奉旨釋回十一月卒於迪化寓所巡撫聯魁奏稱元春身經百

戰屢受創傷背上及左膝蓋兩彈皆深陷骨裏因閱操感寒觸發舊傷遂至不起爲將數十年不事家人生產薪俸所入盡以分贍部曲出關時行李蕭然別無長物身後無以爲歛僅餘親生一子蘇承賜尙未彌歲一切歛身之具皆官爲照料朝廷軫念前勳宥其既往可否量予加恩奏入宣統元年正月詔復其官

劉恩溥

劉恩溥直隸吳橋人同治四年進士改翰林院庶吉士七年散館授職編修十二年九月記名以御史用光緒元年大考翰詹列二等賞大卷紬袍料一疋二年五月充教習庶吉士六月充江西鄉試副考官十二月差竣回京三年六月補浙江道監察御史七月恩溥奏參捕蝗不力各牧令又以雨澤愆期苗稼枯槁糧米昂貴飢民聚爲盜賊直隸武強縣有砍刀會匪千餘名在景州阜城武邑棗強衡水饒陽一帶肆行搶劫地方官形同聾瞶霸州通州固安等處亦均有明火拒捕路劫之案地方官規避處分偪令事主改盜爲竊請旨速敕查拏以靖奸宄上可其奏是年直隸保定以西河間以南旱蝗相乘災區甚廣恩溥乃就當日時勢能舉辦者酌擬數條上之一曰借款平糶於津省庫款中借動二三十萬購糧分撥災

區源源平糶至麥熟爲止一曰分地勸貸略仿朱子社倉之法每州縣設公倉數處勸諭紳富出穀存儲貸於貧民俟秋收後令加息償交公倉一曰井工代賑廣興井工勸富民出貲倡辦以養窮民而得沃壤又以山西荒旱由於廣種罌粟穀產漸少奏請禁種罌粟詔令巡撫曾國荃認真查察一律禁止九月以恭纂穆宗毅皇帝實錄全書過半經監修總裁等奏請獎敘奉上諭御史劉恩溥作爲歷俸期滿並賞戴花翎四年二月恩溥奏陝西至甘肅各站州縣支應經過大吏差使所費動輒數百金皆係攤派貧民約加正賦數倍疏入上立詔該督撫嚴飭各州縣嗣後支應不得攤派民間經過該驛站大員亦須約束家人不准濫索供應又以陝西省至臨潼五十里間水失故道奏請疏治灞澮俾達渭河並以工代賑得旨著該撫查核辦理先是上以北方各省旱災頻仍民食缺乏詔令興辦水利事務恩溥乃奏請濬直隸河道以爲水利爲救荒之本而興工代賑亦荒政之一端直隸南路嗷鴻徧野賑不勝賑所以存活之者莫如興工代賑先治濬沱其辦法有三一關治河以分濬沱水勢一塞改道以復濬沱故道一治子牙河黑龍港河以疏濬沱下游又慮費不易集奏請於新淮鹽斤加價二文提作商捐以爲直隸

水利經費京師向設粥廠收養貧民外來就食者日多一日領粥之人太廣每日竟不得一飽其桀驁者甚至沿街搶奪恩溥以爲其事可惡其情可憫若不速籌安插早爲懲創輦轂之下白晝卽有戒心請旨敕下步軍統領衙門順天府五城擇寬大廟宇或閉關之鋪而房間分撥收養上令各該衙門會議具奏恩溥又以種植罌粟山西受害最深近聞直隸山東奉天吉林一帶皆有栽種罌粟之處若不及早剷除恐相率效尤再蹈山西覆轍奏請敕令各該督撫將軍嚴加查察又以甘霖未沛奏請速將米糧釐稅概予裁撤以期早迓和甘是年丁父憂開缺守制六年服滿七月補授河南道監察御史未幾丁母憂服滿八年復補河南道監察御史恩溥以各省武職人員請免騎射取巧者多奏請敕部妥議章程嚴懲取巧下兵部議奏又以滿漢文武大員以及翰詹科道其中多有漸染嗜好之人奏請除錮習以肅官方如有吸食洋藥者勒限三箇月概令禁斷奉旨嚴行申儆嗣後文武大小各員如有吸食鴉片者務當痛自湔洗倘再陽奉陰違一經發覺定卽嚴行懲辦九年正月恩溥赴午門前查班是日坐班人員無一到者及時享太廟恩溥往收職名投遞者僅數條陪祀者四人恩溥因奏近來陪祀坐班各員曠

誤甚多請敕整頓諭曰壇廟陪祀及常朝坐班典禮攸關豈容任意曠誤著禮部查明舊例通行各衙門嗣後如有無故不到者卽由查班御史奏參恩溥又以翰林院爲儲才淵藪近來翰詹坊缺異常疏通奏請特頒諭旨大考翰詹以拔真才而資治理又以荒政經費支絀請敕各省酌提釐金解部專作備荒經費下部議奏先是恩溥奏參給事中張觀準內務府大臣俊啟劣跡昭著請旨懲處上派吏部尙書廣壽會同都察院堂官確查具奏奏上以張觀準向俊啟借銀二十兩微詞恫喝並有迭承雅意之語而俊啟覆函拒絕亦自稱素有熱腸仍不立時舉發是平日財賄交通已無疑義報聞上立褫張觀準職開去俊啟內務府大臣差使交部議處已而內閣侍讀學士文碩奏請釐正奏議體裁指斥恩溥附片褻慢不倫上命都察院堂官議奏尋議文碩曲爲牽合未知科道風聞言事體格獨寬至劉恩溥彈劾俊啟劣跡以是否昭著爲定今查辦旣已得實該御史卽屬敢言從而議其修詞之誤夾片之疵過於深文曲筆且似爲內務大臣代鳴不平者其亦昧於擇言矣疏入上諭文碩所奏著毋庸議五月轉貴州道監察御史是時法人占據越南有窺我滇越意思恩溥奏言法人之志非僅在越南已也雲南鑛苗極

旺法人垂涎已久借保護越南爲名而實爲侵併雲南起見中國卽不與法爭越南法亦豈非中國之患哉越南爲中國藩屬歷年久遠其地與粵西之鎮南關滇南之迪化江接壤法國遠隔重洋土宇與越南並不相接安得收其租賦而卽有其土地李鴻章現駐上海似須邀英美各國據公法以與之爭卽法人不見從而我義正詞嚴各國亦斷不能曲中而直法如該國罔有悛心則是法人違背公法棄好尋釁並非兵端自我而開師直爲壯一鼓而前自有仁者無敵之效且中國製造輪船購買槍礮不惜數十百萬之重貲者凡以爲攻戰計也請敕下諸大臣密籌速計思患預防勿鄙爲喜事之談勿視爲不急之務勿自餒其志氣而長凶燄於燎原勿甘蹈於因循而示外洋以孱弱再近來雲南有戕殺教首一案若法人以保護傳教爲名移兵入滇其格外要挾可想今此案甫起適值法兵被困於劉永福不暇兼顧倘乘此時機聲罪致討法必乞和將來辦理此案決其萬不棘手時東省頻遭水患待賑孔急上命游百川陳士杰迅速籌賑恩溥以爲該撫等接奉恩旨不過酌提款項杯水車薪何濟於事請敕下戶部本年有津貼京官一議各省允解十餘萬金各京官近來法廉交勵急公慕義者甚多若將此項津貼

儘數捐出作東省賑項由部撥墊匯交該撫認真撫恤似亦救急之一策也陝西巡撫馮譽驥不能屏絕餽送不知約束家丁信昵同知張兆鎔知縣汪鳳溥等招搖聲氣恩溥上疏劾之上派額勒和布等前往查辦尋查明奏上交部議處馮譽驥革職貴州學政孫宗錫考試安順府時輒因供給將普定縣知縣彭億清之子鎖押並索取童生規費濫責生員龍登衢復因考棚朽壞勒索各新生捐銀修理恩溥上疏劾之上命雲南總督岑毓英查奏奏上上褫孫宗錫職大理寺少卿劉緒衰庸貪鄙衆望不孚恩溥請旨勒令休致上如所請行編修林國柱於光緒五年丁憂服闋先期請咨希圖考試試差經吏部駁斥仍於吏部散卷時面求收考得與考試恩溥上疏奏請查參上交吏部查奏奏上詔依部議革職滿漢科道人數衆多賢否不齊間有私作摺底借名撞騙情事恩溥奏請明諭中外以儆刁風上詔此風斷不可長諭令嗣後如有攜帶摺稿向人恐嚇者准其將原人原稿送地方官從嚴懲辦恩溥又參倉場監督恩緒勾串花戶崇文門監督瑞聯之家人勒罰銀兩皆奉旨查辦八月法使脫利古乘兵船來京聲言將以大隊兵船至廣東尋釁恫喝要求詭計叵測恩溥於是有法人恫喝請速賜宸斷之疏其言曰法

人自被劉永福痛殲計不能逞遂有遣公使來京恫喝譯署之事譯署向來因循遷就早已爲其窺破若再蹈覆轍使法人紅江通商則萬不能保滇粵使劉軍讓出保勝則萬不能固藩籬中國一意遷就不但法人得步要挾無厭恐他國亦將羣起而侮我矣伏望密敕兩廣總督將粵東之西江及虎門蕉門崖門螺州門虎跳門凡可入粵之路密爲布置并敕南洋大臣將鎮江狼山各要隘添撥兵船嚴爲設防使不能遽入長江更敕北洋大臣將威海崆峒各島凡法艦可以寄頓輜重之處一律屯兵斷其登州府各島之接濟責成李鴻章布置嚴密團練津勇於要衝潛鑿地道藏伏精銳該督自然天良激發振刷精神而譯署諸大臣亦當膽氣稍壯不至受其恫喝一意恐嚇我皇太后也國威之振在此一舉疏入上嘉納焉自黃河北徙南河漕督裁併所留廳汛無幾東河以關係運道仍循其舊恩溥奏請將閒款冗員酌定去留以裨實用又奏侍郎游百川所議防河疏堵分三策必須數百萬金方能蒞事至工成之後修防各費尙未議及若仍由民修則民力已竭若全由官辦則庫款不敷且亦僅顧目前能否永不潰決仍無把握臣聞美國美西士比河與中國黃河略同美人創用列陣圖之法奮勉赴功永除河患欲

求一勞永逸之法可否敕令出使之員向該國子細探尋以備採擇或僱用西人籌辦庶幾數千年巨患一旦掃除而廓清之尋又以畿南連年水患由於減河壅塞致運河之水不能分消請敕令直隸總督會同山東巡撫修濬兩處減河以拯民患又恐山東德州奸民阻撓乞敕該督撫通籌全局勿聽阻撓致貽畿南巨患並請遇運河水漲時敕令德州居民實力修防或撥兵勇協同修理期無害於直隸各縣爲上策是時京東永平各州縣水患甚大未見奏聞恩溥奏請敕查以蘇民命並劾直督李鴻章不請賑恤玩視民瘼請明頒諭旨將該督酌予懲處又劾李鴻章暮氣漸增貽誤大局凡事苟且敷衍一意見奸屬吏辦理海防將二十年糜費數千百萬半係調劑私人經略三省雖未奉有明諭中外業已皆知乃竟抗不前往以固守北洋爲辭而北洋則仍無把握始以金革勿避奪情而使署總督繼以署理總督而轉巧避金革國家安用此重臣爲耶臣不忍坐視其貽誤請另簡賢能加意整頓庶地方軍務均有裨益是年中秋節前內務府向戶部借銀十五萬兩恩溥以爲方今部庫存款入不敷出各省水患成災進款所虧甚多此而不思撙節何所恃而不恐耶查內務府每年入款約在百萬兩外應得平餘可八

九萬兩除堂司各官養廉不得過三萬六千之數餘盡歸公存儲以備要需自光緒二年至今約計不下三十餘萬兩此項原可動用何以竟向戶部借撥現在各處賑款及修理城垣圍牆各工程皆無所出似可移緩就急聽候撥用應請敕令內務府大臣先行赴庫盤查再將歸公奏案暨此項銷案詳加核對庶免隱匿侵欺之弊以昭核實恩溥又以已故大學士戴齡前官戶部時倚任劣員收受司官餽遺等情不宜崇祀賢良於是有大典不得濫邀之疏十年四月法人攻陷北寧又犯興化與我開釁時有法水師總兵福祿諾遣稅務司德瑾琳持函來請從中講解事聞詔命李鴻章通盤籌畫復令朝臣悉心妥議恩溥與給事中孔憲毅等密陳管見言和局不可恃者十端未敢勉強附和但恐李鴻章爲彼所誤朝廷復爲李鴻章所誤我乃決欲不戰彼非決欲求和彼雖明爲求和仍將終歸於戰李鴻章卽欲言和亦必確有把握乃可入告豈可游移兩可處處自占地步請旨詢問李鴻章是否確有把握再行酌辦越數日恩溥復以前疏有未盡之意且細釋李鴻章原奏覺議和之流弊無窮恐竟有損國體貽後患於是臚陳議和之流弊五條一宜保全劉永福法人所最畏忌者劉永福知非用間不能散劉團於是以

議和爲名議成卽率越南教民進攻劉團若劉永福退入滇越境內法人向我索取不與之則和議甫成又將決裂與之則自壞萬里長城再求如劉永福之效力行間不可多得矣一兵費不宜允付中國庫餉支絀商民困窮皆由開辦洋務而洋務之最耗財力者兵費若用之於訓練兵勇製造槍礮可以化弱爲強何必拱手與人致損國體一雲南不宜通商通商則雲南之人化爲教民者十之九倘有民教不和則法人以保護教民爲名率兵而來又施其越南之故智一曾紀澤不宜撤回法人與曾紀澤切齒最深倘召回內地則適墮法人術中以後駐法公使皆以曾紀澤爲前車之鑒必將甘爲法人鷹犬一越南不宜盡付法人若將越南讓法則中國得一強鄰其患尙小所可懼者英俄日本皆知中國無能爲役自安弱小將見暹羅緬甸廓爾喀高麗等國卽陸續爲其吞併耳再從前髮逆猖獗李鴻章運謀決策卒建殊勳今則身家念重忽變而爲保全爵祿之思國體之是否有傷後患之未來方大概不慮及仰懇嚴敕李鴻章整軍經武實力講求作一必戰之勢予一可和之機操縱在我庶朝廷不爲法人所挾制矣無何中法所訂簡明條約法使藉口法文與漢文不符尋法兵又攻撲我軍於粵恩溥上疏以爲法

人甫經議利旋即稱兵誠屬普天同憤之事此時整旅出師固其宜也惟我軍向未接仗猝遇大敵恐致駭懼遁逃謹就管見詳細臚陳一嚴紀律華兵之在越南潰遁即因軍律不嚴請敕諭各路統兵大員嚴禁騷擾有犯必懲勿徒以空文誥誡了事如遇敵人敗北委棄輜重一概不准拾取以防中彼奸謀至兵丁之吸食洋煙者及早遣撤勿令濫竽糜餉以致失事一勤訓練現在洋人所用之開花礮田雞礮等類最利攻堅以向來未經戰陣之人驟遇奇險鮮有不潰逃者應請敕諭帶兵大員凡紮營處所皆宜逐日訓練以練膽爲第一要義但使礮火至前有深溝高壘以蔽之並不驚駭潰散俟洋兵前進我軍或用伏出奇或偏師分擣殺一名即少一名其子藥亦萬萬不能接濟我軍有不打勝仗者無是理也一明賞罰洋人餉糈優厚我軍所食錢糧相形太少現在帑項支絀萬不能添放多餉惟有於各兵勇剴切曉諭凡有殺黑鬼一名者賞銀數百兩殺其兵弁頭目者倍之打勝仗一次犒賞銀數千兩兵勇見利則不貪生此鼓勵之善法其臨陣退後立斬以徇雖將弁亦不稍寬貸賞罰明則兵勇悅服惟在統領之存心公正無偏徇而已一示體恤每一接仗必有陣亡之人洋人之死於陣前者皆拚命搶去受傷

者皆昇回調治我軍向來統將陣亡尙有奮力搶回者至兵勇則委棄不顧誠使統兵大員加意拊循同甘共苦各兵勇自有固結莫解之勢現在盛暑遄征尤宜多備藥餌優加犒賞立功者立予拔擢陣亡者立予請卹受傷者趕爲調治按期發餉毫無短少譁潰之虞自可免矣六月法使照會總署有請和意頗多要挾恩溥上疏劾李鴻章師心自用貽誤大局略謂法人向我議和時諭李鴻章通盤籌畫李鴻章膺斯重任自當博訪周咨不貽後患乃甫經換約法人頓食前言仍行婪索李鴻章之有意欺飾顯而易見劉永福奮力殺賊中國統兵大員對之愧死無地李鴻章一味獻媚洋人不思保護劉軍謂中國之於劉永福也不必過問且恨其阻撓和局是天良喪盡毫無人心已可概見此次如將兵費索去法人必與劉永福爲難劉軍如勢不能支退至近關處所中國不令之入關不但寒天下忠義之心且與歷次保護劉永福之諭旨自相矛盾請嚴敕李鴻章於不索兵費保護劉永福二條妥議奏明辦理越日恩溥復疏陳管見謂法人前次約內第三條明言不索兵費甫經數月頓食前言賴宸謨堅定法人亦知中國萬不肯遽付重款乃以撫恤傷亡爲名其名曰較兵費爲正其銀數較兵費爲輕在中國撫馭遠

人未始非羈縻之法惟臣子細籌思流弊滋大一此次開仗中與法之兵互有傷亡法人索中國撫恤不知中國撫恤可能向法人索要否不能是中國兵勇之命不值一錢誰復肯效命於行間此不可付者一也一中國敗則必要兵費中國勝則又要撫卹是無論勝負中國皆須耗此巨款此例一開若中國與他國開仗幸而獲勝他人必援照法人索要撫卹中國之貧何以補救此不可付者二也一中國若允其撫卹之請從此可以無事即隱忍予之猶可保境息民惟法人變詐百出倘既得撫之後即憑藉此款與我爲難借寇兵而齎盜糧莫此爲甚此不可付者三也一中國口岸太多防不勝防之故以船礮未能廣爲購買所致若以此數百萬金撫卹之費作造船鑄礮練兵養勇之需豈不大妙何必博慷慨之名蹈困窮之實此不可付者四也以上四條務望敕令在事諸大臣堅持定見嚴詞拒絕大局幸甚是時法人要索賠款中國在事諸大臣有主張息民保境以允之者恩溥又上疏曰法人違約稱兵藉詞需索普天之下凡有人心者無不痛恨切齒但不允賠款非口舌所能爲功苟欲長治久安固吾疆圉自宜迅速進兵痛加攻剿方爲此時第一要義或謂法人船堅礮利所向無前中國萬難與之抗衡不如持

重待時冀收後效不知我軍長於陸戰但令法兵登岸卽可以殲除粵捻之法攻打法人俟其窮蹙求和我仍大度包容不與較論各國聞之自然畏威懷德或謂攻打洋人與削平粵捻迥異粵捻平後腹地廓清便可無事法人則喪師敗績必圖大舉不如稍予卹費可以保境息民不知法自拿破侖第三被僇之後未敢再向德人興拜賜之師何獨於中國無畏懼意且該國兵餉過重若真以四萬人來無論餉無所出卽煤米淡水子藥等項亦不能源源接濟祇須持至三四月必暗倩他國轉圜求和矣或謂兵燹旣開中國餉源不能籌此巨款不如酌予賠費不知開仗則無此巨款何以賠費又有此重貲借債之說臣向不謂然然當此危急之時與其以千萬金拱手而授之何如借千萬金奮力而剿之俟兵事平定由各海關加息陸續歸還似亦可行事已岌岌不可再事遲疑仰懇密敕各路迅速進兵同時大舉洵爲萬全勝算上以和戰兩端均未可輕易從事詔在廷諸臣熟權利害會議具奏恩溥與給事中孔憲毅等疏稱和戰二字自有一是均須操之於己倘人曰戰則調兵人曰和則償款將戰無已時和無已時而償款亦無已時如此而事克成者未之有也計惟有戰而已因言可戰者十端上之恩溥又另疏具

奏云昨臣閱看法人照會有以雞籠作押款分作十期還清等語查法人自同治初年與越構釁責償軍費逼令越南以三省租賦署卷十年加息抵之至償租期滿竟敗前盟現在計取雞籠爲質欲分作十期還清是又以愚越人之故智愚我中國此等詭計萬不可從目前之利害償費則害輕開仗則害重然開仗未必卽敗亦未必終於不勝面子之害似重骨子之害實輕計後日之利害各國效尤中國不能支持償費之害重於開仗兩相比較直是有利無害並不得以輕重論然則無論爲兵費爲撫卹均不可付也明矣至兵餉各事宜目下諸大臣藉口餉糈支絀不思進兵迅速先發制人但期美國調停法人轉圜敷衍了事所謂轉圜者仍是賠償卹費牢不可破之成見也河工雖係民命所關較之軍務尙可從緩京餉雖係固本急需然部庫尙不至遽形拮据可否將此二項先行借作軍需之用近閩省分如浙江江西安徽其一切進款半留本省半供閩軍所需各項解款均暫停解將來將應解京餉數目或可劃清作抵萬壽慶典暨內務傳辦各件費亦不貲皇太后以儉德爲天下先可否將此項借作兵餉京外官員廉俸津貼各省局員薪水均請暫發一半其一半借作兵餉事平後再行一一籌補總之進兵之

要同於拯溺救焚若遲延不決靜俟轉圜或俟其前來攻打方與一戰恐所失者不止一雞籠矣須早行封禁海口方是正辦不得仍令該兵船游弋致中詭計當是時法人恣意要求美國出爲調停又復不允勢不能不以兵戎相見七月初二日恩溥乃上先發制人之計其疏曰法人凌夷我藩屬騷擾我邊疆百計要求多方恫喝豈真欲與中國爭勝負哉不過欲得重貲歸耳臣聞法國在東京所用兵費照議院核准之數溢出三百六十餘萬議院遂有此後不得再加之語是其庫款空匱餉源不繼之一證也東京之船悉赴中國留守之兵患症者多兵力亦弱兵心渙散各兵官十分震恐雞籠之役又爲劉銘傳所敗是其兵力不强之又一證也現在中國不允賠償已成騎虎難下之勢必將鋌而走險爲困獸猶鬪之思取馬尾取廈門取澎湖據地爲質皆屬意中之事中國礮臺修造多不堅固礮臺攻破口岸失陷皆不足慮但使誘之登岸出奇攻擊法人萬不能支即使一再兵敗仍當再接再厲不肯少挫况又未必卽敗耶彼時窮蹙求和我縱之使去自不敢妄生覬覦越南告警以來若使以援高麗之法迅速進兵萬無今日之慮臣請用釜底抽薪之法速令岑毓英潘鼎新等督飭各軍分路進擣越南爲之牽制法

人聞之必將回軍自救俟其軍退截擊其尾卽不得勝法人亦必心膽俱寒如此辦理此事方有歸宿不然法人攻我礮臺據地爲質業已明明失和而我又懼失和局處處爲萬國公法束縛非示人以弱何哉大沽海口應請敕令李鴻章迅速進駐調度一切如法艦到時一有開仗消息務使先發制之是爲至要先是六月十五法兵占我臺北基隆礮臺經劉銘傳擊退至是月初三法人又自馬尾攻傷我兵商各船我軍亦陣斃法兵官詔令中外合力攻擊恩溥於是疏陳法船在中國洋面者本不甚多長門馬尾各處又陸續擊壞其六七隻現雖負隅抗拒已成外強中乾之勢請敕沿海督撫暨各統兵大臣凡所轄境內有法船停泊之處立卽開礮轟擊不必拘定公法從容照會以至坐失機宜將法兵擊敗後南北兩洋卽可將我兵船移駛閩洋內外夾擊以厚兵力倘稽延時日法人必增調兵船雇用阿匪黑人驅令越南叛民接踵來華彼時再行剿辦便不如此時之得機得勢也現在法船之在中國者不過十餘隻若乘其援應未到之先各處攻擊大約開仗數次便可殲除淨盡至雲南一軍由保勝而進以扼其吭廣西一軍由諒山而進以拊其背我軍掎之劉軍角之法人在彼兵力單薄聚而殲之實意中事惟數

月以來法人於越地情形較熟山深箐密恐多埋伏須廣設間諜勤加偵探厚賂土人使作嚮導方不至墮其奸謀如水路有需用船隻之處不妨俟南北解嚴後調鐵甲數隻以資得力更請敕令廣西巡撫檄諭越南令知中國勞師糜餉係爲興滅繼絕起見非有所利於該國如順化都城爲我收復卽敕令劉永福照吳長慶駐高麗之例鎮撫彈壓訓練操防以固屏藩法人如肯就我範圍不再要挾則西貢地方令其照舊通商所有從前已立各約一概廢卻倘負固不服調兵船來越與我開仗我軍當銳氣方張之始盡力與之相持法人師老餉絀萬萬不能得力卽使再向中國聲言報復彼時我軍又已訓練數月防務十倍講求先封口岸來船便擊法人雖悍有何懼哉再嚴斷接濟令法船窮蹙方有解嚴之日聞上海漢奸竟有甘充文案私售軍糧等事奸商接濟法人食物請敕令南洋大臣密派將弁在要隘處搜拏若出力弁拏獲該軍食物者卽將該弁破格獎敘以資觀感恩溥又以法人侵擾閩江若閩督布置有方乃臻完善因上疏劾總督何璟略謂用兵之道以籌畫方略爲第一要義備豫於平日始能應變於臨時若旣渴而掘井則已晚矣何璟自任閩督十載有餘防務一切何難從容布置乃諸多貽誤

基隆新築礮臺一經轟擊卽刻坍塌若非劉銘傳一鼓作氣迅速攻克大局將不可問似此承修草率之員亟宜查明嚴懲今者賊近省垣或招募上幹等處之勇藉壯聲威或於距城十餘里外旱路潛挖地道安放地雷或將近省河口早爲封堵或激勵兵勇爲張佩綸後路援應皆應辦之事顧一概不加講求日惟念佛冀保身家此等恇怯無能之員忝任封圻恐無裨益似不如於劉銘傳張佩綸二員中簡任一人暫權閩篆劉銘傳力守臺灣距省太遠張佩綸駐紮甚近可否卽令暫攝以重事權使其妥籌調集兵勇力固省垣伏望聖明採擇以觀成效再用兵不如用勇隔省調兵臨時恐難得力請敕各省預行募勇訓練以備援應北洋地方遼闊法人必調師船滋擾請飭各口岸帶兵大員預將各口封堵見有法船卽開礮擊之如礮臺業被攻陷其守營者必早挖地洞以避開花礮彈如法人停礮上岸我軍卽出痛擊之利在偏師分擣不宜大隊相戰或東西衝突截斷其輜重或聲東擊西日夜以後膛礮轟擊之使法人不遑寢食各口岸俱如此辦理方操萬全勝算未幾法人肆擾臺疆雞籠失陷詔令南北洋撥船援應各疆臣遷延觀望恩溥上疏以爲劉銘傳望援心切自不待言查天津上海廣東兵輪尙可湊足

二十餘隻與其以固守汛地爲詞強分畛域不若令南北洋各派得力將弁統帶師船多攜軍火速赴雞籠淡水各口由左宗棠楊昌濬等節制調遣併力合剿與劉銘傳內外合攻似可收夾擊之效即使船礮俱遜法人而我多方牽制亦可稍斷其接濟現在節近封河法人決不撲犯北洋各兵輪坐耗餉糈何妨放至上海飭調廣東及吳淞諸兵輪一齊駛至臺灣口岸相機剿辦迅圖克復庶臺灣可保無虞矣十一年恩溥授吏科給事中十二年遷工科掌印給事中十五年三月充會試內場監試官五月恩溥以山東之兗沂曹濟江蘇之豐沛蕭礪河南之汝正新息安徽之潁亳壽州均係盜賊淵藪其有成羣結夥著名巨匪爲州縣官所不易捕拏者自應佐以兵力然非予以獎勵則誰肯出力以搜賊鋒奏請嗣後經營員拏護訊實者照軍營章程保加陞銜以示鼓勵上下吏部議奏十八年七月補內閣侍讀學士十一月擢鴻臚寺卿二十年充四川鄉試正考官二十一年以陳奏事件摺內繕寫錯誤部議罰俸二十二年三月授通政使司副使充稽查右翼宗學九月補太僕寺卿二十三年正月奉上諭此次京察引見三品以下京堂太僕寺卿劉恩溥著照舊供職六月命充江南鄉試正考官以中式試卷有書寫卦

畫篆體者部議罰俸二十四年正月充會試知貢舉三月重修會典全書過半得旨賞二品頂戴七月擢倉場侍郎二十五年十一月恩溥奏全漕告竣十二月奉旨交部議敘三十一年以北新倉不戒於火燒燬現儲白糧之麗字等三廠恩溥等均下部議處三十二年正月奉上諭劉恩溥著開缺另候簡用三十四年三月卒諭曰前倉場侍郎劉恩溥由翰林洊陞卿貳迭掌文衡克勤厥職嗣在倉場案內開缺另候簡用茲聞溘逝軫惜殊深加恩著照侍郎例賜卹任內一切處分悉予開復應得卹典該衙門查例具奏

鄧承修

鄧承修廣東歸善人咸豐十一年舉人同治二年援例捐郎中簽分刑部七年與修玉牒告成奉旨無論題選咨留遇缺卽補八年補刑部四川司郎中十二年授浙江道監察御史疏言廣東賭風甚熾每屆鄉試及歲科試期開場設局竟有巧立闖姓名目抽收經費搜括民利貽害科場有乖政體請革除之得旨著瑞麟張兆棟卽行裁革嚴禁以肅政體而杜弊端是年京師水旱數見畿輔成災承修疏請因災修省並詔求直言庶於新政有裨上嘉納之十三年充會試稽察磨勘官

殿試分卷官考試內閣中書及八旗教習監試官前任兩廣總督門丁黃天錫冒
番禺縣籍朦朧捐職官復令其子黃章俊曠考取列優貢士林譁然承修劾論之天
錫章俊皆斥革旋以父病請假回籍光緒元年丁父憂服闋補江南道監察御史
卽列廣東廣州府知府馮端本招權納賄狀劾去之轉掌雲南道監察御史時恩
承童華奉命四川查事以過境擾累被疆臣糾陳下部嚴議承修疏論恩承等查
辦東鄉數年巨案百姓之奇冤一旦平反於奸人歛怨必多今言者不察以小民
一紙之呈訴撫以入告朝廷未加詰問便蒙罪責彈疆臣如撼山參廷臣如拉朽
恐此後使臣習爲畏沮遇事互相徇隱疆吏知其易動妄生揣測輕量朝廷必馴
至內輕外重之勢伏乞嗣後差遣使臣必察其廉介有威望者然後俾以重任總
以查事得實爲稱職其間有未能檢束致被彈劾者亦須俟其覆命之日始行究
詰不必令其摧折於查辦之地以快奸邪奏人奉上諭朝廷賞罰總期功過分明
豈有中外之別使臣既有應得之咎何能曲爲原宥該御史奏稱須俟覆命之日
始行究辦亦非政體所奏著毋庸議尋劾奏廣東學政吳寶恕下部議降寶恕三
級調用六年七月奏言俄人定約以來在朝之臣因循弛慢屢失事機及遇邊奏

急來則舉動倉皇絕無處置恐敵人窺我怯懦將來條約愈多反覆請調左宗棠入輔委以軍國大柄使內修政事外總兵權庶朝野上下有所恃而不恐逾年詔左宗棠入贊樞密實用承修言也十一月戶部侍郎長絨與山西布政使葆亨於忌辰日婚嫁讌客承修疏劾之二人均奪職十二月巡視東城七年以俸滿截取引見記名以繁缺知府用二月湖廣總督李瀚章奏准故總兵周有全建祠立傳承修以其欺罔冒濫奏請撤銷從之六月彗星見於北方復請任賢去邪以固邦本疏曰臣聞變異者天之仁愛人君使之恐以致福也伏見主德清明曾無缺失彗星之出殆爲樞輔諸臣或未當天意乎商書曰股肱惟人良臣惟聖君之倚良臣猶人之須手足也手足不能舉則無以爲人大臣不任事則無以爲國竊見大學士寶璽久贊樞機值此時事多艱自應竭誠盡節而近年屢請病假恣逸於家養疴自便處之晏然臣逸君勞於義安忍且性好詖諧逢人狎侮鄙正論爲無知視國事如兒戲而望其表率百辟難矣戶部侍郎王文韶本棗稅之材斗筲之器爲曹郎日以奔競著名不數年而外任封疆內居機密家資鉅萬衆所共知倘詢其所由來必有不堪問者方今時事艱難外患孔亟辦理之要首在內治所謂內

治者正朝廷以清其源也如寶璽王文韶之老猾貪庸豈足當重任而禦外侮耶應請量予罷斥以應天心大學士左宗棠以邊警召還方其入朝中外喁喁望治今既數月矣絕未見有設施卽其自請治畿輔河渠固屬根本之計然天下事豈無更大於此者臣聞國事所關莫先刑賞大臣之責不顧嫌疑昔宋仁宗銳意太平責成輔相開天章閣召輔臣條對范仲淹退而上十事首以明黜陟抑僥倖爲言富弼上當世之務十餘條亦以進賢退不肖爲己任他如姚崇之相明皇李德裕之相武宗莫不以分別邪正舉直錯枉爲第一事左宗棠受任以來豈竟一無聞見乎抑未免媵阿卷縮知而不言乎臣願左宗棠以姚李范富自期朝廷亦當責以天下之重使得盡陳其欲爲必曰方今何事可憂何人可任何利可興何害可除何者爲先務何者且緩圖責之專而毋掣其肘若不效則重治其罪毋阻於邪說毋惑於浮言所以固邦本而弭天災無過於此尋左宗棠因病乞退上特命爲兩江總督承修復上疏乞留之不報十一月疏陳湖北財政吏治積弊並劾督臣李瀚章荒淫貪酷諸狀上命左宗棠查辦奪道員楊宗濂等職瀚章旋亦解任承修巡城一年捕獲營房聚賭匪徒糾窩賭營官劾冒功朦保坊官揭發捏遞匿

名書信之職官皆奉嚴旨懲治風氣爲之一肅八年遷工科給事中正月奏陳關稅侵蝕之弊十餘年來日增月益迨不可以數計其見諸奏牘者如前任兩廣總督劉坤一署理海關纔數月耳已盜銀十五萬兩其實缺之胥吏僕役又當倍是可知柯玉棟一閱海關書吏耳不數年而家貲鉅萬捐納知府書吏如此則正任可知至津海關密邇京畿其在人耳目如餽遺過客供應上官歲須數萬金皆取償於此則飽入私囊重載而歸者可知他如上海登萊蕪湖漢口新關九江夔州廣東肇慶梧州歸綏道山海關凡有關稅者無不侵蝕綜而計之不下數百萬今部臣晝維夜算欲額外求一錢辦公而不可得而坐視此數十萬之民脂民膏悉付之狼吞虎噬而不問此臣所不可解也且國家取民田賦以外祇有權稅然錢糧之分數卽州縣之考成有侵蝕者則監追參劾隨之至於權稅則贓私入己累累數百萬聞之如不聞見之猶不見可乎不獨此也因其貨利以結納長官彌縫要路旣以差而得富復以富而市官賄賂日彰官邪益著吏治何由不壞財用何得不竭乞特派大臣密查確數據實參奏並敕下各督撫所屬有關稅者妥定章程或於徵收溢額之中酌留一二以爲緩急辦公之用其餘悉數解部年終開單

呈覽以備稽核得旨著管理關稅之督撫監督等各就徵收實在情形和盤托出遵照部章於正額盈餘外按年溢解朝廷意存寬大亦不追其既往經此次嚴諭敕查後如再有掩飾迴護情弊別經發覺惟該督撫監督是問四月揭參步軍統領番役妄拏廣東舉人古名猷有旨嚴詰步軍統領衙門步軍統領覆奏意存脫卸承修復論劾之命大學士會同刑部按治八月以高麗亂黨粗平琉球之案未結因上疏曰近者高麗骨肉相猜外戚秉政亂機久伏逆黨乘之逐君醜后橫及日臣朝廷命將出師二旬之間罪人斯得聖武布昭遐邇悅服惟聞日廷議論洵洵羣疑滿腹推原其隱殆以中山之案未結恐我揚兵域外爲聲罪致討之師耳故自拓商分島之請未遂日使怏怏而去近聞忽派海軍中將榎本武揚爲駐華公使聞其人頗習兵事素爲日廷所倚重一日出使殆將陽作調停陰覘虛實和戰之局轉圜之機實決於此夫以中國土地之廣人民之衆物產之富賢才之秀甲於地球朝廷徒以重發難端習爲偷惰重以西國甲兵之堅利器械之精良製造之工巧貿易會計之便捷歐人方挾其長技以凌我而苟安持祿之輩遂以爲西盛而中衰環顧而不敢言戰卽以日本而論自李唐步趨中法千餘年於茲矣

一旦舍其舊而新是謀法秦政之坑焚效武靈之胡服幾有雄長亞洲之意然其始未敢大猖獗也臺灣之役姑爲嘗試而我曾不聞以一矢加遺擲金錢數十萬以求一日之無事此其所以肆然無所復忌也而泰西各國因得以窺吾虛實於是威妥瑪有煙臺之行巴蘭德有天津之議俄約紛更日人乘隙夷琉球爲郡縣而突戶磯遂下旌回國恣情挾損威毀重其所由來者漸矣臣統觀今日時局日本視中西之強弱以爲向背各西國又視中東之強弱以爲轉移一髮千鈞關係甚重臣以爲中西交際不妨虛與逶迤示以寬大而東瀛有事則宜全力爭之不宜絲毫遷就啟列邦以輕量中國之心且日本非果富且強也彼之悍然不顧者徒以中國之重發難端耳今以高亂之故朝廷忽遣重兵分道並進所謂疾雷不及掩耳彼旣駭然愕然失其所恃不旋踵而遣使情見勢絀概可知矣臣以爲朝廷宜乘此聲威將高人致亂之由諸將平定之功速宣示中外特派知兵大臣駐紮煙臺相機調度厚集南北洋戰艦示將東渡分撥出洋梭巡更番出入藉以熟探沙綫飽閱風濤流覽形勢爲扼吭拊背之謀其駐紮高麗之吳長慶水陸各軍暫緩撤回以爲犄角布置既定然後責以擅滅琉球肆行挾之罪料日人必

有所憚而不敢發不惟球案易於轉圜卽泰西各國知吾軍勢旣彰不諱言戰如法人之蠶食越南私邀盟約非口舌所能爭者可不勞而定矣又以金幣暗耗國用日空宜籌補救之法略言國家與外人通商十餘年矣嘗考近年出入之表輸入者七千萬輸出者僅五千萬而洋藥入口價值至三千餘萬爲今之計若能杜絕來源嚴禁民食拔本塞源斯爲上也其次莫如弛種罌粟之禁仿屯種之法以敵其利疏皆留覽嗣以雲南報銷案遷延日久疏請先將被參之王文韶罷斥使審訊者無所顧忌易得情實上不允惟添派惇親王翁同龢會同查辦旋因星變河決陳政令闕失復疏論之仍不報十一月劾都察院左副都御史崇勳素無行檢上命廣壽閻敬銘查確褫其職十二月極言考場積弊條陳七事曰慎簡考官曰嚴懲房薦曰精核錄遺曰嚴稽考到曰整頓謄錄曰整肅場規曰嚴行覆試皆得旨施行九年轉戶科掌印給事中稽察富新倉二月奏參前山西布政使方大湜以來京聽候簡用之員繞道不前飾詞託病違旨任情請下部懲處從之又以廣東守令貪庸乖謬諱盜殃民劾罷高州府知府鍾秀茂名縣知縣王之澍三月充會試內簾監試官七年已革總兵陳國瑞在戍病故承修臚陳功績代乞恩施

詔開復原官戰績宣付史館八月以外患日深請敕百官廷議以定國是略曰法人窺我無能肆意蠶食取南定取河內長驅入越朝廷絕無處置關外之師逡巡而不敢進者數月惟越之督臣劉義以孤軍血戰幸而勝之不然越之北境已爲法人有矣昨者道路傳言法人襲居順化阮氏以降國都以覆聞劉所將精銳不過二三千人久暴露於外糧盡援絕其勢不支越之全境必折而入於法越已入法則因越地用越人開鑛製器練軍積穀較歐洲數萬里之調撥難易迥殊數年之間必別開釁端爲得寸入尺之計則滇粵之邊防益亟而禍無既日矣所謂一日縱敵數世之患不知諸臣果有何法以善其後也伏見祖宗朝凡有大事必須廷議以博采羣言前者俄人踞地要求疆臣有棄地徐圖之議賴我皇上聖明廣集廷議雖無甚裨補而盟約卒底於成今越南之變迫於俄境而大於琉球伏乞特詔百官廷議各陳所見若言無可采則決之宸斷庶浮議息而國是定矣倉場侍郎游百川奉命查檢黃河力持分水之說欲開徒駭馬頰導河北行承修疏言該侍郎所議勞費無益且直以鄰國爲壑得旨著游百川回任以陳士杰代之又以已故知府馬縉武素行卑污濫膺祀典奏罷之十一月以廣東吏治積弊奏陳

八事一查事委員宜禁受賄一流寓土著宜禁服官一劣幕盤踞宜嚴稽核一貪吏苛罰宜嚴開脫一諱匿劫盜宜援案糾參一械鬪殺傷宜嚴處分一捕拏盜匪宜禁焚屋一官員庇賭宜申禁令復極論知府劉淮年方功惠知縣盧樂成徐殿蘭胡鑑王序賢通判陳嵩壽暨撫幕沈彬宋華廷諸員贓污酷虐狀先後得旨詰責降黜有差十年二月法越事亟邊防兵潰首劾唐炯徐延旭失律喪師趙沃黃桂蘭擁衆坐視宜正軍律復論沿邊之患廣西急於雲南沿海之患廣東急於他省宜命張樹聲統軍出駐南寧彭玉麟總督兩廣激勵提督方耀總兵鄭紹忠鄧安邦各員使皆奮勉效命則邊海防各得其任矣三月朝廷以邊事日棘斥退舊輔別簡樞臣復奉懿旨軍機處要事會同醇親王商辦承修疏論國家之用親藩與大臣異大臣有過罷斥之已耳親藩則國同休戚有過必裁抑之曲成之母使終於廢棄而後安恭親王輔政多年久資倚畀請皇太后俯念親賢深維國計用醇親王之忠誠以肩其鉅用恭親王之諳練以理其煩於共和夾輔之道不無裨益四月督臣李鴻章電奏法國水師總兵福祿諾令稅務司德璀琳面呈信函請將越事從中和解承修聯合臺諫極言和議難恃請詰問李鴻章此議能否確有

把握仍嚴諭沿海各督撫力籌戰守免墮奸謀旋借國子監司業潘衍桐密陳間敵之策曰法人國事皆出議院兵餉皆由商貸越南之役因添招大富浪夷兵及漆甲黑鬼兵數爲劉義之軍所挫傷夷過半該兵日索賠費法人力不暇給其困敝一也法總統剛必得乘普法之亂驟握大權國人不服調兵籌餉動拂商情若堅持數月彼內變立起其困敝二也法人前據嘉定六省今又增數省疆土日闕備多力分日虞我師之至其困敝三也越南暑溼秋夏之交瘴癘驟發彼軍遠來卒不服習死亡必多其困敝四也法人數敗之後以重利餌沿海粵民使爲前敵自去年十月法商人心渙散餉源匱乏延不支發兵士憤極思亂其困敝五也有此五敝宜其和之速且易矣朝廷若遽許其和彼得以其暇日修守戰製器械爲後日攻取要求之計所謂養虎貽患可爲寒心聞此次法人所恃以破劉軍者兩廣沿海邊界客民客民最爲法人所畏亦易爲法人所誘與其去之以資敵何若用之以攻敵爲今之計惟有主緩和之議以破其狡詐之情用反間之謀以斷其招徠之路雲南昭通鎮總兵何雄輝籍隸廣東諳熟邊徼要害與客民言語相通乞敕何雄輝逕赴兩粵邊界專招客民數營或爲外援或潛往敵營以爲內應我

軍駐邊界者復遙爲應援一俟機緣立時舉發如此則戰固可勝和亦無傷誠今日釜底抽薪之奇計也時邊軍屢挫朝廷擇將以唐仁廉調署廣西提督承修謂津海爲畿疆門戶奏請仍留唐仁廉駐守北塘以固根本五月授內閣侍讀學士六月復言西山失守北寧潰散法人遂有輕量中國之心迨見我遣將增兵軍心稍振法又以和餌我朝廷既許之法仍慮我邊軍未撤牽掣於西未遑於東於是

有諒山一役藉詞背約而馬建忠李鳳苞赫德諸人潛結句通挾制朝廷恐嚇總署遽下撤兵之詔使法人無西顧之憂遂敢悉其精銳盡力於東爲索兵費之舉今宜電諭張樹聲統率淮軍由東路進逼海防別令何雄輝招募客民爲奇兵由欽廉小路進王德榜統湘軍由中路進攻北寧而令唐景崧率所部爲前鋒岑毓英率劉永福出保勝由西路進部署既定一有決裂卽諭令疾馳出關此乃以攻爲守之策會法人藉口爭釁攻占鷄籠樞臣議戰議和游疑莫決承修再陳三策曰法之所長在水戰我之所長在陸戰今法人攻據鷄籠舍舟登陸實爲棄長用短且彼所恃西貢東京之援耳我若以三路之師急攻越南彼將自救不暇不出旬日必將求成於我然後我以重兵屯越使彼內有所忌而後沿海之禍可紓卽

沿海之兵可減此爲上策其次則分兵爲守敵來則戰敵去不追然備多力分彼以數千之衆綴吾十萬之師曠日持久師老財匱利害與吾共之此中策也若以餉紉運阻爲虞不敢言戰敵人得窺此意以戰脅我以和餌我不折一兵使我坐輸八十兆之鉅款彼得藉以經營越南蠶食滇粵其禍可勝言哉是謂下策是謂無策七月補鴻臚寺卿疏稱近者法人因要挾未遂率其兵艦直犯馬尾若舍舟登陸棄其所長乘勢進攻福州我以長門馬尾各路之師扼其歸路俟援兵四集可聚而殲也竊意法人必不出此不過揚威海上調其西貢東京之兵希圖再舉耳朝廷前者諭令滇粵進兵以爲牽掣實目前第一要著但進兵宜速事權宜一請特詔唐景崧速爲召募成軍迅卽出關與劉永福併力攻取軍中事宜許其專摺陳奏更獎勵王德榜軍令同時並舉爲劉軍犄角則規復可期矣八月命在總理各國事務衙門行走疏辭不許九月以征南諸軍將帥不和多懷顧望疏請特簡一威望素重之大臣如彭玉麟等督辦兩省征南軍務以一事權復奏保刑部主事楊秀實舉人知縣黃遵憲均得旨錄用十一月疏言聞鷄籠失後臺灣巡撫劉銘傳知爲李彤恩所誤愧悔莫追竟成心疾章曹諸將無所稟承臺防危急請

旨電敕楊岳斌迅速渡臺察看劉銘傳如精神識略足鞏全臺卽令其迅復鷄籠以贖前過偷病狀屬實則應先解其兵柄俾令靜養冀效將來一面按問李彤恩挾怨失機罪狀一面嚴敕曹章各軍克期進取不得遲回致生他變自法越事起承修陳說兵事章凡十三上皆留覽多見採納十二月左中允樊恭煦因言事降黜承修疏乞寬免奉嚴旨切責下部議處尋議以降三級調用加恩改爲革職留任十一年六月連疏劾湖南布政使龔易圖貪劣鑽營河南開歸陳許道潘仕釗猥鄙刻薄廣東學政葉大焯嗜利無厭經彭玉麟張之洞查辦得實均罷斥七月請假回籍省親詔許之未出都復奉命赴南關與法使會勘中越分界事宜十月馳抵龍州時北寧諒山越團游勇充斥道路梗阻法使欲會於北海從廣東欽州勘起總署已堅拒之承修正欲出關察看奉電諭謂地圖法使所攜有同異當以會典通志爲主或謂諒山在分水嶺東本宜劃歸粵界惟此說與新約不符須費辯論若於兩界之間留出隙地若干里作爲甌脫最屬相宜而雲貴總督岑毓英則請令法退還北圻數省於河內海陽通商兩廣總督張之洞則謂三不要地爲歷朝舊界宜劃歸中華時議又謂法兵病餉艱議院欲棄北圻宜劃諒山河北驅

驟爲我界諒山河以南東抵船頭西抵耶甲河以北爲甌脫更有謂越亂方熾法力已疲待其技窮方易就範持論不一上亦以議界必博採衆說多爭一分即多得一分之利益勿輕率從事爲訓十一月約法使浦理燮會於文淵先是諭旨令廣西巡撫李秉衡會同履勘法使以其握兵權也不欲與會堅卻之承修電奏力爭秉衡始得與議兩粵疆臣欲會議時令馮子材蘇元春兩軍在粵越界地陳兵備制詔止之承修乃單騎出關與浦使會商堅欲照約先議改正界限而彼則力持先勘原界之說辯論各不相下浦使多方恫嚇承修亦言看界而不更正即斷我頭亦不能從浦使知不可奪陽許以文淵保樂海寧三處歸我旋又悔之陰乃電告其駐京使臣以承修違約爭執勢將罷議復挾其國外部電大言聳我朝廷肆其要脅遂有先勘原界再商更正之諭承修復電陳三難二害略謂附界居民畏法虐不願改隸者不下數萬人若先勘原界民心驚疑恐遮道攀轅因而滋事難一游勇近攻得保樂牧馬以東千百爲羣道路梗塞難二原界俱在亂山之中十不存五懸厓疊嶂毒瘴漸生加之淋雨人馬不前難三且旣勘原界彼必颺去新界絕無可商豈惟驅驟卽文淵亦不可得關門失險戰守俱難害一文淵已失

諒北無寸地屬我勢必脅我關內通商邊營盡落後著緝盜入門既棄越地復失
粵地害二朝廷始終中於法使先入之言奏人不省仍電旨催促先勘原界所爭
新界暫置不論十二年二月春深瘴起承修電述病狀請暫停議回龍州醫治俟
秋後再勘上仍不允而浦使更堅約速勘承修再申前請嚴旨詰責有耆英治罪
成案俱在之語並下部嚴議承修乃扶病會勘至平而關瘴癘更盛法使亦病不
能前乃互約停勘旋奉諭鄧承修前曾給假省親准其率同隨員暫回廣東屆期
再前往欽州起辦是年冬十月如約赴欽州十一月至那梭時法使浦理燮因事
回國別遣狄隆海士來會海士先至海寧適爲越團游勇所戕越粵道梗十二月
狄隆始至芒街尙未開議法已先占江平長山等地盛兵相待承修親往會議而
狄使因海士之死疑爲粵人主使甫晤而卽盛氣相加肆言怨憤承修以禮折之
氣稍下始及界議法以偏地團勇艱於履勘請援照雲南辦法按圖定界朝廷已
許之於是首議江平黃竹白龍尾各地法以爲其用兵所得不肯輕讓據無稽之
圖說欲劃歸越境承修以地屬龍門營水師汛內所轄居民有華無越中外圖籍
炳然極力辨爭狄使見我詞理俱直欲權於白龍尾中畫一綫左歸華右歸越承

修以其地爲欽海外戶我守之則遙控海寧敵窺我廉郡必顧其後若彼居之則內逼防城外斷東興思勒是無欽廉也卽中分一綫此島形狹而長彼旣築壘我將安守形勢所關不能遷就議久未決乃暫與定約三條一大段相合二較圖不合作爲未定各請示本國三撤江平之兵狄使仍狡辯乘界議未定竟以兵力驅江平黃竹居民內徙呼籲使轅哀求安置者日凡千百承修責問狄使彼答以兵事有地方主持江黃界已歸駐京使臣與總署面議不能撓越反覆詰駁往來六次兩無端緒朝廷恐議久無成別開邊釁許駐京法使之請凡未定之界歸入後議不決處所一并在京商定乃諭敕承修先自欽西至桂省全界彼此不爭之處一律作速勘辦遂與法使卽芒街校對圖籍訂定清約粵桂詳圖分四段第一圖起竹山至隘店隘口而向日所爭論之嘉隆河八莊分矛嶺十萬山三不要諸地均歸我界第二圖起平而關至水口關外第三圖起水口關外至那嶺岵賴之西南第四圖起岵賴至各達材外止與雲南界接於十三年二月立約署押以界圖校竣入告四月諭界務將竣鄧承修准其先回欽州候旨五月復諭中法續訂界務商務條約已派王大臣與法使畫押其設立界牌事宜照約由地方官會同駐

越法員辦理鄧承修著卽馳驛回京尋予免部議革職處分十四年因病乞解職疏三上許之在籍主講豐湖書院讀書養母十七年卒於家宣統元年以兩廣總督張人駿請詔將學行事蹟宣付史館立傳

翁同龢

翁同龢江蘇常熟人大學士心存之子咸豐六年一甲一名進士授翰林院修撰六月充實錄館協修十二月實錄告成命俟散館後遇有陞缺開列在前八年充陝甘鄉試副考官旋提督陝甘學政同治元年三月充會試同考官六月陞右春坊右贊善七月充山西鄉試正考官十月充日講起居注官尋丁父憂歸四年二月服闋回京三月補原官六月轉左贊善陞右中允十一月命在弘德殿行走五年陞翰林院侍講六年遷詹事府右春坊右庶子七年晉國子監祭酒九年陞太僕寺卿十年擢內閣學士兼禮部侍郎銜因母病疏請開缺予假慰留十二月丁母許氏憂賜祭一壇賞銀二千兩治喪同龢歷充實錄館纂修總纂國史館纂修武英殿纂修必勤必恪事皆盡職屢得優敘十一年穆宗毅皇帝大婚禮成賞頭品頂戴十三年服闋命仍在弘德殿行走補內閣學士同龢居講席每以憂勤惕

厲啟沃聖心當八年六月武英殿之火也同龢恭錄康熙八年嘉慶二年遇災修省聖訓進御復以歷代名臣奏議因火災上言者於講案前剴切敷陳因疏言變不虛生遇災而懼乃千聖之格言祖宗之心法不可不身體而力行宜停不急之工惜無名之費開直臣忠諫之路杜小人佞進之門答天誠修實政者庶幾在是上覽奏動容遂有停工罷浮費求直言之諭光緒元年八月署刑部右侍郎十二月欽奉懿旨皇帝沖齡踐祚亟宜乘時典學日就月將以裕養正之初而端出治之本著欽天監於明年四月內選擇吉期皇帝在毓慶宮入學讀書著派署侍郎內閣學士翁同龢侍郎夏同善授皇帝讀其朝夕納誨盡心講貫用收啟沃之效同龢疏辭又奉懿旨皇帝典學之初端資養正朝廷以翁同龢曾在弘德殿行走有年特命與夏同善在毓慶宮授讀翁同龢夏同善惟當盡心納誨用副簡任之意其各懍遵前旨毋許固辭二年遷戶部右侍郎充經筵講官四年晉都察院左都御史賜紫禁城騎馬抽查漕糧御史英震被同官糾劾同龢以曾將英震保列一等自請議處經吏部議以降一級留任五年正月遷刑部尙書四月調工部六年充典會試副考官七年正月管理國子監事務九月孝貞顯皇后梓宮奉安

賞太子少保銜八年命在軍機大臣上行走同龢以軍機處總攬機事現置毓慶宮若兼任要差恐滋貽誤疏請收回成命上知同龢深諫以當體念時艱力圖報稱不允所請九年充教習庶吉士同龢長於政事文學自是屢任是差十年越南事起法人構釁朝廷念國家元氣未充時艱日鉅內外事務叢脞堪虞而軍機處爲內外用人行政之樞紐不能辭咎嚴旨切責將軍機王大臣等悉予斥退同龢甫直樞廷適當多事亦以無所建白退出軍機處仍在毓慶宮行走十一年八月充順天鄉試副考官十一月調戶部尙書十二年二月德宗景皇帝恭奉孝欽顯皇后祇謁東陵派同龢留京辦事十月充會典館副總裁十三年正月同龢以上年六月曾奉諭旨令醇親王會同軍機大臣戶部工部籌議錢法期復舊制同龢時掌戶部再三審慎機器製造工本過鉅京局開爐尤恐市井滋疑不如令湖北等省搭解制錢運津備用爲善疏入懿旨責以不能仰體朝廷裕國便民之意飾詞延宕下部嚴議應奪職特旨加恩改革職留任尋開復處分任職如故十四年充順天鄉試正考官十五年德宗景皇帝大婚禮成賞戴花翎七月予假修墓以同龢日侍講帷深資啟沃事竣命馳驛回京十一月賜西苑門內騎馬十八年三

月充會試正考官六月充會典館正總裁十九年八月充順天鄉試正考官十二月充國史館副總裁二十年正月恭逢孝欽顯皇后六旬慶典賞雙眼花翎紫韁是時中日事棘朝廷意主用兵命同龢恭親王等商辦軍務再授軍機大臣二十一年在總理各國事務衙門行走二十二年充方略館總裁二十三年以戶部尙書協辦大學士同龢痛於甲午之役知非變法不足以圖存破格求賢冀匡時變惜望治過急薦舉非人二十四年四月奉硃諭協辦大學士翁同龢近來辦事多不允協以致衆論不服屢經有人參奏且每於召對時諮詢事件任意可否喜怒見於詞色漸露攬權狂悖情狀斷難勝樞機之任本應查明究辦予以重懲姑念其在毓慶宮行走有年不忍遽加嚴譴翁同龢著卽開缺回籍以示保全十月又奉硃諭翁同龢授讀以來輔導無方往往巧藉事端刺探朕意至甲午年中東之役信口侈陳任意恣憑辦理諸務種種乖謬以致不可收拾今春力陳變法濫保匪人已屬罪無可道其餘陳奏重大事件恫喝要挾無所不至事後追維深堪痛恨前令其開缺回籍實不足以蔽辜翁同龢著革職永不敘用交地方官嚴加管束同龢罷斥以後閉門思過念及時艱輒復流涕三十年五月卒於家身後蕭然

吳中士民見其忠清同深嗟惜宣統元年郡紳合詞以同龢前後三十餘年再爲
師傅兩預機衡追思講畫之勞宜在矜全之列兩江總督端方據情入告請准開
復原官允之

清史列傳 卷六十四

已纂未進大臣傳三

張仁黼

張仁黼原名世恩河南固始人光緒二年進士改庶吉士三年授職編修十年法越事起奉旨交廷議仁黼與編修朱一新等奏請嚴海防以杜狡謀略謂能戰然後能和道光年間撫議未成海防先弛遺患至今前鑒不遠今宜示以朝廷主戰不主和之意嚴申軍律以肅戎行敵亦安能持久是在當事者之堅忍耳至李鴻章所奏內外上下臥薪嘗膽之言實爲救時要論願臨事則每思自奮事後又徒託空談當茲時勢艱難一誤豈堪再誤此其道在求諸實事其端必始自宮廷是年命在上書房行走旋命授溥倫溥侗讀十一年京察一等以道府用尋提督湖北學政訓士以格致誠正之學捐資恭刊列聖訓飭士子文及呂氏四禮翼陸氏松陽講義陳氏明辨錄倭氏爲學大指諸書並廣購朱子小學近思錄以餉士林整飭經心等書院獎勤懲惰嚴嗜好之禁其有嗜好者以時抽查屢戒不悛者重

懲之士風爲之一振十四年任滿仍直上書房十五年正月德宗大婚禮成賞六品銜二月命授載濟讀八月賞御製勸善要言十二月充文淵閣校理十八年補國子監司業遷詹事府右春坊右中允轉左中允晉司經局洗馬尋署日講起居注官補翰林院侍講二十年大考翰詹列二等孝欽皇太后六旬萬壽賞加四品銜是年日本藉端朝鮮與我開釁軍數失利朝臣多劾軍機大臣禮親王孫毓汶等朋比誤國仁黼與侍郎李文田等合疏請旨起用恭親王管樞務略謂宋哲宗朝宣仁皇太后起用司馬光爲相遼夏之主不敢生邊釁今恭親王之賢不知於司馬光何如而親貴則過之我皇太后之聖明尤非宣仁所能及恭親王艱鉅重膺綱紀整肅軍務常有起色未幾恭親王召入軍機又疏請派吳鳳柱速帶馬隊馳援旅順有旅順失則大局壞徒守山海關無益之言又疏請停止點景移作軍費二十一年轉侍讀二十二年擢鴻臚寺卿二十三年充四川正考官二十四年除奉天府府丞兼學政丁父憂未之任二十六年拳匪事起奉命在籍督辦團練服闋召赴行在時財政支絀當事議加丁口稅召對力陳不可事遂寢二十七年授順天府府尹請收回成命召對時奏稱府尹職守今昔異宜昔重持正今重外

交臣不習洋務倘舉措失當恐誤大局請飭李鴻章舉通曉外交人員請簡遂改授左副都御史扈蹕回京署兵部右侍郎二十九年河南因徵糧改章致孟縣武陟等處民變仁黼以桑梓之邦見聞較確五月乃上疏瀝陳豫民艱苦情形懇請弭患以全大局略謂河南居天下之中民風素稱樸厚平時交納錢糧供應徭役無不奉公惟謹卽如蘆漢鐵路所經之地洋工程司來往履勘從未聞聚衆滋事上貽朝廷之憂誠使撫輯得宜斷不至變生意外乃近聞河南因改銀完錢激成民變之事謹就豫省現辦實在情形與夫利害之關係事勢之流極縷析陳之查河南通省一百零七州縣廳以現錢完糧者俗謂之錢莊其中有四十五州縣以現銀完糧者俗謂之銀莊其銀莊地方斗畝較窄漕折較重當日定制斟酌地方情形參差之中具有精意二百年來一律遵行相安無事歷任河南巡撫藩司考核丁漕者頗不乏人亦從無輕議改章之舉現任河南布政使延祉上年曾以隨糧捐輸飭屬辦理經前任巡撫錫良批斥責其冒昧操切事遂中止現調任撫臣張人駿初到任時以添營籌餉與之商酌延祉稍易前說另立各詞張人駿未及深察據以入奏查豫省現時銀價每兩換制錢一千文之譜原奏所稱每丁地銀

一兩改完制錢二千四百文名之曰改其實已較原額加一倍矣暗中復加至二千八九百文不等而又官吏胥役層層婪索更在此數之外直不啻於原額之外再加倍半且兩倍矣蔀屋窮簷何以堪此是豈朝廷恤民之本意哉今年二月間孟縣百姓紛紛攜農器至縣署求減知縣孫壽彭不善辦理遂至激成變端武陟溫縣原武濟源四縣繼之河以南亦蠢蠢欲動邇聞鐵路工程司電告盛宣懷有九段路線經過數州縣近日大見擾亂聲言與鐵路爲難其作亂實情因匱糧而起等語臣聞信徬徨伏思養兵所以衛民非爲殃民之具練兵所以定亂非爲召亂之端今民未亂而因兵以困民迨亂旣作用兵以平亂利害相權其得失必不能辨之者且亂之至恐未有底止也現時甫經開辦亂端已萌者數州縣矣上忙屆期官吏催比設四十餘州縣蚩蚩愚衆徒以不堪誅求之故同時接踵馴良者貧不聊生宛轉於追呼之下桀驁者鋌而走險弄兵於潢池之中萬一有匪徒煽惑其間愚民無知遷怒外人甚至毀鐵路拆公司戕教士焚教堂皆意中必有之事工程司之電其明證也卽曰兵力可恃我能剿平而內有餉項外有賠償核計所費奚止倍蓰得不償失有斷然者設或勢成燎原我兵未能卽時平亂外人藉

口代剿添兵占地別生枝節又將何以應付懲前毖後熟思審處國家何取歲增三四十萬之款而因此釀成巨患致壞大局乎臣上年奉命治團曾與延祉共事見其智慮精核辦事亦能持平不知此事何以偶未深思固執成見至此又聞張人駿見銀莊改錢以來屢召亂釁頗有悔心惟既誤信於前又係原奏之人未便再三瀆請臣默審事機關係至重用敢呼籲於君父之前仰懇飭將豫省錢糧仍照向章辦理河南幸甚大局幸甚得旨此案前經張人駿奏請援照山東隨糧捐輸章程辦理是以照准若如所奏各節改章加徵民情不順難保官吏不從中索擾著張人駿據實查明不得以陳奏在前稍涉回護應如何禁革變通之處務當體察情形妥爲辦理總期籌款而不擾民毋致別滋事端於是張人駿奏地丁仍照舊章征收民賴以安六月充江西正考官三十年因推恩得廢一子是年上以巡警爲方今要政現辦工巡局尙有條理亟應實力推行改五城練勇爲巡捕均按內城辦理命仁黼會同左都御史壽耆尙書那桐通盤籌畫認真舉辦以專責成三十一年五月上以日俄兩國在華盛頓議和中國應如何因應將來接收東三省應如何善後辦法令各衙門悉心籌畫各抒所見密奏仁黼屬稿與尙書長

庚等合疏略謂日俄開釁戰地乃在中國我以勢力不敵守局外中立之例然所謂局外者對戰國言之爲外局也今則兩國言和而直接開議若仍置我於局外則可慮甚矣既已言和必相競利利在兩國害在中國矣中國利害迫切而株守中立無從與聞將來兩國議定出片紙以要我無一非損我益彼之舉拒之則登時生釁許之則實有難堪彼時處置之難必更百倍於今日臣等聞兩國開議爲期甚迫因應之機斷不可緩況此事舉動關係全球聞各國之派員明暗偵察暨各自爲謀者不知幾經縝密詳審卽兩國始戰終和於各國議論之向背交際之疏密及一舉一動之機局派員分駐各國考察者亦復不少今我處萬分危急之時坐待分爭聽客所爲事機一失終難挽救臣等愚以爲宜速選派老成熟於交涉之大員前往美都會同駐美使臣商度與日俄兩國討論參訂似較事後爭論易於爲力目前雖兩國直接將必各有與我討論之時如有大員前往密爲窺察設法維持預爲續議抵制之地並密諭出使日俄兩大臣隨時偵探兩政府之宗旨及各國駐使密察各政府討論兩國議和之政策而尤注重於駐美使臣之應付其最要者或酌派得力人員分赴各國考察各項政治爲將來辦理善後之地

因應之方莫急於此至善後一切事宜容妥商續陳先後多見施行十二月補兵部右侍郎調學部左侍郎三十二年署工部右侍郎旋即補授復調補法部右侍郎三十三年四月補大理院正卿五月奏請欽派部院大臣會訂法律略云今東西各國莫不號稱法治環球法律派別之不同蓋分四大法系實以中國法系爲最古謂之支那法系其文明東漸西被而印度法系生焉由此播乎歐洲爲羅馬法系是爲私法之始更進爲日耳曼法系此法系復分新舊是爲公法之始歐美諸大國皆屬此二法系日本法律本屬支那法系而今則取法於德法諸國其國勢乃日益強夫禮昭大信法順人情此心此理原可放諸四海而準我朝列祖列宗制作美備大經大法超越前古今更取東西法律合諸一治於上年有修訂法律之命將見支那法系曼衍爲印度羅馬日耳曼新舊諸法系者復令歸於一大法系之中而成聖朝之法治固不僅包含德法甄陶英美而已臣今竊有請者一國之法律將以維持治安擴張主權所以垂諸久遠推行無弊者其爲主要者有一而成之者有三一組織立法樞機也東西各國三權分立其立法一權莫不寄諸議院故能順乎民情合乎公理而裁可之權仍在君主既採輿論之公亦無專

斷之弊特中國政體不同遽難倣行其法然可稍取其意彼公諸議院者我則公諸羣臣近來各部院堂官皆參預政務臣愚以爲修訂法律以之頒布中外垂則萬世若僅委諸一二人之手天下臣民或謂朝廷有輕視法律之意殊非所以鄭重立法之道也擬請欽派各部院堂官一律參預修訂法律事務而以法部大理院專司其事並選通曉中外法律人員充纂修協修各官均係兼差不作額缺另議辦事章程如此則有議院之長而無專斷之弊此臣所謂主要者一也一明訂法律宗旨也國之所與立者惟民一國之民必各有其特性立法者未有拂人之性者也西國法學家亦多主性法之說故一國之法律必合乎一國之民情風俗如日本刑法本沿用我之唐律今雖屢經改正其輕重仍多近乎中律而民法五篇除物權債權財產三編採用西國私法之規定外其親族相續二編皆從本國舊俗況中國文教素甲全球數千年來禮陶樂淑人人皆知尊君親上人倫道德之觀念最爲發達是乃我之國粹中國法系卽以此特聞立法者必以保存國粹爲重而後參以各國之法補其不足此則以支那法系爲主而輔之以羅馬日耳曼諸法系之宗旨也一講明法律性質也中國法律惟刑法一種而戶婚田土事

項亦列入刑法之中是刑法與民法不分每爲外人所指摘故修訂法律必以研究法律性質之區別爲第一義而區別之要有四一國內法與國際法之別二成文法與不成文法之別三公法與私法之別四主法與助法之別蓋此四者不外乎國與國國與人人與人三種關係國與國之關係屬乎國際公法不在修訂法律範圍之內如國與人之關係則屬乎公法人與人之關係則屬乎私法公法如刑法及訴訟法是其刑事之涉乎外國人者則爲國際刑法私法如民法商法是其民事之涉乎外國人者則爲國際私法此二者皆於各法之總則中定之是爲關乎撤去領事裁判權之根本而修訂法律之最要者則在主法與助法之別蓋主法爲體助法爲用如刑法及民法爲主法而刑事訴訟法及民事訴訟法爲助法是也有主法而無助法則徒法不足自行主法雖精而助法未臻完善其行之也猶不能無弊此則法律性質之不可不辨者也一編纂法律成典也法律之學首重統系故欲修訂法律必宜研究編纂之法而法典之不可不備者如現今審判分立而法院編制法寂寂無聞此所以司法與審判權限紛議久之而後能定也又如近者修律大臣等所訂之民刑訴訟法本甚簡略而窒礙難行者已復不

少且民事訴訟法當以民法爲依據今既未修訂民法則民事訴訟法將何所適從未免先後倒置至民法爲刑措之原小民爭端多起於薄物細故於此而得其平則爭端可息不致釀爲刑事現今各國皆注重民法謂民法之範圍愈大則刑法之範圍愈小良有以也他如商律雖有端倪然法人之制殊未能備而海商之法更待補葺凡民法商法修訂之始皆當廣爲調查各省民情風俗所習爲故常而於法律不相違悖且爲法律所許者卽前條所謂不成文法用爲根據加以制裁而後能便民此則編纂法典之要義也以上三條臣所謂成之有三者是也凡此諸端固爲修訂法律之要術然尤在造就法律人材務期司法之官無不通曉法律則治法治人二者相因爲用夫然後可收修訂法律之效總之法律學理精深修訂造端閱大非聚羣臣之討論庶僚之蒐輯斷不足以成一代之法典又云立法之要規模不可不閱推行必宜有漸臣聞日本變法之初調查編訂閱十五年之久而後施行其施行也先其淺近徐爲試驗稍滋弊端立即改正審慎遲迴逐漸推廣迄乎今日乃能蔚然成一代之規我中國調查未久商權未精匆遽施行齟齬棼糾其收效尙未可知而困難甚於曩朝廷明鑒萬里固已燭照靡遺

夫法律之所宜修訂者本欲撤去領事裁判權也然而內審諸己國勢兵力之富強若何人民教育之程度若何內外文武人材之擔任若何如其尙待培養則雖法律精允足與列強同符而欲各國領事裁判權遂一一撤去不待智者而知其未易言矣臣愚以爲今日之修訂法律誠不可緩而實行之期則斷不宜急但使大其規模寬以歲月務求精詳允備釐然胥當於人心然後擇其易曉易從者試行一二端以漸推而廣卽遲之十年二十年亦不爲晚否則於民俗習慣未甚愜諧而貿然頒行將不惟齟齬笏糾而已誠恐外國之屬人主義其勢力日益擴張而內國之屬地主義其處理愈形轉轄或遇地方有司奉行不善因之釀患階厲外人且將藉口干涉其爲隱患何可勝言是不得不深慮而熟籌者也得旨所有修訂法律著法部大理院會同詳核具奏覆奏多循其說議行七月調補吏部右侍郎充經筵講官三十四年二月因母老請假歸省假滿病請開缺旋丁母憂哀毀卒於家仁黼歷充考試提督衙門筆帖式驗看月官朝審監修東西四牌樓估修崇聖祠磨勘試卷閱卷讀卷揀選官缺從耕藉田覆核朝審抖晾實錄釐定官制大臣各差其兩充鄉試正考官取士根於義理而大旨歸於通達敘江西鄉試

錄進呈略曰明臣呂坤之言曰識義理易識時勢難識時猶易識勢殊難識義理迂儒獨能之識時與勢斷非通儒不能國家之於科舉誠欲得通才而任使之也夫義理者道之涂轍時勢者道之權衡也君子之學於道亦期能行而已行於獨而不闕於衆謂之通才江西古理學文章之淵藪第恐者碩凋謝荒江蔀屋株守一隅不知瀛海廣大腐廓而無用而一二穎特者又或根器不深非囂則誕耳朝廷方以通才望天下士願以浮薄應之世變何賴焉程子曰治天下以培養人才爲本人才者天下之光氣也育之學校所以厚其蓄拔之科目所以達其施臣等竊本斯義悉心抉擇或有二三通才出乎其間上應君國之求下持風教之敝其奏保經濟特科人員孫葆田等十餘人與校閱經濟特科試卷均守此義九月遺疏入奉上諭開缺吏部右侍郎張仁黼由翰林入直上書房洊陞卿貳學問優長迭掌文衡克勤厥職旋在吏部右侍郎任內請假回籍省親因病准予開缺茲聞溘逝軫惜殊深加恩照侍郎例賜卹任內一切處分悉予開復應得卹典該衙門查例具奏尋賜卹如例

王文韶

王文韶浙江仁和人咸豐二年進士以主事用籤掣戶部五年以海運全完奏保儘先補用七年以捐銅局辦理捐輸認真奏保俟補缺後以本部員外郎遇缺卽補先換頂戴是年學習期滿奏留八年丁父憂十年服滿十一年三月補福建司主事六月陞四川司員外郎同治二年補陝西司郎中三年二月京察一等記名以道府用又以在工出力奏保專以道員用六月授湖北安襄鄖荆道七月戶部奏遵保出力司員加鹽運使銜時髮捻各匪始由楚竄豫會蔣凝學軍道出襄陽潰散八營大局震動文韶籌餉數十萬收集潰亡兼籌防堵境賴以安踰年調署漢黃德道又值捻匪南竄武漢戒嚴文韶先事預防得無患六年二月左宗棠督剿回逆檄辦西征後路糧臺疏薦於朝有才長心細器識閎偉素爲中外信服之語同時湖廣總督李鴻章亦薦文韶才大心細爲中外難得之員十月擢湖北按察使十一月署布政使八年二月調署湖南布政使尋卽補授十年十月署湖南巡撫十一月奏陳湘省地方軍務大概情形略謂湖南近日情形惟援黔防境兩太端最爲當務之急自軍興以來應募之卒湘勇居多厥後遣撤歸鄉旣不安於耕農又素習於戰鬪遊手徵逐浸生事端以故年來會匪充斥伏莽徧地宵小竊

發幾於無歲無之上年湘潭道州本年益陽龍陽之事其尤甚者也臣於藩司本任內隨同前撫臣劉崐極力設法補救通飭所屬地方官清釐保甲整飭團練以冀隱戢亂萌各屬士紳又多以久歷戎行忠義激發兼以利害切身之故同心協力各衛其鄉半年以來漸著成效雖區區小補不敢謂此後遂可無虞而第能思患預防卽偶有蠢動當不致成燎原之勢從容消弭事在平時此地方防務情形尙可仰紓聖慮至援黔之師數年以來罄全湘之所有以濟軍需積欠餉銀已有二百餘萬兩目前各營之餉每月僅能發二十日藩糧兩庫除例支各項外其可撥濟軍需之款本自無多釐金鹽稅亦止有此數以出較入遠不相當雖屢蒙朝廷垂念酌撥各省協餉亦以支應爲難未能一律照解是故爲湘省計則積困之力誠不能支惟有自全以弭患而爲援黔計則久累之功自難遽棄要在竭力以圖成事有兩妨勢宜兼顧本年奉有減援增防諭旨亟思酌量變通總以欠餉過多一時尙難措置臣雖暫時攝篆斷不敢玩愒苟安亦不敢操切債事俟會商督臣通盤籌畫總期黔事有益而湘力可支竭盡愚忱而未敢遽以自必也蓋其時剿捻軍務緊急黔苗乘隙滋事桂東郡縣悉遭陷歿湘黔驛道梗塞兇鋒所指擾

及楚邊沅靖晃三府州廳時被蹂躪迭經前撫臣李瀚章劉岷籌議大舉援防戮力六七年之久雖迭克桂東城邑湘邊仍復騷然軍威迄不能振自文韶署任以後乃專任臬司席寶田統兵進剿苦戰猛攻始將貴州之施秉施洞台拱九股河凱里麻哈黃平雷公山黃茅嶠頂山各城隘次第收復湘境得以無警黔境驛道亦漸疏暢時桂東苗亂尙未平定也文韶益極力籌餉屢促諸軍破賊於是丹江南猛報德諸寨先後削平悍苗俘斬幾半十一年軍務方甚得手席寶田患病不能督戰文韶以臨敵易將非兵家所宜遂令席寶田所部各將蘇元春龔繼昌唐本友謝蘭階戈鑑分領其衆仍以席寶田調護之將帥和衷軍心益固苗疆有烏鴉坡者岡巒繚亘二十里最爲險要逆苗張秀眉知勢已衰糾其黨楊大六等麇集其處連砦數十全黔叛苗盡萃其中文韶遙策羣苗鋌走絕地勢將窮蹙飛檄諸將奮力會戰羣酋見長圍已合率黨死戰我軍頗有傷亡而士氣彌厲襲破其卡燒苗棚以千計苗亦自焚其棚退踞牙塘尋奪其險苗釋械乞撫六萬餘人又破張秀眉楊大六所踞各砦殘苗聚保烏堡冷水溝計將北走黔軍遏之湘軍馳至截賊爲兩陣斬數千人降萬人並殲首要九大白揭首於竿苗匪乞降者二萬

餘人鏖戰十七日烏鴉坡二十里苗砦悉平搜斬嚴大五於雷公坪擒江老拉詢知首逆張秀眉猶伏烏東山復往搜之與楊大六均各就擒並獲全大五於白水洞檻送長沙誅之其他苗教各酋或俘或斬無一脫者黔境肅清湘境四腳牛寨苗蠢動亦經芟定飛章奏報並陳苗疆善後事宜奉旨嘉納留勇三十餘營駐紮黔湘接壤以資鎮攝至今桂東迄無苗患而湘之沅靖晃三府州廳與黔犬牙相錯之區居者得安耕鑿西路各縣無贖送之勞實賴文韶決策援黔之功貴州巡撫曾璧光疏報全黔勘定極稱文韶派師援剿尤能殫心竭慮不遺餘力十一年五月補授湖南巡撫是年以前巡撫駱秉章張亮基潘鐸功德在民奏准在省城建立三臣合祠又奏請大閱奉旨卽著王文韶逐一查閱十二年奏遵照部議酌定收標世職應支全俸半俸額數自本年起以四百人暫爲定額照章給發報部核銷庶於撙節餉項之中寓體恤忠裔之意又奏遵查殉難故員毋庸予諡並詳議與諡不宜太濫以重名器又奏請變通外官回避章程祖孫父子一條不論官階大小概令其子孫回避祖父以重倫紀均從之十三年奏湘漕試辦採買請留漕項銀兩以資轉運下部議行光緒元年七月寶慶府新化縣屬匪徒滋事文韶

檄總兵謝晉鈞會同地方官前往剿辦匪首李澍暨鄒序仁等先後擒獲訊明正法解散脅從其衡永等屬匪首李炳榮等亦均剿斬地方一律安謐二年奏請開復前湖南巡撫劉崐降一級處分略謂該前撫在湘五年正當撫鄰防境諸務棘手之時卽如援黔之役告成於同治十一年三月該前撫去任不及半年臣任事未久非急切所能就理諸凡規畫皆該前撫歷年心力積累而成又奏保記名提督龔繼昌王永章韓殿甲遇缺題奏總兵廖長明陳海鵬五員堪勝專閫之任三年十月命來京陛見文韶自署布政使到湘至是凡九年軍事旁午內治亦復縝密如增廣貢院號舍以庇多士籌加書院膏獎以勵寒畯親選各校高才以課實學創設候審所恤無告堂棲流所以矜罪犯字窮民銷盜萌湘人至今頌之四年二月署理兵部侍郎在軍機大臣上學習行走時各省災荒天久旱兩宮御素膳宮中日夜祈禱上明諭引咎自責並飭大小臣工恐懼修省翰林院侍講張佩綸編修何金壽先後上疏指陳闕失請訓責樞臣兩宮以咎在宮廷不欲歸過於下文韶乃隨恭親王等以奉職無狀罪有應得力請懲處奉旨交該衙門嚴議尋議革職加恩改爲革職留任四月補禮部左侍郎乞假兩月迎母就養七月命在總

理各國事務衙門行走十月賞紫禁城騎馬五年正月命在軍機大臣上行走旋以京察開復革職留任處分是月調補戶部左侍郎兼管三庫事務仍兼署兵部左侍郎六年正月總理各國事務衙門奏詳議籌邊之策分邊防籌餉儲才三大端列爲八條曰西路邊防曰北路邊防曰東路邊防曰北洋海防曰南洋海防曰綜核餉需曰節流籌餉曰廣儲人才戶部奏籌備餉需事宜十條曰嚴催各省墾荒曰捐收兩淮票本曰通核關稅銀兩曰整頓各項釐金曰嚴查州縣交代曰嚴核各項奏銷曰專提減成養廉銀兩曰催提減平銀兩曰停止不急工程曰核實顏緞兩庫折價皆文韶籌議定稿次第奉旨施行七月以辦事遲延交該衙門議處部議以降二級留任公罪例准抵銷奉旨准其抵銷七年三月孝貞顯皇后升遐賞穿孝百日八年正月署理戶部尙書六月仍以戶部左侍郎兼署禮部右侍郎八月兼署吏部右侍郎七月彗星復見御史洪良品上疏言樞臣舞弊請旨罷斥以弭天變略謂雲南報銷戶部索賄十三萬嗣以八萬了事景廉王文韶均受鉅萬奉旨覽奏殊深詫異事爲朝廷體制重臣名節所關諒洪良品不敢以無據之詞率行入奏著派惇親王翁同龢飭傳該御史詳加詢問務得確實憑據卽行

覆奏悼親王等奏據該御史稱此等詭秘之事豈有令御史聞知之理士大夫商賈萬口一詞不能指定何人得旨仍著麟書潘祖蔭將此案澈底根究務期水落石出以成信讞給事中鄧承修奏略謂樞臣被劾無據事實有因被參之王文韶未解樞柄應請先行罷斥使朋比者失其護符訊辦者無所顧忌尋麟書等奏查明大員接受外官私信請敕呈錄並將疏縱案犯之司員請旨先行交部議處仍令沿途嚴催要證迅即赴案奉上諭麟書潘祖蔭奏雲南報銷一案現經訊據戶部書吏張瀛供稱潘英章來京找伊辦理報銷並許給銀兩伊等各得受筆墨費多寡不等崔尊彝潘英章來京辦理報銷是否係該督撫所委該員等所齎銀兩究係支用何款是否庫款抑係軍餉盈餘請飭查明等語著劉長佑岑毓英杜瑞聯將以上各節迅速據實覆奏不得稍涉諱飾十月文韶奏請開缺養親奉諭王文韶之母雖年逾八旬精神尙健且迎養在京亦可就近侍奉無庸開缺旋又奏請開缺養親奉諭覽其所奏各情本應俯如所請惟見在軍機處暨總理各國事務衙門辦事需人王文韶尙稱熟悉著仍遵前旨於假滿後照常入直毋得再行瀆請十一月復請開缺養親允之九年六月以失察戶部司員書吏收受雲南報

銷案內津貼銀兩並濫保劣員交部議處尋准部議降二級調用不准抵銷旋丁母憂服滿十四年二月在籍授湖南巡撫湘人驩呼謂將重來福我也七月抵任卽整理文武鄉試諸務十五年六月擢雲貴總督八月以恭逢崇上皇太后徽號恩詔遵保獲咎人員已革前廣東布政使姚覲元降調前浙江按察使陳寶箴已革前山西按察使陳湜降調前湖南候補知府徐淦先後奉旨擢用十月奏交卸湖南巡撫印篆並片陳南洲水患略謂洞庭湖爲湖南北兩省水利之樞紐自荆江南岸藕池潰口江水橫決挾泥沙而南淤積西湖一帶漸以成洲見合龍陽華容安鄉三縣轄境計之廣袤幾二百里名曰南洲貧窮私墾豪強爭占五方雜處訟獄日滋此皆近年情形臣初次撫湘時尚不至此然此猶患之顯著者惟洲地愈積愈寬則湖面愈占愈狹容水之區日偪必致橫溢四出湖北則荆江大隄受其害湖南則濱湖州縣被其災蓋湖中之水旣漸變而爲田則湖外之田將胥變而爲水此必然之勢也臣上年到任後察悉情形以爲湖南之大患無有過於此者明知已成之洲萬不能再事剷除俾復全湖之舊然救弊補偏亦正岌岌不可終日滿擬今年秋後水落遴選講求水利實心任事之員周歷重湖詳加查勘或

培隄以禦汎漲或開支渠以導衆流或將荒洲裁灣取直以引溜而刷沙總期於辰沅資澧諸江水入湖之口不致壅遏不通激成泛濫之勢並申明定例嚴禁私築隄垸私墾官荒凡有淤洲苟無礙於水亦祇准官爲招佃不准民間指請升科卽有昔爲湖業今成陸地之處亦祇准豁除漁課不得藉水占地仍於南洲地方添設水師一營常川駐紮巡防無令寇盜因以爲資致蹈宋楊么明陳友諒故轍此皆臣私憂竊計爲亟思設法補救者惜匆匆受代未及見諸施行惟念臣兩任湘撫湘人安臣之教令有過尋常臣旣無德於湘人而並此地方利害所關亦未及早措置冀弭巨患於方來此尤夙夜疚心而不能自己者也擬將詳情告知新任撫臣隨時奏辦謹以附陳十六年正月抵雲貴任二月疏陳地方情形略謂滇省地處極邊實爲西南一大都會咸豐丙辰以後漢回構釁亂民乘勢蜂起通省蹂躪殆徧兵連禍結者二十餘年仰仗天威疆臣效命用能殲除羣寇次第邊平論勘定之功前督臣岑毓英實居其首迨軍務漸定地方政事諸待修舉則劉長佑之老成坐鎮其功自不可沒而見任撫臣譚鈞培懃懇堅凝實事求是二三年來改觀尤速臣未入境以前采聽風聞默揣時局謂地方肅清未久一切政務恐

未能以承平行省相繩及至身入局中綜觀大略舉凡兵事吏事防務鹽務俱有範圍有非臣始願所及者惟池西界連緬甸池南壤接越南大局變遷勢成逼處交涉之事日益糾紛地方文武尙未能諳悉洋情少見多怪深恐措置失宜此固圉弭釁之方所亟宜講求者也滇民生計向來視銅廠爲盛衰軍興以後銅政廢弛民生日困見經前撫臣唐炯督辦礦務創設公司招集商股整理舊廠開闢新場上年冬間雲南之巧家貴州之威寧兩廠已報成堂成堂者廠中諺語謂礦務已成局面也聞成堂之礦足供數十百年采取可以用之不盡此後起運京銅必可較前順手裨國計而益民生此事自關運會臣忝任地方遇有應行會商之處亦不敢以督辦有人稍涉推諉此雲南之大概情形也黔省素稱瘠壤物產不豐省城以西曰上游省城以東曰下游臣自湘入黔先經下游各屬竊見城市蕭條閭閻困苦兵火餘燼如在目前驅車所至惻然傷之及抵上游則城鄉氣象漸入佳境雞犬桑麻自安耕鑿較之下遊迥不相同惟通省地方州縣大半以賠累爲苦以竭蹶補苴之況任刑名錢穀之煩遇事因循在所不免過省時撫臣潘霽與臣議論及之謂數年來著意整頓者亦卽在此蓋官民交因爲黔省第一通病也

潘霽創辦鐵礦一事意在因自然之利開不竭之源購置機器水陸運載建局設廠大費經營議者或以時絀舉贏力小任重爲嫌而臣竊服其任事之勇見在工程將竣三四月間即可開爐鑄鐵但期礦產豐旺銷路暢行姑無論公中之利益何如而自開采以及傭工轉運窮民之食力於此者殆不可以數計下游一帶必有起色此貴州之大概情形也總之滇黔兩省被兵已久受害過深民間彫敝情形非一時所能驟復臣意主休養生息實冀爲邊徼遺黎重謀生聚非敢好持迂論以鎮靜掩其衰庸也時法越之事初定越南游勇侵擾內地沿邊夷匪土司與附近省會之教匪勾結營弁一時並起連陷富民祿勸兩城衆心驚惶文韶剿撫兼施獲斬叛將旬日而定四月雲南鎮康州土族刀老五勾結外匪殺斃土知州刀悶錦圖盤踞土城文韶飭永昌府知府鄒馨蘭督同官紳調集團勇馳往剿辦擒獲賊首陣斬匪黨多名土城克復五月猛喇游匪滋擾竄至金子河那窩寨踞險抗拒卽檄總兵何秀林督師進攻克復那窩寨乘勝擊破金子河賊巢民賴以安十七年六月貴州獨山州屬峯洞墨寨等處匪首陸老鑽莫金保等聚衆行劫分遣夥黨混入州城約期內應拏獲訊明正法復陣斬陸老鑽生擒匪黨吳隴幅

等地方得以無事十八年雲南鎮邊地方新附裸夷聚眾滋事拒捕戕官檄飭署理池南道劉春霖督同文武員弁分路進兵將東生富角閑官等佛房及東生等各家口營逆巢次第攻克生擒夷酋漢奸悍賊多名殲斃無算招降二千餘眾拔出被脅難民五百餘家戕官首惡均經擒獲正法邊境遂安二十年正月恭遇孝欽顯皇后六旬萬壽慶典賞戴花翎並交部優敘七月里山里夷頭目丁洪潰等句結匪徒妖言惑眾附近夷寨多被脅從文韶調軍剿捕夷日就誅掃蕩匪巢一律平靖先是雲南防務自英法兼并緬越後西南兩面慎密爲難文韶撫恤諸路土司令自爲守英法勘界議起與出使英法日比四國大臣薛福成往復咨商援據輿圖索還界地弭患尤在無形是年日本與朝鮮有事我軍援朝鮮者陸軍屢卻海軍繼潰沿海各省戒嚴而天津爲京畿門戶尤關重要九月特召來京陛見十二月派充幫辦北洋事務大臣二十一年正月署理直隸總督北洋大臣文韶料簡軍儲嚴定賞罰督飭各營將士講求戰守機宜巨細兼籌昕夕罔懈泊和議既定舉辦善後事宜而遣散各軍尤爲繁重時山海關內外防軍共四五百營酌留湘淮豫軍各三十營督飭營務處分別水陸兩途悉數遣撤拊循周至軍無怨

言七月調補直隸總督北洋大臣二十二年正月疏陳統籌北洋海防略謂北洋海防以天津爲諸軍根本之地以大沽北塘爲內戶金旅威海爲外戶而山海關營口等處分扼水陸要衝相爲犄角環海三千餘里在在均關緊要上年和議甫定遼南未歸大局未能遽定見當金旅接收調募各軍陸續遣撤移防諸有頭緒亟宜及時整頓布置以重防務查北洋沿海防軍前由督辦軍務處奏准除原有守口各軍外議留湘淮豫三軍共九十營分地屯守見聶士成所統淮軍三十營分紮蘆灣一帶吳宏洛等軍分紮北塘大沽一帶新城盛軍舊壘則有袁世凱新建一軍填紮湘軍陳湜所統馬步二十營與淮軍賈起勝等軍分紮山海關一帶宋慶所統毅軍三十營自金旅接收後分部移屯兵力尙單布置粗爲縝密但使操防認真一兵有一兵之用緩急庶爲可恃天津機器製造各局爲軍火所自出機器局鑄鋼一廠見擬試造快礮大沽船塢亦擬造單管快礮製造局擬添新式擡槍此外器械之應添購修理者均經臣督飭各局隨時籌辦此則簡勵戎行蒐討軍實最爲目前切要之圖也旅順各局廠臺庫規模以船塢爲最鉅而各礮臺次之該船塢專爲修理鐵艦而設見塢局廠庫各房屋毀損尙不甚多惟各廠機

器合計僅存十之一二非購配安設不能工作應照原定章程大加收束量設工役派員經理以便南北洋各兵船在此操巡得以隨時赴旅修整其原設之械局醫院及濬澳船隻指泊員役等項勢所必需亦應酌量舉辦俾無廢事至旅順大連灣本北洋外戶威海見駐俄兵南北對峙形勢最關重要設防未可稍疏今查旅順東西兩岸礮臺十一座大連灣礮臺六座各臺身被毀甚多其藥庫兵房均遭拆毀各臺原設大小鋼礮七十餘尊全數毀失估修約需銀二十萬兩爲數無多惟添置各項礮位總非銀二百萬兩不辦款項過鉅擬先擇要興修變通舊式分年籌辦以各臺之形勢定礮位之大小多寡至省亦在百萬以外前經臣奏准將漠河金廠報效銀十萬兩存備旅順善後之用不敷尙鉅仍不能不仰給於部撥見任東海關道李興銳於北洋防務素所究心擬卽派委兼辦旅順大連灣善後事宜飭令渡海將旅大局廠臺庫應修應緩各節詳細覆勘擬具章程約估用款卽行專案奏辦此則旅順大連灣等處隍工宜緩修防宜亟所應分別辦理者也至海防之利鈍總視水師之強弱水師任戰陸軍任守奇正互用應變不窮各國海軍每一枝必鐵艦二三艘快船六七艘雷艇十餘艘佐以練運探報各船力

大勢盛始可角逐爭鋒北洋經營二十餘年甫獲成軍經此挫失見僅康濟一練船飛霆飛鷹兩獵艇新增建靖練船修改尙未告成欲復前規一鐵艦需款二三百萬一快船需款百餘萬加以各項船艇粗具規模亦非二三千萬不可取諸庫帑則羅掘已窮多借洋款則負累愈重且練兵簡器取精用宏事同草創非一時所可能遽就計惟有整頓水師武備各學堂簡選訓習以儲將才嚴飭各練船認真操巡以嫻兵備俟財力稍裕漸次擴充此則北洋海軍雖宜亟辦而限於物力所應爲之以漸者也疏入下所司知之六月坐代奏布政使王廉請託事降三級調用加恩改爲降三級留任十一月疏陳籌修旅順大連灣礮臺略謂旅順爲北洋外戶左顧遼瀋右衛津沽大連灣扼其吭金州撫其背大連灣之防不固則旅順不能守金州之防不固則大連灣不能守旅順金州不守則北洋全局震動往歲之役其前車也旅順原有礮臺密於防前而疏於防後敵從大連灣入旅順遂成孤注大連灣原有礮臺亦專顧防海而未及防陸故敵從金州登岸大連灣遂不能支前督臣李鴻章經營布置垂二十年徒以經費支絀擇要先修未能處處嚴密一旦挫衄盡棄前功至今日而重整海防不修復各處礮臺則不能固北洋

之防僅修復舊有礮臺而不彌其罅隙則復蹈從前覆轍仍不足以固北洋之防
本年正月間臣於統籌北洋海防摺內略陳大概嗣有德國克虜伯礮廠委員克
馳馬格魯森礮廠總辦年彌持出使大臣許景澄信函先後來津願往各海口察
看形勢經臣商令前往旅順等處詳細查勘各陳所見詳略雖異而主於水陸兼
顧之義則同年彌並繪具圖說於舊有各礮臺分別去留酌定修改又於從前布
置未密之處添建陸路礮臺以防後路計旅順海口東西兩岸擬修礮臺十八座
東北西北西南三面添修礮臺二十座四圍環繞聯絡一氣無論水陸皆可守禦
大連灣金州之交擬修礮臺十三座其黃山和尚島徐家山等處礮臺九座專禦
水師上下南關嶺等處礮臺四座兼防陸路其防海而擊敵船也則由二十八生
二十四生等項快裝大礮其防陸路及護濠牆也則用十二生十生半暨五十七
密里各項快放小礮均皆量敵遠近因地制宜合計旅大兩處各臺共需安設大
小礮位二百三四十尊連電光燈鋼甲礮架等項共約估需價銀三百五十萬兩
上下此乃因鉅款難籌極力從省計算如財力稍充尙需添建大鐵甲旋轉礮臺
及鐵甲望臺數處方可益臻鞏固見聞總理各國事務衙門先後定購穹甲魚雷

等船一二年內即可陸續來華船臺相輔而行水師既已逐漸經營礮臺亦應及早布置惟是建造礮臺要義不外擊敵與防敵擊兩端擊敵則期命中及遠防敵擊則宜堅築深藏擇地而施非深明測算之學者不能得其窾竅旅大各臺雖經年彌等擇定基址查明大概情形其地勢之高下廣狹地質之土石鬆堅以及礮臺如何建置仍須逐細測量始能興工建臺購礮須同時並籌建臺需費約數十萬金俟定議後核估請撥其購礮一項業經年彌等一再考核無可再省擬請敕部於籌備購船經費之外先行酌撥銀三百萬兩由臣與各礮廠核實訂購務節虛糜而歸實用下部妥議二十三年正月京察開復降三級留任處分直隸防務交涉胥關重要一切新政尤爲全國命脈所繫文韶繼前總督李鴻章之後凡李鴻章舉辦未成之事皆次第成之如奏勘吉林三姓金礦謂妥議開辦章程卽爲實邊裕餉通商之計奏開磁州煤礦謂該處爲蘆漢鐵路必經之地鐵路告成卽資其煤以爲用而該處煤鐵各礦亦可逐漸擴充又奏墾天津新農鎮一帶營田五萬餘畝以興民利減免望都縣糧賦玉田縣差徭以恤民艱乞永定河淤塞治潮白河故道築溫榆河各壩並設水利總局以除患興利免南商米稅以濟民食

鑄北洋銀圓以維國法皆奉旨施行京漢鐵路爲南北第一幹線運兵濟餉關係民生國計甚巨時議紛紜遷延日久特派文韶議辦會商湖廣總督張之洞往反討論決定借款興築遂以成功又奏設北洋大學鐵路學堂育才館俄文館西學水師各學堂上海南洋公學以造就各種應用之才二十四年五月再奉命在軍機大臣上行走兼總理各國事務衙門行走補授戶部尚書九月賞西苑門內乘坐肩輿二十五年十一月以文韶七十生辰賞御書扁額對聯珍玩文綺旋以戶部尚書協辦大學士十二月充經筵講官二十六年二月恭遇德宗景皇帝三旬萬壽慶典以年逾七旬賞加太子少保銜五月充國史館副總裁是年夏拳匪肇釁首禍諸臣惑於邪說文韶力持正論再三上陳深中其忌七月事亟聞尚書徐用儀立山將罹於禍亟擬申救已不及事後始知首禍者并欲陷文韶幸上聖明置不問時內外交訌軍機入直僅文韶一人而宮禁森嚴聲息隔絕猝聞兩宮西狩遂攜軍機印鑰徒步追隨崎嶇三日抵懷來縣兩宮駐驛聞文韶至立命入對相持而泣諭曰此後國家惟汝是賴隨扈由晉入秦召對日數起事無鉅細罔不疇咨凡東南保守之約聯軍議和之款皆參贊宸謨密承乾斷統籌全局轉危爲

安十月授體仁閣大學士管理戶部事務二十七年五月充國史館正總裁六月改各國事務衙門爲外務部授外務部會辦大臣八月以迴鑾在卽賞穿黃馬褂旋賞用紫韁九月命署理全權大臣先行回京會辦東三省中俄條約及和約未盡事宜十月以大局漸定回京有期文韶協力同心不避艱險賞戴雙眼花翎十二月命稽察欽奉上諭事件處又派督辦路礦總局轉文淵閣大學士二十九年二月署翰林院掌院學士五月晉武英殿大學士閏五月加恩免帶領引見九月開去外務部會辦大臣管理戶部事務充文淵閣領閣事三十一年五月有旨王文韶當差多年勤勞卓著見在年逾七旬每日召對起跪未免艱難自應量予體恤著開去軍機大臣差使以節勞勩三十二年二月京察命交部議敘三月因病奏請開缺奉旨賞假兩月安心調理無庸開缺如是凡五請皆蒙賞假至三十三年五月復陳請開缺奉諭大學士王文韶久贊綸扉朝廷深資倚任前因患病迭次陳請開缺未經允准茲復瀝陳病狀懇准開缺回籍情詞迫切不得不勉如所請王文韶著准其開缺回籍調理並加恩賞給馳驛文韶敷歷中外撫湖南者先後七年督雲貴者五年督直隸者四年直軍機者先後十五年持大體達情事

籌餉治軍處分適當察吏撫民洞悉其隱用人不拘一格凡所薦剡多有聲績名臣忠義婦女節烈多所表彰其寵眷爲同直樞臣所無賞賚稠厚至不勝紀三十年退出軍機之後二月停罷科舉之詔下文韶在直之持異議也然歲時頒賞仍與在直時同其爲兩宮優眷蓋如此三十四年正月以鄉舉重逢賞加太子太保銜十二月卒奉上諭致仕大學士王文韶器識深穩才具優長由部屬簡授外任受先朝特達之知洊擢兼圻勤勞夙著由直隸總督宣召來京參預機務晉贊綸屏服官五十餘年精敏勤慎克稱厥職上年因病奏請開缺陳懇肫切准其致仕馳驛回里本年因鄉舉重逢賞給太子太保銜方冀長承恩眷克享遐齡茲聞溘逝悼惜良深著加恩追贈太保照大學士例賜卹任內一切處分悉予開復應得卹典該衙門查例具奏伊子農工商部郎中王慶甲著以道員用伊孫江蘇補用道王鈺孫著交軍機處存記用示篤念耆臣至意尋賜祭葬予諡文勤宣統三年二月湖南巡撫楊文鼎以文韶功德在民奏請於湖南省城建立專祠春秋官爲致祭從之有宣南奏議湘撫奏議滇督奏議直督奏議各若干卷

曹鴻勛

曹鴻勛山東濰縣人由同治十二年拔貢朝考一等籤分刑部七品小京官光緒二年一甲一名進士授職修撰五年五月奉旨充湖南副考官十一月差竣覆命七年七月提督湖南學政湘人素講根柢學而邊僻各府往往謬於舊習拘守章句鴻勛輜軒所至拔其尤者令入省書院肄習以資觀摩由是諸生聞見大開邊僻風氣爲之一變十一年九月差竣請假回籍省親十二年五月假滿到京供職十三年命在上書房行走並奉旨授載潤讀十四年二月京察一等十五年正月賞加五品銜六月奉命充陝西正考官尋改充江南副考官十二月差竣到京覆命十六年充教習庶吉士十七年五月以母憂回里十九年九月服闋到京命仍在上書房行走二十年正月以孝欽顯皇后六旬慶辰賞加四品銜是年京察一等覆帶引見得旨著交軍機處記名以道員用三月命以原銜充署日講起居注官旋奉旨授詹事府右春坊右贊善三月大考二等第五十名十一月充補武英殿纂修二十一年八月轉左春坊左贊善二十二年正月簡授雲南遺缺府知府七月雲貴總督兼署雲南巡撫崧蕃奏補永昌府知府二十三年正月到任永昌居滇省極邊華夷雜處素稱難治鴻勛下車後平反巨案數起人服其明斷且以

時遊歷鄉曲詢悉閭閻疾苦凡有益於民生者無不以身任之大吏知其賢調補雲南府知府二十四年九月抵任越歲簡授雲南池東道旋署糧儲道二十七年三月得旨雲南按察使著曹鴻勛補授時滇省上控巨案動輒累年不結鴻勛抵任未及兩月斷結巨案十餘起由是大吏益倚重之二十九年擢貴州布政使四月命暫署貴州巡撫時值廣西游匪不靖奉旨兜剿南丹土州地方廣袤二百餘里遊匪恆恃爲根據地鴻勛選將誓師人皆思奮匪徒聞風星散不戰而南丹胥平三十一年正月十三日調補湖南布政使是月二十一日拜陝西巡撫之命三十三年八月得旨曹鴻勛著來京另候簡用是年十一月到京召見一次旋奉上諭著曹鴻勛協理開辦資政院事務宣統二年九月病卒遺疏入奉旨前陝西巡撫曹鴻勛由翰林入直上書房迭掌文衡外任道府洊陟疆圻嗣因開缺奉旨來京派充資政院協理宣力有年克勤厥職茲聞溘逝軫惜殊深加恩著照巡撫例賜卹任內一切處分悉予開復應得卹典該衙門查例具奏欽此

馬維騏

馬維騏雲南臨安府阿迷州人由行伍積功擢至四川提督爲人性沈毅有勇略

年未弱冠卽好武喜兵謀應武試咸豐八年遭匪亂全滇被擾思自效乃以武童入營九年隨同官軍攻克霑益馬龍各州城旋往祿豐元永等處防堵剿賊所向有功遂蒙前署滇督徐彙案奏保藍翎千總旋蒙拔補開化鎮右營右哨千總同治二年省城被圍奉調赴援奮力先攻圍立解又接連克復楚雄等府州縣城九年敍功保奏奉旨以千總儘先拔補並賞戴藍翎十年復偕官軍攻克新興州大東溝賊巢十一年克復永昌府等城先後出力經兩次督撫臣會銜奏保得旨以守備補用嗣以攻剿順寧雲州等處悍匪之功十三年列保上奏得賞加都司銜光緒元年攻剿騰越等處賊巢敍保都司得賞換花翎繼又剿辦寧州鄧川鎮雄等處匪衆擒斬首要得保奉旨以游擊補用並加副將銜嗣又剿辦各屬蠻夷土匪要逆就擒六年得保奉旨以參將補用九年奉委管帶綏遠左營練軍及法越事起率師出關遂以偏裨獨當一路初駐軍興化援應北寧屢敗敵兵旋進攻宣光奮力薄城晝夜不懈當卽陣斃敵將多名敵兵無算敵守將窘迫求救投筒於江屢爲官軍截獲城已垂陷會敵援兵大至劉永福一軍在前被圍甚急該故提督奉調赴援乃撤圍馳救至左城地方值敵兵大隊蜂擁而來當以衆寡不敵被

其包圍鏖戰兩晝夜官兵陣亡三十餘人勢危甚而該故提督勇氣益奮不少卻卒能戰退敵兵並拔出劉永福一軍於險旋分軍往臨洮助戰迭獲勝捷竟槍斃敵酋七名敵兵數百及奪獲軍械紅白衣數百件十一年事竣論功奏保副將並蒙賞加博多歡巴圖魯勇號十三年剿平猓黑關地千里設鎮邊直隸廳按猓黑爲滇邊烟瘴之區以瀾滄江爲門戶道塗險遠自逆首張秉權盜據其地常出滋擾嘉道咸同閒屢征不克至其子張登發繼父爲惡更得僞軍師楊定幗爲之畫策招脅蠻夷土匪數萬人嘯聚其中依險築壘拒于川江恃爲巢穴分黨四出焚掠邊民連年受其荼毒經前滇督岑檄兵分四路進剿諸將皆畏阻莫敢前該故提督獨率督標三營冒夜前進乘賊不備已由猛柱間道搶渡瀾滄江賊始驚覺以大股拒戰該故提督揮兵奮擊奇正兼施連敗賊衆分奪堅碉要隘數十處賊勢不支退據圈挖僞城堅壁自守該故提督復會兵圍攻力奪僞城再戰敗之於大墳山遂追擒逆首張登發並獲其父子兄弟及僞軍師楊定幗等猓黑遂平其餘三路之兵均以後時無功可想見其治兵神速之大概矣木夏寨土匪時尙披猖乃移師進剿渠魁就擒餘黨潰散遂滅之事上奉旨以總兵記名簡放隨奉委

赴元江次通壩安插越邊授地編屯措置悉當復馳赴各處開墾勞瘁有加十六年越南游匪餘孽魏名高等又起復加剿平事竣論功奏保奉旨賞加提督銜十七年土匪黃子榮等闖入富民祿勸兩縣該故提督奉委率領新募綏靖選鋒營勇馳往剿辦立將兩縣城收復遂邀滇督撫兩部院合詞奏保存記以備專闕之選奉旨允准嗣經前滇督王迭次優保奏署普洱鎮及臨元鎮各總兵篆務十九年越匪竄擾開化府屬歸仁里一帶以致邊境游氛屢起法人時有責言該故提督奉調往剿先由都章進兵轉於黃樹皮小壩子黑河一帶地方盡殲匪黨邊境肅清外交之釁以弭得旨從優議敘二十一年入都引見道出天津經北洋大臣直督王特摺奏保以氣識沈雄謀勇素備爲武職中不可多得之員且熟悉滇邊形勢深諳中外情形若以鎮撫邊陲必能鼓舞羣情用固吾圉遂得奉旨發回雲南差遣當蒙滇督崧委署雲南昭通鎮總兵二十四年奉旨補授廣東潮州鎮總兵二十五年委署廣東陸路提督庚子之變粵省興中會潛謀起事由廣東撫臣德調辦省防擒斬首要地方以安又以專闕之材奏保得旨交軍機處存記二十八年遂奉旨補授廣東陸路提督旋以川省仁壽匡彭山等縣匪徒焚燬教堂傷

斃教民遂至釀成交涉重案乃奉旨調補四川提督會同川督妥籌剿辦及該故提督到任匪徒輒以次戡定當以川省防練各軍四十餘營分紮要隘深恐無所統率經護川督陳奏以該故提督韜鈴夙裕紀律素嚴派充總領全省水陸各營得旨允行嗣又經調署川督錫因威遠等軍改爲續備六軍賴有知兵大員居中督率爰奏以該故提督爲續備全軍翼長仍兼統續備前軍其爲先後督臣倚任之重有如此者三十一年打箭鑪關外泰凝寺喇嘛稱兵叛亂該故提督率兵往剿平之已而巴塘喇嘛又糾集土司稱兵謀變戕害駐藏幫辦大臣鳳全並殺斃法國教士又與瞻對裏塘各番匪勾結串合聯成一氣聲勢洶洶全臺震動川藏中梗大局幾危該故提督由泰凝寺移師進剿當時遍地賊氛扼險抗拒冰地雪天轉運不前該故提督廣施方略剿撫兼施先進攻二郎灣山之頭殿喇嘛寺肉薄揉升連破關隘數重殲其精銳又進擊於三壩山頂斬獲甚衆餘匪潰遁連戰皆捷邊事始有轉機惟邊外窮荒蠻民逆命軍糧必採於內地轉運倍苦其艱辛該故提督既籌進攻復顧糧路沿途設伏屢破鈔襲之師官軍始得後顧無虞士氣百倍遂連克大朔關破丁林寺收復巴塘全境又追剿於毛奶西攻克木多雅

巴廟殷拉橋象山巴當等處分合搜剿前後殲除逆匪喇嘛無算其原槍傷鳳全之逆匪正犯喇嘛阿澤隆本朗吉暨打毀教堂之喇嘛工布汪阿那格桑洛米羅戎卻本馬全阿訾番匪津昌汪學巴塘正副土司羅進寶郭宗札保等悉就擒戮中外憤舒遐荒警服經前川督錫奏上其功得蒙恩賞頭品頂戴並賞穿黃馬褂及凱撤入關該故提督感激圖報深以時事多艱將材難得因與前成都將軍綽前川督錫籌商提撥提署鋪租各款創辦將弁學堂使旗綠各營子弟漸習新軍法制又就營款籌設公立小學堂教育各營弁兵子弟以資造就老成碩畫盡瘁有加三十四年改編巡防軍經前川督趙奏充巡防全軍翼長嗣因該故提督連年積勞傷病感發常患咯血便血等症仍力疾從公不少休息乃至宣統二年終以是卒於任事聞諭曰已故四川提督馬維騏由武童隨前雲貴總督岑毓英轉戰滇邊三池剿辦蠻夷各匪所向有功洊陞總兵擢授提督巴塘番逆構亂統兵進剿全臺肅清平日整頓營伍勞瘁不辭茲聞溘逝軫惜殊深馬維騏加恩著照提督軍營立功病故例從優議卹任內一切處分悉予開復應得卹典該衙門察例具奏並將戰功事蹟宣付國史館立傳伊子四川試用同知馬佩璈著以知府

分省補用以彰勞勩尋賜祭葬

景星

景星滿洲鑲白旗人二品廕生同治六年引見奉旨文職用以主事籤分工部十一年恭辦典禮保以本部員外郎卽補並加道銜嗣以圓明園工程移獎賞戴花翎光緒四年補員外郎五年恭辦惠陵奉安事宜保以本部郎中無論咨留遇缺卽補加隨帶三級是年穆宗毅皇帝聖訓實錄告成詔賞舉人十二年挑取謄錄十三年補郎中十四年京察一等詔以道府記名九月除江蘇蘇松常鎮太糧儲道以前在部襄辦大婚典禮加二品銜十八年大計卓異十九年九月丁繼母憂回旗守制是冬百日期滿二十年三月命回原衙門行走十月督辦軍務王大臣派充文案翼長二十年授陝西陝安道二十三年遷長蘆鹽運使二十四年正月補授山西按察使八月調任山東十月陞授河南布政使二十六年八月擢任江西巡撫旋調補湖北巡撫敘豫藩任內承辦甘餉功獎頭品頂戴景星自歷任道以來積有勞績迭蒙交部優敘者凡六次十二月補授福州將軍二十八年因病乞假解任回旗三十一年景陵隆恩殿災命照例議處三十三年充資政院協理

大臣命襄辦開院事務尋派充禁煙大臣宣統二年正月卒遺疏入諭曰前福州將軍景星由部屬簡放道員歷任按察使布政使洊擢湖北巡撫福州將軍均能克勤厥職當因患病准予開缺回旗調理嗣經派充資政院協理大臣禁煙大臣辦理一切悉臻妥協茲聞溘逝軫惜殊深加恩著照將軍例賜卹任內一切處分悉予開復應得卹典該衙門查例具奏伊子蔭琦著以郎中補用尋賜祭葬

廷杰

廷杰滿洲正白旗人由光緒二年進士用刑部主事洊陞員外郎京察一等記名道府十二年授郎中補承德府知府以捕獲馬賊敘功加鹽運使銜十四年奉旨修辦熱河宮牆倉廩並武河大石壩要工出力以道員在任候補十六年擢湖南岳常澧道十八年調辰永沅靖道二十三年陞授奉天府府尹二十四年補直隸布政使二十九年調補奉天府府尹三十年兼署盛京戶部侍郎三十一年署盛京將軍先是牛莊等處葺塘地畝已招商佃開墾嗣因拳匪構亂商佃流離曾由盛京將軍增祺奏請緩辦而塘地升科課賦以爲供應三陵要差抵歷年由京請領之款京外便之至是廷杰復奏請續辦並條陳利弊得旨令督飭委員認真勘

辦廷杰遣員清丈全塘民情帖然遵章交價無一違者時經拳匪亂後公私困竭新政待興而物價騰貴官俸省者尤苦費用不給廷杰上疏曰竊維忠信重祿爲政之經非有以養其廉卽無以懲其貪而吏治終無起色自來各省州縣均恃徵收餘潤以資辦公卽佐貳教職亦藉此津貼奉省各廳州縣徵收本屬無多且有並無經徵之處而廉俸又照章折減支給故困苦情形甚於他省甲午以後斗秤各捐均歸地方官經理尙可稍資挹注自原任將軍依克唐阿整頓稅務派員會徵各州縣不惟無可沾潤甚至有虧空賠墊者雖東邊昌圖新民洮南海龍各屬設官案內廉俸等項先後奏請支給實銀究竟爲數甚微現在開辦學堂警察及整頓農工商諸要政鼓舞振興端資提倡地方之責任愈重辦公之經費愈多責以無米爲炊勢必一籌莫展其佐貳教職有參預襄贊之勞亦不能不寬籌所入擬請在斗秤捐款項下按季支領作正開銷分別各缺等次酌定銀數多寡仍隨時督察整飭以期款不虛糜而政治日臻上理疏入詔如所請尋以警政武備亟須開辦又上疏曰警務爲內政權輿內政不修遑云外交雖籌款萬分爲難然不敢因噎廢食擬照北洋所辦警察藉資鋪捐辦法益以斗秤燈膏等捐爲整頓警

察兼設警務學堂之用復仿照陸軍小學堂章程設武備小學堂選派學生四十人入日本振武學校捐廉俸八千金以爲之助並請應用經費由後任將軍隨時設法措籌以期久遠上皆如所請行未幾上以奉天懇務緊要詔開奉天府府尹原缺以侍郎候補前往奉天辦理墾荒事務甫之任復奉補授熱河都統之命熱河地處邊瘠需次人少舉辦新政雖調內地人才往往裹足不往廷杰請於朝遇有府州縣新舊缺出暫准於奏留人員內不拘成格量才補署上允之熱河舊有牧廠與密雲牧廠相接光緒三十年副都統于珊奏請放丈未甚推廣廷杰上疏曰熱河賦額無多常年餉需全資戶部直隸接濟近以舉辦要政需款浩繁擬將熱河牧廠東西三四十里南北十數里分爲三則一併招墾上則准領一頃中下則准領二頃約可得地一千四百餘頃收押荒銀六萬餘兩俟三年成熟升科之日報部給照執業而熱河官馬仍留地五百餘頃以資牧放得旨允之熱河地廣兵少自承德圍場赤峰豐寧灤平二千餘里間列防四十餘處僅有熱河自練之巡防五營杰擢節稅捐各款添馬步隊各一營以資防禦復奏請丈放巴林蒙荒二千頃上墾務章程八條一荒價二平色三繩丈四科則五地照六帳棚七轉運

八除弊均蒙嘉納尋以東三省總督徐世昌奏陳內蒙墾務辦法上詔廷杰與世昌妥籌興辦廷杰上疏曰近來時勢艱虞談防務者必以經營蒙地開闢蒙荒爲主義熱河所屬昭烏達卓索圖兩盟十七旗幅員遼闊袤延二三千裡其散處於黃河以北者則有昭烏達盟之巴林左右兩翼阿魯科爾沁東西扎魯特三旗氣候土宜均占優勝之地位若不及時圖維著手愈難惟是籌辦墾務法不一端而形勢之異同蒙情之向背有不可不詳察者東西各國殖民墾荒如英之於坎拿大日本之於北海道類皆無主廢地一經招墾歲收所入盡歸國家足以給殖民開地一切之敷設是以開闢之初凡牛犁籽種房舍器物悉由公家置備故各國興業補助費有多至數千萬者事前雖屬多費事後不難取償中國沿邊各荒多屬盟地與無主產業可以隨意占有者不同今既責令報墾押荒錢糧不可不分子酌給公家徒擲大宗之款以組織一切事後仍無取償之期臣愚以爲就已成之款辦未成之事則易就未成之款辦未成之事則難若如原奏所云爲通盤合籌之法則必特派大員豫籌鉅款重之以區畫之任濟之以財賦之權竊恐經費浩繁既非剋期所能集事地段遼闊亦非計日可以開通不若各就地方情形以

目前之款辦目前之事得尺則尺得寸則寸收效較爲切實是以臣自勸辦蒙荒以來卽以招領爲宗旨其未墾也則妥爲勸諭凡里數畝數皆令地方自行報效並不強爲索取其旣墾也則嚴定章程凡繩丈長短土地肥磽皆依一定準則又爲奏請多留餘地俾資牧養少收押荒以廣招徠計自開辦兩年以來可放之地與各旗面積比較不過十分之三四然已大費周折良以蒙人狃於遊牧雖知墾荒之利終懷失地之疑惟有因勢利導逐漸擴充不敢過事操切開辦經費先由庫款撥墊將來卽於荒價項下作正開銷其建築廬舍購買籽種仍照墾荒成例由領戶自行籌畫所有測繪地形區別道路以及擇勘城鎮各基均責成各局員預爲布置俟辦理有緒擬先設立縣治派員試辦以順蒙情大抵招民開墾之法與移民開墾之法不同移墾則創始難而所費多招墾則創始易而爲費省移墾非通盤合籌預計成數不能見諸實行招墾則度地因時逐漸經營自可漸臻成效非不知墾荒宗旨不在籌款然非款則無以集事一經開放凡設官置署練兵籌餉以及添巡警設學校立公司皆應有之施設當此度支奇絀旣不敢請領部款重累司農而熱河貧瘠情形與奉天不同就地自籌尤非易易故目前辦法惟

有因地制宜暫主招墾以爲徐圖擴充之計疏入允之未幾綏遠城將軍貽穀奏請廣籌旗民生計及教育實業辦法參用滿人上詔各省督撫將軍等按照所陳各節妥籌辦理廷杰奏請設立工藝所俾學實業並請籌撥津貼圍場八旗生息一款上皆允之熱河圍法腐敗商民俱困廷杰撥發官本試辦官銀號購運銅洋各圓以補救圍法復設立商會以聯絡聲氣行之期年商務遂臻發達時墾務開闢治理日繁原設州縣不遑兼領廷杰又奏請於阿魯科爾沁東西扎魯特三旗之地添置開魯縣於巴林左翼之地添置林西縣而以原設之赤峯縣升爲直隸州並於小庫倫所屬之庫街益之以奈曼一旗稱爲綏東縣仍隸朝陽府其東土默特喀爾喀二旗仍隸阜新縣以便鎮懾疏入部議照准先是光緒季年詔各省禁吸鴉片並禁種罌粟通以十年爲限以次遞減而邊遠省分吸種向多於內地至是復嚴諭各省大吏縮短年限禁吸禁種仍籌款抵補洋土藥稅釐並考其成績優予獎擢宣統元年廷杰應詔縷陳禁煙辦法其略曰禁煙一事宵旰焦勞凡在臣工忍不實力奉行廓清沈痼查禁煙一端前奉政務處奏頒章程十條及陸軍民政等部各專章臣卽遣派委員分赴兩府七州縣會同各地方官先勸令開

燈之煙館售賣煙具之商店立時改業未幾卽一律禁絕於是清查吸戶發給甲乙牌照一面限制土藥店爲官膏局凡不驗牌照而賣煙或所賣之數多於牌照所開之數者罰之合官紳之力籌備醫藥設立戒煙所陸續據報戒斷者全屬合計約十之四五膏店據報歇業者亦十之五六統稅局收數遞減大半均可爲吸戶漸少之證據上年復遵照禁煙大臣咨行奏設禁煙公所所有旗民文武各官綜計三百餘員均分班調查其各署局所幕友司巡在官人役責成該管印委考查從此堅持不懈三二年內可冀盡絕根株然竊有鯁鯁過慮者吸煙富戶力能多蓄鴆毒以爲久食之計婦女又深居詭秘稽察難周若不設法先禁將來禁吸限滿必至害公益而誤全局臣已嚴飭地方明查暗訪勸懲兼施紳富則責成各戶族長婦女則責成各戶家長務令繳煙具領方藥刻期戒斷而後已此禁吸之辦法也至禁種一端自奉政務處章程後卽飭屬以光緒三十年種煙地畝爲斷任減無增現已呈報禁絕者凡四府縣其餘各屬原定分年遞減緣口外種煙之戶民蒙各半貧苦居多行法之初未便猝施強迫今已嚴飭蒙旗所有煙苗統令今春禁絕此禁種之辦法也至抵補土稅一端熱河財政支絀土稅所入本爲軍

餉要需若不勉力豫籌轉於禁煙全局受其牽制查朝陽赤峯等府州縣所轄蒙民佃向由蒙旗收租地方衙門並無案據往往增佃奪佃轉租退佃因之涉訟不清擬令租佃蒙地者發給租佃字樣格式簿收其紙費半爲地方新政之用半以抵補土稅而濟餉需似一舉而三善皆備疏上允行熱地民蒙雜處自蒙旗放墾以後新招商佃與民蒙時有爭執言事者傳聞失實以寄居巴林民蒙恃強苛虐入告上令直隸總督端方會同廷杰確切查禁妥籌辦理廷杰疏言曰熱河昭烏盟十一旗內巴林左右翼兩旗克什克騰一旗均隸烏林西界甘珠廟地方與克什克騰旗毗連克旗蒙民遂有驀越至該處遊牧者日聚日衆嘉道間屢因爭界互控經理藩院咨行熱河都統督飭各旗清查旗界奏奉諭旨該地仍歸巴林寄居之克旗蒙民四百戶按戶按年交租至光緒三十三年巴林王扎嘎爾巴林貝子色丹那木吉勒旺寶奏請報效蒙荒數處連甘珠廟地方一併報效在內當派員勘丈之時克旗寄居蒙戶聚衆阻丈毆傷員役經臣奏明委員會同昭烏達盟長阿魯科爾沁貝勒巴薩爾吉里迪所派蒙員切實查辦該三旗自行議定克旗蒙民原歸本旗安插巴林願按四百戶每戶資助遷費銀二十五兩共銀一萬兩

由應得五成荒價項下撥給取結完案奏蒙俞允而言者乃謂巴林王依博盟長
強行驅逐實爲傳聞之誤至於克旗之地雖處邊塞較之巴林尤爲沃衍黃岡梁
烏博洛等處與巴林地而僅隔土梁一道天時地理大致相同亦不至如言者所
云奇寒不毛難於遷徙言者又云克旗蒙民生長巴林房屋什物俱在豈易輕離
故土卽云放墾亦可稍留遊牧之所何必悉數驅逐且蒙民亦可按戶給田令與
漢民雜處久將習與性成耕穫之道不教自熟若巴林之苛虐如此是未來之生
計未籌已有之生計已失臣查克旗蒙民四百餘戶自乾嘉以後寄居巴林閱年
雖久然俗安遊牧至今未改朝西暮東逐水草而居並無一定處所故安土重遷
在內地居民則有之揆諸口外遊牧之風尙未盡合現在巴林旗地已領報效開
墾招徠領戶民蒙雜處言語不通風俗殊異旣已多所不便而墾牧並行一處亦
斷難利益均沾故凡報墾地內習於遊牧之巴林蒙民現尙有自行他徙劃分片
段爲各保生計之謀克旗寄蒙情形相同況其本旗荒地甚多最適宜於遊牧之
用尙不致因巴林報效七千餘頃地失其生計今復給資遣回其體恤寄蒙亦極
周至若如言者按戶給田之議當時未嘗不計及於此方寄蒙之阻丈也該三旗

自行議定克民遷回本旗則給遷費銀一萬兩不遷則撥給地二百五十頃任其遊牧乃該克旗章京等均願受銀而不願留地始全數遷徙回旗實無恃強驅逐苛虐之事也夫巴林報效蒙荒丈放開墾并資遣安插本旗原爲墾牧兩種彼此各安生計起見且係兩造樂從事極平允現在克旗寄蒙四百八十二戶已領銀遷回四百三十戶尙有未遷之五十二戶均稱願遷惟籲懇速發續給之遷費而已臣擬墊撥遷費發交林西縣與昭烏達盟長派員前往散放不准克旗蒙員經手俾得實惠均沾而兩旗各安生業亦不至以多年積釁再起爭端矣疏入詔如所請行廷杰在熱河四年舉辦新政甚力上知其能遷法部尙書賜紫禁城騎馬是年十一月到任視事因積勞多病數請開缺溫詔慰留十二月因病續假復請派員署缺得旨再賞假一月毋庸派署未幾疾卒遺疏入諭曰法部尙書廷杰老成練達端謹廉明由部曹簡放外任洊陟監司陞任熱河都統擢授尙書宣力有年克稱厥職前因患病疊次賞假方期調理就痊長資倚畀茲聞溘逝軫惜殊深加恩賞給陀羅經被派貝子溥倫帶領侍衛十員卽日前往奠醊照尙書例賜卹任內一切處分悉予開復應得卹典該衙門察例具奏伊孫一品廕生延齡著俟

及歲時以郎中用用示篤念盡臣至意尋賜祭葬孫延齡一品廕生

豐陞阿

豐陞阿郭博勒氏滿洲正白旗人由親軍從征直隸山東等省屢立戰功同治元年賞藍翎侍衛三年督辦軍務將軍都興阿奏調前往甘肅寧夏等處派充馬隊幫帶四年攻克寶封縣賞給三等侍衛旋收復寧靈城詔遷二等七年以狄道河州洮河等處克復擢頭等侍衛是年調回神機營當差十二年署烏里雅蘇臺將軍長順奏調赴烏檄充吉江察哈爾等處馬隊統帶駐紮喀爾喀西南界以遏白彥虎北竄昕夜嚴防敘績賞副都統銜復由神機營奏保加二品頂戴光緒六年以防堵要隘不避艱險由烏里雅蘇臺將軍春福保以副都統記名簡放詔如所請九年撤防回京十年補鑲白旗漢軍副都統十一年四月授鑲白旗護軍統領七月挑在乾清門上當差十二年欽差大臣將軍穆圖善辦理東三省練兵事宜奏充總統奉天盛字馬步練軍豐陞阿撥左右翼各五營分駐城東西營哨規模倣吉林章程編定是年六月朔一律成軍十六年以訓練事務諸臻妥協賞頭品頂戴十七年督隊馳剿邊外佛喇嘛寺等處賊匪是時熱河朝陽匪徒滋事豐陞

阿奉檄由開大廟一帶進剿獲匪首潘岳林訊悉該股竄匪約會於黑城子是處距奉界清河門百餘里舊有土城匪等修築完固東南二面安設礮座內外嚴守爲久踞計豐陞阿分三路進兵命右翼馬隊依桑阿等由南路進左翼馬隊常恩等由北路進自督右翼統領等率鑲白鑲藍兩旗步隊由中路入齊抵黑城子城外踞逆槍礮齊發各將士奮勇爭先馘賊二三百名匪勢不敵退保土城與城內賊併力抵抗城上彈丸雨下官軍猛攻而入斃賊四五百人立復土城匪乃退守貝子府池東之一公所院內築礮臺二座用以死拒豐陞阿令步隊圍攻東北西三面親督兩翼馬隊在城外截剿鏖戰數時生擒匪首于發等四十一名殲賊甚夥其南門逃匪經馬隊圍殺殆盡斬逆首張盡先於軍中獲槍械馬匹無算捷人上嘉其功賞識勇巴圖魯名號並賞穿黃馬褂二十年欽差大臣定安奏派統帥盛軍會同淮毅兩軍往平壤保護高麗六月駐軍大東溝旋與日本接戰退保奉界十月岫巖失守命革職交部治罪將軍長順電請留營效力允之嗣於海城子雙山子等處屢戰有功二十一年和議成長順奏懇開復奉旨改爲軍臺效力贖罪二十四年加恩釋回交管理武衛中軍大學士榮祿差遣二十五年賞副都統

銜充庫倫辦事大臣二十九年三月直隸總督議裁庫倫防營豐陞阿疏稱庫倫遠處極邊地方遼闊蒙民雜處巡緝彈壓與內地迥不相同兼以近年蒙人貧苦往往乘機爲亂又有內地流民或自俄國歸來或由口內奔出屯聚街市滋生事端而地當孔道逼近俄疆俄國駐庫官商及各國往來人員保護一切較昔日尤爲緊要庫地增此一營四出巡查尙恐不敷分佈若再裁減更屬可危擬請仍留原額以重邊疆而資保護從之閏五月報效正陽門工程銀一千兩八月補授呼蘭副都統三十年陞見授馬蘭鎮總兵兼總管內務府大臣三十二年授鑲黃旗漢軍副都統三十三年九月署鑲黃旗漢軍都統十一月充管理新營房城內官房大臣宣統元年十月調補密雲副都統十一月卒諭曰直隸密雲副都統豐陞阿由行伍從軍於直隸安徽陝西河南等省曾著勞績簡授副都統克勤厥職茲聞溘逝軫惜殊深著照副都統例賜卹尋賜卹如例予祭葬

孫家鼎

孫家鼎安徽壽州人咸豐九年一甲一名進士授職修撰十年充武英殿纂修官尋充總纂十一年三月以校刊宣宗成皇帝聖訓出力奉旨俟進二十名以陞缺

前列候簡七月充山西鄉試正考官同治元年三月充會試同考官閏八月充實錄館纂修官二年復充會試同考官旋奏充翰林院漢辦事官兼庶常館提調三年二月補詹事府右贊善四月提督湖北學政四年三月轉左贊善閏五月遷翰林院侍講六年轉補侍讀七年二月差竣回京九月命在上書房行走十一月擢侍講學士十二月充日講起居注官九年轉侍讀學士充武英殿提調十年五月奏請解任歸養允之十二年丁母憂光緒二年服闋入都以原官候補命仍在上書房行走復充武英殿提調四年二月命在毓慶宮行走八月詔以原銜署日講起居注官九月補翰林院侍讀學士十二月授詹事府少詹事五年晉內閣學士兼禮部侍郎銜署工部左侍郎充文淵閣直閣事六年授工部左侍郎八年二月兼署吏部左侍郎四月充考試試差閱卷大臣八月兼署禮部左侍郎充順天鄉試副考官十一月復兼署吏部右侍郎九年調戶部右侍郎兼管錢法堂事務復署理吏部左侍郎旋因雲南報銷一案失察司員書吏受贓下部議尋議罰俸得旨准其抵銷十年恭逢孝欽顯皇后五旬慶典恩賞御書扁額旋賜紫禁城騎馬十一年四月充考試試差閱卷大臣八月復兼署禮部右侍郎九月充順天鄉試

覆試閱卷大臣時江西學政陳寶琛奏請以先儒黃宗羲顧炎武從祀文廟議者多以爲未可家鼐與潘祖蔭翁同龢孫詒經等獨請旨准行比仍議駁後卒從家鼐議十二年署都察院左都御史十三年正月以戶部酌易制錢奏覆延宕奉懿旨嚴議尋議革職加恩留任旋調兵部右侍郎十二月開復處分十四年四月充考試試差閱卷大臣八月充覆核朝審大臣十二月充經筵講官十五年正月調吏部右侍郎恭逢德宗景皇帝大婚禮成奉懿旨賞加頭品頂戴是月命知貢舉時以吏部議覆開缺御史屠仁守處分失當由都察院議以革職復奉諭留任八月署工部尙書十六年三月署刑部尙書七月兼署工部左侍郎十一月授都察院左都御史十七年賞西苑門內騎馬十八年三月署戶部尙書五月充教習庶吉士六月兼署工部尙書旋即補授復兼管順天府府尹事務十二月命充總辦慶典大臣十九年八月兼署戶部尙書十二月充會典館副總裁二十年正月孝欽顯皇后六旬萬壽賞戴花翎並交部優敘三月兼署都察院左都御史充考試翰詹閱卷大臣時值中日開釁朝臣議戰家鼐獨言釁不可開及平壤失利京師戒嚴家鼐又力沮異議卒賴以安二十二年正月管理官書局三月七十賜壽賞

匾聯紬緞銀鏤十月調禮部尙書十一月兼署工部尙書二十三年三月署吏部尙書四月命充查庫大臣七月調吏部尙書八月充順天鄉試正考官二十四年三月充會試正考官五月充會典館正總裁詔以吏部尙書協辦大學士維時國事多難外海日棘言者謂非變法不足以強國乃諭百司整飭庶務開言路舉新法實事求是家鼐以原任中允馮桂芬所著校邠廬抗議一書最爲精密奏請飭印頒發各署俾諸臣條論可否彙呈聖明采擇以準公論而順人情詔從之適大學堂初立命家鼐管理學務家鼐詳定規則增設中小學堂又酌立速成學校及醫學校均得旨施行御史宋伯魯奏請以上海時務報改爲官報上命管學大臣酌議家鼐疏覆謂閱報以祛壅蔽事實可行惟宜嚴明混淆黑白瀆亂宸聰之禁至各省報章亦宜飭督撫呈送備擇以廣天聽又議酌置散卿一疏謂國家廣集卿士以資議政聽言固不厭求詳然執兩用中精擇審處尤賴聖知其所建議類能深持大體二十五年因病乞開缺凡三疏皆蒙賞假復固陳十一月得請賞食全俸二十六年德宗景皇帝三旬慶典正月賞給福字一方大緞一匹是歲鑿輿西幸家鼐趨赴行在十月補禮部尙書復拜翰林院掌院學士之命二十七年三

月調吏部尙書十一月扈蹕還京十二月晉大學士旋授體仁閣大學士管理吏部事務二十八年七月賞西苑門內乘坐肩輿十月恩免帶領引見二十九年二月充會試正考官五月充覆試閱卷大臣閏五月充朝考閱卷大臣六月充考試拔貢閱卷大臣八月轉東閣大學士九月充政務處大臣十一月充學務大臣是時學部未立直省儒風龐雜日甚自家兼管學後裁度章程折衷中外嚴定宗旨一以敦行績學爲主海內士氣爲之一靖三十年五月充朝考閱卷大臣十二月賞穿帶膝貂褂三十一年因病迭請開缺朝廷以家鼐老成諳練未允所請先後賞假三箇月並諭假滿卽行銷假六月調文淵閣大學士三十二年以京察議敘加級三月八十賜壽復奉頒賞聯額暨諸珍品七月明詔立憲簡廷臣十餘員釐定官制公同編纂而以家鼐總司核定旋充國史館總裁十二月充文淵閣領閣事三十三年春御史趙啟霖疏劾疆臣賁緣親貴上命醇親王及家鼐確查具奏旋以察訊無據罷啟霖職五月奉旨稽察欽奉上諭事件時直省官制草案擬就其大要有二一曰分設審判各廳以爲司法獨立基本一曰增易佐治各員以爲地方自治基本議成由家鼐覆核呈進上可其奏俾實行焉六月晉武英殿大學

士八月立資政院簡貝子溥倫及家鼐爲總裁命詳擬細章會同軍機大臣妥議具奏家鼐深維中國時勢參考列邦成規與諸臣會訂日次首總綱次選舉次職掌次資政院與行政衙門之關係次資政院與各省諮議局之關係次資政院與人民之關係次會議次紀律次秘書廳官制次經費凡十章先後入告均得旨允行十月詔諸臣輪班進講經史政治三日一直家鼐領班撰尙書四子書講義以進三十四年二月以鄉舉重逢恩賞太子太傅銜五月玉牒告成賞表裏暨加級十月孝欽顯皇后德宗景皇帝先後升遐奉皇太后懿旨穿孝百日十一月皇上登極禮成賞用紫韁嗣頒賞先聖遺念顯皇后白玉壺佩各一景皇帝遺衣一襲暨玉壺玉佩宣統元年命查郵傳部尙書陳璧被參各款均得實具奏二月諭呈進經史國朝掌故各國歷史講義仍派榮慶等輪班撰擬並命家鼐總司核定旋以京察交部議敘是歲奏辦翰林院講習館家鼐督理校閱精研政學時務尤以翰光淬行爲館員勸八月病乞開缺溫詔慰留賞假一月並賞給人蔭二兩期滿再疏未允復予假及珍物如初十月卒遺疏入諭曰大學士孫家鼐品學純正志慮忠誠由翰林受先朝特達之知入直上書房屢掌文衡得人稱盛條陳大計持

論閱通光緒四年欽奉懿旨命在毓慶宮授讀兼祧皇考德宗景皇帝恩禮優加
洊擢正卿晉登揆席前因創立學務授爲管理大臣於一切應辦事宜擘畫周詳
規模甚大前年設立資政院簡任總裁釐定章程悉臻妥洽朕御極後眷顧老成
深資倚畀嗣因患病屢請開缺迭經賞假並賞給人蔭以資調攝方冀永享遐齡
長資輔弼茲聞溘逝悼惜殊深著賞給陀羅經被派貝勒毓朗帶領侍衛十員前
往奠醊加恩予諡文正晉贈太傅照大學士例賜卹入祀賢良祠賞銀三千兩治
喪由廣儲司給發任內一切處分悉予開復應得卹典該衙門察例具奏靈柩回
籍時沿途地方官妥爲照料伊子陸軍部郎中孫傅榮著以四品京堂補用伊孫
一品廕生孫多煖孫多燧均著以郎中分部補用用示篤念盡臣至意尋賜祭葬
如例

陳啟泰

陳啟泰湖南長沙人同治七年進士改翰林院庶吉士十年散館授編修充國史
館協修十三年充會試同考官光緒元年充陝西副考官二年充順天鄉試同考
官三年記名以御史用六年充會試同考官七年九月補山西道監察御史十一

月奏參雲貴總督劉長佑漕運總督周恆祺皆溺於洋煙性耽安逸又言吏部尙書萬青藜散法營私均請立予罷斥未幾長佑恆祺皆乞病去青藜亦休致八年河南有王樹汶臨刑呼冤一案啟泰奏請秉公研鞫以重人命已而鶴年仍照原擬定案上命解部覆訊王樹汶果非真犯承審各員皆降革有差十二月啟泰以竊賊闖入宮禁恐爲內監容留所致請派親王會同內務府大臣前鋒護軍統領查拏懲辦由是門禁益嚴肅矣是年七月御史胡隆洵請將盜案分別首從辦理刑部議欲復舊例應將就地正法章程先行停止而疆臣皆言其不便八年二月啟泰奏言遷就新章流弊甚大一案既出但憑州縣稟報督撫卽批飭正法則其中以假作真移甲就乙及改輕爲重情弊皆所不免蓋地方盜案登時就獲者少參限屆滿躡緝無期往往別取平民妄拏充數或前案人名竄入後起或尋常案犯陷以重情捏賊教供刑逼誣服州縣但以考成爲念上司各懷瞻徇之私委員會訊者不過一公稟銷差道府覆訊者不過一空詳塞責案情既結死者不可復生斷者不可復續覆盆之枉昭雪無從部臣所稱各省就地正法案件每歲不下數千百人其中法無可宥者固所必有情有可原者亦難保其必無實爲洞燭情

弊之言若不亟思變計恐殘殺習爲故常怨憤激成事變弭亂不足召亂有餘也夫刑罰世輕世重原無一成不易之條從前髮捻未平匪徒蠡起自不妨權用重典以儆凶頑今海內晏然幾二十年矣百姓粗安元氣未復休養生息正在斯時卽間有奸宄之徒恃強藐法官吏認真緝捕自足綏靖地方而辦理章程尙與軍興時漫無區別當亦聖主好生之德早爲垂念及之者也應請斷自宸衷飭令仍照舊例解勘分別題奏以重刑憲無使地方官吏久擅生殺之柄朝廷寬大之恩庶漸被於無窮矣上命刑部咨行各省詳議而各省以盜多爲詞卒不能盡革又言吏治之不振實由冗員之太多吏部奏定考試章程其不列等者勒令回籍可爲沙汰之一助然不過百中之一二仍於大局無裨應請飭下各省督撫認真考試年終年滿甄別尤當破除面情實力裁汰不可但以佐雜教職等員塞責庶官方可以澄敝矣湖南鳳凰廳痞苗石老華江華縣土搖盤成豪前後滋事撫臣李明墀奏保文武員弁冒濫啟泰請將保案撤銷略言此兩案皆由地方官激成以愚民土著爲賊巢以屠戮無辜爲剿辦天日在上夫復誰欺並臚列著名貪劣各員請旨一併查辦又以孝廉方正一科卽古者鄉舉里選遺意固不必專以文藝

見長要必名實相符方足以備召用之選近日保送太濫污濁下流及紈袴乳臭之子不學無行輒以鑽營賄賂得之以故分發各省旋以貪墨卑鄙論劾者甚不乏人藏垢納污朝廷又安用特設是科爲耶請飭部仿照拔貢等項朝考之例議定年限試期並酌准每省保送額數嚴定去留不得一概錄進而尤必申明保舉連坐之法以彰儆戒七月啟泰條陳興利除弊事宜略曰爲政之道在用人尤貴理財欲強兵必先富國蓋國之有財如燈之有膏魚之有水農之有田燈無膏則熄魚無水則蕘農無田則飢自然之理也而拘儒不達介介而爭率以言利爲病不知各國通商以來島船夷塵徧布會要得尺得寸抵隙蹈瑕無微不至無孔不入我中國已成漏卮坐視不可補苴不能更數十年後元氣日以耗民生日以蹙國用日以竭而始敝敝然求理財之術不已晚乎且中國非無財也無盡之藏不事經營終等棄地之貨已決之防不爲挽救幾同竭澤之漁源既未開流復不節弊且日滋致令自治之計以匱乏而中阻大利所在以牽制而不行此臣所爲憂憤籌思而不能自己者也一重稅洋藥夫洋藥之蠹中國久矣卽每歲進口收稅徵之則民間消耗之數可知況偷越之貨幾與報數相埒暗漏尤爲不少今不思

設法禁止吸食而但以不種罌粟爲長策是益其薪而助之燄也近日朝鮮與美英訂約獨嚴鴉片之禁尙能自固藩籬中國美巴新約亦禁彼此不得販賣將來英國換約能否輓回此局雖難預料然朝鮮猶能拒之中國豈可不思自立況有美巴新約可據杜絕當自不難至補救目前惟有重徵釐稅一法既可稍懲頹風亦以藉充國帑查通商善後條約第五款原有洋藥如何徵稅聽憑中國辦理之條洋人自不得阻撓其事上年左宗棠議加每箱銀八十兩尙未明見施行然臣愚尤以爲太少內地釐金似亦可加倍抽收價貴則吸食自少銷滯則販賣亦稀實爲釜底抽薪之計卽勢難禁絕歲可驟增千餘萬餉需於財政亦不爲無益一收買絲茶通商出口貨物以絲茶爲大宗洋商狡詐百端每歲新貨到岸之時始則餌以厚值迨聞風者踵至卽把持包攬勒措多方貨愈積而愈多價愈抑而愈賤華商業此折閱甚多元氣大傷甚非中國之福計每年出口進口銀數中國惟恃絲茶兩項稍敵外洋百貨三分之一而洋藥數千萬兩之數不與焉並此而不能設法維持將成坐困之勢臣愚以爲宜設立絲茶公局招商集股資本不足借供帑項絲茶歸局收買彙售外洋入價劃一定之章出價酌數分之息務使商人

得沾餘潤免墮洋商詭計之中則華人生理消耗無虞公局子母兼權亦可坐收利益但此事得人斯理應請南北洋大臣籌議開辦嚴定規條選派廉能素著之員妥爲經理以杜弊混一廣織呢布民間布帛之用比於菽粟通商以來各國呢布充滿寰中上至縉紳下至齊民罔不購用歲計糜費中國金錢難以數計外洋獨擅其利豈容久作袖手之觀聞漢口上海等處商人屢議興辦織布公司以需款過多因而中止應請飭下通商各省督撫籌開公局招商借帑廣織呢布以濟民用而收利權其有自願辦機器開織者聽之總期愈推愈廣庶錢刀不至暗漏於外洋一擴充礦務天生五材民並用之礦硎之開利源尤鉅從前雲南礦廠最盛兵燹以後置未經理各省礦坑亦久經封閉新疆開闢以來未曾發洩礦苗尤旺坐視此自然之利棄同泥沙殊爲可惜近年李鴻章奏開開平煤礦平原長樂等銅礦亦相繼興辦取多用廣成效燦然應請各省推廣行之商辦官辦各視所宜明定章程總期有利無弊庶幾天地無盡之利皆國家歲入之需矣一改運官鹽兩淮鹽務甲於天下然利歸於商徒使禹筴起家豪貲競侈司農仰屋帑項仍虛丁寶楨將川鹽變通辦理改商歸官任怨任勞卒著成效今以兩淮而論道光

十一年前督臣陶澍於淮北酌運官鹽或暢岸商鹽有缺或滯岸票鹽不到卽委員載運濟售是官運曾試行於淮北今年左宗棠奏請收復引地委員前赴湖北荊州監利運鹽漸入試銷是官運又將行於淮南祇以商人請領票張並不循例驗貨掣簽配發繳捐數日亦未據實奏明以致奸猾之徒包攬射利物議頗多辦理殊未盡善臣愚謂宜趁此事機將新增之引一律改歸官運擲還各商捐項令將引票繳銷以杜奸計而肅鹺政且免川淮交訐鄂省官吏久戀腥羶臺諫諸臣利其賄潤左宗棠力主復淮之計授奸商居奇之柄何如籌國帑不竭之源丁寶楨庇護川商利在公家自不敢任其充斥浸灌是官運行而借岸自復餉項自增應請妥議章程垂諸久遠果能實力奉行釐課而外歲入當不下數百萬若再推廣行之所增尤鉅一酌裁制兵綠營兵將碁布星羅養兵之需歲幾二千萬山澤之儒常有養兵不如養士之歎然使無事能資彈壓有事可期捍禦國家原不宜吝惜此款乃自髮捻跳梁莫不棄甲倒戈聞風驚潰遂使中原糜爛江左逋逃今事平之後猶復久仍舊制虛糜鉅項莫此爲尤各省練軍雖稍變通辦理而額旣未裁餉仍未減應請量裁塘汛並沙汰都守以下各弁就原定兵額酌留四五成

以裨實用而免虛耗一清釐關稅國家正供田賦而外關稅實爲大宗任其事者莫不垂橐而往捆載而歸如果涓滴歸公歲入奚止十倍臣愚以爲各海關暨稅務較重之處宜簡派廉潔剛正破除情面之大員監收一年或本省督撫廉潔著聞者亦可令其兼辦則歷任弊端可期水落石出然酌加解額以裕帑需皇上原有務存寬大不追既往之諭自無所容其瞻顧積弊一清入款自充足矣一慎重庫儲財用盈縮恆視有無侵冒爲衡官吏不能弊絕風清而欲項款之無虛糜未之有也內府浮銷已成積重戶部銀庫銅局暨派辦處司員書吏又皆通同舞弊勒索侵漁報銷之案尤駭聽聞外職京員朋分夥竊動輒百萬或數十萬夫此私家中飽之物何一非天府帑藏之需疆吏以之行賄劣員據爲利藪朝綱國計大有所關理應立法稽查廓清積弊戶部派辦處名目似可議裁嗣後各省報銷案到部臨期酌派一二廉幹司員核辦並不準本司官吏與聞以杜染指如所派不得其人贓款發覺即將堂官照私罪議處庶可稍示懲儆各處工程浮冒亦重節省銀兩仍當提出歸公應請飭下內務府戶工二部暨管庫大臣嚴定章程以禁貪饕而重庫款以上各節或未經議及或議而未行或行而未盡若決然爲之府

庫何患不充財用何患不足更有事屬創舉人懷疑慮處今日之勢不能不亟籌
試辦者則修鐵路是也通商各國莫不有鐵甲船而兵強有火輪車而國富中國
相形見絀宜其環而相侮莫可如何夫知己知彼與師其長技而制之皆兵家上
策鐵路若成徵調轉輸貨運文報之捷在在均收實用先辦清江至京一路逐漸
推廣利賴無窮清江一路既開則江淮轉漕之費無事開支且鐵路告成河工亦
緩並可裁撤河漕兩督及所屬廳員弁兵數千人歲費尤省彼持異議者無非以
需款太鉅值此餉項支絀興舉爲難若臣所陳各節可行何憂此款難集並不
必籌借洋款致滋盤剝之虞且鐵路之利更可以濟輪船之窮尤爲有益無損果能
利藪開而餉源裕餉源裕而兵力強必能裨益聖朝誅鋤強敵乃者日熾於東法
擾於南兩地邊藩悲生旄葛此外四方萬國莫不眈眈虎視伺便乘虛我朝以神
武定天下兵威之盛曠古無儔今頗靡然不振者良由度支竭蹶遠略難勤如其
奮發有爲原不難震懾殊俗上嘉納之下所司議行劉長佑報銷雲南軍需不實
賄軍機章京周瑞清及部員書吏贓款十餘萬啟泰劾之得實皆獲罪又以浙江
台匪未平調任撫臣任道鎔未嫻軍事恐誤地方請特簡知兵大臣撫浙以弭隱

患詔以劉秉璋代之九年正月啟泰奏言錢制歷代變更大抵輕則竄惡難行重則盜鑄尤甚國朝制錢最爲精當然至今民間不足以資流轉者銷燬與私鑄之爲害烈也自鈔票當五百當百之法時行時止民多擾累不得已而改鑄當十大錢抵值既多私造愈衆加以奸牙狡獪賣空買空市價陡漲陡落不獨官錢周轉不及卽借私錢補救亦有時而俱窮於是以銀易錢者往往空持片紙錢商所入實銀所出空票貪饕既鑿動卽關閉數千百萬之楮幣卽滯行數千百萬之民家頃刻凍餒京師根本之地小民困憊如此可爲寒心今議改復鑄錢所費既多銅亦不給且旋鑄旋燬官費難乎爲繼計惟改鑄銀錢自一錢二錢三錢五錢至一兩區爲五等面鑄年號背鑄分兩輕重有一定之程交易便奇零之用則民間行使不必專恃銅錢卽無慮空存廢紙似尙爲窮變通久之法通商以來海禁大弛舊鑄之錢奸民多私販出洋各口青銅紫銅作房洋商復重價收買以致直省均苦錢荒自可頒給銀模准其一律開鑄重準庫平並鑄出某省字樣撥解支放各省通行卽杜奸宄挖補低潮又免夷胥扣減成數取攜便利銖兩分明加色壓平爭擾諸弊均不禁自戢且外國貨易中國之銀攙和夾雜鎔鑄洋錢使用幾

徧天下而又能操縱其洋價之低昂以爲出入盤剝商民漏卮無算徒以內地銅錢短絀藉洋帑轉運暗耗亦無可如何若我國仿鑄相敵以後各關徵稅無論洋商華商概令輸納中國銀錢則價值必一時騰踊番餅不得暢行或可懲艾於萬一但錢之式樣宜精分量宜準方可行之無滯歷久不磨督辦之官必須勤能精密潔已奉公然後承辦之胥役工匠無所施其弊混尤爲治事之本二月奏請酌復錢糧舊章又以漢陽永興械鬪由州縣官釀成請飭督撫嚴切示禁以遏亂萌允之三月轉掌廣東道事務尋掌河南道事務法人進據南定窺逼富春越南都城勢將爲其所併啟奏言西人志在經商惟利是視一意進取計不反顧勢之所積斷非口舌所能輓回越南文弱之邦法兵不過數百橫行境內卽已畏之如虎中朝保護藩屬不能不助其聲勢派隊出關然法人翻覆性成我兵進止無定事同兒戲奔命不遑縱推字小之隆恩殊失經邊之要道爲今之計頓兵境外曠日持久勞師糜餉有損無益下策也糾合泰西各國立約通商借各國以保越南借越南以保邊境俾他族互相牽制中國得以息肩中策也若調集滇粵水陸各軍三道並進諭令越南國王將未失境土悉聽中國區處另爲越王籌一居止俾

奉其祀如其首鼠兩端始終抗命卽因而取之越南土地與中國毗連內附天朝方免淪爲異域夫兼弱攻昧旣爲用武之常經而畫界保疆又絕外人之窺伺一勞永逸操縱自如最上之策無逾於此惟用兵之道擇將爲先徐延旭熟習邊情究心形勢可當廣西一路唐炯陞任滇藩旋師以後氣卽中餒若令獨當雲南一路難免債事不如令岑毓英帶兵出境毓英勇於任事又素爲外人所憚必能有功但後路亦在得人斷非杜瑞聯所能勝任楊岳斌勳望素著可否飭令赴滇督辦一切劉銘傳頗具將才海道進兵似可責其獨當一面李鴻章駐劄欽州三省軍務悉歸調度必能因時制宜相機進取若僅身駐滬濱爲苟且自全之計鞭長莫及挾制在人不少月間越南將爲法人所有滇粵邊事愈形棘手矣若但畏難苟安勢必爲虎傅翼應請飭令內外臣工各據所見以備採擇並令在事諸臣堅持定見勿畏艱鉅勿持兩端建明臣張沐之殊勛規漢代日南之舊治又言講求吏治當自整飭學校始一酌留學額一澄敍教官一核實書院一慎簡學政均得旨允行時台匪黃金滿投誠啟泰慮其反覆請飭浙撫無遽招納法人屢申和議啟泰言夷情叵測請飭諸將無遽退兵已而法人果翻前議十二月授山西大同

府知府大計卓異十六年調直隸大名府十七年議敘道員在任候選尋以東明黃河兩屆安瀾改候選爲候補並賞戴花翎十八年加二品銜二十一年四月調補保定府知府大計卓異二十三年十月補授雲南池東道署雲南布政使二十五年正月丁內艱服闋二十八年正月回池東道任九月調補直隸通永道署直隸按察使三十一年八月授安徽按察使三十二年八月擢江蘇布政使九月兼署提學使三十三年八月署江蘇巡撫十二月實授浙江嘉湖臬匪滋事與吳長之蘆墟黎里金津盛澤等處連壤素爲梟匪出沒之區啟泰慮其竄入蘇境三十四年正月特派新軍步隊扼要駐紮並飭飛划營游弋各處嚴密布置相機防剿三月奏派布政使瑞澂督辦蘇松太杭嘉湖緝捕清鄉事宜嗣以官軍合剿擊斃匪首夏竹林拏獲匪首余孟亭正法東南地方賴以安謐五月奏請設立存古堂爲保存國粹造就通材之計七月改編蘇省飛划水師巡防隊畫一營制嚴定餉章軍務積習爲之一除宣統元年五月卒於任奉旨陳啟泰植品端嚴政聲卓著著照巡撫例賜卹任內一切處分悉予開復子江西試用同知繼鸞以知府仍留

江西補用

張之洞

張之洞直隸南皮人同治二年一甲三名進士授職編修五年大考二等六年充浙江鄉試副考官旋命提督湖北學政十一年以襄辦大婚禮賞加侍讀銜十二年充四川鄉試副考官旋授學政四川地處西陲寇氛甫靖士未知學之洞會商前總督吳棠奏設尊經書院擇郡邑之秀者肄業其中聘名儒督課之一切章程手自訂定著輜軒語書日答問示蜀士以讀書之法光緒二年奏陳川省試場積弊因上整頓八策請敕部核議十二月充文淵閣校理五年晉國子司業四月以吏部主事吳可讀奏預定大統之歸懿旨敕廷臣妥議具奏之洞疏稱穆宗毅皇帝立嗣繼嗣卽是繼統此出於兩宮皇太后之意合乎天下臣民之心而爲皇上所深願乃可讀於所不必慮者而過慮於所當慮者而未及深慮穆宗繼嗣之語屢奉懿旨人君子孫凡言繼嗣卽指續承大統而言繼統繼嗣毫無區別其分爲兩事乃明代張璁桂萼謬說高宗純皇帝欽定儀禮義疏已辭而闕之矧今懿旨申命再三設有迷妄小人舞文翻案廷臣皆得執簡而爭不必慮者一也所舉宋太宗背太祖明景帝背英宗然德昭非太宗子見深非景帝子也若皇上以皇

子嗣穆宗名爲先朝之繼體實則今日之麟振有何嫌疑有何吝惜以皇上之仁孝受兩宮皇太后之殊恩起自宗支付之神器必不忍負穆宗不必慮者二也趙普黃玘之輩誠難保其必無然明世宗案大統而暱私親以興獻已歿使其尙在必能以禮自處少加裁制今醇親王天性最厚忠直恪公他日如有妄進異言者必能出一語以救正不必慮者三也至請明降懿旨將來大統仍歸穆宗嗣子意則無以易矣辭未盡善也緣前奉懿旨皇帝生有皇子卽承繼穆宗爲嗣儻參以該主事之說是一生而已定爲後之義卽一生而已定大寶之歸將類建儲有違家法未及慮者一也前代讒構奪嫡流弊已多今被以紹統之高名重以承繼之形跡較之尋常主器尤易生嫌未及慮者二也天位授受簡在帝心帝堯多男非止一索聖意所屬知在何人此時早定豈不太驟未及慮者三也伏讀此次懿旨卽是此意四字言簡意賅至堅至確天下萬世誰敢不遵願聖意宜遵家法亦宜守今日之事約有二說淺之爲穆宗計則但如諸臣之議並請一渾涵懿旨略謂屢次懿旨俱已賅括皇上孝友性成必能處置盡善似無所妨矣然生卽承繼卽是此意一語字字當遵託諸文辭可避一建儲之名見諸事實儼成一建儲之局

他日誕皇子命承繼廷臣中或援祖訓以爭則繼嗣之事且中止是此日以恐類建儲而承統之名不能定異日又以恐類建儲而承繼之旨不能宣乃令皇上轉多難處故深之爲穆宗計卽爲宗社計惟有因承統者以爲承嗣一法不必遽定何人承繼將來續大統者卽承繼穆宗爲嗣此則本乎聖意合乎家法皇上處此亦不至礙難伏請兩宮聖裁卽以此意明降懿旨皇上親政之初循覽慈訓感惻天懷自必仰體聖意再頒諭旨祇告郊廟宣示萬方則固已昭於天壤堅於金石矣又片奏此次懿旨中卽是此意一語乃此議緊要關鍵諸臣心知其意而苦於恐涉建儲不敢發揮故不便述此四字之文而專駁吳可讀之摺以爲如此便可不類建儲豈知聖意已經宣揚若不善爲會通乘此時畫一長策究其時勢必類於建儲而後已且懿旨上言預定下言卽是語意相連今不疏解分明恐迂儒以文害辭誤疑兩宮有游移之意更恐異日讒佞附會藉此議爲翻案之端一言之微語病甚大伏望兩宮聖裁權衡至當再降懿旨愚臣不勝願望五月以四川東鄉重案定擬未協因以請旨核議入奏並極陳川省賦歛太重民力困竭且以此案起於苛歛誣叛力請誅署東鄉知縣孫定揚七月以星變地震奏請修省以弭

災變而陳其要曰納直言肅臣職厚民生謹河防八月擢詹事府左春坊左中允九月晉司經局洗馬十二月崇厚與俄擅訂新約諭飭廷臣集議之洞奏言崇厚與俄所訂新約十八條其中最謬妄者爲陸路通商由嘉峪關西安漢中直達漢口因陳不可許者十事且謂必改此議不能無事不改此議不可爲國遂陳改易四要道曰計決曰氣盛曰理長曰謀定又奏馭俄之策宜先備後講備之法三曰練兵曰籌餉曰用人講之法三曰責以義折以約怵以勢是月以國史館畫一臣工列傳保加四品銜六年二月授翰林院侍講五月轉侍讀又奏上經權二策其守正之策曰請正崇厚之罪必誅無赦以存國體通變之策曰欲釋崇厚必加南北洋以嚴譴責令戴罪修防訓誡樞臣飭使實心捍患赦此罰彼以示不測六月陞授右春坊右庶子七月充日講起居注官先是朝廷已降嚴旨將崇厚革職治罪而以侍郎曾紀澤爲出使俄國大臣之洞因奏改約各節其關係極要之條宜令曾紀澤堅持定見期於必行商務中如陝楚通商穿行三省流弊太多設萬不能改宜於兩難之中曲圖挽救松花江行船參考公法證之咸豐八年議約所指亦專係夾於二國之間一段江流而言以上二條擬請發交曾紀澤七月又奏議

約迫促謹擬上補救之策以免始終貽誤一責使臣以羈縻一條約應駁改處宜全數達知彼國一辯駁宜先重後輕一先詰俄人無故遽發兵船商令撤回一責他國使臣以調停一最要數事宜百計挽回以顧國體一約如不改惟有誅崇厚以存國權八月轉左庶子又奏稱俄船將近俄使將來海警日迫請急籌戰備因條列切近急務曰急速徵兵並急速籌給的餉軍火曰鮑超之兵宜速調輪船迎取曰各輪船宜調齊停泊北洋曰烟臺必宜有良將重兵曰大孤山泉水急宜斷絕曰天津內河事急時宜斷船路劉銘傳宜特召備用曰京師根本宜速調知兵大臣曰籌巨餉必借洋款又片陳曾國荃督辦山海關外防務宜明降諭旨以一事權彭玉麟亦宜特頒明旨將江海防務飭令督辦八月以俄使將來懿旨令廷臣通盤籌畫顧全大局之洞上言痛陳前此七失仍請急籌邊備蓋卽前先備後講之意而片陳講法謂原約最重數端無論如何設法抽換要以改動爲期備法則催知兵重臣以備戰詰俄發兵以杜兵費速購軍火調水師將吏並用現有之將九月以布策東來曾紀澤邀之使回重與訂議之洞恐議約不慎以致全局受虧乃奏陳補救之策謂宜敕曾紀澤埽除前文從宜另議注意重務專力籌商而

以西漢通商一節爲尤緊要伊犁全境不能爭當與婉商酌分南境爲中國留一通南八城之路免致棄伊犁孤城爲絕地設領事一條則烏里雅蘇臺科布多兩處宜力阻松花江行船可從緩另議十二月因案奏請裁抑關宦七年二月陞侍講學士三月以急務不可再緩宜速集重臣籌議入奏一禦日豫防事宜除北洋較緩外南洋以江防爲最重福建以臺灣爲最衝南洋大臣是否勝任臺灣將吏是否得人江防情形請敕彭玉麟確察詳籌覆奏山東烟臺防務請敕李鴻章節制兼顧一禦俄持久事宜除西路現有重兵宿將外三姓琿春從此不能罷戍俄船窺伺朝鮮則吉林之防重張家口漸成俄商熟路自宜開屯置鎮則庫倫張家口之防亦重六月擢授內閣學士兼禮部侍郎銜以星變示儆奏請修政弭災因陳修政之要曰用人曰言路曰武備曰禁衛閏七月星象復有變異之洞應詔陳言以封疆重寄虛懸未定爲可憂因請定疆臣以安邊圉十一月授山西巡撫八年四月以越南日蹙滇防漸急奏請籌兵遣使以先發爲豫防因條上十六事曰成算法人狡謀已遂情勢已彰徒遣密使偵探無益徒在法京辯論亦無益惟有遣使帶兵赴援保護上可令退出越京次可代定條約越患旣紓滇防自固曰發

兵雲南兩廣設防勞費無已待根蒂已固路徑已通雖有防軍無益故今日斷宜迅速發兵曰正名保護屬國保護商人爲外國通例我兵之出可以此明告諸邦曰審勢敵之注意滇急而粵緩我之下手滇緩而粵急非從兩粵進兵批亢擣虛則滇防徒爲糜費曰量力閩粵人不畏洋兵而習於海戰粵西軍兩入越境兵氣頗壯地利亦熟滇雖鄰越道路回遠聲息較阻兵亦較弱須及早措置訓練曰取道粵西陸師出龍州鎮南關粵東水師出廉州海皆會於越東京若調集兵輪一二十艘益以粵省所購辦及所自製再量募艇船商船不患濟師缺乏戰船之用則宜聽使臣斟酌曰擇使請揀忠正明幹大臣二員出使越南辦理護商議約事宜任重道遠必須正副二使相輔相濟大臣如黎兆棠可備選擇曰選將總兵方曜可統粵船員錦泉可統閩船皆聽使臣調度布政使徐延旭可統援軍出關唐炯可統援軍臨邊布置宜假以事權責成滇粵督撫勿掣其肘曰籌餉援餉取給於閩粵兩海關四成洋稅廣西庫儲可支半年餘由廣東接濟滇餉可取給四川曰議約我師入越詰問法使兵官責以公法示以戰意乃爲居閒調處則法越立約必有限制有礙於我之條約自不能萌並宜與法越定議中國常以一軍駐越

港口護越護商曰相機我師在越然後會紀澤在法京得以行其說駐法駐越使臣互相關會操縱相機爲之法人必可就範曰刻期所論諸臣及戰艦兵勇皆在沿海自中樞定議分投調撥部署速行兩月可集廣州再二十日可達越京粵西防軍待徐延旭整飭調度後水師十日亦可會於越京唐炯成軍出蒙自後粵西軍一月亦可到防奮迅赴機於越事猶可挽救曰廣益大局須自內定其調將吏遣間諜等事除飭李鴻章及南北洋大臣滇粵沿海督撫籌議外如黎兆棠並可令抒所見隨時條議曰定局大要此事一切迅速必須秋間始有端倪似可令李鴻章先行赴粵詳酌條約布置久計曰兼籌日事觀望不決勢同騎虎越事既定然後催問球案則可迎刃而解曰持久廣東爲洋舶來華第一重門戶越事既須經營則粵防愈要當年曾國藩建議南洋大臣本擬駐粵擬請增設而以兩廣總督兼之不惟經略南交兼可先得各國要領免以增兵置師致啟各國猜疑六月奏陳晉省治理刊敝現籌次第整飭擬請將未墾荒地寬限起征並豁除累糧裁減差徭禁種罌粟裁革公費餽送十年三月詔來京陛見四月命署兩廣總督時中法戰事亟有旨飭令酌撥師船往援閩防又令豫爲籌畫酌辦法越事宜之洞

因奏牽敵以圖越爲上策現飭唐景崧募勇出關與劉永福合力犄角七月實授兩廣總督尋以保薦徐延旭降一級留任五月之洞奏言法人肇釁以來歷考各處戰事宜不免受制於敵以水師之無人槍礮之不具故方今急務首在儲人材查泰西各國莫不各有水陸師學堂茲擬就粵省博學館設立一所慎選生徒延聘外洋教習並令募到通曉火器水雷輪機駕駛臺壘工程之洋弁講求水陸戰法並繙譯西國兵書測繪地圖諸學製造火藥電線諸技藝分門講求並選將弁亦入其中博習討論以備將材之用次制器外洋恃以爲戰者四爭勝外國恃鐵艦水陸攻守恃快槍巨礮設守海口恃水雷鐵艦費鉅工遲穹甲衝快諸船亦事體重大機算精微未便率爾施工要當另籌辦法各種槍礮乃水陸所急需近左宗棠疏請閩船廠兼設鑄礮廠心躉其論擬請閩廠造礮礮彈及隨礮各件附焉粵廠造槍造雷造藥槍彈雷艇及隨槍各件附焉次開地外洋富強全恃煤鐵富甲四洲擬訪求外國鑛師或搜求地塲或化分鑛質或烹煎成器各專其責查福建穆源古田安溪等處皆產善鐵兼饒煤聖廣東惠州清遠等處所產亦佳近已於省城設立鑛務局招商試辦六月以撥軍籌餉功賞花翎十月奏遵旨籌議海

防大治水師通籌全局切實核計分條臚陳曰分地中國洋面北起吉林南訖欽州治海軍宜分四大枝北洋爲一枝旅順烟臺瑋春屬焉南洋爲一枝浙江屬焉閩洋爲一枝臺灣屬焉粵洋爲一枝瓊州屬焉每枝設統領一員左右翼分統各一員轄於統領聽洋面督撫調遣節制而皆隸於京師以總理衙門爲之統領曰購船粵洋海軍一枝擬配水帶鐵甲三艘鐵甲魚雷船六艘每一鐵甲巨艦配兩鐵甲魚雷爲一隊統領左右翼各領一隊合爲一軍至南北閩洋應由各疆臣自行酌辦曰計費上項所稱水帶鐵甲鐵甲雷船一軍以四百萬兩爲率四營共需一千六百萬兩曰籌款大舉巨款非枝枝節節所能辦擬於洋藥稅釐提出五年收數之半爲造船專款曰定銀洋例貨價議妥先付三分或五分之一此項定銀擬請由戶部墊撥八十萬兩飭由出使大臣於該國銀行暫借八十萬兩餘由四川湖北湖南江西安徽限數勸捐以足其數曰養船自定議造船二年後各船陸續來華卽須籌養船費擬請五年後卽將提半藥釐仍四分之以充將卒師匠及修船等費曰修船巨艦兩年必須一修故製船必先製澳粵省黃埔澳淺窄當徐圖擴充各省有無可作大船澳之所請分敕疆臣豫籌備用曰練將擬選派員弁

生徒出洋練習一途隸出使大臣分發各國學堂水陸營務礮臺船廠分科練習一途駕坐練船周歷華洋各海口先中後外藉以周知諸邦口岸形勢戰船規制練習風濤駕駛練船卽爲學堂兼可講習諸藝曰船廠閩廠規模已備滬廠亦略有憑藉粵省本無船廠春間試造淺水兵輪俟告成察看利病何如設法籌款酌造藝熟工精再當定議大舉曰礮臺粵東省防虎門內外新造各臺略有規模其間參差不齊闕略未備惟有隨時量力修改增補其五門要隘現已另籌辦法至瓊廉海口爲南洋第一重門戶急須堅臺巨礮惟工費太鉅當專疏奏陳各省海口應由疆臣自行酌度曰槍械粵省籌設槍雷各局俟奉俞旨卽擬開辦其城內機器局城西增步軍火局現正重加整頓擬將城局併歸增步以就水運且便督察十二年正月奏廣東莠民爲害地方約有三類曰盜劫曰拜會曰械鬪擬請出統兵大員酌帶營勇前往歷來滋事地方督同該管文武分別查辦澈底清釐以清內患三月會同護理廣西巡撫李秉衡遵籌邊防事宜略謂廣西邊隘以鎮南關爲最要而關之中後關之左右均須設防擬分中東西三路所有各隘均宜分兵屯駐而以防軍十二營專防鎮南中路四營分防東路六營分防西路全桂大

勢注重邊防並擬將廣西提督由柳州移駐龍州柳州擬添設柳慶總兵龍州開關通商重兵所萃擬設太平歸順兵備道總轄全邊駐紮龍州四月奏廉州處廣東極西南隅之地自北海通商華洋紛錯其郡已爲要衝越事旣變廉屬爲外洋入華北岸水陸第一道門戶高州鎮總兵駐防北海不能兼顧擬請於廉州特設總兵名曰北海鎮水路總兵駐紮廉州陽江鎮事務較簡請裁省併入高州亦改爲水陸總兵廉州設有重鎮則專力籌防高州鎮屬地緊湊則便於調度請敕部速議五月舊金山華民被匪虐害倫敦報載粵督電美謂將報復之洞疏辨其誤因請飭鄭藻如暫行留美會同張蔭桓經理各案議定善後章程並力請飭下總理衙門照會美署使電催該國並飭鄭藻如張蔭桓力請外部務請將焚殺搶逐各案應抵者議抵應償者追償應緝者速緝應卹者給卹迅速澈底嚴辦並請美總統特頒明文惋惜不得以約償十餘萬監禁七八人含糊率了六月兼署廣東巡撫十四年舉行察典以之洞盡心民事綏緝嚴疆殫竭盡忱不辭勞瘁有旨交部議敘十五年三月調補湖廣總督之洞前奏籌辦鐵路由蘆溝橋直達漢口擬分頭試辦南自漢口至信陽北自蘆溝至正定餘再次第接辦經海軍衙門奏如

所請有旨命會同李鴻章海軍衙門妥籌開辦之洞因奏籌辦鐵路其最要以不
外耗爲本計利便爲末積款采鐵練鐵教工爲先勘路開工爲後何謂外耗借洋
款用洋鐵必致坐受盤剝何以積款擬酌減新海防捐例每年約得二百萬金再
於洋藥稅釐年撥一百萬金由戶部提存備用一面急求採鐵練鐵之方鐵則取
之晉鄂粵三省一面派曾經出洋學生一二十人赴鐵路各國專習此藝俟兩年
學成回華指授工匠輾轉傳習則可無需洋匠多人如此定期開工修路兩端並
舉一氣呵成海署所擬南北並舉之法最爲扼要北路直隸總督任之南路湖廣
總督任之兼令河南巡撫會同辦理十月奏瓊州孤懸海中逼近越南關鍵中外
現於海口城西五里之秀英山修築礮臺七座十里之西場山修築礮臺三座海
口城後之大英山修築礮臺五座該處海岸平行敵用舢板小船伺便登岸更難
防遏計惟沿海堅築礮臺方有可恃又擬於濱海一帶西自西場起東自牛始舊
礮臺止築一堅厚長隄開修礮路通行礮車以擊沿灘人口敵船礮臺遠攻礮車
近擊交相爲濟廉州北海一口去越甚近且接近九頭山爲海盜窟宅瓊防而外
廉爲最亟現擬於冠頭嶺天馬嶺石龜尾諸山擇要居高築礮臺五座其平沙一

帶擬練礮車五隊以備敵人近岸往來馳驟攻擊之用又奏法人擬於越南開築鐵路由海寧以連諒山復由文淵至平而關外之白欖村狡謀避險深懷叵測未可稍弛戒備現與提臣蘇元春會商須於平而關擇要增置礮臺四處以備防守鎮南關中路一帶亦應酌增數臺以臻完密十一月抵兩湖任十六年閏二月以創辦織布兩廣總督李瀚章奏陳廣東礙難設局請移至鄂之洞因奏擬將粵省所借山西善後局銀二十萬兩移鄂充用並陳擇地建造廠局十一月奏陳廣東練鐵機器改運至鄂經臣擇於漢陽大別山下定立廠基督員興建一面修築大冶運道開採鐵鑛一面籌辦運煤采煤各事宜十七年以籌解甘肅新餉敘勞賞頭品頂戴十九年兼署湖北巡撫二十一年命署兩江總督二十四年變通科舉擬上隨場去取之法請將從前三場先後之序互易第一場試中國史事國朝政治論五道二場試時務策五道專問五洲各國之政專門之藝三場試四書義二篇五經義一篇首場按中額十倍錄取二場三倍頭場取者始准試次場每場發榜一次三場完畢如額取中歲科考生童以此例推之先試經古專以史論時務策命題正場四書五經義各一篇是年刊布所著勸學篇以示天下學者二十六

年二月兼署湖北提督五月團匪變起各國兵艦駛至大沽力索礮臺遂開戰釁之洞與兩江總督劉坤一電飭蘇松太道余聯沅與各國駐滬領事議東南保護約款九條七月聯軍入京師兩宮西幸李鴻章奉命爲全權大臣之洞亦被會商辦理之命八月駐蹕太原之洞電商李鴻章以款局須速開議遲恐生變並陳目前四要義十一月之洞電奏各國使臣所交條款其第五款專爲製造之材料一句關係匪輕查伍使楊使來電皆云俄美外部所告祇言暫禁此條當可商改又奏條款第七第八第九條大沽撤礮臺使館駐護兵津沽設兵卡其勢不能不允宜請敕下全權大臣於此節務商善法暫緩回鑾二十七年八月會同兩江總督劉坤一以整頓中法仿行西法條列以請十月賞加太子少保銜二十八年六月以湖北遵旨設立學堂入奏並臚陳辦法十五條首師範次小學次文普通中學次武普通中學次文高等次武高等次方言次農學次工學次勤成學堂次仕學院次經費次省外中小學次蒙學次設學務處以資董理籌辦要旨八條一以小學爲至要二日課專加讀經溫經時刻三教科書宜慎四學堂規制必宜合法五文武相資六教員不遷就七求實效八防流弊六月命充督辦商務大臣九月命

署兩江總督二十九年正月奏中學小學堂教員咸取材師範現於江南創建三
江師範學堂前三年教小學堂之師範生約分三級一年速成二年速成三年本
科以便陸續派赴各州縣承充學堂教員四年添置高等師範本科精研教育學
理以教中學堂之師範生備各屬中學教員之選並設兩江學務處以便督催興
辦四月入京陛見賜紫禁城西苑門內騎馬閏二月命充經濟特科閱卷大臣尋
經管理學務大臣榮慶張百熙奏請派之洞會同商辦京師大學堂事宜將一切
章程詳加釐定奉旨允准十一月會奏上所訂定章程略云臣之洞伏查上年大
學堂奏定章程宗旨辦法實已深得要領惟草創之際規程課目不得不稍從簡
略以徐待考求增補至各省初辦學堂管理學務既難得深通教育之法之人而
學生率皆取諸原業科舉之士未經小學陶鎔而來不自知學生本分故言論行
爲不免有軼於範圍之外者此次欽奉諭旨命臣等將一切章程會同釐定期於
推行無弊自應詳細推求倍加審慎數月以來臣等互相討論虛懷商榷並博考
外國各項學堂課程門目參酌變通擇其宜者用之不相宜者缺之科目名稱之
不可解者改之其有過涉繁重者減之每日講功課少或四五點鐘多亦不過六

點鐘所授之學排日輪講少或四五門多亦不過六門皆計日量時以定之絕不
苦人以所難中人之資但能循序以求斷無兼顧不及之慮至於立學宗旨無論
何等學堂均以忠孝爲本以中國經史之學爲基俾學生心術一歸於純正而後
以西學淪其智識練其藝能務期他日成材各適實用以仰副國家造就通材慎
防流弊之意計擬成初等小學堂高等小學堂中學堂暨高等學堂章程各一冊
大學堂章程附通儒院章程一冊原訂蒙學章程所列爲外國初等小學茲參酌
蒙養院之意增補其缺略訂爲蒙養院家庭教育法一冊辦學首重師範原訂章
程僅就京城試辦尙屬簡略茲另擬初級師範學堂優級師範學堂并任用教習
各章程此外如京師仕學館係暫設章程亦暫仍其舊譯學館前經奏明開辦茲
將章程課目一併擬呈進士館與仕學館意相近課程與各學堂不同茲亦酌定
章程課目別爲一冊國民生計莫要於農工商實業原章顧未之及茲另擬初等
農工商實業學堂章程附實業補習普通學堂及藝學堂各章程高等中等農工
商實業各學堂暨實業教員講習所章程實業學堂通則又以中國禮教政俗本
與各國不同而少年初學之士胸無定識龐雜浮囂在所不免此時學堂辦法規

範不容不肅稽查不容不嚴茲特訂立條規申明禁令編爲各學堂管理通則並將此時開辦各項學堂設教之宗旨立法之要義總括發明訂爲學務綱要至學生畢業考試陞級入學考試亦經詳定專章其獎勵錄用之法比照奏准鼓勵出洋游學生於獎給出身之外復請分別錄用章程亦經詳加斟酌擬有專章伏候聖明裁定將來應卽分別照章奏明辦理又奏科舉阻礙學堂擬請鄉會試每科遞減中額三分之一減盡停止歲科試請於鄉試兩科年限內分兩歲考兩科考四次分減每次減學額四分之一減盡停止三十年兼署湖北巡撫三十二年正月京察諭以謀慮精詳力任艱鉅交部議敘三十三年五月奉旨以湖廣總督協辦大學士六月補授大學士仍留總督任十六日充補體仁閣大學士七月授軍機大臣八月懿旨賞西苑門內乘坐二人肩輿旋命管理學部事務先是之洞任湖廣總督時以各學堂短衣皮鞮仿效西式奏請定湖北學堂冠服並請敕下軍機處學部將所擬冠服章程詳加核議至是奏請通行頒爲定制十一月懿旨賞穿帶膝貂褂十二月命充經筵講官三十四年江蘇巡撫陳啟泰奏粵漢鐵路宜定統一辦法請遴派廉明大臣督辦路務六月命兼充督辦粵漢鐵路大臣旋以

路事入奏奉諭粵漢鐵路重要特派張之洞爲督辦大臣近據奏稱該路事權紛歧議論淆雜諸多窒礙該路交通大有關係詎可長此延緩嗣後該路籌款用人興利除弊各事宜悉責成張之洞通籌全局任勞任怨嚴定期限各就三省情形分別妥訂章程因時制宜主持定斷郵傳部暨湖北湖南廣東各督撫均須實力協助不得掣肘所有各該省原派之總協理均聽節制在事官紳商董儻有營私舞弊煽惑把持以致妨害路政各情事卽著據實參辦尋命之洞兼充督辦鄂境川漢鐵路大臣十一月上御極禮成恭上皇太后徽號賞之洞太子太保銜紫韁宣統元年二月充實錄館總裁官命總司核定進呈講義閏二月舉行祭典諭以張之洞等同心襄贊共矢慎勤交部議敘四月奉旨免其帶領引見六月因病請假七月續請諭旨再賞假二十日安心調理八月以病勢日增奏請開去差缺奉諭再行賞假毋庸拘定日期並賞人蔭二兩毋庸開去差缺二十一日卒遺疏入諭曰大學士張之洞公忠體國廉正無私荷先朝特達之知由翰林洊陞內閣學士簡放山西巡撫總督兩廣湖廣權理兩江凡所設施皆提倡新政利國便民庚子之變顧全大局保障東南厥功甚偉旋以總督晉陟綸扉入參機要管理學部

事務宗旨純正懋著勤勞朕御極後深資倚畀晉太子太保服官四十餘年擘畫精詳時艱匡濟經猷之遠大久爲中外所共見近因患病屢經賞假調理並賞賜人護方冀克享遐齡長資輔弼茲聞溘逝軫惜殊深著賞給陀羅經被派郡王銜貝勒載濤帶領侍衛十員卽日前往奠醮并賜祭一壇加恩予謚文襄晉贈太保照大學士例賜卹入祀賢良祠賞銀三千兩治喪由廣儲司給發任內一切處分悉予開復應得卹典該衙門察例具奏靈柩回籍時沿途地方官妥爲照料伊子禮部郎中張權著以四品京堂候補郵傳部學習員外郎張仁侃著以郎中補用伊孫選拔生張厚璟著賞給主事分部補用用示篤念盡臣至意十一月四川總督趙爾巽據在籍紳士編修伍肇齡等呈請代奏請將之洞前在四川學政任內事蹟宣付國史館編入列傳詔允之

葛寶華

葛寶華浙江山陰人光緒九年進士同治六年先由監生報捐員外郎籤分戶部至是仍以原官卽用五月考取總理各國事務衙門章京十年補員外郎十六年補郎中十九年充坐糧廳監督二十年京察一等記名以道府用二十一年補授

內閣侍讀學士二十二年六月補太常寺少卿九月管理覺羅官學事務十月轉通政使二十三年充福建鄉試正考官二十四年補光祿寺卿旋補宗人府府丞十月署禮部左侍郎十一月補都察院左副都御史二十五年擢兵部左侍郎二十六年兩宮西幸隨扈至西安應詔陳言奏請變通科舉以求實學精練新軍以固國防責成州縣以弭教案特設專官以興實業皆次第施行二十七年鑾輿將返奉旨先行回京六月調戶部右侍郎十月陞補工部尙書管理溝渠河道事務十二月調補刑部尙書二十八年兼署工部尙書二十九年隨扈景皇帝謁西陵七月上以御史奏參提督蘇元春縱兵殃民缺額扣餉經岑春煊確查屬實革職交刑部治罪寶華奏遵旨定擬蘇元春應得罪名略云律載管軍官冒支軍糧入己若承委放支而冒支者以監守自盜論又例載監守盜倉庫錢糧入己一千兩以上者斬監候各等語此案已革提督蘇元春籌辦廣西邊務有年並不認真整頓軍務廢弛至於潰亂誠如聖諭實屬辜恩負國乃於平日兵勇擾害及伍籍缺額均諉之失察其漫無紀律咎已難辭復積欠扣存底餉至於十三萬兩之多情節尤重據供因公挪用有案據者僅五六萬兩其餘既無案據卽應科以侵吞入

已之罪按挪移庫銀二萬兩以上及監守自盜錢糧一千以上二罪均應斬監候應從一科斷查底餉扣存本營係屬官款該革員自用自銷應以取之於官論且係統兵官支欠軍餉較尋常承委冒支者尤難寬貸自應仍按監守自盜問擬已革提督蘇元春合依監守自盜錢糧入己一千兩以上者斬例擬斬監候係統兵大員仍恭候欽定至所欠餉銀例應勒限追完應請飭兩廣總督廣西巡撫按所供數目分別確查勒限追繳以昭核實而杜狡卸得旨蘇元春縱兵殃民所擬罪名尙屬輕縱著刑部再行按律定擬具奏寶華覆奏略謂臣部爲執法衙門不容畸輕畸重若律有明條向不得於律外加擬致失定律本意查縱軍擄掠律載軍人若於已附地而擄掠者不分首從皆斬監候本管官鈐束不嚴杖八十留任其將領知軍人於已附地面擄掠之情故縱者各與犯人同罪注云至死減一等各等論詳繹律義原謂已附地面皆屬吾民軍人敢有擄掠人口財物者卽屬殃民一律問擬斬候立法本極嚴厲軍人之罪旣重故本管官及將領之罪從輕其鈐束不嚴者罪止擬杖必知情故縱始與犯人同罪凡稱同罪者至死減一等此治罪之通例故律注有至死減一等之文也若監守自盜之例一千兩以上卽應問

擬斬候較將領之故縱軍人擄掠者罪名爲重又徧查律例惟提鎮於省城及駐
筭地方不行固守聞警先逃者例內有依律擬斬聲請處決之文其餘如貪取降
人財物殺傷其人以及失誤軍機失陷城寨各律其罪名亦皆至斬監候而止別
無加重治罪專條今蘇元春積欠餉項尙有應追之贓照監守自盜之例其本罪
應擬斬候卽科以縱軍擄掠之律從重不准減等而按律從一科斷亦罪止斬候
並無出入此次欽奉諭旨旣令按律定擬而參稽律例其罪無可復加自應仍按
本例科斷已革提督蘇元春合依律擬斬監候秋後處決仍照例勒限追贓卒依
議行是年充順天鄉試副考官寶華官刑部久其獄之最重大者如三十年審明
已革知縣王維勤仇殺一家九命分別首從定擬三十一年審明蒙古護衛幅株
哩妒姦謀殺家長按律定擬三十二年審明瑞洵等婪贓舞弊擬定罪名勒限追
贓皆根據律意胥得其平其兼署工部二年餘疏請給承修工程各員辦公經費
歸併陵寢歲修另案專案諸名目以杜浮估之積弊官刑部時嘗以會審失於覺
察罰俸一年以監犯越獄降一級留任以朝審失出降一級留任旋准抵銷或邀
寬免年六十蒙兩宮賜壽賞紫禁城騎馬三十二年七月朝廷預備立憲命充釐

定官制大臣與諸王大臣會議於朗潤園同編纂官制九月補授鑲紅旗蒙古都統三十四年署法部尙書宣統元年補授禮部尙書寶華歷充東陵西陵要差耕藉查齋讀卷閱卷磨勘驗放管宴復核朝審參與政務值年進內大臣二年二月卒遺疏入諭曰禮部尙書葛寶華廉明勤慎學問優長由部曹洊陟卿貳疊掌文衡擢授尙書宣力有年克稱厥職茲聞溘逝軫惜殊深加恩賞給陀羅經被派員勒毓朗帶領侍衛十員卽日前往奠醊照尙書例賜卹應得卹典該衙門查例具奏尋賜祭葬予諡勤恪子紹煒俟及歲以主事用

戴鴻慈

戴鴻慈廣東南海人光緒二年進士改庶吉士明年授編修五年督學山東尋丁父憂法越事起海疆戒嚴在籍倡辦團練十年冬起復十一年督學雲南十七年充雲南鄉試正考官十九年充順天鄉試同考官二十年大考一等擢庶子充日講起居注官方略成書特獎以應陞之缺開列在前并賞加四品銜時日韓啟釁平壤一役我軍受鉅創鴻慈奏言行軍之道以一專權濟餉運爲先平壤之挫僉謂事權不專餉運不繼所致北洋大臣李鴻章以直隸總督總統師干一切應敵

機宜是其專責應請敕李鴻章進紮山海關就近調度并調李秉衡幫辦直隸總督事宜刻日抽帶精勇數營馳赴天津駐紮辦理軍需一面催魏光燾迅速起程直抵奉天會同宋慶諸軍進剿如此則前敵後路均各得人庶能維大局而圖進取又奏此次援韓失利實由李鴻章調遣乖方遷延貽誤而不逞之徒各騰異議有謂朝鮮本中國贅疣不早棄之以貽此患者有謂日人本意欲與我共治朝鮮乃我先開兵端以致失和者有謂日人意僅圖韓可割鴨綠江爲界而卽無事者有謂傾中國之兵不能禦日不如忍辱求和徐圖後舉者種種妄言無非爲李鴻章解脫近乃聞有款議將成之說僉謂數大臣私謀密議爲隱忍偷安之策竊恐款議遽定則虧國體而重後患將來有噬臍莫及者請歷排前說披瀝陳之夫謂朝鮮爲中國贅疣者不知中國大勢者也朝鮮爲吉奉屏蔽吉奉爲京師根本苟一舉足全局動搖故我太宗文皇帝力征經營列聖相承胥廬怙冒以懷遠爲保邦之策慮至深也光緒初年朝鮮苦日逼甚矣朝廷命李鴻章以綏靖東藩李鴻章任用非人信一馬建忠而有十年十一年撤兵之事信一俄使韋亨而有本年五月遷延不救之事信一衛汝貴而有本年八月平壤不守之事一誤再誤以至

今日皆外視朝鮮之意有以啟之推原禍本爲贅疣之說者我祖宗神靈之所必
殛也至於兵釁之開日實背約仁川之戰我船渡送援軍未先犯日也而日乃擊
沈我高陞船矣牙山之戰我軍往平韓亂未先犯日也而日自漢城來蹙我矣大
東溝之戰我船渡送銘軍未先犯日也而日自仁川來乘我矣及平壤之戰我軍
先到月餘未敢越平壤一步因循畏蕙坐致圍攻乃議者猶歸咎於朝議主戰之
故夫所謂主戰者必其勢可以不戰而決意用兵然後謂之主戰若敵人節節見
逼迫我以不得不應何主戰之有必如議者之意必束手待斃而後爲不開兵端
乎則謂釁自我開者妄也我軍已退渡鴨綠江盡失奉天門戶九連城距朝鮮義
州纔數十里中間江面寬者纔三四里褰裳可渡且鴨綠江長亙千餘里一無險
要可守我如沿江設防雖五六萬衆不敷分布不惟無此兵力亦斷無此兵法今
日之勢平安爲奉天門戶咸鏡爲吉林門戶保奉天而防鴨綠如勿防也必以平
安爲障蔽而後鳳凰城可守保吉林而防圖們亦如勿防也必以咸鏡爲鎖鑰而
後寧古塔可安我皇上如勿棄吉奉兩省斷無不規復朝鮮之理規復朝鮮斷無
不剋日進兵渡江之理比聞葉志超電奏遵旨全軍內渡是因大軍新挫倉皇退

避既已大誤於前若不及時進占則敵人益得休息兵力全銳拒我日來日兵不動當必於平安咸鏡之地分據險要建築礮臺彼備一修則將來我軍進攻愈難得力刻下前敵諸軍兵力不爲單薄宜諭令及時進剿以赴戎機夫平壤之敗敗於衛汝貴之十六營望風先逃非以兵單致衄卽以爲將圖大舉稍待後援亦宜步步爲營爲得寸得尺之計如不督令進戰恐諸軍誤會日前退渡之諭旨謂已無意朝鮮將帥灰復讐之心士卒阻敢死之氣軍不欲戰敵起乘之禍敗尙忍言哉且三軍之戰勝在士氣士氣之鼓舞在上心法越之役我軍進攻得手遽因李鴻章之請速定和約將士聞之無不憤懣然猶以戰勝在後許和在先捷報未通以至於誤今若萬里徵兵不爲戰用則事機坐失更非昔比竊恐天下人心妄測上意從此無出力效死之將從此無欣然赴召之兵疆臣之心知朝廷之必不一戰也而備禦勿修眈視之邦知中國之必不一戰也而覬覦競起皇上獨不爲中國萬年計乎夫人心所繫宗社之安危視之是宜及今可用之鋒早定自強之計否則人心渙散後患方長敵啖日張我疆日蹙并目前所據有者而亦不可恃矣則謂畫江自守者妄也至於不戰遂和之害益覺不可勝言日人雄據全韓朝發

夕至得我兵費則益充其戰守之資散我師徒則益肆其進攻之計不多爲之備則遼瀋燕齊在在有可蹈之隙若概設重鎮則軍火糧餉駸駸有自敝之虞至於無端之迫脅非理之要求從之則其欲無厭不從則頓失前好此尤歷來議款之明鑒則謂忍辱求和者尤萬世之罪人天下臣民之公敵也若賠款之說尤屬勢所必爭卽以法越前事而論法之國勢數倍於日而越南一役不聞有兵費之說今且傾國帑借洋債以籌戰備矣而一切委置無用之處更籌鉅款以餉讐仇試問一款之後能保日十年不犯中國乎卽有他國居間而事後誰能相保天津專約甫七年耳及今而有兵取韓京之事夷情反覆已有明徵後之視今猶今視昔竭生民之膏血以求旦夕之安而安終不可恃旣和之後仍須辦防悉索旣空費從何出適足以示瑕而速寇耳且日人素稱狡詐設如彼一面進兵而姑言和以懈我軍心緩我守備豈不重爲所給以貽笑萬國此尤不可不長慮卻顧者也若夫籌戰機宜約有四端一曰作勇敢夫兵以氣勝坐而待敵鋒銳必銷故善守者或雕剿以懾敵心或分枝以牽敵勢平壤之敗我惟呆守彼則活攻步步進逼我軍幾無駐足之處一戰而潰職此之由近九連城駐守之軍不敢踰鴨綠江一步

偵候不遠哨探不行似此情形恐蹈平壤覆轍應請電飭諸軍相機度勢防剿兼施無得株守以致坐困一日籌進取東征之軍奉調而至者數且十萬有餘矣據此一隅雖多奚益宜分作數枝責奉吉諸軍以規咸鏡責淮豫諸軍以復平安責海軍以略仁川責南洋出兵艦以襲釜山水陸並進此正化呆兵爲活兵之法且日人專尙虛聲我卽乘其虛而搗之亦足以牽掣敵兵張我形勢也一日偵洋情竊觀法越前事軍情利弊不獨在廷建議外而封疆守吏出洋公使以至微員末秩莫不各效見聞集益旣多運籌自易唯急於議和一節徇李鴻章之意貽譏萬國爲大失著而事前則軍火有資事後則兵費罷議未嘗不資羣策之功今之敵情軍勢惟北洋一人之口是憑惟津海關道數行之報是據模糊脫略考辨無從而疆臣軺使箝口結舌無敢出一語以仰贊廟謨者以此籌戰戰固不能以此籌和亦斷斷知其和之無策是宜嚴敕樞譯諸臣於洋務軍情用心考求無膠成見一面電諭各省督撫出使大臣等隨時探訪各效忠謀羣策並進庶以絕壅閉而資贊助一日嚴督責債軍之葉志超奉旨查辦矣而外間覆奏尙在遷延督運之周馥奉旨東行矣而後路程臺未聞奏設以及諭查軍火則核實無期命購船礮

則垂成輒變似此心存玩忽軍務安有轉機應請諭戒內外大臣一切特旨指揮務須實力奉行如有稽遲卽加譴責至於荼毒韓民首先潰退之衛汝貴應請再申嚴諭立正典刑以慰韓人之心而作三軍之氣不報尋以東事日亟金州鳳凰城大連灣岫巖州復州等處相繼淪陷有旨命戶部左侍郎張蔭桓湖南巡撫邵友濂使日本議和鴻慈奏言能戰然後能和爲古今之篤論現在日燄方張要求狂悖其陰懷叵測者在擁挾朝鮮獨立其顯肆逼索者則在割地賠款兩端以土地言之微特奉天根本重地在所必爭卽沿海各省要區皆我列祖積功累勞艱難勘定百姓食毛踐土久隸版圖豈有一旦予人之理此宜拒絕者也至兵費一說雖外人所經見然庚申之役烽燧內侵補還烟費多不過八百萬兩若過索鉅款帑藏之歲入幾何以有限之金錢填無窮之谿壑質地質關諸約由此而興日後練兵置械之資更將安出此宜詳審者也若夫多方之要脅無理之誅求狼子野心非能逆料倘使臣識力不定墮彼術中從之則貽害安窮不從則轉圜乏術凡此皆未和之先所宜長慮卻顧者也定約之後例須息兵而日性狡詐或脅我以撤防先退而反覆靡常或藉口於償款未完而釁端又起況未經懲創本有輕

我之心遂其誅求益逞無厭之欲且法則覬覦開化矣英則窺伺騰越矣俄則蠢動環春矣以日蕞爾小邦尙不敢校將援利益均霑之例羣起爲難試問主和諸臣果何以善其後乎萬里徵兵不爲一戰遣散之卒卽爲伏戎內外交訌曠臍何及此旣和之後所宜長慮卻顧者也又奏兵事以一將權爲先將權以兼地方爲要劉坤一旣特簡爲欽差大臣節制關內外各軍自當彈竭血誠力肩艱鉅但思內則督辦軍務大臣外則北洋大臣皆有節制全軍之權直隸總督奉天將軍亦均節制一路劉坤一參伍其間無地方糧餉之權兵事雖有節制之名而疆吏未易和衷客軍多非素習仰承俯注左紉右支賢者無以盡其才不賢藉以卸其責守外者以統帥有人相諉主兵者以疆臣掣肘爲虞前劉坤一奏懇收回成命蓋亦知此中難處未敢輕言節制也朝廷旣倚劉坤一辦事卽爲全局利害所關似當深察事宜善爲措置俾得盡其籌策而責其成功擬請飭令李鴻章專管直隸總督以劉坤一兼署北洋大臣或令裕祿專管盛京將軍以劉坤一兼署奉天總督如此兼有地方之責一切調兵轉餉尤易指揮再湖北巡撫吳大澂現統營數過多該撫臣未歷戎行才望較淺若撥歸劉坤一統帶以吳大澂爲參贊應更得

力否則就中先撥湘軍三十營卽爲欽差大臣專管轄之兵便可及時布置大抵今日用兵之要必使奉直兩省兵事餉事流通一氣又復節制分明覈功罪爲進退察事勢爲變通審形勝爲控扼勿以款議瞻顧弛戰備而誤戎機目前爲禦日之謀卽異日爲保疆之策疏入奉旨留覽是年十二月日兵竄擾山東陷榮城縣明年正月連陷威海衛據劉公島覆我北洋海軍京畿震動鴻慈奏言日人蓄志凶狡其奉省山東等處當是牽掣之師而攻臺擾南亦祇恫喝之計必將專注直境乘虛而入查直隸沿海兵力本非甚厚北塘至樂亭數百里皆關緊要現調回聶軍協防加以游擊之師尙覺有備無患惟滄州岐口一路僅有梅東益馬步三營未免太單曾聞日人在此量水其擇瑕而蹈實在意中設由此登岸繞而北趨津通諸軍隔絕而不能救不過五日可抵京師專恃南苑一軍當其前敵滄州離海百二十里控運河水陸之衝一爲敵侵運道梗塞關係甚重自滄而進則固安當其隘畿南屏蔽惟恃固安應請敕下督辦軍務王大臣酌量緩急遠近於關外魏光燾吳鳳柱徐邦道各營中速調回兩軍分駐滄固或於關內先行抽調一軍駐紮岐口卽以南苑一軍移防固安與駐守武清之軍相爲掎角聞警策應俟關

外各營趕到再行勻撥仍催調南省得力勇營兼程北上以爲後勁庶布置稍密不至爲敵所乘又奏自威海旣失津沽之屏蔽盡撤李鴻章節節債事以奉旨拏問敗壞海軍之丁汝昌始終袒護稱其得力又謂作霧洋人非丁汝昌不能駕馭現聞日陷威海丁汝昌不發一礮所謂得力者在丁汝昌駕定遠戰艦潛逃作霧之法並未施演所稱駕馭洋人者又何在李鴻章極力爲丁汝昌迴護不恤抗違詔旨以遂其私而丁汝昌全置李鴻章於不顧李鴻章尙有何說以自解乎竊惟李鴻章貽誤大局之罪已貸無可貸朝廷曲全李鴻章之意亦加無可加倘復任其玩兵養寇坐誤軍機李鴻章一人不足惜如畿疆何如天下何伏願明發諭旨特予嚴懲並責成將丁汝昌速行拏解以肅軍令而儆效尤若國家追念前勞猶欲保全終始亦應早解事權俾接替得人危局尙可補救不報尋有旨命李鴻章赴日本議和以王文韶爲北洋大臣直隸總督是年四月和議成鴻慈條奏善後十二策一審敵情以固邦交二增陪都以資拱衛三設軍屯以實邊儲四築鐵路以省漕運五開煤鐵以收利權六稅菸酒以佐度支七行抽練以簡軍實八廣鑄造以精器械九簡使材以備折衝十重牧令以資治理十一召對羣僚以勵交

修十二變通考試以求實用七月遷侍講學士先是廣東巡撫馬丕瑤銳意禁賭並查辦豪紳控案甚厲奸人銜之謀去馬丕瑤鴻慈奏言廣東大吏禁賭認真致滋羣謗浮言搖惑恐爲所撓請飭疆臣堅持定見以清治源而收成效又以革黨潛謀起事香港保安輪船截獲軍械一案事變已形因奏請飭疆臣嚴緝首領以弭亂萌並移會水師提臣鄭紹忠於省城外添紮安勇附近各鄉佛山等處一律舉辦團練以資鎮壓又奏近聞革黨暗運軍火欲由澳門徑襲粵垣現粵省裁撤安勇多招楚軍聞楚軍人地生疏緝捕本難得力且兵無紀律民有怨言又與土勇積不相能一有緩急恐不可恃請飭疆臣勿存成見先事預防均有旨下廣東督撫臣妥慎籌辦十月充咸安宮總裁二十三年督學福建二十四年轉侍讀學士二十五年遷少詹事以報效昭信股票賞戴花翎二十六年遷內閣學士兼禮部侍郎銜是年冬學政報滿乞假回籍修墓尋擢刑部左侍郎明年假滿赴西安行在上敬陳治本疏條舉八事一矢憂危以習儉勤二審號令以維國柄三容直言以伸士氣四節財用以恤民窮五改捐例以清治道六設考課以育人材七存科目以繫士心八平民教以弭禍患又奏請建兩都分六鎮謂宜建西京於長安

建南京於江陵擇近支親賢分駐其地裁西安荊州兩將軍卽建邸於軍署無事則輯人民完城郭以固屏藩有事則扼險要備巡幸以資緩急俟蘆漢鐵路告成分一支由河南入陝西一支由武昌達江陵而居中控馭之處則以襄陽爲重應改現時提督行臺爲湖廣總督移駐之所提督還駐穀城使上通關隴下接湖湘藉壯聲援互爲掎角無封建之名而隱收其利則邦本可安矣夫唐因藩鎮而亂終以賴藩鎮而存宋撤藩鎮而安究以廢藩鎮而弱今我國家固重任疆臣矣然救時之策似宜稍爲變更擬請畫盛京吉林黑龍江爲一鎮改盛京將軍爲三省總督經略大臣仍駐奉天直隸山東山西河南爲一鎮改直隸總督爲四省總督北洋經略大臣駐紮天津藩司兼護巡撫仍駐保定江蘇安徽江西浙江福建爲一鎮改兩江總督爲五省總督南洋經略大臣仍駐江寧閩浙總督改爲福建巡撫駐福州廣東廣西雲南貴州爲一鎮裁雲貴總督改兩廣總督爲四省總督經略大臣仍駐廣州湖南湖北四川爲一鎮改湖廣總督爲三省總督經略大臣移駐襄陽四川總督改爲四川巡撫甘肅陝西新疆爲一鎮改陝甘總督爲三省總督仍駐蘭州甘肅藩司兼護巡撫以上六鎮簡忠實勤幹知兵大臣任之專責以

治兵不紛以吏事務令久於其任畀以重權巡撫以下均歸節制並許辟置幕僚其沿海之榆關登州崇明定海澎湖廈門南澳虎門瓊州等處地方提鎮聽該大臣自擇才能奏請委任以爲之輔既無督撫同城阻撓推諉之慮又無統兵客將孤懸零寄之嫌綏靖軍民繕完守備每省練兵二萬一鎮卽有數萬精兵聲氣聯絡首尾照應得藩鎮之意而無其害則邦基可固矣疏入奉旨留覽是年冬隨扈還京二十八年轉戶部右侍郎兼管錢法堂事務充考試試差閱卷大臣考試漢御史閱卷大臣江南鄉試正考官先是庚子之役與各國議和賠款至四百五十兆並以保護傳教載入條約至是各省教案益劇鴻慈奏言國家懲毖後患無非欲民教相安而教案之考成旣嚴教民之氣燄愈盛去冬以來鬧教之案層見迭出懲辦愈厲怨毒愈深民智未開往往有鋌而走險之事應請援乾隆八年成案復設宣諭化導使卽以各省學政兼充道府以下凡有關於宣諭化導者聽其節制並請敕下外務部將外國來華傳教原始通商以來所辦教案及此次議和保教賠款條約皇上諭旨臣下奏章外國照會勒爲一書頒發各省刊布使臣按臨所至試事旣畢傳集紳士商民反覆開導務使窮鄉僻壤戴髮含齒之倫憬然領

悟而朝廷憂勤惕厲萬不得已之苦衷亦可昭然若揭於天下又開民智者莫切於報紙近年我國報館之設所在多有然海隅租界放言高論往往鼓吹邪說淆亂人心欲遏亂萌非朝廷自設報務不可擬請在翰林院創立報局擇編檢中學術純正議論暢達通知時事者爲主筆選輯各報芟其煩雜新法美政有必錄盜賊水旱有必書並各抒所見著爲論說一以宣上德抒下情爲宗旨應請飭下政務處會同翰林院安定章程以立中國報律之準各省官報亦應遵章踵設庶言論有所範圍觀聽無虞淆亂疏入格部議不行二十九年充考試庶吉士散館閱卷大臣考試試差閱卷大臣殿試讀卷大臣朝考閱卷大臣考試經濟特科閱卷大臣覆核朝審大臣三十年充會試副考官覆核朝審大臣時朝廷銳意求治設會議政務處遇有奉旨交議事件令三品京堂以上與議鴻慈奏言方今事機孔亟百端待理非集思廣益無以宏濟艱難惟是候促則事不達謀寡則慮不周莫若因會議之制變通而推廣之擬請自後內政外交凡有建革之大疑難之端由政務處摘錄事由標明要領片行閣部九卿翰林科道定期會議速者三日五日遲者十日尤繁重者十五日各抒所見別紙錄陳並令傳知屬官咸得論列呈堂

代遞屆期由政務處大臣開誠布公周咨前席務使詞無不盡理得所安然後舍短從長詳實覆奏循是行之有四利焉一日收羣策謀於猝不若謀於豫詢於獨不若詢於同惟寬予以時日之期隱予以講求之助則有智而遲者以潛研而自出謀野則獲者經採納而愈宏利一也一日勵人才習於冗散休戚若不相關引與參謀智能皆思自效人人有欲據之建白卽人人有勇赴之事功是於詢考之中默寓激揚之用利二也一日折敵謀東西各國首重民情百官者國民之標準也師其合羣之意以爲抵制之方彼非理之侵旣可挾衆志以抗拒不情之請亦可援公論以磋商利三也一日息羣謗自來局外之身恆不諒局中之苦捕風捉影謠譏繁興皆緣本末未明傳聞多誤以故游談成於市虎積忌甚於杯弓譎言莫懲豈國之福勢難禁止利在疏通門戶洞開翕訛自息斯操觚者無所施其橫議秉鈞者不至敗於流言利四也疏入下政務處採擇施行三十一年有旨命五大臣分赴東西洋各國考求政治鴻慈與焉將發有奸人懷炸藥登車狙擊同行被創衆懼鴻慈從容詣宮門取進止兩宮慰諭至泣下時謠言蠱起聞者危之鴻慈謂人臣以身許國義無反顧卒行凡八閱月歷十五邦以明年六月歸國哀

其所得成列國政要百三十三卷另纂錄歐美政治要義十八章進呈因奏言各國大勢情形雖間有不同而治理則大略相類觀其政體美爲合衆而專重民權德本聯邦而實爲君主與匈同盟仍各用其制度法義同族不免偏於集權惟英人循秩序而不好激進故其憲法出於自然之發達行之百年而無弊反乎此者有憲法不連合之國如瑞典挪威則分離矣有憲法不完全之國如土耳其埃及則衰弱矣有憲法不平允之國如俄羅斯則擾亂無已時矣種因既殊結果亦異故有雖改革而適以召亂者此政體之不同也覘其國力陸軍之強莫如德海軍之強莫如英國民之富莫如美此國力之不同也窺其政略則俄法同盟英日同盟德奧義同盟既互相倚助以求國勢之穩固德法摩洛哥之會議英俄東亞之協商其對於中國者德美海軍之擴張美法屯軍之增額又各審利害以爲商業之競爭蓋列強對峙之中無有一國孤立可以圖存者勢使然也況人民生殖日繁知識日開內力亦愈以澎漲故各國政策或因殖民而造西伯利亞之鐵路或因商務而開巴拿馬之運河或因富國而投資本於世界均有深意存焉此政略之不同也驗其民氣俄民志偉大而少秩序其國失之無教法民好美術而流晏

逸其國失之過奢德民性倔强而尙勇武其國失之太驕美民喜自由而多放任其國失之複雜義民尙功利而近貪詐其國失之困貧惟英人富於自治自營之精神有獨立不羈之氣象人格之高風俗之厚爲各國所不及此民氣之不同也臣等觀於各國之大勢既如此又參綜比較窮其得失之源實不外君臣一心上下相維然後可收舉國一致之益否則名實相懸有可以斷其無效者約有三端一曰無開誠之心者國必危西班牙苛待殖民致有斐律賓古巴之敗英鑒於美民反抗而於澳洲坎拿大兩域予人民以自治之權致有今日之強盛開誠故也俄滅波蘭而用嚴法以禁其語言今揭竿而起要求權利者卽波蘭人也又於興學練兵皆以專制爲目的今滿洲之役不戰先潰莫斯科聖彼得堡之暴動卽出於軍人與學生也防之愈密而禍卽伏於所防之中患更發於所防之外不開誠故也二曰無慮遠之識者國必弱俄以交通之不便而用中央集權故其地方之自治日以不整美以疆域之大而用地方分權故其中央與地方之機關同時進步治大國與治小國固不侔也德以日耳曼法系趨於地方分權雖爲君主之國而人民有參與政治之資格法以羅馬法系趨於中央集權雖爲民主之國而政

務操之官吏之手人民反無自治之能力兩相比較法弱於德有由來矣三曰無同化之力者國必擾美以共和政體重視人民權利雖人種繁雜而同化力甚強故能上下相安於無事土耳其一國之中分十數種族語言宗教各不相同又無統一之機關致有今日之衰弱俄則種族尤雜不下百數語言亦分四十餘種其政府又多歧視之意見致有今日之紛亂奧匈兩國雖同戴一君主而兩族之容貌俗尚語言情性迥殊故時起事端將來恐不免分離之患蓋法制不一畛域不化顯然標其名爲兩種族之國未有能享平和臻富強者矣此考察各國所得之實在情形也竊維學問以相摩而益善國勢以相競而益強中國地處亞東又爲數千年文化之古國不免挾尊己卑人之見未嘗取世界列國之變遷而比較之甲午以前南北洋海陸各軍製造各廠同時而興聲勢一振例之各省差占優勝矣然未嘗取列國之情狀而比較之也故比較對於內則滿盈自阻之心日長比較對於外則爭存進取之志益堅然則謀國者亦善用其比較而已又奏臣等曠觀世界大勢深察中國近情非定國是無以安大計國是之要約有六事一曰舉國臣民立於同等法制之下以破除一切畛域二曰國事採決於公論三曰集中

外之所長以謀國家與人民之安全發達四曰明宮府之體制五曰定中央與地方之權限六曰公布國用及諸政務以上六事擬請明降諭旨宣示天下以定國是約於十五年或二十年頒布憲法召集國會實行一切立憲制度又奏實行立憲既請明定期限則此十數年間苟不先籌預備轉瞬屆期必至茫無所措今欲廓清積弊明定責成必先從官制入手擬請參酌中外統籌大局改定全國官制爲立憲之預備均奉俞旨採納至是立憲政體乃確定而不疑而憲政之措施亦始有條理之可循而無冥行擿埴之患矣先是鴻慈奉使在途已擢禮部尙書使還充釐訂官制大臣玉牒館副總裁轉法部尙書充參預政務大臣賞紫禁城內騎馬充經筵講官時法部初改併寓創於因端緒紛曠又與大理院權限轉轄往復論辨苦難明晰鴻慈悉心規畫首以申明權責爲入手辦法凡司法官吏之進退刑罰判決之執行廳局轄地之區分司法警察之調度悉隸法部其直省刑事稿件由各省分達部院經大理院覆判後咨部核定若有情罪未符仍咨回大理院自行駁正蓋以法部專任司法大理院專掌審判各有主持而事權乃不至淆亂其次釐訂職掌刑部向設十七司至是改併八司曰審錄曰制勘曰編置曰宥

恤曰舉敍曰典獄曰都事曰會計八司之上設承政參議兩廳廳設參事各二員以資襄理京外各級審判廳次第舉辦又採英美改良監獄之制於京師籌辦模範監獄先後奏奉俞旨允行三十三年充舉貢考職閱卷大臣明年四月疾作賞假調理逾月未瘳乞解職溫旨慰留十月兩宮升遐力疾銷假視事宣統元年四月賞一等第三寶星充報聘俄國專使大臣禮成返國奏言此次奉使道經東三省地方日擊日俄二國之經營拓地殖民實有狡焉思啟之慮非急籌抵制無以固邊圉非振興實業無以圖富強東省財力竭蹶工商稀少惟因其已然之迹而擴其自然之利切要之圖厥有二端一曰墾植查三省墾務業已次第開闢由各屬官荒推及蒙旗均經先後開放顧墾務至今迄無起色者則以放荒者祇計荒價之多寡而不問墾植之興衰攬荒者祇知壟斷以居奇而不恤領戶之艱窘墾務墮壞職此之由欲圖整理宜取泰西小農地大農地之法變通而並行之曷言小農地就本地蒙民編列戶籍計口授地貸其籽種給其資糧寬其賦稅免其徭役無追呼之擾而有耕墾之安變榛莽之區而爲沃饒之壤數年之間成效可觀此變小農地之說也曷言大農地直省大資本家鳩集股本組織移民開墾公司

劃給大段生荒徙民往墾官任保護明示十年之後始議升科其運載移民之輪船火車特別免價或酌給半價有能糾集大公司辦有成效者破格奏獎如是則移民日衆墾地日多較之曩時巨戶攬荒祇圖轉售牟利轉售無人終成蕪曠其利害得失相去懸絕此變通大農地之說也由前之說足以裕蒙由後之說足以實邊地多一人之移殖卽多一人之捍禦將來墾務旣盛可仿古屯田之法寓兵於農移民卽以集兵力田卽以供餉是又可操其券也一日森林山虞林衡載在周禮林麓之政古昔所重近日東西各國林業皆設專官誠以材木之用利至溥也臣此次赴俄自入西伯利亞始綫以後森林綿亙數千里彌望無際其中以樺木松柏爲多俄車伐薪以代煤軌道兩旁積薪如壙備沿路接濟之用此外若墊路若造車及一切停車之驛場僑民之廬舍皆就地取材用之不竭而我滿洲里以內之境林木頓疏以原隰之廣幅幘之長而令濯濯童山繁植無望凡有製造轉資洋木利源外溢所失尤多誠宜及時振興林業設森林局遴選賢員認真督理其入手辦法應先周歷履勘察其地利辨其土宜其不宜於穀麥者卽劃爲籌辦森林區域並繪圖貼說咨會各直省督撫明定獎格勸諭紳商興辦林業公司

凡一切保護之責經營之方皆嚴立規則以資遵守循此辦理可爲邊境闢一大利源十年以後材木不可勝用矣凡此兩端若果辦理得人實事求是立疆圉富強之本卽以杜鄰邦窺伺之謀國計邊防所關非細將來財力稍裕興學以迪蒙智開礦以闢利源廣鐵路以利交通籌兵屯以資捍衛又當權其緩急後先之序以爲措施次第之準耳得旨下東三省督撫農工商部郵傳部籌議施行是年八月以尙書在軍機大臣上行走十一月擢協辦大學士賞穿帶素貂褂二年正月卒諭曰協辦大學士尙書戴鴻慈忠清亮達學識閎通由翰林迭掌文衡洊陟清要擢任正卿均能恪盡厥職考察政治尤能抉擇精微有裨憲政朕御極後優加倚畀俾參機務晉協綸扉夙夜靖共深資擘畫前因偶患微疴賞假調理方冀醫治就痊長承恩眷遽聞溘逝軫惜殊深著賞給陀羅經被派貝子溥倫帶領侍衛十員卽日前往奠醑加恩賞加太子少保銜照大學士例賜卹入祀賢良祠賞銀二千兩治喪由廣儲司給發任內一切處分悉予開復應得卹典該衙門查例具奏靈柩回籍時沿途地方官妥爲照料伊子一品廕生戴曾諤著以郎中補用用示篤念蓋臣至意尋賜祭葬諡文誠

陸元鼎

陸元鼎浙江仁和縣人同治十三年進士以知縣即用籤分山西因親老告近改江蘇光緒元年恩科二年正科迭充江南鄉試內簾襄校官尋署山陽縣知縣縣多拐販婦女案城外水關一帶夜間往往聞哭聲有因而致斃者道路或漬血痕居民患苦又有巨匪二黨羽密布句蠹役通消息官莫能捕元鼎密訪窩所既確一日託言謁漕運總督選壯役自從天未明破扉入匪宅匪驚起抽刀拒捕左右叱奪之遂就獲搜出婦女十數口審實置法嚴捕餘黨匪患頓息俗好訟革文士之業刀筆者創捐設射陽書院以誘進之亟修倉廠儲穀備荒庶政以次畢舉民利賴之六年補江寧縣知縣丁父憂八年以河運出力彙保服滿以知縣仍留江蘇補用十年服闋仍補江寧縣缺時南門外有敕建古剎西人指索爲教堂洋務局員遽許之士民大譁元鼎執條約力爭得不釀禍卒以前諾易城西隙地予之案始定尋調署上海縣事上海通商要區交涉尤劇適有法蘭西商人斃華民沈姓一案驗係內傷領事官堅謂無傷痕不承元鼎謂洋製時辰表墜地鋼條斷玻璃面未損此何以異領事官理屈惟請緩期會讞遷延至易任而後結時江南北

焚燬教堂之案十數所差員四出無一議結者元鼎被檄至如皋查知焚燬者二處教士詭稱本國已專使來華兵輪亦旋至元鼎多方辨詰以銀四千兩議結自是各州縣援照辦理教案以息又署泰州知州城河久淤墊半成平陸稍旱輒苦無水不戒於火取水北門三里外遠不濟急捐廉議開濬有市屋占礙故道者拔之雖巨室不稍贍顧下河斜豐港隄綿亙六十里廳久不修西來之水不可禦坐是屢無豐年因就舊址加增高廣各一丈基倍之全隄歲事按察使方規畫水利請檄東臺縣接修范公隄而止泰州仍協助十有一里從此水患絕田穀常倍收尋復署上元縣事回任江寧縣百姓歡呼倍相愛慕元鼎實心任事不務赫赫之名所在民悅去皆爲生祠以祀累舉卓異兩江總督劉坤一以元鼎學識淵深操持堅定歷任煩劇所至有聲足膺方面之任疏薦於朝先是辦理蘇皖賑捐出力以直隸州知州在任候補嗣捐陞道員二十年奉旨以道員發往江蘇補用二十一年補廣東惠潮嘉道隨調補江蘇蘇松糧儲道二十四年擢江蘇按察使入覲奏對稱旨語及甲午之戰我槍口與子彈多不合兩宮命軍機飭各省留意改造並謂不必說由陸元鼎陳奏致與督撫有意見二十五年四月受任正江陰縣美

國教堂被燬縣令訪爲首者訊實擬絞罪解省美領事官突自滬至蘇稱冤云已由駐京使臣商允前來會審元鼎告以關道有會審章程臬司無此例乃云不會審可觀審元鼎答以既不會審卽不便觀審又云總署電來將若何答以慎守國家刑章官可辭法不可枉獄遂定尋署布政使十一月有旨暫行護理江蘇巡撫二十六年補授江蘇布政使二十七年巡撫蒞緝槩奏稱上年辦防之際籌捐殊難措手幸賴蘇州藩司陸元鼎督率府縣剴切勸導集款至五十餘萬毫無苛派勒捐非陸元鼎勤政愛民輿情悅服曷克至此奉旨賞給頭品頂戴二十九年擢漕運總督先是元鼎爲山陽縣知縣政聲達鄰邑至是淮海居民咸欣喜色相告是歲夏秋水盛平隄親行周勘分道搶護堅守各壩險而復夷又以清淮一帶制錢缺乏公私交困疏請試鑄銅圓三十年四月調署湖南巡撫時元鼎方病假以廣西匪勢正熾電傳諭旨令迅速赴任力疾起程受事奏定以防爲防不如以助剿爲防之策增募營勇改留提督劉光才防守扼西路之要貴州永從縣大年河匪蹤已逼清州飭道員黃忠浩與衡永郴道莊賡良疾馳赴黔邊協禦賡良旣攻取龍貫峒忠浩先擊敗同樂悍股提督張慶雲分兵相繼出境剿賊餉械悉由

湘運赴廣西四十八峒匪勢張甚得湘軍之助旋以救平兩廣總督岑春煊廣西巡撫李經羲均稱其不分畛域有胡林翼駱秉章之風最後雲南布政使劉春霖調補湖南布政使所帶滇軍有旨分留湘省元鼎知不可恃電請收回成命而劉軍達字後營果叛於黔境若非先時奏止則受禍益烈醴陵縣密拏會匪起有偽印刀旗票布供稱革命不諱連及東洋留學生九月起事等語元鼎立誅首犯二名留一名備質他無株連人心大定裁汰冗官之旨下以湘省漕經改折各衛所屯墾復由縣經徵糧儲道缺事既簡奏請裁撤教職佐貳宣講分防均有職守俸廉既微可仍其舊均從之十一月調署江蘇巡撫旋卽補授蘇省患鹽梟太湖港汶紛歧與浙錯壤尤爲逋逃淵藪元鼎宦蘇久諳熟情事至卽增造師船與浙撫會商剿辦擒斬首要復嚴賭禁以清其源匪風自此漸戢徵兵議起以吳地風氣柔脆應徵者多不安分之人惟淮徐之民較可精選不應畫分區域力爲陳奏格於部議後此逃亡相繼事端滋多蘇省前鑄當五錢公私攙雜民以爲苦飭廣設局所一併收回毋別私鑄市肆稱便官民所立學堂大小八百餘所調查規畫就近親詣考校並援撫湘時奏設出洋遊學預備科之例於蘇省開游學預備科至

察核吏事振卹災黎修治塘圩諸大端凡關民瘼勤求之心無敢或懈三十二年京察開缺另候簡用三十三年特召來京適滬杭甬鐵路蘇浙人不認借用外債之約召見首問及此奏稱民情忠愛上保主權並無煽惑臣不敢稍有欺飾反覆陳對至移晷刻兩宮動容諭以卽飭外部與英人磋商於是部借部還之改議諭令協理開辦資政院事務以三品京堂候補三十四年因病奏請開去差使再請始允回籍宣統元年學部奏充浙江學務公所議長二年病卒於家事聞賜卹如例子景賢議敘同知直隸州早卒孫紹宗分省知縣紹言分部主事紹宣正二品廕生

陳璋

陳璋湖北應城人光緒間由同文館肄業生考入北洋武備學堂直隸總督李鴻章檄充永定河工委員迭獎府經歷以知縣補用歷任奉天通化鐵嶺等縣知縣由遼陽知縣陞興京府知府二十年秋日本以朝鮮故與我構釁八月幫辦北洋軍務大臣宋慶委充毅軍營務處兼中軍幫統十二月欽差大臣節制關內外防剿各軍劉坤一委充湘軍營務處兼署奉天錦州府知府二十六年夏義和團事

起璋聞有設壇授術者立捕置於獄通電鄰省力陳奸民假左道惑衆狀請嚴禁又親歷各縣鄉村考察人民良莠暨教民被害情狀捕誅素行不法者若干人諭良民量力出資修葺教堂撫卹教民後教士至無可爭執遂以無事其受知朝廷自此始二十七年命興京永陵守護大臣兼陵河兩工督辦大臣靈熙赴吉林查謁龍岡調璋回興京府任護理永陵守護大臣兼護陵河兩工大臣及興京都統興字馬步全軍軍統二十八年陞任直隸通永道署通永鎮總兵兼護直隸提督二十九年充駐比國頭等參贊旋陞署駐比出使大臣三十年黑龍江將軍程德全奏調赴黑龍江任全省營務處督辦兼商埠總局清鄉局督辦三十三年新疆巡撫聯魁甘肅總督升允奏調奉旨發往任改編甘新陸軍督練處督辦兼陸軍三十五協協統三十四年先後經郵傳部尙書盛宣懷外務部尙書那桐奏充中俄勘界督辦兼甘新郵電督辦嗣升允聯魁會奏陳璋與俄使勘界交涉數月爭回邊地功在國家請旨嘉獎允之復奉旨迭署塔爾巴哈臺參贊大臣伊犁將軍嗣命爲甘新宣撫大臣就近宣慰內外蒙古各旗事宜回京後補授正紅旗滿洲都統以病陳請開缺回籍上如所請旋卒遺疏入諭曰正紅旗滿洲都統陳璋老

成碩望兼資文武出綰疆符入襄樞政中外敷歷懋著勳勤比年養疴退隱會觀
時艱方冀年享期頤長承恩賚遺章遽告悼惜殊深生平事蹟宣付國史館列傳
並著按照都統例從優議卹該衙門查例具奏以示篤念舊臣之至意尋賜祭葬
如例

K820.49

2

2573258

文科教學研究會圖書館

清史列傳

清史列傳卷六十四終

二



103-924

21101000158080